

國學基
本叢書
明

書

九

舊

國學基本叢書

明書

(九)

傅維鱗纂



商務印書館發行

國家圖書館典藏

由國家圖書館數位化



62610
7567
V. 9
明書卷一百十二

列傳三

儒林傳二

陳獻章傳

陳獻章字公甫。廣東新會人。母林氏。既孕將寢。父先一月卒。始生獻章。有穎質。目光如星。臉具七星如北斗狀。身長八尺。音吐清圓。喜讀書。一夕夢拊石琴。其音泠泠然。見一偉人笑謂曰。八音中惟石音爲難。今諸若是。子異日得道乎。因號石齋云。年二十。舉正統丁卯廣東鄉試。明年戊辰。及辛未。赴試禮部。皆不第。一日讀孟子至天民者達。可行於天下。而後行之。歎曰。大丈夫行當如是。時聞江西吳與弼。遂往學焉。事母林氏甚謹。嘗在外。母有念。輒心動。亟歸。果然。母頗信浮屠。及病。以佛事禱。獻章聽之。始從與弼。以伊洛成語及經史百子爲教。獻章服其說而未悟。居半載。以母告歸。乃絕意舉子業。足跡不履城市。閉門讀書。徹夜不寢。小困則以水沃其足。如是者累年而未得。乃歎曰。學貴乎自得也。自得之。然後博之以典籍。則典籍之言。我之言也。否則典籍自典籍。而我自我也。遂築臺名春陽。日靜坐其中。又數年。久之。覺有所悟。然後見吾心常若有物。日用間種種應酬。隨吾所欲。如馬之御銜勒也。體認物理。稽諸聖訓。各有頭緒來。

歷如水木之有源委也。因答趙提學書云。吾始從吳聘君學。其於古聖賢之書。蓋無所不講。然未知入處。比歸白沙。杜門不出。日靠書冊尋之。忘寢忘食。如是者亦累年。而卒未有得焉。於是舍彼之繁。求吾之約。惟其靜坐久之。然後見吾此心之體。常若有物。於是渙然自信。曰。作聖之功。其在茲乎。又致書賀給事中。言爲學須從靜坐。養出箇端倪。方有商量處。未可便靠書冊也。南昌張元禎聞其學。遣書問之。答以詩云。古人乘糟粕。糠粕非真傳。渺哉一勺水。積累成大川。亦有非積累。源泉自涓涓。至無有至動。至近至神焉。發用茲不窮。緘藏及源泉。吾能握其機。何必窺成編。學患不用心。用心滋牽纏。本虛形乃實。立本貴自然。戒慎與恐懼。斯言未云偏。後儒不省事。差失毫釐間。寄語了心人。素琴本無弦。蓋向所謂自得者。見乎此矣。成化三年丁亥。復遊太學。祭酒邢讓一日試獻章和楊龜山此日不再得詩。能饑謀藝稷。冒寒思植桑。少年負奇氣。萬丈摩青蒼。夢寢見古人。慨然悲流光。吾道有宗主。千秋朱紫陽。說敬不離口。示我入德方。義利分兩途。析之極毫芒。聖學信匪難。要在用心藏。善端日培養。庶免物欲戕。道德乃膏腴。文章固糝糠。俯仰天地間。此身何昂藏。胡能追逸駕。但能漱餘芳。特此木鑽桑。其如磐石剛。中夜攬衣起。沈吟復徬徨。聖途萬餘里。髮短心苦長。及此歲未暮。驅車適康莊。行遠必自邇。育德時含章。爾來十六載。滅迹聲利場。閉門事探討。蛻俗如驅羊。隱几一室內。兀兀同坐忘。那知顛沛中。此志敬莫強。辟如濟巨川。中道奪我航。願茲一身小。所繫乃綱常。樞紐在方寸。操舍決存亡。胡爲漫役役。斷喪良可傷。願言各努力。大海終回狂。讓得之驚曰。龜山不如也。明日颺言於朝。以爲真儒復出。由是名震京師。一時名士如羅倫。莊景。章懋。賀。

欽輩皆樂從之遊。欽時爲給事中。聞獻章論。卽日抗疏辭官。事爲師。旣家。遂肖獻章像懸於別室。有大事必啓焉。獻章自京歸。四方學者聚徒日盛。東西兩藩部使以及藩王島夷宜懋。無不致禮於其廬。獻章日與門生講學。或賓友論天下古今事。每至漏下。塵壑不少倦。時江西布政陳煒修復白鹿洞書院成。以書幣聘爲十三郡士者師。謝不往。進士姜璘以事使貴州。取道如白沙見之。出語人曰。吾閱人多矣。如先生者。耳目口鼻人也。所以視聽言動。殆非人也。至京師。人問之。對曰。活孟子。活孟子。十八年壬寅。廣東布政彭韶薦於朝。謂其潛心聖賢之書。洞達事物之理。心術正大。識見高明。涵養有素。德性堅定。上卽命有司以禮勸駕。未及行。巡撫都御史朱英又交章薦。遂就道。至京師。年已五十六。朝廷敕試吏部。疾不果赴。乃上疏略云。臣母以貧賤早寡。俯仰無聊。殷憂成疾。老而強劇。使臣遠客異鄉。臣母之憂日甚。愈憂愈病。愈病愈憂。憂病相尋。理難長久。又以病軀憂老母。年未暮而氣則衰。心欲爲而力不逮。夫內無攻心之疾。則外不見從事之難。上有至仁之君。則下多曲成之士。疏入。除翰林檢討。親終疾愈。來供職。遂歸。弘治庚申卒。年七十三。學者稱爲白沙先生。獻章初從吳與弼。苦支離。比歸。自得主靜工夫。故凡教人。必令靜坐。以養其端。嘗曰。人之所以學。欲聞道也。求之書籍而弗得。則求之吾心可也。惡累於外哉。此事定要覷破。若覷不破。雖曰從事於學。亦僞人耳。斯理識時爲己者信之。詩文輩未習著述等路頭。一齊塞斷。一齊掃去。毋令半點芥蒂於胸中。然後善端可養。靜可能也。終一意勿忘勿助。氣象將日佳。造詣將日深。所謂至近而神日用而不知者。自此迸出面目來也。其語門生林光曰。終日乾乾。只是收拾此而已。此理干涉至大。

無有內外。無有先後。無一處不到。無一息不運。得此樞柄入手。更有何事。往古來今。四方上下。一齊穿紐。一齊收合。隨時隨處。無不是這充塞。舞雩三三兩兩。正在勿忘勿助之間。會點些活計。被孟子一口打併出來。便都是鳶飛魚躍。若無孟子工夫。驟而語之。以會點見趨。一似說夢。自此以往。更有分殊處。合要理會。嘗曰。有學無學。有覺無覺。得山莫杖。臨溪莫喝。蓋佛偈矣。獻章晚年。豪於詩興。若大小遠近。喜憂哀樂。山水花木。禽鳥蟲魚。每每發之詞章。及語門生。直截上達一節。皆玄虛妙旨。新奇可駭。究竟難爲事業。如云。耳目無交不展書。此身如在太清居。後學高明之士。一入其說。非惟目程。朱爲老生。將置六經。駕狗之矣。流而爲猖狂。一得志。恐苟卿之門。有李斯。所謂害於其政。害於其事者。不可勝言矣。楊廉曰。朱子謂康節之學。其骨髓在皇極經世。其花草是詩。若夫胸次高明。識見洞徹。則誠所謂振古之豪也。近年陳白沙。棲遲衡門。優遊卒歲。於吟詠諷誦之際。每稱堯夫不置。則所以慕其爲人者。已非一日矣。予喜其所爲詩。暇日擇錄若干首。間以數言釋之。用備觀覽而已。若白沙之胸次。識見。骨髓花草。堯夫不堯夫。必有知之深者。而不竅乎余之言也。其爲贊則曰。有評象山。吾嘗竊識。儒以爲禪。佛謂無事。公學所期。自得爲至。箋經注書。非其所事。平生議論。詩以見意。此卽語錄。無所隱秘。堯夫法門。懷卷隨世。何椒邱致羅一峯書云。近得陳公甫二書。及其門人林緝熙寄公甫書。僕尋繹數日。深喜公甫玩心高明。非俗儒所及。斯道之傳有望矣。但書中所言。有不能無可疑者。夫道之難言也尙矣。中庸曰。天命之謂性。率性之謂道。是則所謂道者。不外乎性命。非窈冥昏默之謂也。又曰。君子尊德性而道問學。是則所以入道者。不外乎存心致知。

非有甚高難行之事也。白濂、洛、關、閩諸大儒繼作。其於道之全體大用。與凡所以入道之方。發明詳且盡矣。儒者世守之。毋庸異說也。今公甫之書云。夫道至近而神。至無而動。又曰。虛其本也。致虛所以立本也。得非老、莊虛無之說與。又曰。不須廣覽前言。徒亂心目。得非子靜不必讀書之說與。又曰。僻處作室。靜處用功。如是則學道者。必如仙翁釋子。絕類離倫。乃可以得道歟。至於緝熙之書曰。終日靜坐。杜門而壁。無乃禪家之意歟。又曰。端默踰月。從此得些光景。無乃佛氏頓悟之說歟。凡此數說。參諸濂、洛、關、閩之書。誠爲可駭。不知公甫何爲而然也。近世儒者所學。詞章而已。潛心道學者。惟閣下與公甫。廷祥數君子耳。而公甫之說。又如此。豈所謂智者過之耶。羅整菴曰。近世道學之倡。陳白沙不爲無力。而學術之誤。亦恐自白沙始。至無而動。至近而神。此白沙自得之妙也。愚前所謂徒見夫至神者。遂以爲道在是矣。而深之不能極。而幾之不能研。雖不爲白沙而發。而白沙之病。正恐在此。章楓山嘗爲余言。其爲學本末。固以禪學目之。胡敬齋攻之尤力。其言皆有所據。獻章之爲學如此。獻章授檢討歸。一出都門。便張蓋乘傳作勢。人譏之。

吳與弼傳

吳與弼字子傅。江西崇仁人。父溥。爲國子司業。與弼自幼英異。年十九。見伊洛淵源錄。遂慨然欲爲聖賢之學。及觀明道亦嘗有獵心。益知聖賢之必可學。遂棄舉子業。日玩四書諸經諸儒語錄。尤達於易。嘗處一小樓。收斂身心。沈潛義理。其詩曰。九仞始一簣。千里方跬步。又曰。誠當通鬼神。志當貫金石。蓋不下樓。

者二年。尤以刻行著稱。嘗省親太學。粗衣敝履。人莫識其爲少司成之子。動履效古。隱不欲仕。獵有時名。陳獻章師事之。正統景泰間。僉事何自學等累薦不出。天順初。石亨有寵。門客謝昭請亨效宋蔡京招楊龜山故事。得致名士自翼。亨信其說。一日議事內閣。談及山林處士。大學士李賢首薦與弼。亨慨然欲薦之。遂懇賢代草。明日奏入。又數日上。問賢曰。吳與弼何如人。對曰。儒者之高蹈。請效古聘入朝。上頷之。是冬十月。遣行人曹隆奉敕書往聘。與弼幡然入京。戴尖頂闊簷棕帽。賢首咨以下學上達。與弼曰。且莫說上達之妙。只說下學事。賢笑曰。老先生亦記注不得。已而上問賢與弼當授何官。賢對曰。今東宮講學。正宜老成儒者輔導之。明日詔吏部授以左春坊左諭德。辭不拜。尋召入文華殿。從容賜問。對亦無甚奇。時上諭之曰。久聞高誼。特聘爾來。如何不就職。與弼以疾辭。因遣太監牛玉以文綺羊酒柴米送之。館既就。穀仍具疏三辭。一日賢往叩其所。以不就之故。與弼謂敕書重以伊傅之禮聘。卻以此職授之。故不受。賢曰。如此亦固執矣。朝廷待先生當大任。今必欲如傳說。伊尹作宰相。勢不能行人。皆失望。不若且就宮僚。若果有建明。則大任以漸而至。與弼竟不願除。遂稱病。邸兩月餘。乃疏六事欲進。過賢第。適尹直。邱濬至。坐良久。二人欲退。與弼揖之曰。大人先出。吾有私語與李先生商量。二人遂別。與弼門人黃順中送之。既出去。直卻步謂順中曰。帽非土服。吳先生何爲乃爾。順中曰。遮日耳。直又曰。公事則公言之。私事則不可言。況處士可語私事於宰相前乎。順中曰。非他私事。只說決去就耳。直曰。去就當自決。豈可求決於宰相。順中曰。吳先生見朝廷授以諭德。不允其辭。意得先生終後把作得住。方可就職。故來問耳。直曰。把作得。

住否亦豈李先生所能預料。此當自度才力何如耳。適見所白六事，皆經生之恆談，無大裨於治教。且詞語寂寥，學術可知，不若勸其終隱，免致他日實不副名。貽笑斯文。順中曰：諒不可留。與弼曰：懇賢爲乞歸。一日，賢於上前從容言之。上曰：果如此，亦難強也。復召入文華殿，賜敕嘉之，資以銀幣，丁甯無忘著述。以繼前賢。遂遣行人王惟善護歸。仍命有司月給米二石以贍之。陛辭，復條陳十事以進。與弼既家居，益自多，頗有傲世之志。或曰：中貴權要厚遺之，輒造拜。又藉朝紳名刺爲一帙，語人曰：傳諸子孫，見一時之榮。以故士論疑之。陳真晟聞其名，擔負入南昌，見張元禎，因元禎語，遂不見。番禺人張瓚守撫州時，與弼以弟奪其田，乃自纏冠，蓬首，襲衣束裙，雜稠人中，跪訟府庭。瓚閱狀，始知其爲與弼。下堂禮之，未幾，又訴布按二司。張元禎爲書切責，首云：拈起此筆，怒氣冲天。末云：當上告素王，正名討罪。豈容先生久竊虛名，爲名教中之罪人。吾且按兵以待。成化五年己丑冬十月十七日卒。年七十有九。學者稱爲康齋先生。說者謂與弼之學，未究其所歸，然好異而不苟，苦心以招譽，亦近世之士也。陳白沙云：東海平日自謂具隻眼，能辨千古是非人物，而近遺夫康齋，又何如。康齋易知耳。予年二十七遊小陵，聞其論學，多舉古人成法，由濂、洛、關、閩以上達洙、泗，遵師道，勇擔荷，不屈不撓，如立千仞之壁。蓋一代之人豪也。其出處大致不暇論，然而世之知康齋甚少。如某輩往往譏呵太甚，羣噪交競，是非混淆，亦宜東海之未察也。徵吾與蘇君今日之論，則東海之於康齋，其憂嬰之孔子乎？了翁之伯瀆也。門人敘述與弼，不過著其胼胝稼穡，遺風危坐，尊嚴師道，不受束修，詩作雅渾，奇古而已。尹睿齋曰：與弼自應聘後，矜肆無復故態。或者陳建曰：與

綱文集序記諸作。與夫疏陳十事。皆枯淺寂寞。草率粗略。無所發明。至於日錄所記。每多說夢。而錄首卽說夢。見文王。孔子與朱子。中間復言夢。孔子來訪。朱子來訪者。再至至三。爲攀聖附賢。嗚呼。羅整菴曰。吳康齋之決去。所得亦已多矣。然好學如康齋。節操如康齋。何可多得。當取其大而略其細。袁表云。昔楊時赴蔡京之薦。爲朱子所譏。與弼雖不拜官。然石亨之薦。不可出也。其學無所概見。所著康齋語錄。及上言十事。皆常談。無過人者。其惡宦官釋氏。及病宋末語錄之繁。可謂有見矣。要之力學修行。不失爲儒者。

邱濬傳

邱濬。字仲深。廣東瓊山人。濬性最穎悟。一目數千言。輒成誦。六歲能詩。長博涉羣書。殆極該洽。嘗著論謂許衡仕元。無能改於其俗。又不能行己之道。不仕可也。宿儒見之大稱歎。以爲先儒未有言及此者。舉正統廣東甲子鄉薦第一。登景泰甲戌二甲第一名進士。選庶吉士。授編修。預修寰宇通志。時兩廣經年用兵無成。因條事宜上。內閣李賢爲代奏。上嘉納之。付所司舉行。成化改元時。以九載秩滿陞侍講。修英宗實錄。或曰。于少保死以不軌。盡正其罪。濬曰。己巳之變。可無謙哉。謙功大過亦不可掩。竟錄其實。實錄成。進侍講學士。五年。轉學士。乙未。主會試事。丁酉。續編宋元通鑑綱目。成。以原官管祭酒事。踰十年。尊師道。端士習。時士子爲文。多以奇怪相高。至不可句。嘗考南京鄉試及會試。一切痛裁。怨誹不恤。以是文體復渾厚。論者謂師道尊嚴。無愧李時勉。而綜理微密。則時勉不及。十六年。進禮部右侍郎。仍掌國子事。嘗謂真西山大學衍義有資治道。而治國平天下之事缺焉。乃采經傳子史。有及於治平者。分門類輯。附以己

見名曰大學衍義補。丁未。孝宗卽位。首奏是書。孝宗覽之。嘉答曰。卿所纂書。考據清。論述該博。有補政治。朕甚嘉之。賜白金文紵。擢禮部尙書。掌詹事府事。充副總裁官。修憲宗實錄。時年七十餘矣。弘治辛亥。實錄成。加太子少保。冬十月。命兼文淵閣大學士。入內閣典機務。明年壬子春。上疏陳時政之弊。略謂我太祖開國。洪武建元。歲在戊申。我皇上登極。改元之歲。適與相符。天意殆欲陛下紹休太祖也。迺觀漢唐宋中世繼體之君。皆生於世道豐亨之際。宮闈逸榮之中。不歷險阻。不經憂患。天示變而不知畏。民失所而不知恤。人有言而不知信。好尙失其正。用度無其節。信任非其人。因循苟且。而無奮發之志。顛倒錯亂。而甘爲敗亡之歸。故也。今成化間。彗星三見。遍掃三垣。地震無慮五六百次。變不虛生。必有其應。天人相與。甚可畏也。臣願體上天仁愛。念祖宗基業。端身以立本。清心以應務。謹好尙。勿流於異端。節財用。勿至於耗國。公任用。勿失於信聽。禁私謁。以肅內政。明禮義。以絕邪姦。慎儉德。以懷永圖。勤政務。以弘至治。庶可以回天災。消物異。帝王之治。可幾也。因擬二十一條。設爲諭答之詞。奏之。疏入。上悅。卽付諸司議行。七年甲寅。兼少保。加太子太保。改戶部尙書。武英殿大學士。屢以疾乞休。凡十三疏。皆不允。會吏部奏黜在外大小官幾二千人。因言於上。此非唐虞九載三考之法。又非祖宗制。請凡歷官未及二載者。且復任。雖經一考。非貪暴蹤跡顯著者。且勿斥。一時不肖者皆喜。然自是貪殘日肆。吏部尙書王恕執不肯。濬滋不悅。會醫官劉文泰以醫出入濬家。文泰失職。誣訐。人疑濬賊之也。以故臺諫交劾。濬又乞休。不許。乙卯春二月戊午卒。年七十六。贈太傅。特進光祿大夫。左柱國。諡文莊。官其孫榮爲尙寶寺丞。有瓊臺類藁。世史

正網家禮儀節。朱子學的及大學衍義補行於世。濬爲學。以自得爲本。以循理爲要。平生有三不可及。一好學。至老手不釋卷。一介慎。絕不爲中官作文。一廉靜。京師城東私第。始終不易。歷官四十載。俸祿所入。惟得指揮張淮一園。然立朝與人。多好持己議。以此大不悅於人。王鏊謂濬學於子史無所不窺。而尤熟於國朝典故。議論高奇。人所共賢。必矯以爲非。人所共非。必矯以爲是。能以辨博濟其說。亦自恃其才。故對人語滾滾不休。人無敢難者。論秦檜曰。宋家至是。亦不得不與和親。南宋再造。檜之力也。論范文正則以爲生事端。岳飛則以爲未必能恢復。論郊祭則以類於上帝。類字強訓爲同元始。以同牢不爲瀆。不可以莽廢。又謂夏至祭地。則地先天食。蓋褊滯立論。好異類如此。其最得者。黜元不與正統。許衡不當仕於元。亦前人所未發也。又謂公進大學衍義補。得進尙書。李廣幸於孝宗。因之得入內閣。與同僚爭。每事欲有紛更。時王恕重望於天下。濬每憎之。莊曩乞休家居。濬嫉之。嘗曰。引天下士夫背朝廷者曩也。吾當國必殺之。甲寅。曩被召入京。大學士徐溥以爲言。濬語人曰。我不識所謂定山也。其量如此。獨謂其性剛不苟取。而恬於仕進。年七十以學士終。濬嘗言。明朝相業。三楊躋矣。然當其時。南郊叛逆。軒龍易位。敕使旁午。瀕泛西洋。曾無一語。權歸常侍。遠征巖川。兵連禍結。極於土木之變。誰實啓之。其持正論如此。

羅倫傳

羅倫。字彝正。江西永豐人。性慷慨樂善。自幼厲志聖賢之學。遊邑庠。爲舉子業。嘗歎曰。舉業非能壞人。人自壞之耳。處空而志愈奮。吉安知府張瑄嘉其志。憐其貧。因遺之金。謝弗受。成化丙戌。年三十六。舉會試。

第三名及對策。輿聲數千餘言。引程正公語。人主一日之間。接賢士大夫之時多。親宦官宮妾之時少。宰執見之曰。宜截下句。倫不從。時讀卷官吏尙書王一夔。以程敏政卷字精楷。力贊宜居首。大學士李賢曰。論文不論書。遂奏名第一。授翰林修撰。會賢報憂。詔奪情起復。諫者不敢言。倫詣賢私第。告以不可。賢始以其言爲然。上疏乞終制。不允。倫復上疏。略以爲臣聞朝廷援楊溥故事起復李賢者。臣竊謂李賢大臣起復大事。綱常風化之所繫。天下後世之所監。伏讀聖策有曰。朕夙夜倦倦。欲正大綱。舉萬目。使人倫明於上。風俗厚於下。陛下是言。真可爲國家扶綱常。爲天地立民極。爲萬世開太平者也。然欲正大綱。莫先於明人倫。厚風俗。欲明人倫。厚風俗。莫先於孝。孝者天之經也。地之義也。國而非此。不可以爲國家。而非此。不可以爲家人。而非此。則禽獸矣。中華而非此。則夷屬矣。故先王制禮。子有父母之喪。君命三年。不過其門。所以教人孝也。古者求忠臣於孝子之門。誠以居家孝。故忠可移於君。爲人臣者。未有不孝於親。而能忠於君者也。爲人君者。未有不教其臣以孝。而能得其臣之忠者也。昔子夏問三年之喪。金革之事。無避禮與。孔子曰。魯公伯禽有爲而爲之也。今以三年之喪。從其例者。吾弗知也。陛下於李賢。以金革之事起復之。歟。則賢所未聞也。以國家大臣起復之。歟。則禮未之見也。以故事大臣當起復。歟。則爲君者當以先王之禮教其臣。爲臣者當據先王之禮事其君。臣不暇遠舉。請以宋事言之。仁宗嘗以故事起復富弼矣。弼之辭曰。何必遵故事以遂前代之非。但當據禮經以行今日之是。仁宗卒從其請。孝宗嘗以故事起復劉珙矣。珙之辭曰。身在草土之中。國無門庭之寇。難冒金革之名。以私利祿之實。孝宗允其辭。此二君

者未嘗拘當代之故事以強起其臣。此二臣者亦未嘗循當代之故事以苟從其君。故功澤加於當時。名聲垂於後世。史筆書之以爲盛事。士夫誦之以爲美談。此無他。君能教其臣以孝。臣有孝可移以忠於君也。自是而後。無復禮義。史嵩之欲援例起復爲丞相。王黼起復爲執政。陳宜中起復爲宰相。賈似道起復爲平章。此數君者未嘗不以當代之故事起其臣。此數臣者未嘗不以當代之故事從其君。然生靈以之而困。天下以之而亂。社稷以之而傾。貽禍於當時。遺臭於後世。此無他。君不教其臣以孝。臣無孝可移以忠其君也。詩曰。殷監不遠。在夏后之世。臣願陛下以宋爲鑒。使賢盡孝於君親。爲萬世之大臣。陛下以禮處賢。爲萬世之大君。此臣之願也。亦賢之分也。若以賢身任天下四方多虞。而起復之典。則仁宗之時。契丹桀驁。未爲無虞也。孝宗之時。金人強盛。未爲無事也。陛下必欲賢任天下之事。不專門內之私。則賢身不可起。口則可言。宜降溫詔。俾如劉琪。不以一身之戚。而亡天下之憂。使賢於天下之事。知之則必言。言之則必盡。陛下於賢之言。聞之則必行。行之則必力。則賢雖不起復。猶起復也。使賢於天下之事。知之而不言。言之而有隱。陛下於賢之言。聞之而不行。行之而不力。則賢雖起復。猶不起復也。陛下無謂廟堂無賢臣。衆庶無賢士。君孟也。臣水也。孟圓則水圓。孟方則水方。君好諫則臣直。好諛則臣佞。陛下誠能於退朝之暇。清閑之燕。略崇高貴重之勢。親直諒博治之士。開懷延納。降禮尊賢。講聖學之大要。明君道之急務。詢政事之得失。察生民之利病。訪人才之賢否。考古今之治亂。諷風俗之盛衰。咨邊方之緩急。舍一己之見。而以衆人之見爲見。舍一己之知。而以衆人之知爲知。順旨之言。則察而逐之。使貢諛保寵者。無以

自容忤旨之言。則容而受之。使輸忠爲國者。得以自盡。羣策畢陳。衆賢並用。則賢所欲言者。人亦能言之。又何必違先王之禮經。拘先朝之故事。損大臣之名節。虧聖明之清化。而後天下可治哉。朝廷舉措。大臣出處。天下觀之。史筆書之。清議雖不行於朝廷。天下以爲何如。公論雖不行於今日。後世以爲何如。誠不可不懼也。夫賢之起復。猶誘之曰。負天下之重任。應先朝之故事。比年以來。朝廷以奪情爲常典。縉紳以起復爲美名。食稻衣錦之徒。接踵廟堂。據禮守經之士。寂寥無聞。不知此人於天下之重何關耶。此事於先朝之故事何所據耶。先朝自楊溥之外。未聞起復某人爲某官也。今起復之官。何如此之多耶。以其高謀遠慮。足以建天下之大義耶。何未見其發也。以其折衝禦侮。足以定天下之難爲耶。何未見其能也。以其直節勁氣。足以勵天下之士習耶。何未見其有也。以其深仁厚澤。足以浹天下之民心耶。何未見其行也。以其忠言讜論。足以裨朝政之闕失耶。何未見其敢也。陛下何取於斯人而起復之哉。意其平昔之計。不過阿媚權勢。豫爲己地。及遭通喪之時。則必曲爲諛說。上蒙天聽。不曰。此人辦事。理可奪情。則曰。此有故事。例當起復。既遂姦計。略爲虛辭。一見俞允。歎然就位。未有堅請如富弼。懇辭如劉瑛者也。且婦於舅姑。喪亦三年。孫於祖父母。禮有期服。奪情於夫。初無干其妻。起復於父。初無干其子。今或舍館如故。妻孥不動。乃號於天下曰。本欲終喪。朝廷不容。雖三尺童子。臣恐其不信也。爲人父者。所以望其子之報。豈擬至於此哉。爲人子者。所以報其親之心。豈忍至於此哉。枉己者。未能直人。忘親者。豈能忠君。望其直人而先枉己。望其忠君而先忘親。陛下何取於斯人而起復之哉。何不使之全孝於家。而後移忠於國哉。昔富

弼有母喪。韓琦言起復非盛世事。而富公竟不可奪。史嵩之遭父喪。太學生留之至數百人。嵩之竟乞終制。今大臣起復。羣臣不以爲議。且從而爲之辭。所以豫爲己地也。羣臣起復。大臣不以爲非。且從而成其事。亦所以豫爲己地也。大臣既無忌。羣臣復何慚。羣臣既有例。大臣復何辭。今之大臣。固韓琦富弼之罪人。今之羣臣。又太學生之罪人也。上下成風。混然同流。致有公無起復之例。私爲匿服之計。例在薄恩。則匿服以受封。例在得官。則匿服以聽選。例在撥科。則匿服以應舉。例在遷官。則匿服以候選。例在求賄。則匿服以之任。率天下之人。爲無父之歸。臣不忍聖明之世。風俗之敝。綱常之壞。一至於此也。夫愛親之心。孩提有之。短喪之說。下愚恥言。況在冠裳之列。聞聖賢之道。肯於其親無三年之愛乎。特以貪利。遂至忘親。孔子曰。是可忍也。孰不可忍也。又曰。上有好者。下必有甚焉者。陛下誠能守先王之遺禮。遵祖宗之成憲。待之以禮義。而不廢之以爵祿。激之以廉恥。而不誘之以名位。使積習之弊。脫然以除。則忠孝之心。油然而生。向雖忘其親。今則爲孝子。向雖後其君。今則爲忠臣。亦理之所必有。勢之所必至也。特在乎陛下轉移之間。何如耳。天子者。以孝治天下者也。大臣者。佐天子以治天下者也。欲孝行於天下。必先行於大臣。臣願陛下不惑羣議。斷自聖衷。取回內臣。許令李賢依富弼。劉珙故事。守制其餘。已起復者。悉令終喪。未起復者。悉許守制。脫有金革之事。亦從裏衰衣制。任國事於外。盡心喪於內。將見朝廷既正。則天下自正。大臣既行。則羣臣自效。人心天理。不可泯滅。誰肯甘心爲不孝之子。視顏爲不忠之臣乎。綱常由是而正。人倫由是而明。風俗由是而厚。士心由是而純。紀綱由是而張。國勢由是而一矣。忤旨謫泉州市舶司。

提舉士論榮之。直聲大震。三年丁亥春。召還。會有奏事者。辭連倫。下錦衣獄。一鎮撫見之。驚曰。羅先生其可至此乎。卽日趨成讞之。倫得免。仍爲南京翰林院修撰。居兩月。以疾乞歸。不允。六年庚寅。辭益切。許之。旣歸。卽金牛山結茅茨數間以居。取給田畝。往來共樵牧。若無意於世者。日注經。與諸生講習不倦。用度空乏。恬不介意。其所自得。充然不爲勢利汨汨也。倫之學。專宗朱子。陳獻章嘗遺之書曰。先生欲理會著述及諸外事。莫若且打疊令我潔潔淨淨。先生平昔所篤信者。非朱紫陽乎。非全放下。終難淡泊。非紫陽語乎。倫亦不以爲然。成化十四年九月二十四日。以疾卒。年四十八。學者稱爲一峯先生。正德中。追謚文毅。倫不視惡色。不聽惡聲。不恥惡衣惡食。與爲子者言。依於孝。與爲臣者言。依於忠。言居官必及民所疾苦。大率義之所在。毅然必爲。人之毀譽歡戚。事之成敗利鈍。己之生死禍福。皆所不顧也。胡敬齋稱所志不凡。任道甚力。章楓山曰。羅一峯氣魄大。感動得人。嘗謂其可正君善俗。我輩只可修政立事。先生剛毅之資。似程伊川。劉元城。至其脫官甘貧。學以考終。充然有箪瓢陋巷之風。足以廉頑立懦。豈非吾道之攸賴耶。陳獻章謂倫才大不及志。考成化間。論德行文章氣節者。當以陳羅並駕。陳克菴身旣貴顯。燕會唯服先人故衣冠。客至瓦器蔬食。相對無愧色。自河南聞喪。還行裝蕭然。惟車一輛而已。及之官廣東。騎驢出都門而去。其儉約有寒士不及者。羅一峯常欲做古置義田以贍族。而力不逮。或助之堂食之饒。則謝而弗受。遇乞人死於塗。輒解衣以覆之。家居時。有客晨至。留具飯。其妻語其子曰。瓶粟罄矣。之旁舍干之比。舉火日已近午。亦曠然不以爲意。蓋二人所得同。故其嚮向同。而於世味亦同。或問王廷相以陳克菴。

曰節行處世問羅一峯曰學術術道請折諸聖曰由士賢充之仁以爲己任死而後已者乎由彙正充之行一不義殺一不辜而得天下不爲者乎蓋躬行君子也焉耳昔楊士奇作相時以百官祿薄議得折柴薪銀後遂爲例及倫獨不受

周瑛傳

周瑛字梁石莆田人爲學先以敬收斂此心然後博物以窮理而反約以施博造詣篤至瑛發科最遲登成化五年己丑進士授廣德州知州首軫民惑於鬼神著祠山雜辨又民不知葬祭法溺殺女子著教民雜錄臨政有聲擢禮部郎中遷撫州知府調鎮遠府累官至四川右布政使致仕瑛嘗自撰墓志銘曰年過四十始仕庶幾觀斯道之大全而求見夫子所謂一者及領鄉薦遂沒仕路而初志爲始奪云又謂其居官行己頗知畏天命凡事每自檢於心求合於天而人有不及知者惟不及知而暗合於天則恆自喜曰此吾學之得也先是與陳獻章友時獻章首倡習靜之說一時樂其說之新奇士翕然聽之嘉魚李承箕字世卿往從之遊得其說歸遂居大崖山以老謂靜則其心虛心虛則理見故視六經若土苴視形骸若仇敵視聖人所以立禮義之防若纏束細縛欲撤去之瑛亦知承箕致書云白沙子友也二十年前日相往返瑛見其神清氣完心地定曩往往以其心觀天下之動竊以爲古閉關人也今世卿從白沙遊不知其說果出於白沙否果出白沙吾欲盡己之說不當祖述其說而申告之也瑛聞人心無外以爲有外者非也聖人靜有以立天下之大本動有以行天下之達道由體及用以一貫之自餘爲學皆由博以反

約博者萬殊也。約者一本也。求諸萬殊而後一本可得。一本既得。則所謂萬殊者。亦可推此以貫之矣。瑛請得以言其功。程次第。蓋始學之要。以收放心爲先務。收放心。居敬是也。居敬則心存。聰明睿智。皆由此出。然後可以窮理。所謂窮理者。非謂靜守此心而理自見也。蓋亦推之以極其至焉耳。孟子曰。萬物皆備於我矣。此言人心無外也。不卽物以窮理。其能盡此心之體乎。故由情性之微。以及形體之粗。自食息之末。以及綱常之大。自六經之奧。以及天地萬物之廣。皆不可不求其理。求其理。謂求其自然。與其當然。又於自然當然求所以然。積累既多。自然融會貫通。而於一體者。亦自得之矣。一本固非學者所敢言。然聞之中庸有曰。喜怒哀樂之未發。謂之中。又曰。上天之載。無聲無臭。至矣。此譬如穀種。雖自塊然而根苗花實。皆聚於此。又如雞卵。雖自渾然而羽毛嘴角。皆具於此。及其發見於行事。在聖人體用一貫。在學者未免差互。蓋在己者有所拘蔽。故所發不無偏重之殊。在外者有所搖奪。故所施不無遷就之異。然而既復本源。則於處善亦安。循理亦樂。至於患難事變。雖以死易生。亦甘心爲之。此聖學之大略。今不務此。乃塊然靜坐。求畢體用之學。吾見其難矣。瑛自契於中。而見乎辭者如此。瑛嘗講邵氏、蔡氏、注經世管論。律呂管論。又苦字學無師承。乃博采諸說。爲字書管論。其他詩文。有水雲臺、金臺臺、金陵臺、桐川臺、臨川臺若干卷。



明書卷一百十三

列傳三

儒林傳三

賀欽傳

賀欽字克恭世居定海其先戍廣甯遂爲遼西人少穎敏沈厚好學喜讀近思錄成化二年舉進士爲戶部給事中見陳獻章與論學歎曰至性不顯寶藏猶蠹世卽用我而我奚以爲用卽日上疏解官去執弟子禮事獻章旣別肖其像懸室中事之甚謹宏治初薦授陝西叅議撫治商洛以老病母憂上疏懇辭且陳四事一曰資眞儒以講聖學二曰薦賢才以輔治道謂新會縣歷事監生陳獻章天性高明學術純正誠當世之大賢爲士大夫之矜式宜以非常之禮起之或任內閣俾參大政或任經筵使養君德三曰遵祖訓以處內官謂內府監司局庫衙門載之祖訓內官條其職掌不過洒掃供養關防出入等事而已近年如王振喜甯舒良王誠曹吉祥牛玉汪直尙銘梁芳陳喜輩或陷主虜庭身叛賊境或主易儲君禁固南內或謀爲不軌賄易后妃或邀功啟釁流毒邊徼或恃寵招權納賂不貲或引用左道蠱惑上心或導進淫巧盜虛府庫此其陷君誤國蠹政殃民昭昭在人耳目宜深鑒已往之弊內不可使職掌奏牘得預

大政外不可使鎮守地方。掌握兵權。則非惟國家無疆之福。亦宦官無疆之福也。四曰。興禮樂以化天下。謂陛下紹基之初。舉行朱子喪葬之禮。但初政之施。方發其端。而頹敗之俗。尙仍其舊。禮讓之化未行。淫穢之風日盛。乞申明正禮之當行。革去教坊之俗樂。疏入。報聞。允其辭。正德四年。劉瑾括田遼東。人驚疑。思亂。義州以守臣貪。故遂先發。聚衆縱火劫財。大擾。然相戒曰。毋入東街。驚賀黃門。欽聞。往諭之曰。渠輩既知悔。卽不殺人可解。鎮城常有人至。爾輩直拜跪求生。慎無殺人。已而撫鎮人果至。須臾有言軍至且勦者。衆復呼譟曰。賀黃門無謾語。又趨跪欽里門。欽曰。城中擾亂至此。鎮城焉得不發兵。雖至。爾等第不殺人。必有爾無恐。衆遂定。城中不傷一人。欽不勝博覽。專心經書小學。靜思默識。反身寔踐。冠婚喪祭。遵用家禮。其與聖賢之道。多所申暢。鄉人皆興於行義。老更好易。究心精粹。手不釋卷。著易說。卒。鄉人祠之。凌溪釣臺。稱爲醫閭先生。子士諧。鄉貢士。博學篤行。嘗陳十二事論王政不報。辭疾歸。終身不仕。

丁璣傳

丁璣。字玉夫。丹徒人。父元吉。學行高古。隱居教受。學者稱爲易洞先生。璣幼服庭訓。嶷然早悟。弱冠舉進士。授中書舍人。同官長逾倍者。皆尊事之。吳寬與爲忘年交。成化末。以星變。應詔上疏。言治道本末。時政得失。反覆數千言。而根極於正心術。教東宮。振綱紀。正風俗。慎用人。重名器。蘇民困。理財節兵。皆切時政。末言方士釋老。近之則害治。宜斥遠。疏入。爲羣奸側目。出爲普安州判官。普安遠夷。去中州萬里。非人所居。璣獨從一僕。怡然行。秦如也。宏治初。三原王恕爲吏尙書。雅重璣。延見。坐語者竟日。明日復召。不赴。奏

記言今日無急於正君。然非一人一日之力。宜早堅主上嚮道之志。開進賢之路。庶本正源清。制治保邦之務。可次第而舉。恕疑其言。欲引爲吏部郎。竟爲忌者所沮。轉廣西通判。猾伍以怨誣鄰民爲盜。斷其舌斃之獄。汚罵其妻女。逮伏法。同官坐事者。處之曲有恩。至丐印易牒。執不可曰。某平生惟辨此一片心事。君敢爲欺邪。內艱服闋。倪岳掌銓。卽家起儀制郎。尋以副使提學廣東。入賀道清遠。山水暴發而沒。翌日得其屍。衣冠端整如生存。璣克養深粹。居圓運方。身不踰中人。而任道好古。崇正闢邪。有萬夫直前之勇。羣吠衆譟。不震不悚。有百煉之剛。以儀禮周公之典。久廢不行。家居冠婚喪葬。一取衷之。其教人。正容端坐。澄心定氣。使躁釋慮消。方與開講。其析疑義。入毫芒。而文主純雅。其爲政。先風化。而一以誠意將之。有去後思。室廬不庇風雨。子女踰期無力爲嫁娶。而愛君憂國。一出天性。蓋儒學不傳。得其門者。或寡。璣窮探力索。渾融冲粹。志之所向。不息不歧。一以考亭朱子自期待。魯齋臨川而下。不屏也。所著大學疑義。中庸語。孟說及儀禮注。大學士靳貴從受學。尊事終身。稱其中行獨復。於衆醉羣污之中。任道甚力。制行甚方。涵養甚粹。德性甚良。如金剛玉潤云。

蔡清傳

蔡清字介夫。晉江人。氣質粹然。仿躬厲行。動準古人。學以六經爲正宗。四書爲嫡傳。四儒爲真派。造益深而養之純。發爲文章。澤於仁義道德。粹如也。舉成化丁酉鄉薦。第一。登成化二十年甲辰進士。授禮部主事。時王恕爲吏部尙書。舉以爲屬。祭酒邱濬時稱海內儒宗。不屏一世。每對人言介夫學醇而行潔。可以

進之於古人。嘖嘖加歎賞不釋口。尋以母憂去任。服闋。仍補禮部。乞改南。又補吏部主事。未幾。以父老乞終養。居父憂。既除。擢江西按察副使。提督學校。以理學淑士類。因出其作易四書蒙引授學者。傳及四方。咸宗師之。曰。虛齋說。時仕江西者。朝甯王皆朝服。清獨去朝服中蔽膝一件。先是每朔望朝王。俱次日始謁孔廟。清力言不可徇舊例。遂以初一十五先謁廟。乃行禮。時甯王欲奏討護衛。清阻之。以是拂其意。會都御史林俊有憾於王。讒人因言清與俊頗厚。王遂併怒清。專謀孽清。使人騰謗京師。欲以併壞之。清歎曰。如此誠慮。一旦死於非命。則非惟有孤朝廷。任使其斯文。責望之意。而吾於身上下關係。俱未有一毫成立。亦可虞也。亟引疾乞休。家居二十年。始終一貧。責負轉展。數口之計。乃常不辦。歎曰。此士之常也。正德初。起爲國子祭酒。命及門而卒。寔正德三年戊辰十二月二十三日也。年六十六。學者稱爲虛齋先生。林俊云。先生平日精力。盡用之易。溫陵造就。可謂易學一時矣。又云。先生督學江右。甯藩讐予。因讐介夫。介夫引而去。逆瑾亂政。起祭酒。以鎮壓人望。而介夫先沒矣。嗚呼。介夫之不爲龜山。非幸耶。清嘗言。分陰不惜。學力不充。當事臨疑。口耳無所歸。手足無所措。故楊月湖稱之曰。學識操履如介夫者。纔不多見。羅整庵曰。蔡介夫中庸蒙引。鬼神數段極精。其一生做窮理工夫。且能力行所學。蓋儒林中之傑出者。王恕一日與清論今學者滿天下。何異才難得。清曰。是由上之人所以養之者未盡其道。下之人又幸時之昇平而傳之急耳。儒生少知章句訓詁。人便而舉進之學宮矣。未幾作經義。甫成篇。便得補廩。以爲當然矣。又未幾作三場文字。纔可讀。便迫迫期中舉中進士矣。一中進士。則官已到手。或無暇於學。又自以爲無

用學矣。其仕而能學者無幾。又且或有過時扞格之患。蓋識見既淺。踐履少薄。規爲必粗。非所謂俟其熟而食之者矣。況自幼入小學。而其所學多非學做人之實事。人才之不如古者。以此。故雖有異質者。亦不能成異才。又曰。異才之難得。果舉業累之耶。舉業不謂累人。而人自累之。異才之稱。非必其聰明壓班。馬而凌韓。柳也。賜之悟。不若曾之魯。存乎其學耳。有其學。則有其才。今世學者。其始也依所業以干進。循文子套子。熟時其體式。如販者然。多招奇貨。以祈鬻於人。而遑恤其貨之非己有也。一旦登科入仕。惟以是爲事。脫六經四書。如敝屣然。故夫親民事。職簿書。既以不暇於學。若被選讀書。職任絲綸者。亦不過勤閱奏。漢文而竊其似。以號古作。酷想韓柳文。而啜其穢。以淹文法。視六經四書爲詭語。目濂洛關閩之言爲不足。以藝於文。而驚世駭俗也。

張吉傳

張吉字克修。餘干人。生有美質。四五歲。聞父母之命。卽不敢違。或口授之故事。輒記不忘。長從鄉先生學。見諸生各治一經爲舉子業。歎曰。士常兼治五經。今業一經。而所遺如此。豈聖人之言。亦有當去取者。乃力購諸經及宋儒諸書讀之。久而有得。喟然曰。道在是矣。日務窮理致知。卽聖賢言語。體之於身。驗之於心。朝夕不解。尤以名節自砥礪。故同類多忌。按之。惟教諭鄭重先爲之延譽。成化丁酉。魁鄉薦。登成化辛丑進士高等。除工部主事。時左道李孜省妖僧繼曉皆以術得寵。乙巳元旦。星隕有聲。詔求直言。吉上疏請上親賢圖治。修德遠邪。以謝天變。因指斥二人之罪。疏入。邪黨切齒。因搆摭其過。不可得。踰月。乃噉吏

部尙書尹旻貶爲景東府通判。時追逮甚急，故舊皆畏避。吉獨攜圖書數卷，僮僕數輩，出都門，適然詣任。先是景東僻處西南極邊，民風鄙梟，士官陶氏世握郡章，不能易其俗。吉至，首布令，以孝悌忠信禮義廉恥反覆開諭，間有不法者，亦薄示以罰，約無再犯。又夷人不知書，吉手錄諸經，葺齋舍，討論其中。久之，夷人訓服，漸聞中國之化。寓官舍，政暇卽取古聖賢教人修身之要，分爲四門，作慎獨窮理，改過求仁四箴。書之座右，日以自勵。時居景東，未攜家室行。陶士官謀爲置妾，拒之，尋以銀器數事爲餽，一無所受。已而陶亦遣子榮來學，榮亦遂能善事父母，以孝著。宏治元年，轉肇慶府同知。陳獻章講學，吉往還與之論，深究義理。辛亥，都御史秦紘爲總兵柳升所誣奏，逮赴京詔獄。吉上疏代辯，奏遂得白。壬子，進表入京，庭謁吏部堂，時尙書王恕雅知其名，甚禮待之，曰：「以之淑士有餘矣。」欲擢以提學，不果。癸丑，轉梧州府知府，日躬課諸生，爲講說聖賢大學之道。士類賴之。庚申，陞廣西按察司副使。正德改元，轉按察使。明年，轉山西右布政使，尋轉廣西左布政使。以忤權奸降兩浙鹽運使。轉河南參政，調廣西，轉湖廣按察使。癸酉，陞貴州右布政使，以疾乞休。家居數年。十三年戊寅九月甲寅卒。年六十八。吉嘗謂禮之大者有四，其冠婚喪三者，可守行之。惟祭祀煞用斟酌，其行於家，最爲精當。鄉里化之，居常無可喜可怒之事，及變故之來，利害之際，則惟義是從，無所忌憚。居家嘗訓子弟，以節儉讀書先小學四書而後諸經。嘗曰：「學者不讀五經，遇事便覺窒礙。」吉早歲微偏於剛，中年充養宏裕，病且革，必正衣冠端坐，倦則隱几假寐。楊廉贊云：「五經四書，深契奧妙。」呂陸是攻，各鍼其竅，及觀所著，有關佛學論古城集，貞觀小斷，陸學訂疑。

楊廉傳

楊廉字方震豐城人。成化二十二年進士。爲南京給事中。建議多國家大體。邊防要務。宏治十三年陞南光祿少卿。轉南太僕少卿。晉南通政使。正德七年轉順天府尹。平徭減役。裁諸冗費。愛人節用。有聲京輔。稱清。十年進南禮部侍郎。尋進尙書。大禮議起。同南九卿具疏。請考孝宗。母昭聖。以崇正統一本之義。疏出其手。廉好學能文。負時名。吏事精敏。性耿介。恥回互。論事多據經義。通達古今淵源。自六經權衡。程朱低昂百氏。故其發之詩文。鑿鑿乎先儒之矩度。尤篤好程朱之書。自修身施政。以至文詞書札。冠禮衣裳之細。必取法焉。或羣言淆雜。人莫適從。廉輒舉二夫子言曰。程朱云云。吾不知其他。可謂言程朱之言行。朱之行。服程朱之服者矣。嘗復余子積論理氣曰。論一則不徒理一。而氣亦一。論萬則不徒氣萬。而理亦萬。此言尤有獨見。他理義多所發明。卒諡文恪。所著有文集奏議家規及皇明名臣言行錄。理學名臣錄等書。

邵寶傳

邵寶字國賢。無錫人。性度端雅。有古風。而氣節尤厲。接人未嘗有疾顏遽色。遇事人或數百語不能終。寶以數語竟之。自當於理。登成化甲辰進士。授許州知州。作新廟學。諭諸生以義利公私之辨。及忠孝大節。急民事。躬課農桑。倣朱文公社倉。立積散法。行計口澆田法。爲備荒計。釐正糧籍。士民稱便。宏治癸丑夏六月。許州小趙鎮有誣言龍骨出土中。縱口道禍福。以誑愚俗。寶恐其久而惑民也。取而毀之於廷。杖巫

而遣之舉動風化煥然改觀。陞戶部員外郎。時尙書周經、劉大夏皆器重之。章奏多出其手。擢江西提學副使。敦尙道義。以身爲教。一時士風丕變。遷浙江按察使。出疑囚。振法紀。正德二年丁卯。陟右布政使。轉湖廣左布政使。振恤災傷。奏蠲逋負。民賴以全活者衆。己巳。擢右副都御史。總督漕運。會劉瑾擅權。仕者皆爲往來。寶獨一無所通。瑾銜之。數遣人撼以危言。寶不爲動。瑾遂矯旨勒致仕。遂歸。寶於聲色貨利嬉戲。絕口不言。惟潛心諸書。開拓古今。粹然自出機軸。嘗曰。願爲眞士夫。不願爲假道學。檢身誠切。操履端飭。自登第至侍養。一切餽遺。例不苟受。篋無長物。惟圖書金石遺文。蓄之甚富。嘗取程伊川今日格一物。明日格一物之意。乃博綜羣籍。研窮有得。著日格子十二卷。庚午。瑾誅。起巡撫貴州。尋陞戶部侍郎。辭不就。乞終母養。許之。寶事母甚謹。年踰六十。朝夕不離左右。如少壯時。嘉靖初。大臣言官交薦。起爲禮部尙書。時母尙無恙。寶懇辭如初。世宗不忍奪其志。溫旨答之。仍敕有司存問其母。人以孝榮之。尋卒。諡文莊。寶曾作章楓山祠堂記云。天下之道德爲乎定。定於一而已矣。大哉孔子。萬世之師也。孟子去孔子未遠也。闢邪放淫。勤一生以爲任。大閑立矣。后數百年而有董子。欲出百家於漢。又數百年而有韓子。欲去二氏於唐。然其識與力。皆不逮乎其志。故泛然莫之能定也。周子。程子。斷趕於宋。其識與力。超然獨詣。繼往闡微。爲世先覺。而朱子繼之。著書言行於天下久矣。先生以盛德重望。弗惑弗貳。而扶衛之意。倦倦其間。蓋先生之信朱子。猶朱子之信周程。程之信孔孟也。觀寶此記。可謂後學指南者矣。所著有定性說。漕政舉要。容春堂勿藥諸書集。其他簡端學史二錄。都御史吳獻臣爲奏於朝。謂寶耿耿迴瀾。老益惇篤。其

毅然任道之心乎。秦金稱之曰：實於家稱孝子，於國稱名臣。於世稱純儒，傑然爲天地間完德君子。

章懋傳

章懋，字德懋，蘭谿人。自幼識卓志遠，不以科舉學累。潛心大業，慨然慕范文正之爲人，尤持氣節而恬雅。古樸造理淵邃，以易舉天順壬午鄉試，登成化丙戌會試第一。廷試高等，選庶吉士，授翰林編修。再四十年，會朝廷有事元宵燈，懋及莊景、黃仲昭、公疏諫，言直切忤旨，黜知臨武縣。時稱三君子，尋起爲南京大理寺評事。陞福建僉事，毅然以振風紀爲己任。嘗因歲序卻桃符，題其門曰：要使鬼神司屋漏，不須鬱壘衛門庭。時事多掣肘，不獲盡行所志。乃議處番貨，公通貿易，聽民採礦等事。嘗因行部積勞，觸瘴成疾，恐貽親憂，歸志甚堅。比考績入京，遂乞解官。時吏尙書尹旻懋留之，懋辭益切。尹詰之曰：不罷軟，不貪酷，不老疾，如何可退？懋對曰：古人正色立朝，懋之罷軟多矣。古人一介不取，某之貪多矣。古之視民如傷，某之酷多矣。年雖未艾，鬚髮早白，亦可謂老疾矣。尹爲之動，知其志不可奪，遂爲具奏得歸。時年四十一。比歸杜門事親，暇日卽讀書講學，甘貧守道。其學一以關、閩、濂、洛爲宗，要在精究而力行之，不襲口耳，不涉支離。故雖眞見獨到，洞貫道妙，其發之議論，寔切當，多有前賢所未發者。嘗曰：人形天地之氣，性天地之理，須與天地之體同其廣大，天地之用同其周流，方可謂之人。又曰：學者須大其心，曾蓋心大則百物皆通，必有窮理工夫，心纔會大，又須小，必有涵養工夫，心纔會小，不至狂妄矣。家居幾二十年，薦者無虛日。宏治辛酉，起爲南京國子監祭酒，遭父喪，時北學亦缺祭酒，吏部尙書倪岳起謝鐸於北，懋於南，有旨聽終。

制。遂虛位以待。癸亥。服闋。起視事。首開示諸生。以近裏功夫。謹渠度。厲廉恥。諸生翕然向風。天下莫不賀得師焉。尋上修舉學政。條陳時弊。正德改元。又疏治要五事。曰。勤聖學。隆繼述。謹大婚。重詔令。敬天戒。再疏乞休。不允。是年。任滿三載。年踰七十。以老病不能赴京。給由懇辭。遂緘公移。繳吏部。不待報歸。復三疏始得請。已而閹瑾擅政。公卿多遭斥辱。而懋已先幾去矣。正德五年庚午。起爲南京太常卿。再辭。進南京禮部右侍郎。致仕。嘉靖初。陞南京禮部尙書。又致仕。方纔書存問。使及門。而懋卒。年八十六。賜祭葬。贈太子少保。諡文懿。學者稱爲楓山先生。自入翰林。以至八座。立朝僅四十日。官不過三考。乞休凡十餘疏。難進易退。當於古人中求之。嘗懋論學術。則云。程朱久又大壞矣。必須真聖賢出。方能救得。論政體。則云。第一是格君心。收人才。固民心。爲本。然后政事可舉而行。論風俗。則云。須做橫渠復古之志。行藍田呂氏鄉約。庶可變而厚。論居常處困。誦伯夷。叔齊餓於首陽之下。民到于今稱之之語。便覺自警拔。論居敬。自謂於專一上見功。覺心中無甚放僻邪侈之私。論窮理。自專於精義處得力。見得進退辭受之節。頗分明。不敢放過。大約懋之學。粹然一出於正大人。皆以其不盡究於時惜之。蔡清與董遵道書云。今聽先生一人。堅臥林下。保全令德。斯亦足壯士風。淑士類。而爲國家添一人物。雖然。託老。釋以亂正學。假易簡以壞聖功。天下且羣然而信之。余喬云。謂程朱之後。純無一語出於己。固難稱爲自得之學。謂程朱論多非是。則其狂悖僭妄。不自量度。可勝歎哉。先生學術宗依。遠惟程朱。是敬是信。不敢少有違戾。其視近時敢爲異論之人。匪徒獲罪程朱。而亦先生之罪人也。楊廉曰。儒雅如黃未軒。豪邁如莊定山。先生則斂華就實。風

節如羅一峯。習靜如陳白沙。公則既博復約。嗚呼。在漢東都。爲危言之叔度。在宋鵝湖。不立異說之伯恭。湛若水傳。

湛若水。字元明。廣東增城人。性穎敏。自少知學。宏治五年壬子。以書魁其鄉。尋從陳獻章遊。卽以隨處體認天理爲宗。獻章曰。此子參前倚衡之學也。自是潛心默會。日有所得。遂焚去路引。誓不復仕。後以母命出。僉事徐紘爲勸。駕赴南雍。祭酒章懋試。辟而益背論。甚奇之。十八年乙丑。會試第二名。賜進士高等。選爲翰林庶吉士。擢編修。時王守仁在吏部。相與倡道京師。塲屋所取。士修撰呂柟。主事王崇輩和之。道價日著。學者稱甘泉先生。久之。使安南。册封國王黎暉。卻其餽不受。正德丁亥。奉母喪歸葬。荷塘廬墓三年。墓產瑞瓜。人以爲孝感所致。卜築西樵。多士來學。支與日給錢米。開禮舍於僧寺。至齋戒三日。習禮成而後聽講。講必端坐。觀心不遽與言。嘉靖初。趨朝。考九年滿。陞侍讀。尋進南國子祭酒。開講院。與諸生論學。刻心性圖說。尋陞禮部侍郎。先後有勳聖學等疏。凡數十上。竟爲獻納。編又做大學衍義補。作格物通。以進。累遷南禮吏兵三部尙書。置新泉三山二莊。講學於新泉三山二書院。年逾七十。乞致仕。許之。所著有遵道錄。樵語。古文小學。四書測。二禮經傳測。春秋正傳。古易經傳測。學庸訓測。前後詩文集。不啻千百卷。平生足迹所至。必建書院祀獻章。雖田莊亦然。嘗於所居天關精舍。參贊尙書府。立祀聖所。置倉廩。館穀多士。又至衡山。建白沙書院。置田五頃。歸復取白雲山爲白沙祠。平生志篤而力勤。無處不授徒。無日不講學。從遊者殆徧天下。所論以自然爲本體。以勿忘勿助爲工夫。大抵得之師門爲多。獻章嘗謂曰。人與

天地同體。四時行。百物生。若滯在一處。安能爲造化之主。善學者常令此心在無物處。便運轉耳。學以自然爲宗。不可不理会。又曰。學以自然爲宗。承喻日來頗有淡泊處。譬之適千里者。起腳不差。必有所到。自然之樂。乃真樂也。宇宙間復有何事。又示以詩曰。有學無學。有覺無覺。千金一瓠。萬金一諾。天命流行。真機活潑。水到渠成。鳶飛魚躍。德山莫杖。臨濟莫喝。萬化自然。太虛何說。繡羅一方。金針誰撥。其得於指授者如此。卒年九十五。若水在南都久。春時勸農。躬詣田畝。閔俗侈汰。定喪禮之制。頒行之。費省而禮舉。都人無不樂從。有劉公廟聚衆燒香。爲沈其像於江。絕衆惑。貧者或以火葬。爲買地城四郊。爲漏澤園。以處之。且置田供時祀費。盡毀私創庵院。僧尼勒令歸俗。後生子多以洪名者。

羅僑

羅僑。不知何許人。孝宗時。嘗爲台州府知府。平生潛心理學。所養甚正。著有潛心錄。所論性理之懿。極有旨趣。有云。每見青天白日。便看吾心光明。何如。每見雲影蔽日。便看吾心昏蔽。何如。每見草木生意。便看吾心生意。何如。每見禽魚自適。便看吾心自適。何如。又云。人於一日。自朝至夕。由興至寢。不可有一毫惡念。念惡一萌。卽斬絕之。使根株悉拔。不可一息無善念。善念一萌。卽充廣之。使若泉達火然。其體驗於心身者如此。可以爲儒矣。

陳茂烈傳

陳茂烈。字時周。莆田人。宏治九年進士。先瑞安人。戊籍興化。遂居梅峯。髫年喪父。繼戎役。勵志邁俗。不與

羣兒伍。晝入公署。夜歸讀書。祖母憐其孱弱。亟止之。乃篝燈默誦不輟。年十八。慨然歎曰。善學聖人者。莫如顏曾。顏之克己。曾之日省。豈非學之法。與。作者克錄。自考。進士時。奉使廣東。師事陳獻章。語累日。甚喜。獻章曰。學須靜。一。退作靜思錄。爲吉安推官。持大體。開至誠。通以民彝之懿。豪家利寡婦財。評許婚。斷從守志。夫制悍妻。嫁有娠妾。既生子。歸承其業。族人爭之。驗與姊類。爭者愧服。時郡守嚴擊強豪。徐輔以寬。常道尙深刻。徐開解得寬。選授監察御史。袍服樸素。騎牝馬。身若無官者。有尙書子受賂。崔志端以道士起。皆根植自固。言者屢劾不動。茂烈劾尙書去。崔竟留。遂以母老乞終養。力供甘旨。短牀敝席。不辨一蚊帳。身治畦。一蒼頭給薪水。出則自執小油蓋。妻子服食蠶織。一女適彭惠安孫輔。嫁具涼薄。皆人甚不堪者。茂烈泰然自足。日坐斗室。究極五經四書之旨。體驗身心。隨得隨錄。常曰。儒有向上工夫。詩文特土直耳。正德中。吏部以公養母清苦。奏改爲晉江縣學教諭。資其祿。疏辭不拜。既又援侍郎潘禮例。奏給月米。上嘉茂烈清苦。令有司月給米三石。以資孝養。又辭曰。陛下隆孝理之化。長清白之風。下逮微臣。亦荷收恤。豈獨臣一家之幸而已。第念臣家素貧寒。食本儉薄。故臣母自安於臣之家。而臣亦得以自遣其貧。非誠有及人之廉。盡己之孝也。古人行傭負米。皆以爲親。臣之貧尙未至是。而臣母鞠臣守貧居寡。艱苦獨至。臣雖勉盡心力之義。竟未酬涓滴之恩。且母年已八十有六。來日無多。返哺之情。固欲自盡。資養月米。心竊不安。奏上不允辭。茂烈以母年九十。未有嗣息。日夜爲憂。方抱疾而母卒。強起號哭寢地。疾轉亟。卒。林見素爲治殮具。立其族子遠揚爲後。都御史王應鵬薦公廉約如石守道。而所養獨純。孝行如徐仲

車而所處尤困。詔表宅里曰孝廉。恤其家。見素曰。陳公領悟既深。而充養亦熟。隱衷粹行。對天地。質鬼神。鄉國敬服。殆黃憲管甯之流也。

羅欽順傳

羅欽順字允升。江西泰和人。性恬雅粹愨。登宏治癸丑進士。及第第三人。授翰林編修。先是不知所謂禪。居京師。偶遇一老僧。因向叩佛。由僧漫舉禪語爲答。云佛在庭前柏子樹。欽順意其必有所謂。遂爲之構思。徹夜不寐。達旦。攬衣將起。則恍然而覺。流汗通體。若有所得。既而取禪家證道歌讀之。如合符節。自以爲至奇至妙。天下之理。莫或加焉。凡幾年。已而漸歸於聖賢之道。多有覺處。至宏治十三年。遷南京國子監司業。尤篤志問學。凡五經四書及濂洛關閩諸大儒語錄。未嘗一日去手。久之。喟然嘆曰。昔兩程張朱。早歲皆嘗學禪。亦皆究其底蘊。及於吾道有得。始大悟禪學之非。而盡棄之。非徒棄之而已。力排痛闢。又曰。朱子自象山爲禪學。蓋見之審矣。自後欽順始悔前所見者。乃此心虛靈之妙。而非性之理者。遂研磨體認於道心人心之說。盡心知性之說。理氣性命。神化陰陽。皆極其旨奧。正德三年戊辰。以忤閹瑾落職爲民。庚午。還職。辛未。轉南京太常寺少卿。晉南京吏部右侍郎。十六年辛巳春。召爲吏部左侍郎。條奏久任良法。併及超遷之說。與久任之法。相爲流通。超於前。自可責其後之久。超於後。固無負其前之淹。時不能用。嘉靖元年。陞南京吏部尙書。以父年踰八十。乞休歸養。尋以父憂服闋。起爲禮部尙書。改吏部尙書。皆力辭致仕。許之。欽順嘗追悔早年受學。不過爲利祿謀。年幾四十。始慨然有志於道。雖已脫然。自謂苟

能粗見大意。亦庶幾無負此生。而官守拘牽。加之多病。工夫難得專一。及是冢宰命下。人多榮之。欽順力不肯拜命。家居謝客。不涉城市。又潛心二十餘年。每日道之在是。乃爲有以自信者何。蓋此理之在心目間。由本而之末。萬象紛紜而不亂。自末而歸本。一真湛寂而無餘。惟其無餘。是以至約。乃知聖經所謂道心惟微者。其本體誠如是。故人心道心之辨明。然後大本可得而立。大本誠立。酬酢固當沛然。是之謂易簡。而天下之理得。尋卒祭葬如例。諡文莊。欽順信道最篤。一於尊朱子。以上遡孔孟之傳。遂得其正宗。又於諸佛書尤多博覽。欽順以其似欲亂我之真。常辭而闢之。曰。釋氏明心見性。與吾儒之盡心知性相似。而實不同。蓋虛靈知覺。心之妙也。精微純一。性之真也。釋氏之學。大抵有見於心。無見於性。故其爲教。始則欲人盡離諸相。而求其所謂空。空卽虛也。既則欲其卽相卽空。而契其所謂覺。卽知覺也。覺性既得。則空相洞徹。神用無方。神卽靈也。凡釋氏之言性。窮其本末。要不出此三者。皆心之妙。而豈性之謂哉。又云。張子韶以佛語釋儒書。改頭換面。將以愚天下之耳目。其得罪聖門實甚。而近世之談道者。或猶陰祖其意。往往假儒書以彌縫禪學。律以春秋誅心之法。吾知其不能免。先是陳獻章好隱談學。人疑其禪。獻章之言曰。夫道至無而動。至近而神。又曰。致虛所以立本。欽順深誣其說之禪。獻章之門人洪若水嘗致書欽順曰。公指白沙先師爲禪。水謂白沙先師非禪也。先師教人。初以孟子必有事焉而勿正。心勿忘。勿助。長爲標的。又以明道學者先識仁一段。未亦以孟子此段爲存之之法。及水自思得。因稟問天理二字。最爲切要。明道云。吾學雖有所授。然天理二字。卻是自家體貼出來。李延平教人默坐。澁心體認天理。水以

爲天理須切體認。日用間隨處體認天理。便合得。先師喜曰。日用間隨處體認天理者。此輩何患不到聖賢佳處。夫禪者以理爲障。先師以天理之學爲是。其不爲禪也明矣。欽順復書曰。隨處體認天理一言。孰云非是。顧其所認以爲天理者。未見其真切也。僕安得而不疑乎。未幾。王守仁又倡致良知之說。天下高明士多從之者。守仁之言曰。吾心之良知。卽所謂天理也。致吾心良知之天理於事物。則是事物皆得其理也。致吾心之良知者。致知也。事事物物各得其理。格物也。欽順以爲此非學。欲致書辨之。而守仁卒。因嘆曰。王、湛二子。皆與余相知。於王蓋嘗相與論文而未細。忽焉長逝。可惜也。湛則會晤絕少。音問亦稀。然而兩家之書。余皆得而覽之。區區之見。終未相合。蓋憂彼說長。而正學愈漸滅矣。世之士有喜禪者。聚徒談禪。而程、朱蒙詬。於是欽順又著論曰。近時以道學名者。秦然自處於程、朱之上。然究其所得。乃程、朱早嘗學焉。而竟棄之者也。夫勤一生以求道。乃拾先賢所棄以自珍。又從而議其後。不亦可嘆耶。先生著有困知記。多辨近時學術之非。

胡鐸傳

胡鐸。字時振。餘姚人。性質直謹。厚言如不出諸口。晚造詣正。大力排異說。先是以易領浙江鄉薦第一。登宏治乙丑進士。選庶吉士。改刑科給事中。正德初。以忤閣瑾出。爲河東運副。勵清節。變頽風。轉福建僉事。去之日。民咸焚香注水禱之。爲立生祠。入閩。守建甯。獎儒雅。雪冤獄。政迹卓然。巡按御史疏其事二十條。聞於朝。下爲政式。不報。三年滿。進副使。督福建學。設科條。正風俗。士子翕然丕變。人稱胡道學。又謂小夫。

子在闕時同列有以術試鐸者。鐸不疑其詐。久之。且曰。胡公篤實。真古君子也。嘉靖二年癸未。以母憂去。徒跣奔喪。哀毀踰制。坐臥一小樓。三年。足跡不至城市官府。服闋。除順天府尹。改南京太僕寺卿。居滁陽。地僻事簡。閉門著述。作典學說的。異學辨。及天文地理律呂醫卜兵陣諸書。各有辨正。十二年丙申。秋七月。寢疾。忽舍後星殞。紅光燭天。翼日。鐸從容衣冠卒於官舍。年六十六。朝廷遣官諭祭葬。大學士顧鼎臣稱之曰。闕邪崇正。如吾時振聖賢之道。有不明者乎。信言篤行。如吾時振聖賢之地。有不到者乎。孫燧每曰。閱公撰書。皆立正心崇正道。講正學。而闕禪佛者也。我朝自薛文清公後。僅見公一人而已。黃子彙曰。文學肖曾子。固篤實如司馬光。房無侍妾。宅無樓臺。信謂趙清獻一人。鐸痛時多宗陸子靜者。倡知行合一之說。作異學辨。爲錄其略。首曰。象山異其所學。好靜厭動。是內非外。心不盡而欲其存。性不知而覘其養。此學之所以爲異也。是以老太極。墨西銘。蔽鋼伊川。而支離其學。又云。昔列禦寇託爲孔子告顏淵之言曰。用志不分。乃凝于神。欲其不分。所以不用也。不用則不知。而自爲無不知也。象山亦曰。人須要用。不肯不用。人須要爲。不肯不爲。而又繼之曰。人皆可以爲堯舜。是以爲堯舜。可以不用不爲爲也。孟子曰。奚有於是。亦爲之而已矣。夫不用而不知。以用近於二。故不用也。不知而不爲。以爲近於用。故不爲也。其功惟在於不用而已。謂之知行同功可也。謂之知行合一可也。然非吾儒之學也。堯性之者也。名其德者。但曰克明而已。舜於禹。始以惟精惟一告之。大學之格致知也。卽惟精也。誠正修身行也。卽惟一也。昔傳說之告高宗。又以非艱惟艱別之。孔子之告哀公。又以三知三行別之。是又其顯然而明較者。烏得而混之。

嗚呼古之人惟恐人之不知而今之人惟恐人之有知其示老氏非以明民將以愚之之意歟或舉象山晚年悔悟書張魏公能致廣大而不能盡精微能極高明而不能道中庸分爲兩截始悟夫知行之爲一而不可分鐸曰程子云涵養須用敬進學則在致知又曰力行先須知夫致廣大極高明者所以存其心涵養也盡精微者致知也道中庸者力行也誠如象山之言則存養無施於靜居之時必待致知力行而復爲之然則君子戒懼於不聞敬信於不言不動者將屬之盡精微耶屬之道中庸耶象山非特欲廢乎知又將并存養者而廢之惟欲歸於不用而已哀哉或曰然則不待存養之定而後致知知之盡而後力行歟鐸曰非也朱子嘗推程子之意矣三者以涵養爲主致知次之力行又次之然亦須一時並行非謂今日涵養明日致知後日力行也或又舉中庸天命以至位育未嘗言知蓋以存省之中自有知象山略乎知而惟從事於存省蓋有得於中庸者鐸曰象山止求於一心之念慮而欲廢其他於此而偶有見焉遂謂知行之功一舉而可以兼得其爲惑也深矣或又舉象山之言有曰踐道則精神又曰惟精惟一須要如此涵養此皆其近理者鐸曰彼以精明生於踐道一卽爲涵養此皆混合之意但讀者不知耳彼雖不廢知而其所知者不由致知而得皆其意見之偏不若不知之爲愈也朱子嘗告張南軒曰子壽兄弟欲盡廢講學而專務踐履卻於踐履之中提撕省察悟得本心此其爲病之大者要其操持謹質表裏不二實有以過人者惜其自信太過規模窄狹不復取人之善將流於異學而不自知耳王守仁翻刻古本大學獨宗陸氏格物之說而營程朱鐸辨曰萬物一源者也象山之學異異於惡物者也惡物不已遂以

格物爲玩物。又以絕物爲格物。以物爲外而欲絕之。則萬物皆非我矣。象山以程子格物之說。徒使人玩物以喪志。嗚呼。自鄒孟氏沒。而大學之道不明。學者茫然。不知所謂格物者爲何事。往往雖有求道之心。而昧所從入。程夫子出。始發其旨以教人。夫然後學者乃知格物所以窮理。如繳而射者。必先明乎的。如跌而行者。必先視乎地。象山反厭窮理之煩。而欲誣其說。何耶。或又引明道嘗以玩物喪志箴上蔡爲言。鐸曰。明道正以其徒務博而不窮天理也。苟博學而篤志切問近思。仁在其中矣。奚其喪。或又曰。象山嘗令徐仲誠思萬物皆備於我。是亦以物爲我有也。何謂外而絕之。鐸曰。孟子云。物備於我。非爲有外也。必心體乎物。而後能誠。象山言我有物。非假乎外也。必心不累物。而復能誠。故其告徐仲誠曰。此事不在他求。只在仲誠身。語則似是而實非也。毫釐之差。已判於此矣。象山以讀書之累心。無異於外物之累心。故欲內絕乎想。外絕乎書。曰。只此是格物。非絕之而何。象山之言曰。汝耳自聽。汝目自明。又曰。此心之存。則此理自明。蓋言吾心與耳。本自有知。豈非釋氏以聞見緣覺爲外。必如亢倉子七竅自覺。五臟所知。方謂之在內耶。程子曰。物我一理。纔明彼。卽曉此也。苟專求之心。而果易簡也。孔子當先爲之矣。何以曰思不如學也。嘗聞讀書窮理之要也。張子曰。書可以維持此心。象山願以爲累心。何也。孔子施教。先之以詩書。子路曰。何必讀書。則佞以絕之。象山乃欲廢書。嗚呼。學之晦也。豈不以多說之亂之也。而誰歟。或人又述朱子與劉子澄書。亦云。始知言語文字之外。別有用心處。是其所見。亦以讀書之能亡羊而去之也。何獨非乎象山哉。鐸曰。朱子答子澄之書。正以其專事編綴異學以爲業。而無日用切己之功。乃託爲自貶之

詞以箴之。觀其前後諸書。豈真欲廢其言語文字耶。或又謂象山之欲廢者。諸儒之傳註也。非古訓也。故常言秦不廢乎道脈。至漢而大壞。故以讀伊川易傳。胡氏春秋傳。范氏唐鑑爲陋說。蓋曰。六經皆我註腳。固已贅矣。又復讀註腳之傳註。不亦糜弊精神矣乎。鐸曰。遺經之難知矣。傳註之翼經也。尙矣。馬遷述古史之言曰。孔子傳禮記。否則儀禮之喪服。非子夏之傳乎。否則大學誠意以下之傳。非曾子之意乎。否則十翼非夫子之傳易者乎。程子易傳序曰。前儒失意以傳言。後學誦言而忘味。予憐斯文之湮晦。將俾後人沿流以求源。此傳之所以作也。若夫漢儒雖非伊洛之比。其於傳經。明制度。辨名物。功亦博矣。使當時而無此。則後世亦將何所取以證而折衷之。且老莊之教。尙虛無。滅禮法。爲我之過。而不擇義利。惟適意者取之。楊氏申韓。皆其流也。秦以其教而遂至焚書。晉以其教而基亂華之禍。象山不此之追議。而反罪吾儒。且曰。漢禍甚於秦。亦見其自比於僭王。猶夏說淫亂而助邪以攻也。象山之欲廢書。我知矣。蓋其於書。初不甚解。虛乎有問之不能答。而見詘於門人也。乃豫爲是言以禁止之。學者歆其易簡之說。而靡然趨之。卒至塗其耳目。而不知其賊夫人之子也。象山常教人曰。格物者研究其理。但不究於物。而物究於心。去其人欲。而存其天理。噫。研而究之者。擇善之功。去而存之者。克復之事。象山不知天理人欲者。焉能去而存之。何也。象山以天人而分理欲。非也。象山謂樂記論語分別天人理欲之言。皆根於老氏。則其於理欲之介。混淆而不欲區別者矣。平居飽食終日。無所用心。不豫究其孰爲天理。孰爲人欲。至於酬酢之間。須臾之頃。方欲去之存之。其爲義外而襲也甚矣。烏得以是而反譏訕夫精義者哉。自象山之倡爲是

說也。而近世之解夫格物者，遂恣竊橫議，而莫可禁止。惟訓格爲正，取尙書格正。孟子格其非心爲義，以爲有證而實非。聽者是之，而不知其悖理甚矣。或又曰：格物者非正心也，所以誠其意也。象山有言曰：誠意者毋自欺也。總脩身齊家治國平天下之要也。夫物有所蔽，斯意有不誠。惟格而去其蔽，則誠而明矣。是得其用功之要者。何子不憚煩，而必瑣瑣之窮理之務耶。鐸曰：此正象山之學之蔽也。非大學之道也。今如其言，以誠意代乎格物，而移於致知之前，以致知不爲擇善，而移於固執之後，非其序矣。且自誠而明者，非性之而聖者乎。聖人無欲者也。既曰猶有欲之可去，則未至於聖矣。欲其自誠而明，有是理乎。而其異學辨下篇，力辨陸學之雜於佛。老。鐸曰：禪家之言曰：見性是佛。作用是性。夫天命者太極之流形也。其在於人爲性，卽所受於天之太極也。而禪以作用者當之。象山於禪學中，認取其昭昭靈靈能作用者爲太極。是以氣爲性矣。是以形而下者爲道矣。至其論學，惟曰端坐拱手，完聚精神，是其所以爲學者。惟欲見於己而已矣。又曰：余觀象山自鵝湖辨論之後，亦兩致書於朱子，自訟前日偏見之說，而朱子戲謂其自惹嶺帶來，故其再會之間，辭多斬屈。余竊意欲有逃焉而未能者也。或有問人於子靜，不謂之禪，而謂之異學者何。鐸曰：禪者靜也。佛老之通學也。象山之學之駁正，韓子所謂雜佛老而言之。張子所謂使儒佛老莊混然一途者。禪亦不足以盡之。二氏之教，虛無寂滅，體若相近，而用則大異。老氏絕念去知，而以微明爲用，是猶役其情於權謀詐術者。釋氏則并其情而滅之。象山凝神爲學，老釋其心，獨儒其言。若良心若仁義，若四端，必以爲口實。聽之似是而非也。虛而不受，寂而不感，於二氏之體，則同之矣。而又以

撿擗乎人爲用。是又純用老子之術。而非吾儒道德齊禮之意矣。或又問象山乃終身不合以流於異者。其故何在。鐸曰。象山嘗自言其性好與人異也。而其所以爲學者。其誤又非一端。昔朱子謂子靜之學。只在不知性有氣稟之雜。余謂此特其一也。又其一乃讀書入門之誤。又其一乃自廣狹人而不知取善於人之誤。又其一以養知卽爲致知之誤。又曰。於其問仁。象山獨謂顏子用力甚難。夫子答之。猶下克己二字。仲弓沈靜寡思。日用之間。自然合道。夫子但告以出門如見大賓數語。嗟夫。同己者則進之。而異己者則退之。象山之見。其異乎人之見歟。

明書卷一百十四

列傳三

儒林傳四

呂柟傳

呂柟字仲木。陝西高陵人。性穎敏。誠確。未總角時。輒有志聖賢之學。雅不喜辭章。嘗居一矮屋。衣冠危坐。日誦六經。性理諸書。雖盛暑不廢。嚴寒則履藉麥草。夜以繼日。潛心通奧。與馬理、康海偕聲價。舉陝西鄉試十名。就禮部不第。入太學。以親喪歸。正德戊辰。舉南宮第六人。賜進士第一。除翰林脩撰。時年三十有四。賜冠服帶履。服若固有。明日有中官來賀。卻之。卽劉瑾也。柟學慕古。是時瑾秉國事。意柟爲鄉人。欲引附己。每啗以卿佐可力致。且授先朝故事。得入內閣典機務。柟屢遜謝之。遂避不與往來。瑾深憾。欲中傷之。會瑾敗得免。九年。在告歸。嘉靖元年。復任修撰。三年。議大禮忤旨。出判解州。六年。陞南京吏部考功司郎中。九年。轉南尚寶司卿。十三年。陞南京太常寺少卿。十四年。轉南國子監祭酒。爲四子抄釋。以示諸生。蓋彙周、程、張、朱粹言也。篤行率人。勤於訓迪。每有條約。動遵古誼。經書子史。博讀詳玩。並有發揮論者。謂其不愧成均重任云。十五年。陟禮部侍郎。十八年。致仕居家。凡四年卒。年六十四。所著有四書因問、五經

說史館獻納奏稿。涇野文集十四種。椿之學大約從克己務實行。至於闢異學之非。則見道甚卓。椿曰。所謂格物。在隨時隨事處格。念之所起。身之所動。事之所接。皆是要窮。然鳥獸草木。元初與我也。是一氣生的。怎麼不要格。如伏羲亦嘗觀鳥獸之文。但遠取諸物。必須近取諸身。纔是。若離卻己身。馳鳥獸草木格。做甚。又曰。聖賢之道。雖千言萬語。不能盡。切於今日之急務者。惟有二焉。一曰改過。二曰甘貧。又曰。今之學以甘貧爲本。改過爲急。故能行焉。講知行之不合。無損也。苟不能焉。雖講知行之合。無益也。或問陳白沙之樂。似與孔顏之樂。微有不同否。椿曰。孔顏之樂。只憂處解不來。便是樂。故曰發憤忘食。樂以忘憂。又曰。樂以天下。憂以天下。如今人言樂。只在推開了事去樂。其流之弊。便是晉人竹林之風矣。時陸伯載宏齋。鄒謙之東郭。皆蚤從守仁遊者。二人數以守仁之學難椿。椿曰。子敢以陽明之學爲是乎。子敢以陽明之學爲不是乎。二人曰。如子之言。不幾於持兩端乎。椿曰。不然。昔者先正以一言一字發人。而況陽明之學。痛世俗誦章之煩。病世途勢利之爭。乃窮本究源。因近及遠。而曰行卽知也。知本良也。亦何嘗不是乎。但人品不同。受病亦異。好內者不可與言禁酒也。好奕者不可與言禁財也。故夫子勸牛之躁言。色商之直義。達師之務外。懼由之好勇。故德無不成。材無不達。如今病瘡。有在手者。有在足者。有在肩背者。有在面目者。皆足以滯一身之氣。而壅百骸之腫。所病去。則全體無不安矣。故受藥亦異。而起其病亦不難。故有知而後能行者也。猶目見而後足亦走。未有不見而能走者也。若曰見守齊舉。知行並進。此惟聖人能。故陽明之學。中人以上。雖或可及。中人以下。皆茫無所歸。故論語不道也。亦何嘗盡是乎。雖然。自夫俗儒。

而言。忘其良知。而又不以行之爲急也。其弊至於戕民而病國。則陽明之學。又豈可少乎哉。又曰。古之異端。猶可闢。猶異類也。今之異端。不可闢。則同類也。挾術數者。世稱才儒。閑詩賦者。世稱雅儒。記雜醜者。世稱博儒。趨時競勢者。世稱通儒。談元者。世稱高儒。臨事含糊淹滯者。世稱老儒。蹈襲性命之言者。世稱理儒。斯非皆誦孔子之書之徒者乎。然誤天下蒼生者。皆此異端也。老佛其細。諸又曰。達腰面壁之事。學亦良苦。是蓋入定之功。然使其心有所定。雖終日入市朝。猶寂寂爾。使其心無所定。雖終年面壁。猶擾擾爾。王學謨云。薛文清公有言。汨溺於聲利之中而不覺。何道之敢言。言之適足以爲口耳之末耳。而涇野呂公亦云。只不恥惡衣惡食。做將去。便是實學。由是觀之。在彼不在此。余觀兩公爲人。潛心聖學。不求人知。嘗迹其行事。一不屈金英。一不附劉瑾。至於解經訂傳。安貧守道。幾微不爽。所謂儒宗也。

王艮傳

王艮。字汝止。秦州安豐場人。場俗故業鹽。無宿學者。而汝止孝出天性。寒日見親。以急務盥冷水。乃痛哭曰。某爲子。而令親天寒盥冷水乎。何用人子爲。出代親役。入掃舍奉席。晨省夜定。如古禮。唯謹。久之。行益純。忽心量洞明。悟性無礙。而天地萬物爲一體。自此行住語默。皆在覺體中。題其坐曰。正德六年閒。居仁三月半。卽悟入時。已能如此。於是謝役。秉禮爲儒者。而人未之識也。益有年。王守仁以副都御史撫江西。江西人有客安豐者。聞艮說論語。詫曰。此絕類。王巡撫公之談學。艮乃大喜。卽日造江西。服古冠服。執木簡。賦二詩爲贊。以賓禮見。守仁異之。下階迎入。艮長揖上坐。論學居數日。有省。曰。吾人之學。飾情抗節。矯

諸外先生之學精深極微得諸心者也。反服執弟子禮已守仁居越時時造越中請質乃太息曰是某之罪也夫何風之未遠也辭還家駕小車從二僕北行所至以師說化導所至人聚觀聽者無慮千百抵京同志相顧愕眙共匿車勸止留一月竟諧衆心而反而良意終遠矣良骨剛氣和性靈朗徹見人眉宇卽知其所存學者意慮稍疎漏見之不敢正而視也接引人無閒僕隸雖顯貴悍戾不說學者聞其言皆愧悔謝不及有蓄疑不解者旁及他事使本疑頓解機應響疾諸聲應氣求者望庭爲歸與剖析精審莫不虛往實還而喜溢色眉也良之學以悟性爲宗以反己爲要以孝弟爲實以樂學爲門以太虛爲宅以古今爲旦暮以明學啓後爲重任以九二見龍爲正位以孔氏爲家法其言曰只心有所向便是欲有所見便是妄旣無所向又無所見便是無極而太極又曰知愚夫愚婦與知與能與鳶飛魚躍同一活潑潑地則知性矣語持切大嚴者曰君子不以養心者害心有問放心難收者呼之輒應而起曰汝心見在更何求乎曰卽事是心更無心矣卽心是事更無事矣其郡守召辭以疾謂門人曰致師而學學不誠矣往教教不立矣不往是不仁也必往是不智也此道也或問良何不仕曰吾無往而不與二三子者是某之仕也或勸之著述不應御史洪垣搆舍居其徒御史吳悌抗疏薦不報卒大學士趙貞吉謂良爲契聖歸真生知之亞晚作格物要旨勉仁方諸篇學者稱爲心齋先生生五子衣襪裋補雍皆有立而襲最知名襲字宗順學者稱東崖先生生九齡隨父之守仁所士大夫會者千人守仁命童子歌多囁嚅不能應宗順意氣恬如吟聲若金石守仁召視之知爲良子詫曰吾固知越中無此兒也輒奇而授之學是時守仁左

右多名宿。宗順以守仁命。悉師事之。踰十年歸。安已之越。復留者八年。師友相陶汰。氣竦神涌。耳新目明。由枝葉而達其根。派流而溯其源。沛如也。久之守仁卒。良始授徒淮南。宗順相之。覃思悠然。講論鏘然。良沒。宗順望日隆。四方聘以主教者。沓至。歸則隨村落小大。扁舟往來。歌聲與林樾相激發。聞者以爲舞雩詠歸之風。復出。耿天臺嘗晤宗順。迎謂曰。衆多君解了。於道宜得。君自謂若何。曰。道者六通四闢之塗也。藉謂我有之。將採取焉。而又曰。我能得之。則已離矣。聞者大賞其言。至金陵。與多士講習。連榻累旬。博問精討。靡不愜其欲。以去。或問學何以曰。樂。又問曰。樂者心體也。有不樂。非其體也。吾求以復之而已。然則如之何。而後樂。曰。吾體自樂。曰。如之何。而後樂。是加於體之外也。然則學可廢乎。曰。否。莫非學也。而皆以習此樂也。樂者樂此學。學者學此樂。吾先子蓋言之矣。樂有辨乎。曰。有所倚而樂者。樂以人也。喪其所倚。則不樂。無所倚而樂者。樂以天也。舒慘失得。欣戚榮悴。無之而不可。曰。無倚而樂。非樂道邪。曰。樂卽道也。而曰樂道。是牀上之牀也。學顧止此乎。曰。孔顏曰不改其樂。曰樂在其中。於此蓋終身焉。而何以加諸。然則何以曰憂道。曰。君子非以外物爲戚戚也。所憂者道也。憂道者。憂其不得乎樂也。云爾。居恆不煩繩削。而動應矩矱。非其義。千金至前。不一盼也。喪祭必遵古禮。建先祠。置祭田。月朔率子弟肅衣冠致奠。隨考一月中所爲。竟日乃罷。蓋良以修身格物爲鵠。宗順嚴取。敦孝弟。聯宗族。關於行誼者。毛髮必謹。以薦召用。宗順堅臥自如。臨終屏婦女。毋使近。諭門人子弟親賢講學。語不及私。良之與從遊者甚衆。推馴謹者。以林春爲第一。

林春傳

林春字子仁。秦州人。春生平束脩之間。畏之若包直。行必愜人情之所安。故不爲崑崖斬絕之行。言必衡乎力。故不爲要眇浮闊之言。於世紛華盛麗。環巧慧辯。未嘗一有濡賦也。正德中。登進士第。累官文選郎中。吏部稱文選至要重。故峻其門第。雖親故不往拜。春獨門無留賓。同志中雖名位絕不相埒者。俊俊下之。惟謹。出部則徧走刺諸賓客。夜則挾衾被往宿觀寺中。講學竟夕以爲常。其論學輒曰。吾師心齋說如是。惟恐人之不入。意烝烝如也。而同志日臻。是時搢紳士以學萃京師者數十人。其聰明解悟。能發揮師說者。推山陰王畿。志行惻怛。則推春與吉水羅洪先。洪先於朋友中最沈密。子仁猶而疵之。以其露才也。然春本以長厚清苦。謹繩墨自立。日以朱墨筆點記其意向。臧否醇雜自程度。而時學微本體益精。頗以春爲未至。卽春亦自歎曰。此治病於標者也。然其後蕩者失所歸。而春終以質行名。春官吏曹久。以母病謝歸養。掌選事。慎擇監司守令。而賢同志者薦進之。恐後。其論選曹之職。上欲以其心通於君。相與冢宰之心。下欲以其心通於選人。與天下人之心。相冢宰之心。未必皆選人與天下人之心。選人之心。未必相冢宰之心。誠令相冢宰之與天下人之心合。則吾職舉。吾志行矣。其自任如此。

董濤傳

董濤字蘿石。海鹽人。家約好學。年六十有八。以能詩聞江湖間。與其鄉之業詩者十數輩爲詩社。旦夕吟詠。至廢寢食。遺生業。時俗共非笑之。不顧以爲是天下之至樂也。已遊會稽。聞王守仁講學山中。以杖肩

其瓢笠詩卷訪之入門長揖踞上坐守仁異其氣貌且年老矣禮敬之詢其名曰董蘿石守仁故聞之與之語連日夜灑退謂何秦曰吾見世之儒者支離瑣屑修飾邊幅爲偶人之狀其下者貪饕爭奪於富貴利欲之場而常不屑其所爲以爲世豈真有所謂聖賢之學乎直假道於是以求濟其私耳故遂篤志於詩而放浪於山水今吾聞王子良知之說而忽若大寐之得醒然後知吾向之所爲日夜敝精勞力者其與世之營營利祿之徒特清濁之分而其間不能以寸也幸哉吾非至於王子之門則幾於虛此生矣吾將北面王子而終身焉得無以旣老而有所不可乎秦起拜賀曰先生之年則老矣先生之志何壯哉入以請於守仁守仁喟然嘆曰有是哉吾未或見此翁也雖然齒長於我矣師友一也苟吾言之見信奚必北面而後爲禮乎灑聞之曰王子殆以予誠之未積歟辭歸兩月乘其瓢笠持一縑而至謂秦曰此吾老妻之所積也吾之誠積若茲縷矣王子其許我乎秦入以請守仁曰有是哉吾未見此翁也今之後生晚進苟知執事爲文辭稍記習訓詰則已侈然自大不復知有從師學問之事間有或從師問學者則闕然共非笑指斥若怪物翁以能詩訓後進從之遊者遍江湖蓋居然先輩矣一旦聞予言而棄去其數十年之成業如敝屣遂求北面而屈禮焉非天下大勇其孰能與於此則如蘿石固吾之師也而吾豈足以師蘿石乎灑曰甚哉王子之拒我也吾不能以俟請矣入而強納拜焉守仁固辭不獲則許之以師友之間與之探禹穴登廬峯陟秦望尋蘭亭之遺跡徜徉於雲門若耶鑑湖剡曲灑日有聞益充然有得欣然樂而忘歸也其鄉黨之子弟親友與其平日之爲社者或笑而非之或爲詩而招之返且曰翁老矣何自苦

若是邪。灑笑曰。吾方幸逃於苦海。方知憫若之自苦也。願以吾爲苦邪。吾方揚鬢於渤海。而振羽於雲霄之上。安能復投網罟而樊籠乎。去矣。吾將從吾之所好。自號曰從吾道人。後歸家。以講學老子穀。仕至漢陽知府。亦精於名理。著有四存稿。

王畿傳

王畿字汝中。浙江山陰人。學者稱龍谿先生。正德嘉靖間。王守仁講學。以致良知爲宗。郡人駭而不信。畿首往授業焉。畿弱冠。以高才。領鄉薦。士望之爲去就。及是以所聞出。爲諸士言。願從者日衆。嘉靖癸未。試禮部不第。立取京兆所給路券。焚而歸。卒業於師門。師爲治靜室居之。踰年。乃曰。致良知三字。誰不聞。信得及者。惟我也。丙戌。復當會試。守仁命往。不答。守仁曰。吾非欲以一第榮子。願吾之學。疑信者半。而吾及門士。樸厚者未通解。穎慧者乏沈毅。能闡明之者。無踰子。今宦學者咸入都門。子曷往焉。畿曰。諾。在途。自良知外。口無別談。自六經四書傳習錄外。手無別檢。間有及時藝者。曰。業已忘之矣。抵都門。歐陽南野。魏水洲。王瑤。湖泊。郡縣入覲。諸同志爭迎畿。與相辯證。大爲推服。入場屋。所爲文直寫己見。不數數於時格。識者謂此非可以文士伎倆較也。拔置高等。而同門錢緒山亦在選。時閣部大臣多不喜學。公語緒山曰。此非吾輩仕時也。不就廷試而還。時師門來學者衆。守仁不能徧指授。則屬畿與緒山分教之。而畿所與起爲多。守仁論學。每提四句爲教法。無善無惡心之體。有善有惡意之動。知善知惡是良知。爲善去惡是格物。緒山謂此是師門定本。不可更易。畿謂夫子隨時立教。謂之權法。未可執定。體用顯微。只是一機心。

意知物。只是一事。若悟心是無善無惡之心。意卽是無善無惡之意。知卽是無善無惡之知。物卽是無善無惡之物。蓋無心之心。則藏密無意之意。則應圓無知之知。則體寂無物之物。則用神天命之性。神感神應。惡固本無。善亦不得而有也。是謂無善無惡。若有善有惡。則意動於物。非自然之流行。著於有矣。自性流行者。動而無動。著於有者。動而動也。意是心之所發。若是有善有惡之意。則知與物一齊。皆有。心亦不可謂之無矣。緒山曰。若是是壞師門教法。非善學也。畿曰。學須自證自悟。若執權法以爲定本。未免滯於言詮。亦非善學也。時守仁將有兩廣之行。緒山謂曰。吾二人所見不同。盍相與就正焉。晚坐天泉橋上。因各以所見請質。守仁曰。正要二子有此一問。吾教法原有此兩種。四無之說。爲上根人立教。四有之說。爲中根以下人立教。上根之人。悟得無善無惡之體。便從無處立根基。意與知物。皆從無生。一了百當。卽本體便是工夫。頓悟之學也。中根以下之人。未悟本體。未免在有善有惡上立根基。心與知物。皆從有生。須用爲善去惡工夫。隨處對治。使之漸漸入悟。從有歸無。復還本體。及其成功一也。汝中所見。是接上根人教法。德洪所見。是接中根以下人教法。汝中所見。我久欲發。恐人信不及。徒爲躡等。今既說破。亦是天機該發。滯時。但吾人凡心未了。雖已得悟。不妨隨時用漸修工夫。不如此。不足以超凡入聖。所謂上乘兼修中下也。德洪資性沈毅。汝中資性明朗。故其學亦因其所近。若互相取益。使吾教法上下皆通。始爲善學耳。守仁發舟。畿與緒山追送嚴灘。復扣元旨。守仁舉佛家實相幻相之說。詔之。畿獨旁語曰。心非有非無。相非實非幻。畿著有無實幻。便落斷。辟之弄丸。不著一處。不離一處。是謂元同。守仁亟可之。守仁至洪都。

鄒東郭暨水洲南野率同門三百餘人請益。守仁曰：吾雖出山，汝中與同志居里究竟此事。諸君只裹糧往浙，相與質之，當有證也。明年守仁平思田歸，卒於南安。畿方偕緒山赴廷試，聞變渡江，復返迎至嚴灘。與緒山議服制，緒山以爲父母在，麻衣布經，弗敢加焉。畿請服斬衰以從，於是共奔至廣信成喪，扶柩歸越。經紀喪事，廬於墓，定服心喪三年。建天真書院於省，肖守仁像其中，且以館四方來學者。歲舉春秋仲丁之祭，無間及門私淑，皆以期集祭畢，分席講堂，呈所見，有畿取正焉。心喪畢，壬辰始赴廷對，授南職方主事，尋以病乞歸。病已待補，時相夏言議選宮僚，其增儀制，郎吳春、畿門生也。首以畿薦，言曰：吾亦聞之，但恐爲文選所阻，一往投刺，乃可。畿曰：補宮僚而求之，非所願也。言怒曰：人投汝懷，乃敢卻耶？若負道學名，視我爲何如人？遂大恨。補南武選，會三殿災，詔求直言，六科疏薦王畿，學有淵源，宜列清班。備顧問，言詆爲僞學而罷。薦首吏科都給事戚賢官，乃再疏乞休，後以考察罷歸。孳孳以講學爲務，所至接引無倦色。自兩都吳楚閩粵，皆有講舍。江浙尤盛，會常數百人，年八十餘，猶不廢出游。有止之者，輒對曰：不肯豈真好勞？但念時常處家，以習心對習事，因循隱約，有密制其命而不自覺者。纔離家出遊，精神意思，便覺不同。與士大夫交承，非此學不究，與朋儕酬答，非此學不談。晨夕聚處，幹辦此一事，閑思妄念，與世俗態無從而入。蓋欲究極自己性命，自然不得不與同志相切磨。若同志中因此有所興起，欲與共了性命，則是衆中自能取益，非吾有法可以授之也。又曰：不肖百念已灰，而耿耿於心，不容自己者有二：師門宗說，幸有所聞，常年所遊，思得一二法器，相與證明，衍此一脈。天壤悠悠，誰當負荷。六經四書之文，厄於後

儒之憶測附會。道晦學荒。蓋千百年於茲矣。先師首倡良知之旨。千聖學脈。賴以復續。不肖晨夕參侍。謬承受記。時舉六經疑義。而相指授。欣然有契。稽諸遺編。所可徵者。十纔一二。衰年日力有限。若復祕而不傳。後將復悔。師門之罪人也。思得偕同志數輩。相與辯析折衷。開舉所聞。編摩纂輯。勒爲成典。藏之名山。以俟後聖於無窮。豈惟道脈足徵。亦將以圖報師門於萬一也。萬曆癸未卒。年八十六。

鄒守益傳

鄒守益。字謙之。安福人。父賢。進士。仕至福建按察司僉事。守益年十七。舉江西鄉試。正德六年辛未。會試。王守仁爲同考官。賞識之。拔第一。廷試及第。第三人。授翰林編修。踰年告歸。一意問學。嘗讀中庸。嘆曰。程朱補格致傳。而中庸首言慎獨。不及格物者。何也。積疑於懷。會守仁開府虔臺。守益往謁。論辯反覆。間風疑冰釋。曰。道在是矣。會宸濠反。周旋兵間者久之。嘉靖初。起官。復謁守仁於越。留月餘。守仁戀戀不能舍。去。門人問之。曰。曾子所謂有若無。實若虛。犯而不校。謙之近之矣。會大禮議起。上書忤旨。下詔獄。謫判廣德州。其蒞官臨民。務以誠心相感。發奸摘伏。人稱神明。顧常自訟曰。如保赤子。愧未能也。撤淫祠。建復初書院。延同門友王良。暨諸賢講學。典禮風動隣郡。徽甯池。太間皆向風志學。六年丁亥。陞南禮部主客郎中。在部日。與湛若水。呂柟相聚講論。辛卯。請告趨會稽。會守仁卒。存撫其孤。聚同門講學於天真書院。戊戌。起南吏部考功郎中。己亥。奉旨簡宮僚。召入爲司經局洗馬。充經筵講官。應詔上薛瑄從祀議。時與徐階。羅洪先。唐順之相資切。士類興起甚衆。居頃之。陞太常寺少卿。兼侍讀學士。掌南院。尋改南監祭酒。於

是明成憲申章程立號冊俾出入相友淑慝相勸歌詩習禮六館士相慶得師居無何九廟災大臣當自陳守益於疏中寓交傲意譏者因中傷之竟解官歸四十一年壬戌年七十二寢疾召家人訓飭之諸子扶坐正衣冠而卒隆慶初贈南京禮部右侍郎謚文莊有文集若干卷嘗語學者曰人心之靈萬古一日目分黑白口辨甘苦鼻別香臭今之人有異三代乎是非在人猶黑白甘苦謂人無是非之心輕其心者也夫孩提而知愛敬入井而知惻隱啣臠而知羞惡豈待教而後能哉心之靈明知是非若黑白甘苦井然不爽自慊自欺在己而已又曰良知一也自其無昏昧謂之覺自其無放逸謂之戒懼自其無加損謂之平等工夫一也所從言之異耳若以覺與平等爲簡易以戒懼爲起非惟誤認戒懼亦誤認覺與平等矣其持論類如此平居與學者接不言而使人意消說者謂溫良恭儉讓之風感人動物有出於言語作爲外者子善太僕卿孫德涵按察僉事德溥太子洗馬皆知學能世其家

羅洪先傳

羅洪先字達夫吉水人自幼端重不爲嬉弄年五歲夢至通衢市人肩摩自知爲夢呼曰汝往來者皆在吾夢中尙自攘攘何耶拍手大笑遂覺以告母李宜人識者知其非埃壻人也十一歲讀古文慨然慕羅一峯之爲人年十五聞王守仁講學虔臺心卽向往遂卑視舉子業常斂目端坐同舍生誚之曰是羅道學先生耶比傳習錄出手抄玩讀至忘寢食年二十二舉於鄉嘉靖八年廷試世宗親閱所對策御批云學正有見言謹而意忠宜擢之首者賜進士及第第一人授翰林修撰明年告歸已而丁外艱哀慟深至

苦塊疏食。不入室者三年。一日讀楞嚴經。得反聞之旨。遂覺此身在太虛。視聽若寄世外。友人觀其顏貌。驚服。忽自省曰。得無誤入禪耶。乃反求諸孔孟。與同郡鄒守益及諸同志。切劘無虛日。改左春坊贊善。疏請豫定東宮朝儀。忤旨罷爲民家居。削跡城市。應酬禮文。辭受取與一裁。以義親賢問道。搗謙求益。未嘗以言詞先人。然瞻其容止者。非僻爲之潛消。遊衡嶽。僧楚石密授以外丹。拒而不受。里中得石洞。故爲虎穴。荆蒨鬱。闢之可容百餘人。命曰石蓮。自是多洞居。時出聚友於雪浪閣。四方搢紳士人請益者日衆。贛江水漲。洪先宅舍漂沒。假宿田家。巡撫都御史馬森以其家故窶。而嘗卻臺省餽坊數千金貯縣帑。檄縣取爲構室助。辭不受。唐順之以兵事起官約借出。洪先曰。天下事爲之非甲則乙。某欲爲未能者。得兄任之。卽比自效可也。奚必我出。時相亦貽書致意。因答書願畢志林壑。年踰五十。謝客屏居。止所製半榻。默坐榻間。不出戶者三年。事能前知。人或訝之。答曰。是偶然。不足道。比順之訃。始下榻哭。邑當造賦冊。念詭瀧重爲民病。戒里中按畝收賦督冊。憲使卽以邑冊請任之。於是宿弊頓革。貧者歡若更生。比疾作。子世先適赴省試。家人問何言。答曰。兒歸。但語以莫厭窮。窮固自好。諸生環侍。以意示令扶起。危坐正中。斂手端默而卒。年六十有一。公學始致力於踐履。中歸攝於寂靜。晚徹悟於仁體。丁巳。提學副使王宗沐訪石蓮洞中。問靜曰。君可聞者。吾之言也。所從此言者。君不得聞也。豈惟君不得聞。吾亦不得聞之。茲非至靜爲之主乎。故曰。君子思不出其位。至靜無私之位也。又曰。戒慎不睹。恐懼不聞。不睹不聞。靜也。戒懼者。不欲馳而離也。又曰。知止而後有定。定而後能靜。知止所以歸靜也。馳而離焉。不可謂之止。故歸

靜言乎其功也。而謂任心之流行以爲功者。吾嘗用其言而未得有得。是以守吾陋而不知變。非敢倡說以眩人也。壬戌。王畿以專靜不達。順應爲疑。訪於松原。問近日行持何似。曰。近覺一切無有雜念。卽感應處。便自順適。王畿曰。工夫有先後否。答曰。卽如均賦一事。終日紛應。吾未嘗憎厭執著。放縱張皇。褻侮偏黨。自朝至暮。惟恐一人不得其所。一切雜念不入。亦不見動靜二境。自謂卽定靜工夫。非專以默坐時爲靜。而動應時無靜也。又曰。世間豈有見成良知。良知非萬死工夫。斷不能得也。人今誤將良知作現成看。不知下致良知工夫。奔放馳逐。茫蕩一生。有何成就。又曰。吾輩所以必須學者。皆緣習氣作梗。要得消磨。蓋自有知以來。積染成習。如油入麪。未易脫離。誠不可以平日虛見爲得乎。須是終日應酬。終日收斂。不使習氣乘機潛發。始不負一生耳。明年。錢德洪以王守仁年譜成請序。乃爲序曰。善學者竭才爲上。解悟次之。聽言爲下。蓋有特妙契而不知反躬。至不副夙期者多矣。甲子。郡節推周宏祖問學。洪先手書冊曰。落思想者。不思卽無。落存守者。不存卽無。欲得此理。炯然隨用具足。不由思得。不由存來。此中必有一竅。生。愈然不類。又曰。此非可以倖至也。卻從尋求中得。由人識取。洪先始歸田。攻苦淡鍊。寒暑躡馬彎弓。考圖觀史。其大若天文地志。儀禮典章。漕餉邊防。戰陣車介之事。下達陰陽卜筮。靡不精熟。至人才吏事。國是民隱。彌加諏詢。曰。苟當其職。皆吾事也。年垂五十。觀時事日非。乃絕意仕進。然饑渴由己。撻市引辜之衷。未嘗一日忘。天下士想望其出。以卜治平。而竟不果。隆慶元年。詔贈光祿寺少卿。諡文恭。

唐順之字應德。武進人。文行爲學者所宗。稱爲荆川先生。嘉靖八年己丑。中會試第一。及廷試。時相使人索試策。欲首擢之。而順之以年少。筮仕。守己當嚴。竟不與。居二甲首。第一則江西羅洪先。一見洪先。知其人品高。因定爲石交。授武選主事。以幼時常竭精神於舉業。幾成瘵疾。而學問文章未成。恐碌碌仕途。無以爲終身自立之地。庚寅。以得歸。值母艱。服闋。起改吏部稽勳主事。調考功。居恆留心有司。稔知某某賢。後至京。以不通關節。留滯不時用。順之卽密白其賢。多擢科道。不使其人知之。時張璠議改部屬官爲翰林。六部首推。拜編修。校對累朝實錄。於時王遵岩。陳后崗。高蘇門。皆以詩文名當世。一見順之作。心服之。而自未敢以爲然也。至其戒行雖苦。終少自得之趣。順之尤自歎。時則王畿居京師。順之見之。叩守仁之說。因留心聖賢之學。校對完。例當陞賞。順之不欲受。又以璠愛己。將遠其嫌。堅告歸。璠緣是怒。以吏部原職致仕。居家貧甚。而於文章之潤筆。弟子之贊儀。未嘗妄取。林下三十年。不役官府一人。不受坊價一緡。會皇太子立。選宮僚。上面諭宰臣。起爲春坊司諫。又以請朝東宮落職歸。自是御一布袍。嘗居宜興山中。與諸生講學。宦於其地者。欲一見之。無從也。四方之行。過是邑者。必先禮於其廬。以得見爲榮。剗薦無虛日。御史舒雲川奏曰。學以聖賢爲法道。以經濟自期。立朝著。遷謬。正直之風。居鄉有廉靖無求之節。乾坤不可無此正氣。朝廷不可無此正人。可謂得其真矣。順之喜靜坐。樂與外方之士遊。曰。方外之學。雖與吾儒不同。而其苦行堅守。洗淨必緣。知自求之身者。固賢於今之儒也。居恆於書無所不讀。無不精究其妙。而於歷算尤精。文章詩賦極於粹精。然嘗曰。此不過應酬之作。更看山中靜坐十年後文字。更何如耳。與

人無間於貴賤貧富。惟投其機。則言笑無厭。有所拂。則嚙然見於顏面。遇之途。亦爲之趨避。曰。匿怨而友。吾弗爲也。其與人言。罄竭底蘊。若無所不盡。事關機要。則深沈隱默。際不可窺。於瑣屑之事。若不甚通曉。至於籌畫世故。則辨悉毫芒。性恬淡。不樂仕進。而見人之瘡痍困頓。又若痲痺切身。思救援之如不及。貌不踰中人。而視天下勢之所至。若萬鈞之壓卵。處之晏然。舉天下之所不敢爲。不能爲者。獨毅然當之。嘗自謂當今少一甯武子之愚。蓋自況也。三十三年甲寅。倭奴起釁。流血東南。順之目擊其變。至不能寢食。適居外艮。而趙文華者。以上命視師海上。來訪。與陳機略。且言非專任時。胡宗憲不能平此寇。文華歸朝。首薦順之。以南部車駕主事起之。進北部職方員外。堅臥不起。上敕巡按官促行。乃赴京。進郎中。陞見後。卽奉命查勘邊務。繼而視師浙直。順之奮然曰。一月賊不平。請掣將官。三月賊不平。請掣郎中。十二月將至浙。賊聞而遁去。順之計平賊上策。當禦之海外。海道不可不熟。乃自江陰與嘉興。兩次下海。泛大洋。至蛟門而還。未幾。春汛急。自登海船。督諸將泊崇明沙。沈賊船十三隻。斬賊首百二十級。餘賊敗走匿三沙。陞太僕少卿。宗憲奏留同事。尋進右通政。於時江北告急。宗憲檄總兵盧鏜往援。順之以江北陵寢重地。乃以三沙賊檄鏜堅守。身赴江北。與巡撫李遂首尾擊賊。敗之於姚家蕩。又敗之於廟灣場。賊遁。復往攻三沙。居海中二月。竟以鹽鹵之故。腹疾增劇。方回太倉。調遣狼兵。而賊乘風雨夜登江北岸矣。順之每以此自愧。其斬馘功。皆遜不居。而宗憲竟上之。三有白金文綺之賜。順之每與宗憲論國家事。未嘗不泣下沾襟。誓以身許國。曰。胡公計事先我一著。至忠義一念。則甚相符合。未幾。陞僉都御史。巡撫淮揚。因積勞。

病不能行。然以淮揚重地。朝方倚任。乃勉赴官。值歲歉。請於朝。得餘鹽銀二萬兩以賑。又自捐俸。倡有司。易米散各地方爲粥。以食饑民。順之素仁愛。又以淮揚爲天下要道。恐有變。倭乘之。貽患不細。故於賑濟。獨勞心焉。時病甚。治軍旅不少休。三十八年己未三月二十一日。登焦山。望三江。嘆曰。吾第一梟將。使吾病而不能展其能。奈何。然使一病都堂居海中。則諸將無敢不下海。諸將能下海。則敵人自奪氣也。欲從太倉取道常熟居海中。行至通州而病革。猶以爲人與學問未成。未了十年工夫。自恨。時天皎皎。聞天鼓鳴於舟上者三。而順之卒。

羅汝芳傳

羅汝芳。字惟德。江西南城人。正德乙亥生。五歲。從母授孝經。小學諸書。十五。從新城張洵水學。洵水每謂人須力追古人。於是一意以聖賢自任。一日。誦薛氏語錄云。萬起萬滅之私。亂吾心久矣。當一切決去。以全吾澄然湛然之體。遂焚香叩首。矢心力行。數月而體未復。嘉靖十一年壬辰。閉關臨田寺。几上置鏡。與孟水對之。令心與水鏡無二。久之成疾。父憂之。授以傳習錄一編。循其言求之。病漸愈。十九年庚子。入省。赴文會。見顏山農。自述遘危病。生死得失。能不動心。山農不許。曰。是制欲。非體仁也。汝芳曰。非制欲。安能體仁。山農曰。子不觀孟子之論四端乎。知皆擴而充之。如火之始然。泉之始達。如此體仁。何等直截。子患當下日用而不知。勿妄疑天性之息也。汝芳悟。遂於稠人中稽首師事焉。癸卯。舉於鄉。甲辰。舉會試。曰。吾學未信。未可以仕。不就廷試。歸而尋師問友。周流四方。十年。建從姑山房。以待四方講學之士。楚人胡宗

正奮以文學受業。至是聞其易有傳也。迎致之。執弟子禮。宗正喜。使息心而深思之。謂曰。若知伏羲當日從平地著此一畫耶。汝芳略爲解說。宗正不應。徐曰。障緣益增。本真益昧。如是三月。然後以易授焉。嘗苦格物義難曉。乃錯綜前聞。互相參訂。每有所見。則以請正其父。父不爲釋然。三年之後。一夕忽悟。心甚痛快。直趨父榻前。陳之。父亦躍然起舞曰。得之矣。得之矣。因回憶往年從師論道。徒成畫餅。餓飽了無干涉。癸丑北上。過臨清。忽遭重病。倚榻而坐。夢一翁來言曰。君身病康矣。心病則未也。不應翁曰。君自有生以來。遇觸而氣不動。當勸而目不瞑。擾攘而氣不分。夢寐而境不昏。此君心病也。汝芳愕然曰。是則予之心。得豈病乎。翁曰。隨物感通。原無定執。君以宿生操持太甚。遂成結習。君今漫喜無病。不悟天體漸失。豈惟心病。而身亦隨之矣。汝芳大驚。伏地叩謝。汗下如雨。遂寤。從是執念漸消。隨入京。赴廷試。初仕爲令。入爲工部郎。出知甯國府。所至不事刑扑。惟以化育人才爲功課。每至彬彬有絃歌風。歲大計。以守入覲。見大學士徐階。階喜曰。吾初不欲煩子以郡事。由今觀之。更有實用也。汝芳起謝。且請曰。先生加意於某。不過爲世道計。如推此意。以及同志。天下斯文尤幸。階默然良久曰。古今事亦有不由己者。卽如狄梁公反周之志固堅。而所託則張柬之。柬之時已向老。儻沒在武后之先。志且奈何。汝芳毅然曰。先生此言。知柬之不知梁公。階曰。我何以不知梁公。汝芳曰。梁公以人事君。則所舉柬之。亦必以人事君者也。武后先沒。成事固在柬之。卽不然。柬之雖去。而柬之所舉。亦自有在。夫復何憂。階首肯。汝芳復曰。宗社以人心爲本。今來朝兩司郡縣。多極一時之選。所患學脈不端。則心事難一。先生趁此合併一番。令其向往不差。則終身

得業。豈不益光明俊偉也哉。階躍然喜。翌日大會靈濟宮。汝芳娓娓發明。音吐洪鬯。興起者不可勝數。返郡未幾。丁父艱。奔歸。士民悲號。不忍釋。有步隨至盱江者。家居四方來學者日衆。萬曆改元癸酉。起復入京。見張居正。問山中功課。對曰。論語大學視昔。差有味耳。居正默然。補東昌守。治東昌如甯國。未幾。遷雲南副使。爲開水利。暫城濠。省徭役。政暇。召同志講學。信從益衆。轉藩參。齋捧入京。禮成。遂請告出城。同志留集廣慧寺。論學。居正惡之。嗾言官疏劾。致仕歸。復與諸門人走安成。下劍江。趨兩浙。金陵。往來閩。廣。益。張皇此學。十五年戊子八月。偶疾。與門弟子講學不倦。一日。肅具冠服。禮天地祖考。端坐中堂。弟子環侍。讀教曰。徒言也不是道。滿前洋溢。俱是發育峻極。左史萬賓。闢問疾。命具紙筆。手書曰。此道炳然宇宙。不隔分毫。故人己相通。形神相入。不待言說。古今自直達也。後來見之不到。往往執滯言銓。善求者一切放下。放下時更有何物。自是絕筆。明日爲九月朔。盥櫛出。端坐。命諸孫次第進酒。各微飲。隨拱手別。諸生曰。行矣。諸生懇留。盤桓一日許之。次日命諸孫掖至正寢。整衣冠端坐而逝。年七十有四。門人私謚曰明德。稱曰近谿先生。

殷邁傳

殷邁。字時訓。南京留守衛人。生而氣貌純靖。有雅志。居恆自奮曰。學不究本原。徒取世資。非夫也。嘉靖十年辛卯。舉於鄉。及入太學。游益自砥礪。辛丑成進士。授戶部主事。乞南。改驗封。滿考。晉文選郎中。出爲江西參議。擢貴州督學副使。疏請致仕。丁卯。穆宗改元。用薦者言。起原官。視學兩浙。歷江西參政。按察使。四

川右布政。晉南太僕卿。請告還。萬曆元年癸酉。復起家起南京太常卿。尋陞禮部右侍郎。卿子管祭酒事。居數月。復稱疾乞致仕。許之。邁自筮仕至卿貳。更四十年。計其在官之日僅十三。始邁以南驗封考滿。如京。士論擬留北銓。力辭不就。每進輒引遠若不屑事。至所居職。恆辦於浙。掄士一先德行。諸生中有以出妻抵誣者。獄久滯。邁暴其枉釋之。夫亡而婦從死。議者欲旌其節。邁曰。婦節以守死不二爲貴。從死非中制也。議者諍之。在太僕。值間政浸弛。吏因緣爲奸。隨事振刷。不辭煩細。至典國學。則申嚴功令。開示名理。六館士喁喁嚮風。其得大體類若此。性尙元泊。恬默寡交。縉紳大夫或造請邁不得。至海內士與邁氣類者。貽書不遠千里。以學術相辯證。少求格致之義。不得其說。至哽咽終日。究心中庸證諸內典。已而澄思靜照。久之。忽有省。自言一日於幽寂中恍惚見其良心。始知此心虛融周徧。而身內有形之心。非吾心也。其所得亦可窺其崖略矣。陸樹聲稱邁坐鎮雅俗似房次律。急流勇退似錢宣靖。洞明宗要則楊次公。晁太傅。至其信道之篤。不言而默成。視理學諸儒不知何如也。所著有懲忿窒欲編。逍遙訣。測言。閒雲館野語。大約皆理學之言。

明書卷一百十五

列傳三

儒林傳五

張元忬傳

張元忬字子蓋別號陽和。其先縣竹人。徙山陰。父天復進士。官至行太僕寺卿。生元忬。元忬生而古貌魁然。稍長好讀書。母憐之。戒無溺苦於學。元忬每暮燈。俟母寢。夜誦不令母知。總角時。嶽嶽負意氣。數矢口。談時政得失。人物臧否。父時抑之。會楊繼盛諫死。元忬遙爲誄詞。慷慨泣下沾襟。天復大奇之。元忬嘗讀書。至朱子格致篇。輒乙其處。而沈思久之。聞王守仁良知之說。遂潛心理學。嘉靖三十七年戊午。舉於鄉。數上公車。不第。下帷龍山之陽。喟然嘆曰。聖賢學自有真。曲士抱蟲蛙之見。不務卽心印聖。而猥躡其下。風。壹何陋也。隆慶二年戊辰。歸自京師。而父天復有滇難。蓋天復故嘗副滇泉擊武定叛夷有功。忌者中以蜚語。卒從吏訊。元忬身掖父萬里。赴逮。已復馳如京。白狀當事者。比有詔免天復官。歸越。復馳如越。履及門。血縷縷滅跡。天下聞而哀之。四年庚午。遊太學。明年舉南宮。射策賜第一甲第一人。授翰林脩撰。自以遭逢聖明。釋躡取上第。廩廩期有以自樹。日橐筆守官下。蒐羅金匱憲典。而研究之。詞林故清署。第雍

容以文墨相高。稍涉事輒引代。庖爲解。元柎獨聚徒講求世務人才。相與籍記之。戶外屢常滿。每抵掌論天下事。不爲首尾兩端。萬曆元年。元柎疏請進講列女傳於兩宮。以修二南之化。不報。六年戊寅。外艱。服闋。起家奉旨教習內書堂。元柎曰。若曹日近皇上。可使習爲善。勃貂管蘇非人乎。乃取忠鑒錄。自爲條解。又作訓忠諸吟。令歌之。尋管理誥敕。直起居館。會皇子生。奉書告楚藩。因上匡廬。浮沅。湘。還取道武彝。所至多題咏。著有槎間漫筆。家居久之。歲丁亥。超爲左春坊左諭德。兼侍讀。清理武黃。尋充經筵講官。既入侍金華。退而嘆曰。明主方孳孳向學。嘔喻受講。臣風勸而講。臣不竭忠畢知。以迪宸聽。非夫也。每喞喞然盟心待對。冀有所感乎焉。初上御麻單恩。乃卽疏白其父冤狀。請以恩及己者移父。至是復申前情。忤旨格不行。元柎仰天泣曰。吾不可以下見吾父矣。武定之役。吾父射擗甲冑。斬首獲千級。口碑具在。乃今幸事明主。而不能爲父洗沈冤。長負君親。吾死後已。蓋居常深念兩世登朝。父建功不售。志以歿。願以身代父報國。而卒且徼國恩報父。故終其身有緹縈之恨。竟以此鬱鬱致疾。疾革。願弟子呼陛下者再。又曰。朝廷亦多有人。乃瞑。元柎平生雅志聖賢之學。宗王守仁。然不空事口耳。顯務以實踐爲基。嘗曰。知善知惡。是良知。爲善去惡。是格物。近世學者徒剽文成之外郭耳。又謂朱陸同源。而未流乃歧之。非是。手摘考亭所論著。與守仁意符者。彙集之。題曰。朱子摘編。以祛世儒之惑。持操端介。絕不喜媮媮事人。然坦焉躡中庸之庭。亦不欲以奇行自見。蓋元柎之進也。出張居正之門。常其炎炎時。卑者蟻附。高者鷲鳴。而元柎不隨不激。有以自守。嘗語同門曰。某門人也。阜囊白簡之事。當以待他人。乃若喪請留。病請禱。某卽死弗爲。

矣。里居數年。私刺不及公門。然事關公義。則侃侃無少避。如議賦法。議不毀兩賢祠。議祀四先生於學。人皆誦爲美談。天性孝友。侍父母疾。湯藥非口所嘗弗進。比卒。藥燻柴瘠。喪葬悉遵古禮。盡革燕賓崇佛諸敝俗。越人化之。有異母弟二人。父病。以屬元忤。元忤拊之。恩義隆備。居常飯脫粟。衣浣補。而賑施宗黨。若弗及。行誼力追古人。其文章。春容爾雅。粹然一出於正。初。父作山陰縣志未成。乃續成之。已又著紹興府志。會稽縣志。義嚴斧鉞。足稱一方信史。他所著有雲門志略。山游漫稿。不二齋稿。志學錄。讀尙書考。讀詩考。讀史膚評。皇明大政記。

史官曰

趙貞吉傳

趙貞吉。字孟靜。號大洲。蜀之內江人。生而神穎。六歲。誦書日盡數卷。年十五。白二親欲往從王守仁於越。不許。遂遍誦六經。自求之。嘉靖戊子。甫鄉薦。走謁故相楊廷和。里第。廷和稱曰。是社稷器也。明年。下第。歸。值母喪。泣曰。人世飄忽若是。遂兼修出世業。習靜古刹。不櫛沐解衣者數年。父強令赴試。舉禮部廷對。都御史王廷相撫其卷曰。雖治安策。弗能絕也。薦第一。上嫌其語戇直。置二甲。尋悔之。乃首列庶吉士。特旨留館。授編修。貞吉感上初年銳意聖學。後稍惑方術。遂上求真儒贊大業疏。執政不懌。貞吉日與同志徐樾輩切劘。踰歲告歸。爲多士發明大學致知本旨。蜀士翕然知學。起教習內書堂。同修會典。尋遷右春坊右中允。管國子司業事。當此時。天下士高者固守物理。紛若射覆。一聞知本之學。反加詆訾。於聖門性道。

之旨莽如也。貞吉慨然曰：學之不明，未知性也。進諭六館士，首揭中庸性道教爲訓。諸士聞之，愾然奮習。若濯而新。二十九年庚戌，敵大舉，八月入古北口。由通州薄都城。貞吉上破敵疏，是時敵方有求貢，媿書入朝。上召禮部尙書徐階集百官議。日中莫有發一語者。貞吉獨出大言曰：城下之盟，春秋恥之。且既許貢，則敵必入城，要索不已。既內外夾攻，胡以禦之。階曰：足下必有奇畫。貞吉曰：爲今計，請上出御正殿，下詔引咎，錄周尙文之功，以勵邊帥。釋沈束之獄，以開言路。輕損軍之令，重賞功之格。飭文武百司，共爲城守。遣官宣諭，諸將監督力戰。其他無可爲者。上已偵知其言，手詔嘉其壯烈。陞左春坊左諭德，兼監察御史。領敕宣諭，并給銀惟所措。然敕未有督戰語，可統攝諸將以行也。貞吉以請於相嚴嵩，嵩故有郤。又其黨趙文華素銜之，冀相齟齬而甘心焉。故不與事權。卽兵曹一護卒不可得。時敵騎充斥，乃單騎出城，先指總兵仇鸞營。次過諸將，宣上旨意，激勵付賞功銀。一時將卒感奮，惟趙國忠一營駐沙河隔敵，則屬鸞傳諭。而以詰朝入城復命。方貞吉之入也，仍欲上請督戰，已撰有疏草矣。而鸞陰畏其至，遂令人請備膳。疏故爲遲之。貞吉入朝，趣疏不來。獨以宣諭事畢奏上。上怒，謂貞吉領銀未覩措置，第爲尙文東遊說。詔錦衣逮杖落職，補廣西荔波縣典史。三十二年癸丑，量移徽州府判。稍遷南吏部文選司主事。未至，進郎中。乙卯，陞南光祿寺少卿。遷南通政司參議。先是嵩已曠吏部，推以藩參。因上問趙貞吉何在，故有是遷。丙辰，陞南右政通。明年陞南光祿寺卿。聞三殿災，移書執政言大工復作，不宜提編加賦，重困民。嵩見大怒。庚申，乃得陞南戶部右侍郎。時貞吉已聞訃歸，服闋改禮部右侍郎，抵任。上屢遣代祭，示憂眷。嵩滋不

樂亡何。有建議薊州增設戶侍郎督糧練兵者。嵩以屬貞吉。且召貞吉酒。詭曰：是行非公不可。貞吉曰：人臣之義，死生以之。復何諉哉。酒半，貞吉徐曰：今欲戶侍督糧，督京運乎？抑民運乎？若二運已有職掌，卽部中與出薊州何異？添官徒增擾耳。況兵之不練，其過宜不在是。縱十戶侍出，無益練兵也。嵩作色怒且罷。適嵩在告，上手詔次相徐階問薊州事。階對以查理常用習邊糧者。吏部因得易管理爲查理，而以林侍郎行。嵩出愈忿。貞吉而詬林侍郎，嗾其黨給事中張益劾林。不數日，并劾貞吉。竟奪官去。貞吉平日持論，以二氏學通吾儒，謂必出世乃可經世。道汙遊嵩高，抱犢伏牛諸山，巡撫蔡汝南逆而問學。貞吉遂列爲圖明三教之所由起。曰：儒者見之曰儒，仙者見之曰仙，佛者見之曰佛。其實一也。蔡梓以傳及家食，多居玉溪莊，嘗爲諸生申致知之旨。又爲講說人心道心，精一執中，大要以中卽性命，卽天則也。後儒不識中爲何物，至以爲物物有之，是有同於刻舟之愚，雕形之苦，殊失其旨。丙寅，肅宗崩，臨哭最哀。曰：先皇帝知我隆慶改元，詔起爲吏部侍郎，兼翰林院學士，掌詹事府事。實錄副總裁，會有言幸學祭酒坐講，當像擇耆德攝之，遂奉旨以原官暫掌國子事。八月朔，駕幸學，賜坐講。禹謨后克艱厥后，章上見其闡發精明，音吐洪響，大爲感動。問之，知爲新起用臣，益喜，尋命解監事。充日講官。先是北口陷石州，貞吉與執政數議邊事不合，乃求補南禮尙書。旣行，御史李惟觀南戶科給事岑用中交章言：趙某居啓沃之任，可以格心贊治，不宜置遠地。適上願講筵無貞吉，不悅。諭曰：前年高往南京者，仍今日講。遂復以禮部尙書兼翰學，協管詹事府事。戊辰三月，還京。會文武邊臣建議欲招練南兵十萬於張家灣，貞吉執不可。曰：曩南京建

振武營致大變。今乃欲建十振武營於都城側哉。況燕薊乃戎馬場。豈藉南兵當事者悟。遂移練兵於薊鎮。惟揀南兵三千教鳥銃。識者謂其得算。頃之奉命教庶吉士。仍充講讀纂修。又命代祭先師孔子。爲皇太子千秋。講唐太宗諭太子章。賜賚無虛日。時薊鎮奏修敵臺幾千座。貞吉以爲徒費無裨戰守。因講語中力言之。語具爲執政格不得上。遂邑懷去志。而上之眷用意益切。尋詔以原官兼文淵閣大學士。同諸臣入輔大政。一日於講筵謝上。而諭盡心輔佐。貞吉稽首對。臣敢不竭股肱之力。効忠貞之節。第近日朝綱邊防多廢壞。臣欲捐身任事。惟陛下主之上。色喜於時。上多恭穆。而面諭者再。羣臣謂自臨御以來。所未有。翌日御便殿。手詔閣臣。謂貞吉已有年。常同任閣事。又撰敕令中貴捧詣閣下。皆特典也。先是大同邊臣棄城走。爲巡按暨科道所參。而閣臣未有言治罪者。貞吉謂宜照元年山西失事例治之。執政不得已。乃行巡按覆勘。貞吉爲是遂註籍不出。上聞溫諭。遣醫賜羊酒瓜果。貞吉感上睦。乃上疏乞解贊輔重任。退供講職。且言大同之罪。惟祖法國是。公論清議八字。勘之足矣。今兵部與閣臣俱仍姑息。臣欲爭論而力不能。故懷慚思退。上亟慰留之。是日上以原票還閣中。改擬有不襲昔年虛套之論。而閣中猶以將才難得。題覆上。姑兩解之。然信貞吉益篤。明年庚午。上言遵古制。收兵權。以飭戎務。略云。我朝內外兵分隸五府。乃高皇帝定萬世太平計。俾免前代權臣握兵之害。永樂末。因聚府兵北伐。旋師後。遂結營團操。乃以三千神機二營附之。因號三大營。其實皆五府兵也。正統末年。嘗變爲十團營。宏治間。又加爲十二團營。正德間。又添置東西官廳。然五營之號未泯。而五府意猶存也。至嘉靖庚戌。嚴嵩欲爲賊將仇鸞

地遂請特設戎政廳。括內外兵籍。鑄總督戎政印授。夫以五府外而別立一廳。則盡變太祖分府之意。以十餘萬衆而統於一人。則盡變成祖分營之意。向使鸞誅晚。則時事之危。未可測也。合無將見操官軍九萬人。分爲左右中前後五營。各擇一將統之。責令開營教習。仍以文臣巡覈之。每歲春秋校閱。凡將官能否。軍士勇怯。技藝生熟。皆得奏聞。而賞罰得焉。要令五營齊成精銳。有事則領教將兵於闔外事。畢則納印歸卒於營中。如是則太阿之柄。獨持於上。而釐穀下有數萬精兵。隨所用而可矣。上曰。分營練兵。乃祖宗舊制。遂下廷臣議行。時本兵科挾前大同事。議遂蜂起。反失貞吉建白本意。上以貞吉兼掌都察院。加太子太保。時閣大學士高拱兼吏部。方欲挾權籠制諸臣。意假貞吉公爲分謗地。故推以兼院事。已而兵尙書霍冀被科臣論劾。賊私疑貞吉前議大同及己。乃於求退疏中。誣其主使。貞吉疏辯。欲付法司究問。以糾官邪。且兩上疏乞休。上不允。乃請給假回籍遷葬。不允。拱尤銜。故相徐階。欲中以危法。疏言當時議事。臣假託遺詔。凡先帝所斥。如大獄及建言得罪諸臣。悉加超擢。死者贈官廕。子是讐先帝。近於無君。又引宏治間彭程事。欲有以治之。貞吉拂衣起曰。若是則將如宋奸黨碑矣。拱色變。強留之。乃共改票。止於吏部通行曉諭而已。又因貞吉言去大獄字。拱以是迄不得逞於徐階。後又以故錦衣陸炳爲徐姻家。已嗾張御史追劾炳。而刑部以炳一品爵。例在應議列。當請敕三法司集議定之。奏。關中擬票。是日拱遲貞吉久不至。既至。欲從容商之。拱遂徑擬削爵沒產。自是拱與貞吉勢不兩立矣。亡何。宣大督撫王崇古等奏。俺答孫把漢阿吉等入降。貞吉語李春芳曰。此邊疆幸事。已而本兵奏上。春芳擬旨。僅曰。是貞

吉曰。大約浮言謂恐開邊釁。然自俺答橫行五十餘年。每年邊餉數百萬。何年無釁。豈不在納降也。惟當請覈與降人官職。慰來者心。其制口機宜。一付之督撫。乃改如貞吉言。與那阿吉指揮使。阿力哥正千戶。時口求封貢。朝議紛然。獨貞吉力主其議。丞令督撫姑置封貢事。徐議之。第令俺答速獻投口叛人趙全等九人。易其孫去。且當慎交質。防口劫盟。又貽崇古書曰。吾外憐悉。但謀之附人。內恐李文饒之失助。其爲邊計。篤切類如此。先是給事中張齊者。爲拱劾。徐階而都御史王好問。因訐齊賊事。抵戍。後齊倚拱。復力擊好問。與刑尙書毛愷。欲因以傾階。乃奏行法司。而刑科給事中舒化。參寢不得行。拱懷怒。思一逞。於是考察科道旨。從內出。貞吉曰。是將倚法爲報復計也。疏請止之。拱聞。卽上揭。謂有成命。不當中止。貞吉遂同赴吏部。有給事中吳時來者。故嘗劾嵩父子。謫戍起用。守伉直。不附拱者也。拱銳欲去之。貞吉獨不可。爭至日中。拱知不可奪。竟從之。以故臺省名士得全者衆。然拱益恨之。刺骨。劾給事中韓楫。劾貞吉。乃疏懇乞歸。且曰。願上放臣歸田里。令拱復還內閣。毋久專大權。樹衆黨。別選老成掌部院。庶上不悖祖訓。下不紊職。掌上允暫還。時論惜焉。貞吉行後。口果還叛人武全等。獻俘禮成。上以貞吉與議。廢一子中書舍人。明年春。貞吉抵家。諸門人請設教。聖水寺。會穆宗崩。貞吉哭臨。至哀。毀成疾。乙亥。遂杜門。不復會講。第擬作二通。遺諸門人。內篇曰。經世通。外篇曰。出世通。二通各分二門。內篇門曰。史通。曰。業通。外篇門曰。說通。曰。宗通。內通之門。八部。史通部曰。統。曰。傳。曰。制。曰。誌。業通部曰。典。曰。行。曰。藝。曰。術。八部具而百代九流之緒備矣。外通之門。四部。說通部曰。經。曰。律。曰。論。宗通部曰。單傳。直指。四部具而頓漸半圓之旨。

悉矣。所貴俾三千年未經折衷之籍。聚爲一書。以俟來哲。是歲十月。卽開局編述。乃爲文祭諸聖賢。告始事。其略曰。身居臣子之地。每懷經世之憂。心慕道德之門。時發出世之願。邇來垂白謝事。忽生勇猛。乃取舊書。以類臚列。隨文點布。各就部曲。約要而言。經世者不礙出世之體。出世者不忘經世之用。然後千聖一心。萬古一道。聖人憂世之念。可少慰矣。至冬。末疾作。輟編。萬曆四年丙子三月卒。年六十有九。訃聞。上輟朝。諭祭誥。贈少保。諡文肅。貞吉孝友。天至。從總髮。與弟蒙吉自相師友。剛忠英偉。稱其氣貌。解褐卽身任天下。憂先一世。雖百挫不回。至其學問淵源。上探堯孔之微。而并包逮於伯陽。子羽。爰達泥洹。雅自命曰經世出世。其古博如此。其文章博辨雄深。要歸於道。所著詩文集若干卷。及進講錄。史官曰。闕。

鄧以讚傳

鄧以讚。字汝德。學者尊爲定字先生。新建青岡里人。青岡卜居自成和始。和生瓊。瓊習靜庵中。夜半。忽生蓮花。紅光燭天。四鄰驚爲火。走撲之。則紅蓮也。始異之。卜者曰。茲地其有至人挺生乎。瓊其五世祖也。累世有隱德。以讚自幼簡默。常聞其父儼與人論學。輒牽衣尾其後。間出語類夙儒。而復勤學。父憐其劬。局之斗室。以讚遂習靜斗室。神情益瑩。出而曰。心之精神謂聖。千古聖賢。只此一事一貫。吾夫子宗旨。多聞多見。引人法耳。間以所得者發之。制藝少年末之奇也。袁洪溪見之。驚而語曰。是兒終當以學鳴天下。王敬所謂以聖賢心發經傳旨。吾道主盟。其在斯乎。大奇之。隆慶元年丁卯。舉於鄉。辛未。舉進士。初張居正

爲主考。閱諸首卷。不憚而置之。晚得以讚卷。曰刊落鉛華。獨存元雅。大奇其文。置第一。及相接。居正以爲冷。冷抑抑。如玉如金。神爲之悚。歸而其兄衡州知府伯子問相國狀。以讚曰。相國心大有爲。但恐緩急弛。張弦韋不佩。未知所終。伯子怪其語。後果驗。廷試賜一甲第三人。官翰林編修。未嘗妄有交遊。取子茹茶。忍寒甚。僮僕方啾啾敗絮中。以讚起。以殘楮當火。燃指哦曰。不是一番寒徹骨。爭得梅花撲鼻香。初服官時如此。亡何。覩神宗卽位。高拱去國。將審察多事。以讚過居正。時有匡拂。居正弗善也。遂移禪利。以病請。居正持不下。遣子就學。已聞其父病。始從之還里。值外艱。有終焉之志。五年丁丑。強起至武林。念母老。未遂歸。時王畿寓西湖。羅洪先。張元竹約以讚對龍溪精舍。畿曰。何功。以讚曰。此體無止。卽以無止爲功。又問曰。信得良知不。曰。新建云。萬死一生得來。豈敢置疑。惟是以知是知。非爲良知。竊恐學者妄認耳。畿業心服。已而備語試之。以讚曰。天也不做。地也不做。聖賢也不做。畿曰。秀才家何得如此大言。海內人皆以以讚必能光明絕學。而居正奪情後。橫政愈甚。羣望其出山。言庶幾有入。己卯一就列。竟不入。遂還里。朝夕依母側。諸縉紳罕覩其面。惟昆弟友朋。互相切究。友以用世進者。曰。學不到舍我其誰。終非天民。書屏几曰。天則不言而信。神則不怒而威。用世一番。須令天地變化。草木蕃育。始爲不負。然其功實基於潛。如龍不在。能見能飛。而在能潛。儻乘雲霧。上青天。人窺一鱗一爪。何以霖雨天下。易之密書之微。詩之綱。皆是義也。客坐偶有齟齬者。卽省曰。我未誠耶。澄心半刻。客竟易顏。常曰。我常虛而人不礙。我不留而人自化。又曰。從氣上起。終是乖戾。從性上發。自爾中和。其虛明若此。居家臺省。薦無虛日。萬曆十六年戊子。

特起纂修不赴辛卯詔起中允管司業事。疏辭已拜南國子祭酒。上疏云。文廟之祭。以元長舉其酒。謂之祭酒。多士之業。以師氏考其成。謂之司成。夫孔訓莫先禮義。以冒進之心。其禮必不享。士習莫尚恬退。以躡等之身。其言必不從。以進之心。爲退之跡。既前史所重。憎居爭之實。蒙讓之名。亦造物所深忌。將使不肯以臣爲趨。滋仕路機變之巧。抑俾賢者以臣爲戒。掩家庭真切之心。此豈修曠典。開賢路。初指乎。上不允。既至。有謂之者曰。南國士。佻弗馴。宜嚴以讚。至多士。洗心聽約束。常示諸生曰。懼我所有也。願以神情與生相交勉。諸生瞿然。顧化曰。勳成內臣。且有聞先生名過而謝罪者。我輩遠先生約。不得爲人。以讚自是益信。曰。嚴必律身始。律身弗嚴。誰能悅之。晉南京禮部右侍郎。轉吏部右侍郎。方大計。以讚指天自誓。卽故人親知不一顧。時吏尙書溫純。都御史陳瓚。皆海內名德。同心共濟。計籍出人。共稱服。亡何。署禮部事。疏請建儲者至再。忽有三王並封之旨。乃奏以爲天不言而信。緣今日明日。今年來年是也。故信也。自請册立以來。蓋數奉聖諭。舉行矣。然皆指皇長子耳。未嘗言待嫡也。今驩而傳之人。創而聽之。故不勝其異。至以凡人之見。上窺聖衷。而以爲非情也。皇上以天自處。身度聲律。萬萬非以虛辭示天下。但臣等竊詳聖主立嫡之條。爲有嫡立庶。斯爲瀆倫。非必有待也。若大典一行。主器有託。皇祖在天。實所欣鑒。臣等又竊聞中宮鍾愛元子。朝夕保護。不啻己出。願早正春宮。猶切於億兆臣民。萬萬皇上以厚中宮而緩册立。或者未諒中宮之心乎。臣又聞古之帝王。將舉大事。既內決於心矣。必謀及卿士。謀及庶人。無所不從而後行之。蓋有見於人心不可拂也。今日並封之旨至。至使人心不能釋然。安在其爲順天下也。且信者

國之大寶。帝王所以使天下精神相通。指臂相使。恃有此也。皇上卽位以來。何令不信。獨建儲一事。屢示
屢易。人將謂詔令可更。法守可玩。自是令一出而疑隨之。指臂不屬。從此始矣。時疏不知其幾。獨膾炙此
奏。語語血誠。轉吏部右時郎兼翰林院侍讀學士。亡何以母喪過哀感疾。扶柩將歸。病宿郊寺。僅存殘息。
知友皆道路是虞。僅抵家。正衣冠坐曰。奇事奇事。諸縉紳問此處見學。曰。不敢不勉。遂端坐逝。詔贈禮部
尚書。諡文潔。賜祭葬。廢一子入監讀書。以讚自少卽悟心之精神。謂聖至終身。日化月融。精密廣大。高明
篤實。所與諸生語。及筆之成書。皆發前人未發。八十猶慕。一生傍母。人以爲至仁純孝。平生強半林坳。退
然陋巷。人以爲廉靖孤介。且衾影無愧。一門藹藹。內行純備。人以爲其妙明性中流行。時而發之。然不得
大行所學。人多惜之。

史官曰。闕

楊起元傳

楊起元。字貞復。別號復所。廣東歸善人。弱冠時。賊躡東平。焚民舍。爲亂兵所掠。從容賦詩自若。賊異而釋
之。明歲舉鄉試第一人。年二十一。三試南宮不售。乃遊金陵。下帷績學。邂逅盱江黎允儒。歡然相得也。黎
爲羅汝芳之甥。爲述汝芳言行甚具。起元大契於中。駁駁向往之。萬曆五年丁丑。舉進士。改庶吉士。己卯。
授翰林院編修。册封崇藩。取道盱江。執贄羅汝芳之門。而稟學焉。往復參證。因會悟性命之宗。曰。乃今如
客得歸矣。因次汝芳會語爲答問集。又摘其論仁者爲識仁編。日諷誦之。并示學者。十五年丁亥。進修撰。

戊子。校士八閩。試策大發。所學人爭傳誦。己丑。遷國子司業。辛卯。晉司經局洗馬。纂修玉牒。充經筵講官。勸上崇聖志。勤聖學。疏千百言。壬辰。前及丙戌。己丑。三分校禮闈。先後所得多吉士。外艱歸。起國子監祭酒。丙申。晉南京禮部右侍郎。修皇陵功成。上命祭告。起元至中都。士大夫暨師生來問學。起元卽中庸首章。反覆開論。中多興起者。丁酉。秋。因災異。復上恭勸勤學疏。踰月。輯高皇帝御製集刻行之。於其中稍爲詮註。取洪範語。名曰訓行錄。上之。遷南吏部。戊戌。召爲吏部右侍郎。兼侍讀學士。未行。而有內艱。還躬營葬事。日荷畚鍤。哀毀之餘。感寒疾卒。年五十有三。平生事親孝。與弟友。厚宗族。閭黨人有過。耳不欲聞。而惟就其所善。獎成之。僮僕有違。亦不加鞭扑。微以意諭戒之而已。一聞羅汝芳講學。銘心刻骨。無須臾忘。雕一小像。出必告。反必面。歲時約同志祭。奠於所居。以爲常。四方之士受學者。屢常滿戶外。每隨機指授。人人躍然意滿去。持論以明德親民止至善爲宗。而要歸於孝弟慈。謂孩提不學不慮之良心。卽聖人之不思不勉。耳目手足之生生。卽心。愚夫愚婦之知能。卽聖氣稟物欲。皆明德之寄寓。共觀共聞。卽不覩不聞之本體。聞者始而疑。中而譁。以辨。久之羣然服。所著有證學編。楊子學解。論學存簡稿。楊子格言。楊子政序。輯白沙語錄。證道書義。

史官曰。聞

顧憲成傳

顧憲成。字叔時。涇陽人。自幼沈毅異常兒。讀韓文諱辨。每至學字。以犯父諱。嘔噀不忍吐。師以告其父。

召而語之曰。昔韓公教子不諱忠。兒奈何諱學。嘗私書壁曰。讀得孔書方是樂。縱居顏巷不爲貧。以自傲。一日師講禱之說。章憲成請曰。夫子旣不知。何知知其說者之於天下如斯也。惜或人未能再發。夫子之蘊耳。又一日講養心章。又請曰。愚以爲寡慾莫善於養心。心爲主。欲爲役。主強則百物退聽。師驚而謝曰。子俱如是觀。五經註脚豈虛語哉。萬厯四年丙子。舉應天鄉試第一。以外覲未計偕。庚辰。登會試。高等授戶部主事。朝夕與南樂魏允中。漳浦劉廷蘭切砥。求不愧科名。觀時政。紕繆。忠佞倒置。輒憤不能平。共擬書上大學士申時行。冀有所匡紘。後觀魏。劉書詞婉而意切。遂焚已書。附名進。不省。張居正病。傾國走羣望。麟業署名。憲成走馬立削去。後居正卒。得轉吏部。孜孜人才。卽幽隱不遺。以母老數請告。許之。閉門註易。春秋丙戌。起驗封司。丁亥。大計。會有糾尙書何起鳴者。起鳴疑都御史辛自修陰嗾諸御史。諸御史遂得降級。憲成上書。詆起鳴。語侵內閣甚力。而屬望大臣臺省與被言者。自當自反。持論公正。通國傾服。爲當路不悅。落職。判桂陽州。先是蘇柳二公及莊景俱以謫至州。人士望其來。如三先生式。臨之。執經受業者甚衆。亡何轉處州府推官。值內艱歸。起理泉州。壬辰。大計。舉廉正第一。尋擢考功司。甫至。值三王並封議定。首疏爭。及與大學士王錫爵往覆爭。侃侃無所回互。竟得寢。已。趙南星司計典。盡黜諸要子弟。嬖亞頗太甚。南星奉旨罷。憲成以考功同共事。願同罷。不報。已。進文選郎。凡啓事與海內意所欲用者。當路色沮。不欲用。錫爵所欲用者。復尼不行。久欲中之。以其時望攸屬。不果。尋以憲成推內閣起王家屏。遂削籍歸。自甲午得重病者累年。各有劄記。沈潛粹密。與讀書錄相表裏。學問者日衆。乃與高景逸等開東林。

集同志歲有會。月有記。其所最研辨者。無善無惡心之體一語。曰。如是則善可不爲。而惡亦可橫行。蓋有感於世之儒名盜行者。卽家三起光祿卿。堅臥不起而卒。年六十三。憲成居家孝友。可追古人。平居恂恂雍雍。居然古儒軌轍。不少假借。孜孜接引後學不倦。故人樂得師承焉。所著有藏稿劄記。大學通考。質言商語。還溼錄。證性編。桑梓編。學者稱爲溼陽先生。友朋私諡曰端文。弟允成。字秀時。號溼凡。允成生有慧質。頭角嶄然。頗好弄。其塾師使其父更傅以激之。已幡然改請一切受教。乃復之初。謂口悛耳。卒操縵下帷。若老生也。久之。同兄憲成遊儒舊張原洛門。張以詣薛應旂。與語大悅。輒手考亭淵源錄授之。曰。洙泗以還。源委具是。若志之。異日無忘老夫也。弱冠。屬文遒贍。爲識者所賞。萬曆七年己卯。舉於鄉。癸未。舉南宮。心戀母。過歸。至十四年丙戌。始廷對。時上冊鄭貴妃。允成憂治危明。射策數千言。纒纒不少諱。其要云。皇上以鄭妃勤於侍奉。冊爲皇貴妃。大小臣工。遂私憂過計。請冊立皇太子。冊封皇恭妃。不報罷。則峻遣矣。夫鄭之勤於奉私也。太子天下本。忠言國之輔。皇上奈何以私掩公。示天下偏。則皇貴妃或以愛憎弄威福於內。其戚屬或以愛憎弄威福於外。閹人宮妾。或乘而弄威福於內外之間。又云。頃皇上以天下事付張居正。居正罔上行私。一時臣工。莫不風靡。以爲不足信。而付之二三羣小。然懲居正之專。而公布之。則可。若轉而付之羣小。臣恐居正之專。尙與皇上一二。此屬之專。遂與皇上一二。則易間。一則難圖也。其辭甚剴切。大約懼內寵將盛。羣小將逞兩端。讀卷者驚怖其言。殿置之。允成退而自傷。此言不得達上。卽達上。死不恨也。尋以彈房仲海歸。久之。以薦起南康府教授。允成以母老又善病。力乞致仕。亡何。丁內艱。服

闕再起保定府教授尋陞國子監博士癸巳晉禮部儀制司主事會詔並封三王允成謂此吾職掌宗社安危在此舉矣乃上疏略曰本月二十五日皇上出密札付元輔王錫爵臣等不知札中何語竊計得君如元輔眷元輔如皇上當早定國本必不遲迴册立以負祖宗在天之靈次早乃接聖諭元子與三子五子一並封王臣等不能無疑及聞人言封王之諭乃錫爵以寸晷立就即次輔趙志皋張位不聞而禮臣羅萬化科臣張貞觀部臣于孔兼皆至錫爵邸並不得面乃知今日之事皇上僅以錫爵一人爲政昔人有言天下事非一家私議蓋言公也況册立一事關係何如皇上奈何易視之錫爵奈何嘗試之臣等不敢危言遠引以瀆聖聽卽如世宗肅皇帝於嘉靖十八年册立東宮並無三王並封之事臣固知皇上不安於心也且聖諭惓惓大旨以皇后生子爲言皇上獨不記正位東宮時乎維時仁聖皇太后亦在盛年穆宗莊皇帝曾不設爲未然之事以少遲大計法祖自近此言可思也臣等深惟聖祖寶訓一句一字無非維持宗社極慮後來聖子神孫得其意則國本固而社稷賴以安不然徒借虛詞掩飾過舉此奸臣借以固寵臣等所飲血椎心甯死不忍見此舉動以負祖宗二百年養士之恩於地下疏入不報當路切齒已而內計出判光州時兄憲成遡源性道天下學士多宗師之因從兄參驗身心猶欲然以爲靡當憲成使認自家允成曰問者吾省吾矣思爲天下第一流人情則近狂比按其實尙輕輕也性復近狷竊恐兩無成耳憲成以中行進之曰世之中行夫子之鄉愿也我何跂焉特自審齊肅將在粗耳憲成謂粗最近真由粗覓真則中行不遠且狂是習情狷亦習性若真性情兩者何有從此究極便識自家譬之親承孔

孟卽五百尤雄。當之靡之。彼魔雖厲。見脫消也。允成慨然曰。命之矣。夫子之稱中行。以正喚醒狂狷。夢寐半生。遽焉大覺於阿兄當下也。厥後義學既遂。恆謂吾輩一舉事出言。須從太虛起念。若旁出陰陽五行。則猶形與景逐耳。或有疑者。曉之曰。使於本真得定。不妨六虛周流。不然。於此模糊。便思融通和會。幾何不墮坑落壑。自失性命。且以誤天下蒼生。又鄉愿之纂理學。直將弒逆萌芽。佈人心髓。使天下滋蔓不覺。下此則天崩地折。無少關係。在縉紳則明哲保身。在布衣則傳食諸侯而已。其持論如此。偶得楊龜山故址於東林。請於其兄。爲築廬結社。四方風趨雲就。訂其會講。皆以顧氏叔季爲素王功臣云。允成孝友得之天性。家居色養。曲當父母心。痛父之不逮祿。時時與其兄語及交相泣也。事諸兄尤恭謹。嚴取予。不少假借。平居布衣蔬食。角巾徒步。又傲儻好施。歲饑。輒分半廩以賑。所交多名碩。與同志處。虛舍平坦。恂恂不言。而令人意消。至於論臧否。策成敗。初以賊人。久之若持左契。故錢起莘曰。允成有眼高。存之曰。允成真除魔手。嫻於書削。卽數語寒儉。或遊戲筆墨。具有關鍵意趣。居恆尤好靜。終日據梧手一編。竟業而後易之。然讀書不句櫛字比。彷彿意象氤氳而止。獨念天下多故。見諸司章奏。百氏微言。有關廟社者。輒誦不置。嘗輯朱紫陽無極王霸諸辨。冀以覺世。又彙其論治者爲編。南粵布衣翟從先欲上書訟都御史李見羅冤於朝。允成力從曳之。代爲疏章。病革。語憲成曰。吾第凝神定慮。循循默默。俟吾天機。若攙入他念。便屬暴棄。且我計身則身非我有。計子孫則人一乾坤。非我與也。斯已了然於易簣之頃。去身世如屣脫。卒之前三日。有大星隕於居傍。至期。自謂張睢陽。且至。家人都從空中聞鸞驥聲。年五十有四。所著有

小辨齋集

史官曰 闕

高攀龍傳

高攀龍字存之號景逸自幼神采奕奕善讀書言動如成人母授果餌必拱手接或命自取一如所授習舉業超超章句外默誦諸儒語錄性理諸書萬曆十年壬午舉於鄉居嗣母憂丙戌丁亥顧憲成方講學聽之甚喜卽曰學將爲聖人也出口則議論入手在躬行豈可泛求一日看大學或問見朱子說入道之要莫如敬悚然曰是矣一以整齊嚴肅爲主久之見程子謂心要在腔子裏解曰腔子猶言身子耳渾身是心大學曰修身爲本又曰知本更於何處索本卽身卽心會歸於一道不遠人於斯可見己丑成進士廷試三甲常爲令丁嗣父憂服闋謁選授行人自盟曰吾道未有所見但依獨知擔負庶幾深造適僉事張世則疏詆程朱欲改易傳註上所著書求頒行天下不勝憤上崇正學闢異說疏上曰高攀龍所言有關世教尋論大本大機語極剴切嘗論河東粹言約而且精當字字體貼又言律爲世用本因加意律學作日省編集崇正編謂讀書意思不進者尊德性功夫少也率以半日靜坐卽出遊公會水邊石上僧房皆其嘿嘿齋心處五更氣清尤自提策忽思閑邪存誠句覺得當下無邪渾然是誠又覺得覓誠卽邪存之卽是舊字雲從因以改焉奉使金陵還朝感時事上君相同心惜才遠佞疏語侵閣臣下部院會議聞之坦然降雜職尋調揭陽典史舟中嚴立規程只於靜中著力當心氣澄寂時有塞乎天地氣象所經奇

峻山川險絕灘頂。一一悅心。當境皆爲學助。過汀州。坐旅舍。一小樓。手二程書。至萬變俱在人。其實無一事。句。猛省曰。果無事。從來牽纏。俄然斬絕。抵官勤職事。課藝集諸子要語刊示之。三月。覓差歸。至漳。謁李見羅。李謂既知宗。則心意知物。各止其所。格致誠正。不過就缺漏處照管。真有無所事事的光景。答以大學格致。卽中庸明善。要使學者辨志定業。此心光明洞達。無毫髮含糊疑似。爲自欺之本。然後爲善去惡。意誠心正身修。善所以純粹而精。止所以敦厚而固也。不然。萬端紛起。如何用力。且修身爲本人皆知之。然必辨義利是非之極。窮至無穿窬之心。斯爲知止工夫。喫緊沈著。豈可平鋪輕說。都無氣力。并條目次第。籠統做去。李無以難。自謂出門至此。學力已三轉手勢。乙未歸。再取釋老二家參之。謂釋氏與聖人所爭毫釐。其精微處。吾儒具有之。總不出無極二字。病處吾儒具言之。總不出無理二字。尋連居父母喪。一依文公家禮。讓產諸兄弟。不可得。盡供喪葬。餘置義田贍族。戊戌。作水居於湖邊。中有一可樓。言無所不可也。閉關趺坐。坐必七日。作復七規程。取大易來復之義。嘗自言。丙午以後。方實信性善知本。中庸之旨。此道絕去名言。程子名曰天理。陽明名曰致良知。總不若中庸二字。中者停停當當。庸者平平常常。本體如是。工夫如是一毫造作。走作不得。心矩學矩。從有離合中。造到渾成處。於諸子爲貫通。於孟子爲集義所生。於顏子爲不貳不遷。四十年攻苦。確然可自信者。庚申。光宗卽位。廢臣以次起用。召拜光祿寺丞。天啓改元辛酉。進光祿少卿。署事綜理精密。中官初閱於前。尋卽帖服。嘗云。頭緒雖多。儘做得去。晉太常少卿。作寅直說。并除務學之要。言明理以明心。明心以出治。方從哲。鄭養性。大義不容不討。不然。孝非孝。反

以不孝爲大孝。忠非忠。反以不忠爲大忠。黑白倒分。人禽反易。何所不至。上怒。使重處。大學士葉向高爭曰。斯人有重望。處則滿朝必爭。吾亦與之同去。得奪俸。時魏忠賢尙未大肆。轉大理少卿。進大僕卿。再移疾。有邪氣所干。元氣大伐等語。以身謂喻。冀有感動。向高留之甚力。明年差歸。給事中王志道疏論兩朝事。淆雜不倫。致書駁之。大要言。人臣爲國。當杜漸防微。懲前毖後。不宜爲亂賊脫罪。爲君父植禍。夫皇祖威福在手。妙於調停。是皇祖身上事。皇考仁孝根心。妙於隱忍。是皇考身上事。今上祖考在念。妙於處分。是今上身上事。若夫嚴萬古綱常。守三尺法紀。君讐必報。君賊必討。是臣子身上事。而奈何諱之。加以誣謗。使天下更不敢開口說亂賊一字。可乎。見者無不膽落。吏尙書張問達曰。高公坐此。人皆畏憚。又自指其心曰。渠心明。說出人自知畏。尋奉差舟行。卒業易註。抵家講東林如故。曰。宦情秋露。學境春風。是可決擇矣。亡何。晉刑部侍郎。趨還朝。時趙南星爲吏尙書。給事中魏大中首吏垣。相約一以培非其類。內外懷懼。顧忠賢已用事。魏廣徵結爲族。入閣初。對衆猶諱之。忠賢曰。我家人殊不濟事。然密已輸款。導之爲非。一日講筵後。忠賢刺刺品評。且曰。莫用一邊人。則其源可知。所礙手惟閣臣。未幾。忠賢爲副都御史。楊漣所糾。列二十四大罪。頗內懼。謀於廣徵。謂必去向高乃可。因求其歸。陽慰諭。迫以不堪。乃行。始無所憚。總憲缺。衆議楊漣署事。忠賢不允。議馮從吾爲代。久之。卒用攀龍。旣入臺。首糾御史崔呈秀之貪。奪官勘賊。尋具疏申嚴憲約。責成都邑。列五十餘款。期於拔才除賊。示畫一之畔。其大端在調和閣部。謂閣當借用外廷。不可以外正直而疑其激。外當責成內閣。不可以內和緩而疑其媚。向高深得此意。未幾。攀龍告歸。

旋革職爲民。呈秀復用。明年乙丑。毀書院。屢起大獄。殺楊漣。魏大中等十餘人。趙南星謫戍。欲并坐攀龍。會有力解者。得免。六年丙寅三月。竟逮。報至。爲十六日。謁道南祠。有別聖文。歸看花後園。呼諸子。舉原無生死四字以示。且曰。急料理爲出門計。獨身就理。可免他累。作字二紙示兩孫。曰。無先發。明日以此付官。旂時已三更。命暫退。移時聲。諸子推戶入。見燈火熒然。發所封。乃遺表也。諸子急從旁屏奔池畔。則赴水死矣。年六十五。鄰人皆開車馬聲。瓦裂聲。衣履整齊。淤泥不沾身。滴水不入腹。類日成殮。面色如生。其遺表云。臣雖削奪。舊係大臣。大臣受辱。則辱國。故北面叩頭。從屈平之遺則。君恩未報。結願來生。臣高攀龍垂絕書。乞使者執此報皇上。復爲別友人書云。僕得從李元禮。范孟博遊矣。一生學問。到此亦得少力。心如太虛。本無生死。何幻質之足戀乎。聞者無不哀痛。崇禎改元。忠賢伏誅。餘以次滿掃。得贈太子少保。兵部尙書。賜祭葬。諡忠憲。廕一子讀書國子監。



明書卷一百十六

列傳四

名臣傳

史官論曰。余讀書至君明臣良。庶事以康。未嘗不慨慕帝世之盛也。天惟純佑。福主福臣。賢才輩出其大者。昌明渾厚。穆穆迓衡。入則周公。召公。出則方叔。召虎。其小者亦靖共持重。愷悌敦敏。效一官一方。以自見。智名勇功。史不勝書。於乎盛矣。明自高文之世。武功最踴。制科薦辟。文學聿興。沿至仁宣。卷阿翺羽。相得益章。凡薪樵於先朝者。蔚爲名臣。憲孝之際。號稱治平。賢相企踵。六官之長。罔非民譽。明之得人。於斯爲盛世。穆以後。進舍日煩。人才漸駁。而議禮考文之臣多出焉。詩云。有馮有翼。有孝有德。皆紀元首。股肱相得。成功之著者也。君子覽茲。而明之人才。思過半矣。

章溢 附子
存道 傳

章溢字三益。龍泉人。始生。音如鐘。父遇孫疑爲不祥。幾棄不舉。成童。嶷然莊重。諸兄應繇。頗爲儕類。侵苦。溢忿然曰。彼弱我耳。我不自勵。豈男子耶。乃往受事。衆皆憚服。弱冠。從鄉先生王剛叔游學。嘗曰。吾聞古

人主躬行章句之習。非其所屑。故器宇夷曠。而於是非皆毅然折衷於理。以身從之。聞金華爲文獻邦。出諸訪浙東憲使禿堅不花與語悅之。不花改官陝西。要與俱。至虎林。盜忽心動。力辭歸。則父病革。越八日逝矣。壬辰。蘄黃寇起。犯龍泉。從子存仁爲寇所執。盜奮曰。吾兄止此子。不可使無後。冒刃出謂賊曰。兒幼無所知。卽殺兒。吾願代之。賊素聞其名。及得大喜。縱存仁歸。乃坐溢上坐問計。溢曰。吾有良策。使諸公首領俱全。父母妻子^也相保。賊曰。何如。溢曰。莫若釋兵戎而歸農。賊怒繫之柱。以刀礪其頸曰。不降且死。溢正色不爲屈。賊愈怒。愈大吐曰。死卽死。何恐。賊爲縮。竟不殺。夜給守者脫歸。集里兵往擊卻之。府判官乘是以兵來。欲盡誅誑誤者。溢走說石抹宜孫曰。貧民迫凍餒。故相挺從盜。誠得一循吏招輯。皆爲良民。今若翦屠。失民望。且賫賊非計。石抹宜孫善之。卽檄無擅殺。因留議軍事。盡平屬縣。上功授龍泉主簿。辭不受。海寇起。石抹宜孫移台州。甯海民亦爲變。應之。犯台急。檄溢爲援。溢方退居。得檄卽起。集趨勇數百人。趨夾擊。賊潰。海寇亦遁去。甯海饑。豪民積穀閉糴。溢言於石抹宜孫。行縣賑之。抵豪罪。發其粟充用。龍泉饑。亦閉糴。溢私以己田易粟貸里人。婉行勸分。民受惠爲多。青田潘惟賢爲盜。而龍泉監縣寶忽丁貪虐。民因遵惟賢來攻。以甘心寶忽丁。寶忽丁走。溢與王剛叔召豪傑戰賊。敗走之。縣治遂復。寶忽丁懼。棄職獲罪。而愧溢等有功。乃使人刺剛叔。且及溢。溢痛剛叔死。言於府帥。檄兵擊襲之。寶忽丁遁去。時處州盜起。行省移石抹宜孫分治處州。溢謂之曰。松陽小醜。不速平。將成大患。宜孫曰。惟君處之。乃授千戶曹勝安方略。一戰降之。以功授松陽尹。復辭不受。尋討麗水賊。敗之。賊首就縛。復平土豪周天覺。散其衆。薦授

武德將軍僉浙東都元帥府事。至是凡三授官。太息曰：吾所將皆鄉里子弟。今子弟肝腦塗地。吾因以爲功名不祥。又力辭不受。歸結廬匡山。自號匡山居士。己亥冬。明兵克處州。盜避入閩。太祖東帛迎之。與劉基、葉琛、宋濂同至建業。入見。上問勞曰：我爲天下屈四先生。然四海紛紛。何時定乎？對曰：天地無常。惟德是輔。惟不嗜殺人者能一之。上悅。擢僉營田司事。課江淮田稅籍。有等。嘗有疾在告。上數視。小愈。入謁。上望見喜甚。恆問左右章盜康彊否。左右對曰：盜念母邑。邑未愈。卽日命歸省。賜金綺。浙東始設按察司。以爲僉事。尋命還處州。代總制胡深入朝。及深出師溫州。復命還守處州。給餉無缺。漢平。設湖廣按察司。調盜往。入見。上曰：紀綱之事。今屬卿矣。荆襄多廢地。建議分屯田。上善之。鎮撫回回。怙勢作威。輕重人罪。廉得狀。坐以法。河南按察使宋思顏等有罪。辭連盜。上遣劉基諭曰：予素知盜守法令。毋疑也。旣而胡深入閩。陷沒處州。震動。改盜浙東副使。鎮之。比至。山寨多叛。乃宣布詔旨。勒兵誅首叛者。餘皆帖然。尋處兵悉發戍浦城。而慶元寇亂。乃召故所部義兵禦走之。上以長子存道提兵爲游擊。盜謂父子相統。非制。請罷。上不許。曰：吾方藉爾父子鎮靜疆場。顧效他人嫌疑耶。浦城軍乏食。上命李文忠至。與盜計之。文忠欲運糧處州。盜曰：不便。今軍中所掠糧甚多。請俱入官。均結債以直。食乃足。時建甯守將院德柔來歸。或疑其詐。盜曰：陳友定據全閩。勢必不能容。故圖自全。非詐也。時請以原官守之。擒斬蒼陽盜周瑞卿。通平陽。瑞安之路。處州僉水軍。隸軍府。役煩而事擾。奏設千戶專統之。又奏免山田之稅。時海賊入寇。千戶任惟賢。退縮。斬之。自拒戰。破擒略盡。會朱亮祖取溫州。軍中多掠子女。盜曰：此非將軍所宜。悉搜出還其家。海隅

甯請朝京師。上報曰。吾知卿在邊方良苦。俟平吳有後命。吳平入朝。令分兵征閩。而存道守處州。上諭羣臣曰。章溢雖儒臣。父子宣力於邊。其功不後諸將軍。廷議征閩。以御史大夫湯和由海道進。平章胡廷瑞自江西入。溢密進曰。二將二討。固必勝。而李文忠威信素馳閩。若令從浦城取建甯。此萬全計也。上立詔從之。時處州餉閩師。歲加徵十倍。皆以溢言從。舊額溫州朱君達既叛。又請降。奏戮之。方造海舟。徵巨材。檄處州與諸郡均辦。溢曰。處限以峻嶺。卽有木。何從出。力奏止之。上卽皇帝位。與劉基并拜御史中丞。尋兼太子贊善大夫。時廷臣多逢上意。尙嚴。溢務存大體。不屑屑細故。或以爲言。溢曰。憲臺百司之儀表。居其職者。當先養人以廉恥。使人避而不犯。豈直恃搏擊爲能哉。上親祀社稷。會大風雨。還坐朝。怒儀曹議禮不合。以致天變。溢奏曰。風雨已連朝。無足怪者。縱禮官議有未善。陛下精誠自足。仰格神明。願賜寬貸。上爲霽威。上禮重溢。嘗語溢曰。先生年向耄。恐感霜露致疾。不宜早趨朝也。先是上既從溢議。令文忠入閩。溢子存道部鄉兵萬五千以從。及閩平。詔存道以兵從海道北征。溢持不可。曰。鄉兵農人也。初詔許事平歸農。今復調之。是爽信也。上不懌。溢請故常爲叛者籍爲軍。使北征。而甯其勿叛者以示信。一舉而恩威著矣。上喜曰。孰謂儒者腐哉。存道部浮海北行。走京師。聽進止。上諭曰。汝父宣勞爲多。汝又北上。勉立事功。以無忝爾父。因授處州衛指揮同知。戊上黨。尋移平陽。洪武二年。溢喪母。悲戚過度。居常忽忽。營兆宅。親負土石。感疾益深。卒年五十六。上憫悼。親爲文祭之。溢孝友。父未葬而盜焚其閭。溢哭抱父柩。火遽滅。事母備極孝養。二兄別居已久。旣創第龍淵。請二兄同居奉母。定先世祭享之禮。益田以供祀。創義塾。

立義阡。諸可以善善扶義者。無不爲也。器局曠曠。撫世酬物。誠確宏偉。外若和緩。至臨大事。爭是非。不避權勢。必折衷於理。宋濂曰。生我者父母。知我者章公。其相信如此。三年存道。從征秦隴。取興元。留守明昇。將吳友仁來侵。擊敗之。改平陽衛。五年。從將軍湯和出塞。至斷頭山。戰不利。死之。史官曰。章溢未遇高皇時。屢平劇賊。衛鄉里。威望已行於江東矣。及帝以儒術召。而父子戮力。出入括蒼。閩海間。招攜伐叛。以武功顯。儒者固不可測如是哉。迹其始終部署。俱江東子弟。溢孝友過人。孚於鄉曲。不忍以子弟肝腦易富貴。此一念可儒可將。宜其得人心而成大業也。

陶安傳

陶安。字主敬。當塗人。外樸而內穎。有大志。博涉經史。滿心濂洛之學。尤邃於易。爲文純雅。疏曷。舉元甲申鄉試。戊子。試禮部不第。授明道高節書院長。元末。四方兵起。郡當其衝。屢以策干守將。不見聽。乙未。太祖取太平。與耆儒李習出郭迎。見上狀貌。喜謂父老子弟曰。龍委鳳質。非常人也。生民今有主矣。上召語時事。安首言。四海鼎沸。豪傑爭雄。志在子女玉帛。非有撥亂救民安天下之心。明公率衆渡江。神武不殺人。心悅服。以此順天人。行弔伐。天下不足平也。上曰。善。吾欲取金陵。何如。對曰。金陵。蟠踞。限以長江。據其形勝。出臨四方。何向不克。上又曰。善。留參幕府爲都事。丙申。從克金陵。陞左司郎中。旣而聘基。濂。溢。琛。至上問四人者何如。對曰。皆天下才也。臣與之語。謀略不如基。學問不如濂。治民之才不如溢。琛。敢爲得人賀。辛丑。克黃州。難其守者。上曰。無逾於安。命爲守。兵荒之後。政務一新。甲辰。改知饒州。寬賦省徭。招徠。

流亡民皆悅服。乙巳，信州賊蕭明攻城急，與千戶宋炳協拒守。登城反復諭賊，賊曰：「使皆如太守，豈有今日會援兵至，賊大敗去。」諸將怒，請屠從賊者。安曰：「民爲賊脅，非本心，奈何殺之？」明年入朝，民爲立祠祀。吳元年，置翰林院爲學士，知制誥，修國史。時開禮樂二局，徵宿儒集議禮制。公總裁，定修律爲議律官。洪武元年，上與儒臣論學術，安對曰：「道之不明，邪說害之也。」上曰：「試如卿言，夫邪說害道，猶美色眩目，自非豪傑不能決去。」因賜門聯旌之。時御史有言安隱過者，上曰：「汝何知之？」對曰：「聞之道路。」上曰：「御史取道路言毀譽人，以此爲盡職乎？」立黜御史。尋出爲江西參政。安寬仁達吏事，政績益著。居四年，疾劇，草上時務十二事。卒年五十七。贈姑熟郡公。國初諸禮多經裁定。安有二子，昱、晟。晟爲浙江按察使，貪信用輕薄小吏，上并昱戮之。其家四十餘人皆發戍。州司逼索，安繼妻陳裹帛入見，上問媼爲誰，具以對。上曰：「陶先生嫂乎？」有幾子，復叩頭曰：「臣前二子皆不肯伏法，家人四十餘坐罪發戍，州司督責甚急，惟陛下念先臣安一日勞，上曰：晟死其罪，言及陶先生，令我惻然，立召兵部曰：朕渡江之初，安首陳幾務，先後蒙涉諸艱，功在彝鼎，家人所犯，卽盡赦之。」安前妻喻，名德常賢著聞。王師克金陵，安移家金陵，喻要母同行，母不可。喻曰：「四海兵爭，惟高城深池都會之地，可以託身，母從之。」及陳友諒陷姑熟，得以移居，免難人服。其先見云。史官曰：陶安杖馬箠，立軍門，渡江數言，開招形勢，何以婁敬輓轂之說。鄧禹初見蕭王數語也，可謂壯士。屢守江州，修扞著績，天下既定，稽古禮文之事，皆取給焉，無雙之譽不虛耳。

唐鐸嚴震直韓宜可羅復仁傳

唐鐸鳳陽人。自庚子從攻江州。洪武二年授西安縣丞。召還中書省管旬。出知延平府。三載召爲殿中侍御史。復出知紹興。陞刑部尙書。改太常卿。內艱。賜半俸。服闋。除兵部尙書。改諫議大夫。坐事左遷。監察御史尋陞右副都御史。復爲兵刑二部尙書。初立詹事院。兼詹事。食尙書祿。未幾致仕。已而改院爲府。復超爲詹事。食尙書祿。尋致仕。再起爲太子賓客。尋加太子少保。二十八年使龍州諭趙宗壽還。復出參謀總兵楊文軍事。經畫守衛。撫輯蠻獠。鐸重厚慎密。靖廉不妄取。予太祖初起兵時。卽侍左右。每以故舊遇之。僚屬罪數連鐸。上念鐸篤行。皆不問。時諸卿中詹徵以才勝。鐸以德勝。然不動聲色。而政務修理。人咸愛之。上嘗曰。都御史詹徵。刑部掌部事。唐鐸二人。性行不同。下人事之亦異。徵剛斷嫉惡。不容奸僞。役吏髮蓬而垢。容愁肌瘦。不異羈囚。以不得肆其貪。故若是。鐸始友及臣。至今三十四載。交不知變色。口不出惡聲。德有餘而才稍不足。屢被小人誣誤。極刑者數矣。朕深知其德。典宥弗罪。奸人忌徵剛。則謗訕滿朝。鐸厚重無疵。又謂儒而無爲。一切文移計稟。皆舞文弄法。愚鐸賄賂公行。鐸無可奈何。嗚呼。聰明決斷者以爲非。淵德海涵者以爲愚。人之心不古有此耶。三十年卒。年六十九。卹賻最優。

嚴震直字子敏。烏程人。有器量。貌魁岸。性誠實。不善讀書。長於算數。太祖起民間。知輸糧苦。有司奸吏多索詐。洪武四年。令東南歲入田賦類萬石。一家主之。不入於官。而集於鄉。自爲徵督。給勸合運入京。及江北諸郡。謂之糧長。既久。法壞多生事。郡縣官往往獲罪。乃議舉名家有行誼者主其事。於湖州得震直。清潔自厲。二十年無纖芥可指。名譽爲列郡最。以布衣授布政司參議。留中署通政司事。奏對詳明。改戶部

郎中。考實江西賦稅。二十四年。賜第於崇禮街。復其家。明年。陞工部右侍郎。六月。拜尚書。時營建方殷。綜理周密。以夫六十萬開膳脂河事。辦繼奉命集天下工伎二十三萬有奇。請戶役一人。父兄子弟不相緣。計煩簡更定班次。人皆便之。里人有訐其弟姪不法事。命震直自按理。無所徇。上并宥之。二十七年。以事降御史。凡囚有誣枉。力辯之。多獲寬貸。它御史劾其傲。且私留鄉人在署飲。上曰。此舊尚書也。小事何足論。不聽。廣西龍州趙宗壽恃險恣橫。潛通安南。奉使往諭。入其王城。開示利害甚悉。皆悚息聽命。凡所餽獻。皆卻不受。并奏減廣東西行鹽之半。立接運法。以通鹽販。商民便之。桂林河渠廢塞者。因故道浚五十里。導南江曰漓。自蒼梧入海。北江曰湘。自洞庭達長江。築隄治陡閘三十六。旁通靈川。千秋峻。鐘象鼻。口峯。鑿灘礮。以通舟車之路。西人紀謂秦史祿。漢馬援及震。直古今爲三人云。上聞喜曰。老嚴成此巨功。朕任得人矣。又均徭賦。振風俗。懲貪殘。慎刑獄。征南之兵。需牛數千頭。皆取諸民。請給鈔償其價。大師兵不戢。及靖江王府人爲民害。奏劾之。獠民嘯集。移檄撫安。邊徼以甯。廣惡少父子冒法。子匿而父出。誣其子宗仁及壻莫瀾。將自脫。事未白。守仁瘐死。奏爲特誅惡少父子。而釋其壻。三十年。遷右都御史。兩淮民食鹽逋稅。罪至數百人。奏釋之。上嘗召其三子宗禮等入見。曰。都御史有進兒。福未艾也。以救御史李斌降御史。八月。陞工部尚書。奏工役贖還家者四萬五千人。十一月。重建太學。指揮李忠奏役徒死者。當戶丁以代。凡四萬餘人。與詰難緩其事。後悉遇赦免。念起自毗庶。自拜官及超轉。控辭屢祿。不敢升斗。被詔。獨其家徭役。力辭。降御史。不敢居賜第。遷家隘巷。致仕。居西塞山中。太宗卽位。召入宣諭。山西九月。

至澤州卒。孫杰，文梁並成進士。杰，御史。文梁，主事。

韓宜可，字伯時，山陰人。元末，御史辟爲掾，不應。洪武初，以歲貢薦授本縣教諭，轉楚府錄事。十年，拜御史，持風紀甚振。十一年，左右都御史陳甯、胡惟庸、中丞涂節侍坐，方宴語，直前長跪，出彈文劾三人險佞，怙寵反側，請斬首謝天下。上怒曰：「快口御史，排陷大臣，下獄。」尋出之。三人釋不問，然上心善其言。疑三人且防之矣。時重外臺之選，擢江西按察僉事。方中都役作，凡官吏有罪，笞以上悉論發。上言：「刑以禁淫惡，一民軌合，論情之輕重，事之公私，罪之大小，而施舍之。今罪不問如何，悉服賤役，小人之幸，君子殆矣。乞分論合律，從之。」十三年，甯等皆坐死，歸朝。上以沒官男女散入諸司爲奴，獨不受，且以爲非聖人舊典，尙書言：「罪人不孥，古之制也。」有事隨坐，法之濫也。官吏有罪，厥辟勿宥，國之經也。經不可廢，制不可違。濫不可則，罰及妻子，何居？豈以夫榮享其樂，旣坐常坐罰，陛下一怒而羣臣家屬不問罪之大小，皆不能保，恐非聖明所宜有。上是之。著爲令。後坐事將刑，正天朗，忽震雷遶殿，上驚曰：「非枉此人乎？」雷卽息，趣免。又上封事二十餘，上皆嘉納之。未幾，罷歸。復召還京，命撰鍾山大江文，諭日本烏蠻，詔堯舜禹湯傳賢論，皆稱旨。除山西布政。二十一年，坐事謫安南。二十三年，薦起雲南參政。尋陞左副都御史，以鋤奸顯忠爲己任。百僚震肅，未幾卒官。時大星墜地，橪馬皆驚，以爲其應。云：生平峭厲可畏，而緣情酌法，要歸平恕，上爲霽威者屢矣。

羅復仁，吉水人，博覽經史，尤通天文書。初，陳漢辟爲翰林編修，遁迹去。壬寅，明兵取九江，復仁杖策來歸。

上喜置左右。從破友諒於鄱陽。詹蠟書招袁。臨吉贛諸郡。諭降武昌。擢國子助教。以老賜小車出入。每宴見。賜坐飲食。丙午。使山西。曉譬擴廓。洪武元年。遷翰林編修。諭安南。歸所侵地。安南遺金貝土物甚多。卻之上。聞益義之。隨拜宏文館學士。復仁性簡樸。古草野倨侮。而胸中了了。每率意陳得失。無所顧避。至操南音以對。上顧呼爲老實羅。而不名。一日。幸其第。復仁方操塗具完壁。急呼妻抱瓦坐上。上曰。賢士豈宜居此。命賜第城內。遇天壽節。制水龍吟一闕以獻。上悅。厚賜之。尋乞致仕。陛辭。賜大布衣。題其裙曰。性雖粗率。忠直可喜。賜汝布衣。放歸田里。久之。復召乘傳至京師。奏滅江西秋糧軍籍。諸不便民事。上憐其老。留三月。賜玉帶。餽杖。裘馬。食具。遣還。未幾。卒。有玉堂唱和集。子養蒙。孫簡。有傳。

史官曰。事英主者。威福叵測。惟正直忠厚爲可久。明祖深知唐鐸之厚德。心許宜可之快口。而震直復仁。時以老實呼之。故數人久膺殊眷。雖罹文法而獲免。若才既不及。而挾詐以御主心。鮮不殆矣。震直綜理周密。多所建樹。宜可風采嚴毅。歷內外臺。不吐剛茹柔。又豈如鐸之才不逮德哉。

王濂傳

王濂。字習古。定遠人。少好讀書。知大義。習聲詩。音節韻趣皆有法。推擇爲定遠吏。有謀策。令長以賓禮遇之。元季政亂。豪傑並起。嘆曰。保宗族。救民可也。走穎毫。說其軍帥。使反。虜政無害民。軍帥喜。留爲萬夫長。歷官至工部尙書。以其必無所成。聞太祖克金陵。乘間挈家南渡。時李善長其婦兄也。在上左右。亟言之。召見。遂詔爲執法官。悉心詳讞。務協於中。全活者多。丹陽令白齊。應天知府王子謙。其著也。上深簡注。進

中書員外郎。出爲浙江僉事。巡行郡縣。貪墨誣民者。擊去。惟恐後。餘則務存大體。觀風宣化而已。一日。大風晝晦。詔求直言。濂疏奏。歷述災傷病民。上爲罷征戍。尋嬰疾休於家。洪武三年卒。年五十七。上痛惜之。每謂善長曰。王濂識力。真王佐材。今舍朕去。朕失一臂。卿肺腑。亦安所託。後善長坐事。上嘆曰。王濂在。必不至此。濂恂恂儒者。與宋濂善。或共論議。或張目吐氣。指畫方圓。滾滾數千言不休。臨大事。神采精緊。毅然不可奪。好而折人過。性和。在戎行。多慈惠。每以不殺進勸。事親盡心力。人咸曰。孝如王習古。庶幾無愧。子二。伯驥先卒。仲佐篤學好古。凡法書名畫。多所鑒定。善虞書。以才爲鎮撫。

史官曰。闕。

王嘉會傳

王嘉會。字原禮。嘉興人。少博洽。負俊聲。元末。累舉不第。客松江。爲人溫澹和緩。後進樂就講論。上海令康伯迂見其所作。敬禮爲上賓。時咨文章。曰。非欲飾吏治。然非公不能洗發我心也。以明經聘至京師。太祖命賦詩作文。稱旨。除翰林檢討。洪武十五年。□國子右司業。時宋訥爲祭酒。太學生常數千人。嘉會與訥及左司業龔敷。嚴立楷範。三人者。春秋已高。鬢鬢如正衣冠。旦夕端坐。諸生雲集階下。肅然望而畏之。以是士類率教。多所造就。吏部取擢。輒能其官。上憫其勞。畚待殊厚。十六年冬。以老疾乞歸。不許。明年許之。未行。卒於官舍。上聞嗟悼。命給舟車還。仍命所在官司祭之。同時松江孫作先亦爲司業。稱曰海濱二老。

史官曰

陳修傳

陳修字伯昂上饒人甲辰來歸擢理官講書律令崇寬厚省煩苛復倫要黜姑息簡明正大四方翕然如有一統之制作上留心兵刑數數講求謂唐世府兵之制稍爲近古而未精密乃進兵部郎中選任將帥條列兵制令內外相維兵農相資遂爲定法太祖卽大位山東新下念濟南重經王氏之亂民塗炭甚大將多練兵屯田其間非修莫可治出爲濟南知府疏勸墾墾荒有成效居二年詔書褒美超拜吏部尙書修引據古典參酌時宜審地劇易制事煩簡與凡貴賤疎數遠近寬嚴課功覈實賞賜黜陟之類皆籌畫妥確未幾卒於官繼之者莫能易宣宗采其事載於五倫書

史官曰

杜敷傳

杜敷字致道壺關人質稟純明學問融貫通五經尤深於易心貌俱古舉河東鄉試第一除高平教諭陞臺州學正西安儒學提舉省院辟之皆不就歸授徒學者爭從之多感慨形於歌詠自號太行樵者學者稱爲南坡先生洪武十三年特徵命爲四輔官兼太子賓客司夏季御書官爵制諭以賜每進見講明治政必以古先哲王爲範一日上曰朕治天下其於前代帝王何做李祐對曰當做唐太宗上默然敷對曰治天下之道莫過於堯舜上曰我非敢當堯舜卿等頗效稷契皋陶時國學成上咨敷誰可爲祭酒者敷

舉滑縣宋訥。卽徵訥。訥爲祭酒。甚當上心。上每曰。非老杜舉訥。其何能教如此。再幸其第。累加賞賜。親與廣和。尋以老疾懇辭。給驛歸。卒年七十二。所著有聯時集。

史官曰。闕

吳伯宗傳

吳伯宗。本名祐。以字行。金谿人。父儀。字明善。元季鄉薦。世稱東吳先生。講學授徒。多所成就。尤深於春秋。著裨傳。類編。五倫辨義三書。辭深密。嘗言。世有楊子雲。其將好之矣。壬辰寇起。集鄉黨自保。入明。其太守聘起之力辭。卒。伯宗十歲能文。先達見者歎曰。此兒玉光劍氣。終不可掩。舉洪武庚戌鄉試第一。府判官王翮夢城中迎狀元。告人曰。必吳子也。明年辛亥中會試。及廷對。太祖親製策問。詢以古帝王敬天勤民之道。伯宗條答稱旨。果擢第一人。時初開科取士。伯宗儀觀儼恪。應對明辨。上甚喜。賜袍笏冠帶。授承直郎。禮部員外郎。與學士宋訥同修日歷。時胡惟庸方用事。羅致庭臣入其黨。伯宗亢直不爲屈。惟庸中以事謫居鳳陽。上書論時政。并言惟庸專恣不可獨任。上得奏。卽召還。使安南。得方物以獻。爲國子助教。十二年。進講東宮。首陳正心誠意之說。皇太子嘉納。明年改翰林典籍。御製十題命賦之。立就。詞語峻潔。上常稱曰。才子也。賜織錦衣。陞太常寺丞。轉國子司業。皆辭不拜。忤旨。貶金縣教諭。至淮安。復召還。爲檢討。壬戌。拜武英殿大學士。十六年。以弟仲宴爲三河知縣。薦舉不實。坐累。復降檢討。十七年。坐文字進不以時。謫雲南。卒。伯宗博學能文。詳雅不苟合。屢獲譴無所悔。著有南宮使交。成均。玉堂諸集。

史官曰。明以制科取士。士亦以此自重。故得人於斯爲盛。凌彝至於季世。而采春華。忘秋實。爲王、楊、盧、略者。多不稱其行。制科遂爲天下詬。吳伯宗制科初開第一人。也。驚才絕學。不呈身權相。首陳正心誠意之說。其樹立何如哉。予故表而出之。爲取士權輿云。



明書卷一百十七

列傳四

名臣傳二

樂韶鳳、張智、崔亮、朱善、吳沈、劉仲質、翟善、滕毅、錢唐、任亨泰傳

樂韶鳳字舜儀。全椒人。乙未。謁太祖於軍門。與語奇之。是秋。扈渡江。參軍事。從下金陵。丁酉。授江西行省管勾。累任起居注。給事中。中書左司員外郎。兵部侍郎。六年。拜本部尚書。正月戊午。上念天下既定。恐中外將卒習於安逸。弛武藝。命同省臺督府定議。教練軍士法。并定賞罰。各有差。改侍講學士。與承旨詹同。定祀孔子樂章。編集大明日歷。爲催募官。又命擇唐宋名儒表箋。可爲式者。頒行天下。七年九月。上以祭祀還。用樂舞前導。命翰林儒臣撰樂章。韶鳳上所撰降祥。祝惠。醑酒。色荒。禽荒諸曲。凡三十九章。曰回鑾樂。辭存規切。八年。與諸廷臣正中原雅音。書成名曰洪武正韻。攷陵寢朔望節序祭祀禮。定以每歲元旦。清明。七月望。十月朔。冬夏二至。日用太牢。其伏臘社。每月朔望。日則用特羊。祠祭署官行禮。如節與朔望。伏臘社同日。則用節禮。復定登壇脫鳥禮。上之上。命著爲令。未幾。以病免。起國子司業。十二年。陞國子祭酒。定皇太子與諸王往復書劄禮。韶鳳考據精詳。上賜諭曰。文廟之設。以尊先師。因之爲國學焉。歷代以

之謂君嗣甚重。故哲王必選名儒以爲表率。朕命爾端是師範。闡揭博通。使幼者記。壯者解。其毋怠忽。以補於朕政。欽哉。十三年。雷震奉天殿。上以羣臣多不職。罷斥者甚多。詔鳳因致仕。以壽終。兄弟皆知名。於時曰。暉以人材知開封府。曰禮。太常卿。曰毅。諸暨同知。并知名。詔鳳有友五人。曰趙奎。陳旭。陳友。王才。魯文質。並起畝澮。奎體貌魁岸。有才略。立功授總管守宜興。洪武四年。從征甘肅。猝遇敵。衆畏怖。奎獨奮殊死。戰敗之上。喜加賞。旭英毅多智識。友有膽氣。常居前鋒。才尤壯武。文質攻醫。授太醫院判。奎才歷官都指揮使。旭以從燕封雲陽伯。友以平蠻封武平伯。

張智字玄略。延平人。父昇。元以神童薦。補太學授祕書郎。五遷至江西儒學提舉。智生而聰穎。讀書過目成誦。不爲嬉戲。正色端謹。如老成人。嘗侍父慨然曰。采玉必於崑山。探珠必於滄海。爲學豈可不出戶庭哉。卽挾策入元都。交當世名士。用薦入國學。四方兵興。以才出參閩省機務。授智同知新喻州。辭居建陽。洪武戊午。以明經薦爲夷陵州學正。凡九載。艱歸。起以尙書趙勉薦。超拜禮部試左侍郎。疏請宜以書籍頒布北方學校。議者以費財不便。正色曰。使賢才彙征。利益生民。何惜此費。未幾實授。是時諸儒多不稱任使。至嬰顯謬。上謂智等曰。古人務學。明體實用。窮則忠信篤敬。以淑諸人。達則忠君愛國。澤被天下。朕擢用儒士。布列百司。而卒少見效。良由師道不立。故成材罕聞。爾宜以朕言諭天下。俾凡爲儒者。必以聖賢之道自律。修己教人。毋徒尙文藝。智請首行於太學。從之。尋奏定歲貢生員制。語詳學校志。壬申。懿文太子薨。智上議曰。喪禮。父爲長子。服齊衰。期年。皇帝當以日易月。服齊衰。十二日。祭畢釋之。在內文武百

官卽日於公署齋宿素服。入臨文華殿。給衰麻。越三日成服。詣春和門會哭。明日素服行奉慰禮。其當祭祀及送葬者。仍衰絰以行。在京停大小祀事。及樂。至服闋日而止。停嫁娶六十日。在外文武百官聞喪。易服於公署舉哀。次日成服行禮。停大小祀事及樂十三日。停嫁娶三十日。尋以時享在邇。令智與翰林院參考古制。智等奏曰。王制三年不祭。惟祭天地社稷。不敢以卑廢尊也。今定議天地社稷先師歷代帝王用樂外。惟太廟乃祖先神靈所在。國既有喪。而時享仍用樂。恐神不樂聽。宜備而不作。詔從之。尋以事左遷爲國子學錄。尋陞博士。建文中進司業。智儀容嚴肅。多識典故。教人以規矩。開導獎勵。老而弗倦。卒於官。

崔亮字義夫。葦城人。元末爲省掾。明兵來。謁舊館。授中書禮曹主事。遷知濟南。有善政。洪武元年。歷至禮部尙書。詔定官員親屬冠服。及隸卒軍士等制。各有差。三年朔旦以來。日有黑子。占者疑祭天不順。禮所致。詔亮議。亮引用漢唐宋及元損益不同。復以國朝前議。圖丘從祀之禮。以漢唐爲煩。故正祀日月星辰太歲爲簡當。上然之。後上問郊祀天地拜位皆正中。而百官朝參則列東西。避正中。何也。亮對曰。天子祭天。陸自午。陸祭社。陸自子。陸蓋社主陰。北方也。故君南向。答陰之義也。郊主陽。南方也。故君北向。以答陽也。若羣臣朝參。無答神之義。俱當避君上之尊。故升降則皆由卯。陸朝班則分東西立。以避馳道。其義不同。上是之。復命議百官及內史監官於皇太子親王前稱殿下。自稱名。若本宮內史本府官及承奉司於皇太子親王前俱稱殿下。自稱臣。百官在上前稱皇太子親王。稱曰皇太子某王。又定大朝會常朝及內

外官員辭謝奏事侍班諸禮。并定皇太子及羣臣賜坐殿上坐。鑿制酌宋典爲損益。其他請旗纛止祭於常祭之月。與夫宗廟四時之祭。皆用四孟及歲除。凡五。定祭於清明等節。各備時物薦享。俱允行。又定大射禮儀。定仁祖廟號。請下太常祭告。時國制草創。亮引證多據經典。七年卒於□。

朱善字備萬。豐城人。善少聰穎。十歲能文。既壯。以經學授徒。兵變隱居。以道學爲己任。所著有詩經解頤輯釋。史輯等書。太祖開設學校。初以薦舉爲訓導。尋授教授。洪武八年。召赴京。廷試諸儒。善居首。授翰林修撰。署院事。知制誥。明年。以奏對失旨。謫戍遼東。無愠色。日賦詩寫懷。有遼海集。未幾。賜還鄉。語子逢掖曰。汝力耕以供賦役。我取祖洞雲先生所著皇極經世等書。考證以傳。庶不墜先業。十七年。召爲翰林待詔。時方革元俗。嚴中表婚禁。民習舊多犯法。上疏論婚姻律曰。國重世臣。家重世婚。今民間婚姻之訟甚多。非姑舅之子若女。則兩姨之子若女。蓋法不得爲婚。以故讎家誣訟。或以聘見絕。或旣婚復離。甚或兒女行立。有司逼拆。使夫婦分離。子母永隔。冤憤抑鬱。無所控訴。悲號道路。感慟人心。議律不精。禍乃至此。按舊律。尊長卑幼相與爲婚者有禁。若謂母之姊妹與己之身。是謂姑舅兩姨。不可以卑幼上匹尊屬。若己爲姑舅兩姨子。彼爲姑舅兩姨女。無尊卑之嫌。爲子擇婦。爲女擇壻。古人不以爲非。成周之時。王朝所與婚者。不過齊宋陳杞四國而已。故當時稱異姓大國曰伯舅。小國曰叔舅。其世爲婚姻可知。至於列國齊宋魯秦晉亦各自爲甥舅之國。後世如晉之王謝。唐之崔盧潘楊之睦。朱陳之好。皆世爲婚媾。又如溫嶠娶姑之女。呂榮公娶姨之女。今此事甚多。以致訟獄繁興。風俗凋弊。願以臣章下羣臣議。弛禁以通人。

情。上是其言。遂弛其禁。十八年。校禮闈。進文淵閣大學士。嘗進講。心箴於文華殿。奏言。致治在任人。今天下太平。惟選用賢才。以敷文治。惟留意焉。上曰。善。尋遭疾。賜告。卒年七十二。正德中。諡文恪。是時有金思誠。爲上海令。博雅宏粹。少負文名。鮑恂。字有孚。崇德人。博學篤行。所著有《大易傳義》、《西漢集全詮》、《安吉人張長年》、《高郵人張紳》、《登州人俱年七十餘廷薦》、《思誠》、《恂》等。明經達治體。遣使徵之。入見。上甚喜。賜坐。顧問。俱命爲文華殿大學士。恂等固辭。上曰。朕以卿等。高不煩以政。故授此職。以輔導太子爾。免卿蚤朝。待日晏入。不久當從其志。庶不負卿等平生所學。恂等復固辭。聽還鄉。惟紳後至。以爲鄆縣教諭。

吳沈。字濬仲。蘭谿人。父師道。字正傳。元禮部郎中。有文學。沈累辟爲學訓導。不就。太祖取婺州。改甯越府。王宗顯知府事。辟沈及朱廉。徐原。主教事。洪武十二年。以儒士舉。誤上名曰信仲。既除翰林待制。謂修撰王釐曰。名旣誤。冒昧不更。是欺罔也。告改正。上曰。是誠恪人。遂蒙眷遇。參謀議。尋以奏對錯誤。降編修。未幾。復待制。十四年。給事中鄭相同奏言。會無二上。稱臣於東宮。非禮。沈駭之曰。國之大本。尊安得異。上是之。十五年。降渭源教諭。未行。留爲翰林典籍。尋晉東閣大學士。上將享太廟。致齊武英殿。謂沈等曰。古聖賢垂訓立教。大要有三。君敬天。臣忠君。子孝親。人道立矣。其摘古經傳類編三事爲書。書成。賜名。精誠錄。沈爲撰序。十六年八月。進講後期。降侍書。改國子博士。時方興文事。沈獨謂兵不可廢。每云。聖人之兵。昭文德而威不軌。所以生人。非殺人。禦亂。非爲亂。尙義。非尙詐。武經則云。兵詭道也。非其本意。遂纂易詩書論孟詞義涉戎事者。立爲五篇。一曰兵象。二曰兵用。三曰兵禮。四曰兵詩。五曰兵訓。總題曰六經師律。崑

山秦約見而歎曰文武一貫有功世道之書也十九年致仕卒沈富蓄遠覽志負經濟三進三黜而無愠色嘗著辨言孔子封王爲非禮自是布政夏寅祭酒邱濬皆主其說并欲去諡至嘉靖中乃行之而用王禮如故

劉仲質字文質分宜人博通經史洪武初爲宜春訓導薦入京奏對稱旨擢翰林典籍校正春秋本末十五年驟拜禮部尙書太祖諭之曰孔子明帝王之道使君君臣臣父父子子綱常以正彝倫攸敘其功參乎天地其令天下郡縣學以每歲春秋仲月通祀孔子丁巳上謂仲質曰國學新成將釋菜令諸儒議禮議者曰孔子雖聖人臣也禮宜一奠而再拜上曰朕以爲孔子明道德以教後世豈可以職位論哉昔周太祖祀孔子入祠將拜左右曰孔子陪臣不宜拜周太祖曰孔子百世帝王之師敢不拜遂拜朕深服其明斷不惑左右之言朕敬禮百神於先師禮宜加尊仲質乃與定議上服皮弁執圭詣先師再拜獻爵後又再拜退易服詣彝倫堂祭酒司業博士助教進講賜坐侍臣以次列東西講畢宣諭學官諸生而還明日祭酒率學官上表謝上從之尋命條學規梓行賜師生進華蓋殿大學士未幾坐事降御史後以年老致仕仲質爲人篤厚文多質實如其爲人云

翟善字敬夫秦興人洪武中貢入國學有聲授吏部文選主事歷員外郎二十六年吏尙書詹徽伏誅以善署部事勤慎稱旨特陞本部侍郎仍署事會上以諸司職有崇卑政有大小無方冊以著成法恐後之蒞官者罔知職任政事施設之詳命善同翰林儒臣倣唐六典之制舉凡設官分職之類編爲書名諸司

職掌二十八年實授。一日上諭羣臣曰。善雖年少。字量宏闊。他莫能侔也。善明於經濟。凡所奏議。多合上心。上每曰。善朕良佐哉。命工部爲善營第於秦興。善辭曰。江鄉地隘。宗親且衆。不忍奪人以自益。況未有所報稱。何敢當。上喜曰。有官居鼎鼐。無地起樓臺。善與寇準同風矣。善故戍籍。上欲免之。善頓首曰。戍卒宜增。豈可以臣破例。上曰。善可謂社稷臣矣。二十九年免歸。

滕毅不知何許人。元末兵亂。流寓江南。乙巳太祖征吳。以儒士入見。言事稱旨。留徐達幕下。尋拜起居注。命毅同楊訓文集古無道之君。若桀。紂。秦皇。隋煬所行事以進。上曰。古人君所爲。善惡皆可以爲龜鑑。而惡尤以儆惕。吾所以觀此者。正欲知喪亂之由以爲戒耳。又命毅與宋濂等日侍左右。講說經史。甚見眷遇。吳元年出爲湖廣按察使。尋命毅與李善長。劉基。陶安。周禎等定律令。毅於湖廣務存寬大。於休養爲急。民多宜之。洪武元年超拜吏部尙書。六卿初設。一切選除考課。皆毅與省臺官裁定。不激不隨。人稱得體。二年出爲江西參政。卒於官。

錢唐字惟明。象山人。博學敦古行。洪武元年舉明經。陳王道稱旨。授刑部尙書。二年詔春秋孔子釋奠於國學。遣使降香於曲阜。每仲月上丁致祭京師。而令天下府州縣不通祀。唐上言。孔子百王師。先儒謂仲尼以萬世爲事。天下祀孔子。天下祀聖壽。報本之禮。不可廢也。從之。祀如故。上以孟子有視君寇讎語。嫌之。欲節略其書。并議廢配饗。懸法曰。有諫者死。且命金吾射之。唐極言孟子言仁義得聖道。不可廢祀。袒胸受射。曰。臣得爲孟子死。足矣。上見其誠懇。幸射不洞胸。命太醫療之。時已撤主。復之。得不廢。一日召講。

虞書。陸立而對。或糾唐草野不知君臣禮。正色曰。以古聖王之道。陳於陛下。不跪不爲踞。又常諫宮中。不宜揭武后圖。上怒。待罪午門外。終日。上悟。賜飯。卽命撤圖。以老乞致仕。不許。尋坐黷忤。謫判壽州。亨於官。任亨泰。襄陽人。貢入太學。洪武十八年。殿試第一。授翰林修撰。陞少詹事。二十七年。擢禮部尙書。時日照民江伯兒。以母病。割股食之。不愈。乃殺三歲子。以禱祭。有司以聞。上怒曰。絕滅倫理。宜亟捕治之。遂逮杖一百。戍海南。命亨泰等定旌表例。亨泰議。凡人子遇父母有疾。醫治弗愈。割肝臥冰者。聽不在旌表之例。從之。詔定蔡氏書傳。學士劉三吾等總其事。亨泰與焉。時酒樓成人。賜鈔宴其上。各獻詩謝。上大悅。二十八年。秦王棧薨。詔定喪禮。亨泰奏喪制宜輟朝五日。今遇時享。暫輟朝一日。因議世子襲爵禮。爾其集議。以聞。亨泰議。凡漢諸王薨。遣使者立嗣爲王。則玄冠衰絰喪服。以承詔事。畢反喪服。諸侯受天子之命。亦宜服其命服。使者出。反喪服。卽位而哭。又議大臣犯罪。雖蒙恩宥。不得列本班。必少加降抑。示勸懲。上命列九品班後。請罷朝參賜食。先是。每旦視朝。御門殿公侯一品官於門內。二品至四品及翰林院等官於門外。五品以下官於丹墀。叩頭皆坐。光祿以次設饌。叩頭而退。率以爲常。亨泰以事煩請罷。從之。十一月。將征龍州。以其地界安南。命亨泰同御史嚴震直往諭之。國王日焜以壯貌磊落。議論英發。敬禮之。明年。使還。上聞市蠻人爲僕。降御史尋免。

史官曰。明祖投戈講藝。延見儒士。惟恐不及。士之一技鳴者。皆得論難侃侃於天子之廷。樂詔鳳。崔亮諸臣。皆議禮制度考文之選也。雖庶事草創。比於叔孫之駢叢。與張蒼之章程。規摹弘遠矣。

周禎傳

周禎字文典江甯人元末兵起流寓江湖間庚子平漢以薦擢授江西僉事吳元年入爲大理寺丞尋進卿詔禎同李善長劉基陶安等定律令洪武元年設六部拜刑部尙書尋改治書侍御史及建廣東行省出爲參政開省之初經理曲盡奏旌香山縣丞冲敬能集流移寇至敬率民捍禦以勞死雷州同知余驥孫開設府治增築海隄揭陽縣丞許德闢公署核田畝廉州知府脫因招徠流民農多復業惠州知府萬迪興廢舉墜不受私謁乳原知縣張安仁創城池立學校撫綏流徙清遠知縣李鐸勤政興學歸善知縣木寅勝立廡宇長於撫恤由是有司競勸嶺表以安而廣東大治會下詔開科舉禎奏應聘名儒司考事從之二年刑部尙書世家寶坐黜復召禎代多行寬政三年致仕去

史官曰

端復初傳

端復初字以善先賢子貢之後以亂遷溧水爲溧水人生有遠志不肯寂寂落人後兵亂袖策言時政無能用者欲歸溧水道絕僑居金華日以書史自娛明兵取金華常遇春聘爲幕官辭去薦於朝召爲徽州經歷均田賦定科徭闢官舍政績大著遷吉州府通判俗尙譁訐教誡殷勤民不忍梗尋擢磨勘司丞凡泉粟刑法物貨句稽精密陞爲令俄僚屬皆以貪敗磔東市惟復初以清白稱超拜刑部尙書按律持以平恕以杭州馬甲飛糧事逮繫者百餘人詔往勘分囚別所人各鞠之合其辭參驗同多者情真否則僞

郡守以下皆服罪。洪武壬子，出爲湖廣參政。亂後土廣民稀，多方體綏，民復業者，獨其賦。事皆豫計，時設官多闕，復初擇在職賢良吏攝其政，稱得人。事舉，民得以安。召還疾卒。嘗著座右銘曰：爲官實難，貧然後安。事有不可急中存寬，又曰：心契上天，腳踏實地。人謂其能自警云。學士朱升謂復初爲人，其謙退似儒夫，其專謹似腐儒，瞻視精悍似俠客，掀髯談笑，世事似辯士，而精神超越，又似逸民。隱者世稱實錄子仁、字孝父、義、字孝思，皆以儒士起家。仁翰林待詔，義翰林待書，先後使朝鮮，以清節爲人所服。朝鮮名其所居館曰雙清。

史官曰：闕

劉敏傳

劉敏，肅甯人。洪武三年，舉孝廉，爲中書吏。暮以小車出龍江，市蘆葦，旦載於家而後入蒞事。妻織蘆蓆，鬻以奉母。人或瞰亡以青磁瓦器遺其家者，懸於梁，候其人復來，竟還之。進楚相府錄事，值中書給沒官女歸於文臣家，咸勸其請納以事母，固辭曰：事母子之事，何預他人？及奸雄事敗，獨無所與，人稱其識。時與茹連皆爲上所知，十二年，擢工部侍郎，勤於其職。十三年，改刑部，詳獄明允，賜以誥，有善治國者，必擇仁人，刑期於無刑之語。十四年，出爲徽州府同知，尋卒於官。

史官曰：闕

彭通傳

彭通字萬里南海人少孤勵志讀書工爲詩隱居教授從游者常數百人洪武四年由儒士舉上親試之拜給事中參劾封駁嚴明有威同列皆遜爲勿如時上方嚮文學多擢近侍真左右俾應制公詩思敏給上稱之賞賜預宋濂醉學士唐和之列九年於力微等十六人偕轉御史巡京郡薦達賢能培擊貪暴有能聲用事者以金帛賂力辭不可遂欲上聞乃已陞山西參政廉出河東運司官匿羨真於法賜寶鏤旌之吳印本僧也官方伯以材辯受上知嘗譖殺僉事張丁其家人橫肆諸藩臬事之唯謹偶以事干直數其罪且斥辱之以聞上不之罪也尋引年致仕卒爲人恭謹外柔而內剛直爲政不事繳察然所舉刺動無遺失故能以功名終

史官曰

范常傳

范常字子權濠州人宋青山先生孟申孫也嗜學淹貫古今彝粹無競篤於行義太祖克濠召見問曰天下惡乎定常曰常聞之好生惡殺人之本心今四海擾亂民鯁鯁懼不保主公能以除亂救民爲心不妄擄戮燔燒俾令安堵內揀精銳半從軍半乘城擇寬厚長者牧字之使得耕守不爲他盜攻劫則四方之人雲合霧集天下不足定也上悅禮遇之從克和州常見諸將暴橫擾民言於上曰使人捐棄骨肉肝腦塗地何以成大事主公當有以處之上卽召諸將切責凡軍被驅婦女悉遣還民大悅上問與論兵常曰古者寓兵於農今兵興宜有制所下郡縣雖田野之人豈無材勇宜精加簡閱爲伍各設長貳典司之耕

作隙則習肄毋懈。事平之日聽其爲農。如此則兵無坐食而不調於用。一日上以羣雄未一命常爲辭。轉於天稱上意尋命典兵。隨克太平授元帥府都事。丙申三月定建康預謀。命爲太平知府募民種藝。時兵亂後乏穀種官廩貯穀數千石請悉發貸民熟則收之。秋大稔公私充牣興學校民甚安之。召入爲侍議訪以時政及古今事宜直對無隱。又嘗紀滌和事蹟上之。洪武元年擢爲翰林直學士尋兼太常卿。禮樂之事多委之嘗賜坐賦詩上覽笑曰老范詩質樸而無華類其爲人遷起居注足疾累在告賜安車出入尋允致仕御製詩四章褒獎之賜宅於太平門遂家焉。常自號瑯琊山人或曰山人隱者之稱。今君朝夕天子左右奈何用此。驟然曰士各有志吾今雖忝列侍從抑鄉土之念誰能忘之。犬馬之齒且益衰暮天子倘賜矜憐首邱之願可以終遂。山人之稱固其志也未幾卒。子組行修潔官至雲南參政從子震材武立戰功累官都督僉事。

史官曰

汪叡傳

汪叡字仲魯婺源人能詩文元末應鄉舉不售會兵亂與其弟同集義旅協官兵復饒州元以同爲餘干州同知叡爲浮梁州同知叡辭歸其帥固留之對曰叡本儒生不通軍旅遭寇荼毒忠憤激切以至於此饒旣平定則婺源山中可以少安養親教子其素心也弟同爲國吾當爲家耳遂得歸事親至孝連內外艱廬墓明兵下婺源同方率兵爭鄱陽不克亡走西湖朝疑之錄叡及妻程子淵存爲質會同爲周所殺。

釋之授安慶稅使。壬寅奏事還京。安慶城陷於漢。妻子竄入山谷。復安慶令舊任。尋與詹同隨軍參贊。以肺疾辭歸。尋從王克恭由新安移鎮會稽。調入閩。越浹歲。又以疾辭。歸臥病。教授鄉里子弟。有白讞者。濠梁人壬寅來爲宰。廉公有威。彊暴者畏而疾之。甲辰冬。鄰境寇來犯。城陷。白遇害。叡爲擇地葬之。洪武甲子。召入京。命釋西伯勘黎篇。發明詳盡稱旨。敕備顧問。侍東宮。授左春坊左司直郎。與朱善、劉三吾稱三老。開陳善道。從容獻納。太祖憫其年老。賜朝房以居。積製薰風南來諸詩。皆見褒賞。當春夏時。有罪至死者。輒涕泣俯伏進諫。請決以時。無傷天地生物之仁。上輒允奏。曰：此發於真懇。非他微名市恩者比。恆稱曰：善人善人。再踰年。丙寅力請歸。允之。將行。上御奉天門。敕中使宣召至。賜坐。顧曰：若知所以召見。意乎。起對曰：未知。曰：昨有不須辭別之旨。已乃思若光陰有限。今旣言歸。若雖嬰喘病。恆見負此病者。往往壽考。矧若龐眉有壽之徵。若之心事。朕所深知。孔子不云：鄉人之善者好之。不善者惡之。但若心素善於人。之善者固好之。不善者亦不惡之。斯爲未能全好善之心。今若還鄉。郡邑官勢須來見。常閉門筆之於東。俾僮輩示之。曰：幸蒙聖恩。予告還鄉。理宜杜門謝客。輸租應役。其敢自速厥戾。如是不亦善乎。叡頓首謝。曰：聖上愛人以德。適茲聖訓。是欲臣全其晚節。敢不欽佩。毋負上心。明日行。送車數百輛。觀者莫不歎嗟。以爲榮遇。生平和而純。莊而毅。默而智。言而信。窮而不憂。樂而不淫。爲學推孔孟之道。必期中道。所爲文章。深厚古雅。賦頌詩歌。要歸醇於正。名潛溪集。卒年七十九。

史官曰：閔

黃哲傳

黃哲字庸之。番禺人。幼孤。刻苦讀書。通五經。能詩。造晉唐奧域。性好山水。結廬蒲澗。往來羅浮。峽山。南華。諸名勝。辭家度庾嶺。過吳楚。燕齊間。一時英豪皆與遊。當風雪時。泊舟秦淮。遇朱文昭。涂穎。相與握手吟咏。沽酒大噱。二人喏曰。君才如白雪。如寡和。何名大噪。太祖駐金陵。建國吳。拜哲翰林侍制。侍太子讀書。尋兼典籤。懿文太子甚重之。屢應制賦詩。稱旨。大見嘉賞。尋奉使青徐。論諸反側。以事出知東阿。胥隸初以儒士易之。公剖決如流。一邑帖服。歲大旱。哲齋戒。徒跣暴烈日中。甘澍應祈。民驩呼曰。此黃公雨也。浪溪有怪物。恆出沒竊人啗。哲爲文禱於神。須臾風雷大作。一青蛟斃水上。人稱其誠感。時亂後民多流徙。聞哲善政。復業者數千人。辛亥。遷東平通判。是歲河決梁山。中書省發民疏浚。哲董其役。經畫有方。民不告勞。有司欲復堰黃陵岡。哲建議。謂此乃故元覆轍。可永戒。毋貪目前。事遂寢。尋上書陳時務數十事。上怒其狂。會山東行省奏哲捐俸修先聖廟。築河隄。有成績。上乃釋不問。未幾乞歸。有司請領郡校事。橫經授徒。四方至者多名士。歲凡數百人。乙卯。以東平事誥誤。竟死於法。哲始北上。舟行倚篷聽雪。嘗自詫曰。天下奇音雅韻。出自然者。莫是過也。構軒曰聽雪篷。學者稱爲雪篷先生。

史官曰。聞

程麒傳

程麒字國祥。定遠人。負英氣。多謀略。上在臨濬。引兵趨定遠之池河。初縣大姓陳氏與麒謀拓健兒屯守。

挾縣尹爲帥自固。聞大軍且至，皆棄妻孥走。麒獨扶尹來降。上指謂侍臣曰：衆皆潰而麒獨降，非有識者不能留與飲食，籌征討之事，密謀曲算，常上意禮遇甚隆。既取滁、州，擢行軍總管府經歷，司其倉廩，兼掌晨昏。歷以指將帥之失伍者，未幾取和州，軍威益振。上以始事之初，惟兵食最急，仍命護滁州倉。既度江，克太平，開江南，行中書省，徵還陞爲郎中。是時，上左右唯麒及善長。凡政令軍餉羽檄，皆二人相與協贊之。及建康下，遷參議。戊戌冬，上親征婺州，署中書省事。方寄心倚委任，俄病卒。上親爲文，御鎮淮橋而祭，慟哭良久。直至葬，所視其窆，始還。子驥，備宿衛，命就儒師學。上親訓督，尋爲管軍千戶。大兵征漢鄂，定襄、沔、下吳興，俱從征有功。上卽帝位，擢親軍指揮僉事。從平中原，陞指揮使。世襲滕州段士，雄反，驥帥師討平之。倭寇浙江，率浙江太倉諸軍征之，捕斬過當，進僉大都督府事。

史官曰：闕

王溥傳

王溥，字士淵，桂林人。進士。洪武二十六年，爲廣東參議。時匠藝之家，勢要占役，弗克營生。溥禁止之，有持部檄來徵舵木者，立期逼取。又木多不中，民苦之。溥親臨揀閱，十取八九。先是行海運，多漂沒，民不勝困。溥自臨廣嶺，徧觀險易，命有司鑿石填澗，修葺橋道，教民造車運之。民賴焉。時兵起無糧，無籍軍司恣甚。溥曰：國以民爲本，今一概起取賦稅，從何出耶？遂入奏。上是之，停取。餘皆獲免。其弟來廣，適遇承差何秀同舟，知爲溥弟，送以布衣。弟至，告其實。溥曰：一衣雖微，不可不慎。此汙行辱身之漸也。命還之，隨遣弟歸。

及奏績。父老。遮道留。不可得。歷官數年。筭無重衣。庖無食饌。爲胥吏龐庸。誣逮詔獄。行李蕭然。寮屬餽贖。皆辭不受。曰。吾豈以患難易其心哉。比至。得白。歸卒。年三十六。廣人惜之。

史官曰。闕

王敏傳

王敏。字進德。浙甯海人。爲諸生。有同舍生能文。往叩之。其人以年少。固靳不以告。憤且奮。兼日夜攻習。不休。踰年。輒出其上。氣剛有廉隅。不與人爲狎。其所爲事。每欲異恆人。家貧好學。饑渴歸。取水飲。休休然。若飮梁肉者。人非其類。雖欲飲食之。不能也。嘗與友讀空舍中。夜半。鄰女叩門求宿甚哀。其友欲納之。獨厲聲罵曰。吾在此。誰敢入。因疾呼。使聞於外。其友愧謝。不敢出聲。女逸去。後學舍諸輕蕩士。目攝相戒。不敢爲非義。或飲酒歡笑。聞其款步。卽皆畏避之。洪武中。貢入京師。試高等。時遣太學生分教北方。賜衣陞見。以行得太原。外官見諸生秀才。從京師來。奔走伺候。若貴戚重臣。其分教者。亦多驕橫。奴視吏民。不爲禮。敏獨以禮自約束。如平時。守令敬愛。退相語以爲儒者。不可媚犯。藩鎮主將苦其清介。異己。欲試其所爲。召使飲酒。牀幃婦人偏室。酒酣內其中。鑰門以去。入見婦人。大呼排門。取廐馬乘之。逃還。主將驚謝。後徵分教諸生。還京師。郡邑恐其入奏。發己罪。多賂以金錢。貪者受至數百千紙。敏一揖辭。父老卽行。無毫髮私受。諸生罪發多誅死。敏獨得免。尋監收嘉興糧。以舟運輸蜀。峽江悍急。行者多舍舟陸行。爲自全計。敏坐舟中。不顧曰。王事君命也。死生天命也。祇君命以事天。何以陸爲。後自全者多以失舟獲罪。敏所部

舟獨無虞。還拜御史。尋免歸。再起爲刑部司獄。坐徵法輸作。赦歸。卒於家。年三十一。敏容貌端偉。有威重。慎交與。不挫屈於人。而居家孝友。兄蓋德。爲燕府紀善。師事之。終身不懈。弟琦。能文章。謹操守。有名。金華胡翰嘗與宋濂論獨行事。自言於衢。得一人曰汪瑋。瑋故嘗仕。斥不用。敝衣繩履。卒於窮死。然其議論卓犖不凡。而敏亦每稱瑋爲人。蓋其操持如此。

道同傳

道同。河間人。先韃靼族也。洪武三年。以才舉贊禮郎。十年。出知番禺縣。性剛毅廉潔。番禺素稱繁劇。而軍衛尤強橫。需求百出。佐吏動遭笞辱。前令不能堪。比同至。視民如子。堅執公法。凡事違理者。一切不從。民賴以安。權要惡之。未幾。永嘉侯朱亮祖至。數以威福撼同。同不爲懼。時有土豪數十人。遇閩里珍貨。輒抑價買之。稍不如意。卽誣以鈔法。莫敢誰何。同廉得實。捕之。悉械繫通衢。諸豪詣亮祖求辯。亮祖召同。勞以酒食。徐爲言之。同厲聲曰。公爲大臣。不當爲小人所使。亮祖不能屈。次日。亮祖出通衢。被械者方曝烈日。中哀呼求免。亮祖釋之。又有富民羅氏。於亮祖之兄弟善。怙勢凌人。同按法治之。亮祖又奪去。以他事告同。同遂歷數其事而奏之。疏未至。亮祖亦誣同抗訕。先聞上方委亮祖兵事。又深惡梗者。卽命使殺同。適同奏亦至上。始悟。以其職卑而直言。大臣有骨鯁風。特遣使馳宥之。二使同日。至同已死。民悼惜之。上知之。悔亮祖竟用是得罪。至杖死。同性峭直。器宇魁岸。奉母備甘旨。於妻子同相親。布政使徐本雅重同。嘗按一醫士罪當笞。本急欲得醫。求同寬釋。同曰。徐公亦欲效永嘉侯耶。笞之乃已。同死後。民多奉其主於

家出入輒告有事卜之響驗人咸以爲神云。

史官曰。闕。

郭資傳

郭資字存性武安人。洪武十八年進士。爲戶科庶吉士。試主事。戶部總部。歷改湖廣。陝西。司爲真。曉練錢穀。陞僉都御史。尙書郁新薦。改北平參議。上言弊政。陞參政。不數月。進布政使。燕兵起。資獻策防禦。已而留侍世子居守。李景隆攻北平。晝夜扞備。輯睦兵民。轉給饋餉。盡心瘁力。不畏強禦。太宗卽位。陞戶部尙書。上曰。資朕蕭何也。未閱月。出掌北平布政司事。卽建北京。置行部。與雜僉並改行部尙書。深見信用。永樂十七年。罷行部。復爲戶部尙書。時巡狩營建。百費並興。皆資調度。仁宗卽位。念其舊勞。洊有寵賚。立東宮。兼太子賓客。陞太子太師。以足疾。賜敕給半俸致仕。復其家。宣德三年夏。轍部務。明年復召入。以太子太師掌戶部事。免朝參。資矢恭慎。祁寒暑雨。必入署視事。不少休。卒年七十三。贈湯陰伯。諡忠襄。官其子佑。戶部主事。資受眷三朝。屢登八座。衣食僅充。幾不能葬。永樂後。文臣贈伯四人。金純。山陽伯。吳中。在平伯。金濂。沐陽伯。

明書卷一百十八

列傳四

名臣傳三

黃淮傳

黃淮字宗豫永嘉人。洪武三十年丁丑進士。爲中書舍人。建文四年。燕兵渡江。淮同衆官歸順。太宗卽位。坐奉天門左室。召見訪政務。稱旨。每朝解縉及淮立御榻左。備顧問。或至夜分。上寢卽賜坐榻前。論議密務。不數日。令入內閣。專掌制敕。旣又選五人與共事。名直文淵閣。是秋。陞編修。進侍讀。立東宮。陞左庶子。永樂五年。陞右春坊大學士。兼侍讀。進講東宮。太孫立。又兼輔太孫。六年。命蹇義、金忠、楊士奇及淮留守。諭曰：太子仁厚。留汝四人居守。猶唐太宗簡輔弼監國。必付房玄齡也。明年。上北狩。又明年。上征虜。長沙妖人李法良反。皇太子遣豐城侯彬討之。漢王忌沮太子。言彬不可用。淮曰：豐城老將。必能成功。兵貴神速。宜亟遣以掩不備。旣而法良就擒。十一年。上再北征。淮復留守。漢王日夜謀奪嫡。造飛語動搖監國。并中傷淮。十二年。坐淮奉表迎上下敬。逮詔獄。凡十年。獄中有省愆集。自省錄。仁宗卽位。出獄中。陞通政使。兼武英殿大學士。仍入內閣。洪熙元年。加少保。戶部尙書。大學士如故。支三俸。辭尙書俸。仁宗大漸。皇太

子在南京未至。深機卒禍。中外洶洶。淮與楊士奇佐鄭襄二王監國。班師始還。第二年秋。固請歸。時淮父卒。賜葬襄事。入謝。賜遊西苑。漢庶人反。上親征。命淮留佐二王監國。班師始還。第二年秋。固請歸。時淮父卒。賜葬襄事。入謝。賜遊西苑。與公侯伯師傅尚書十一人。俱肩輿登萬歲山。宴山麓。比辭。又宴太液池。諭之曰。明年朕生日。卿其復來。至期。淮至上喜。寵錫有加。八年。禮部會試貢士。命淮與少詹事王直爲考試官。十年。宣宗崩。淮奔喪。留逾月。辭歸。正統十四年。卒。年八十三。謚文簡。永樂初。黨獄大起。南人避北官者。又有編戍法。淮言不可。九年。時虜酋阿魯台歸款。請并女直。吐蕃東西諸部。聽其約束。欲朝廷出誓詞。鑄金定集。諸酋磨酒中飲爲盟。衆議且從之。淮曰。古言外夷狼子野心。黨勢分則易制。一心力則難圖。後患滋大。此奸謀不可許。上善淮言。顧左右曰。黃淮如立高岡。無遠不見。爾輩如處平地。所見惟目前耳。賜大寶法王玉章。示淮璞。淮言。朝廷賜外夷。用敕命。廣運二寶。夷人將謂法王尊於朝廷矣。上從其言。

史官曰。黃淮神識洞朗。健力峻拔。有古社稷臣之風。纔脫繹綬。不一二年。遂屏跡丘園。計淮圖士十年。家食二十餘年。而同事七人。縉旣雉羅。廣亦螻滅。胡儼早休。惟士奇秉鈞最久。榮謀幄最密。是皆有幸不幸焉。說者謂方孝孺之誅。蘇尹昌隆之籍沒。許白雲之極刑。皆出於淮。而祭酒劉益謂淮好營毀同列。約之始。進弗端。百善莫贖。淮之蒙詬。不亦宜乎。

蹇義夏原吉傳

蹇義。字宜之。初名瑤。巴人。洪武十八年進士。授中書舍人。奏事稱旨。一日。太祖顧義問。汝蹇叔後乎。頓首。

謝不敢上喜。卽書義字賜之。易名。一考當調命滿九載。朕且用義。廷文皇帝卽位。知太祖欲用義。超陞吏部右侍郎。太宗卽位。轉左。逾月。陞尙書代張紱。當是時。盡改建文諸例。得洪武之舊。義從容爲上言。鑒成憲者。豈無因革。反亂政者。自有經權。間舉數事。陳說本末。上喜其忠實。從其言。或遂譖義。不忘建文。上不聽。永樂二年。兼詹事。上欲諭太子率令。義往導意。太子尤愛重之。七年。巡北京。佐太子監國。諸王及遠夷奏請詣行在。所餘悉啓太子處分。義熟於典故。達政體。不動聲色。事賴以濟。九年。與夏原吉同滿考。賜宴。敕獎諭。十七年。外艱歸。起復。詣北京謝。遣中官護還京。明年。從太子朝北京。十九年。三殿災。特敕廷臣二十六人。巡行天下。義及給事中馬俊。巡應天諸郡。問民疾苦。考察黜陟文武吏。義言。國家多事時。盡法繩吏。人將不勝。斥出太甚者。數人。還吏部。二十年。上北征還。坐東宮事。與楊士奇訟。繫錦衣衛獄。尋釋。仁宗卽位。預政議者。四五大臣。首進義。少保兼尙書。支二俸。歷進少傅。少師。賜義及楊榮。楊士奇。金幼孜。夏原吉。繩愆糾繆。銀圖書各一。諭曰。朕有過舉。卿卽具疏。用此封識。進內制。呈五臣及黃淮。誥草。上特增二語。曰。勿謂崇高而難入。勿以有所從違而或怠。又而諭曰。此朕實心。未幾。又制蹇忠貞印。賜之。義重厚。不敢專斷。每承顧問。常持兩端。不能決。然忠實無他腸。楊士奇謂義勿過思。義應曰。事不熟慮。有後患。上嘗笑曰。義士奇言皆是。楊榮或詆義。語聞上。上不直。久。義頓首言。榮無他。卽左右有譏榮者。願皇上慎察。上笑曰。吾亦不信。偶言及耳。宣德初。征漢庶人。軍中進止多從義。時議赦交趾。義及夏原吉力言。祖宗疆土。不可棄。上不聽。命擇人使交趾。義薦伏伯安。楊士奇語夏原吉。以伯安不可使。義當榻前力爭。當是時。上尤

信任原吉。比召諸大臣入議。義竟薦伯安。上顧原吉云何。對曰。不可。義曰。伯安有口才。羣臣不及。上又顧問士奇云何。對曰。伯安有穢行。無學識。遣使必辱國。上從二人言。不遣伯安使。義亦不以二人爲異。已三年秋。從巡邊還。上顧曰。蹇少師老。不欲煩以事。敕曰。卿事祖宗。積效勤誠。朕嗣統。尤資贊輔。夙夜在念。圖善始終。以卿春秋高。尙典劇司。非所以優老待賢。況師保寅亮爲職。不煩庶政。乃副倚毘。可輟吏部務。朝夕在朕左右。相與討論至理。共甯邦家。其專精神。審思慮。益致嘉猷。用稱眷倚老成之意。明年夏。郭璉代爲尙書。又賜義忠厚寬弘銀章。一七年秋。令有司治義第。八年。一品。九年。賜宴禮部。義生日。賜鈔萬馬一。英宗卽位。日。義齋宿得疾。越五日卒。年七十三。贈太師。諡忠定。義孝友質實。和厚簡靜。處人有量。未嘗一語傷人。至議典法。不苟爲包含。必歸於正。歷事六朝。凡五十年。貴而能謙。富而能約。上前所言。未嘗退以語人。在吏部。尤慎擇郡守。考察明恕。不苟不縱。子二。英。荃。皆尙書司丞。太宗卽位之歲。至成化丁亥。凡六十六年。吏部尙書四人。義及郭璉。王直。王翱。而何文淵協佐者不與焉。自後至正德終五十四年。凡更十八人。而尹晏最久。十四年。

夏原吉。字維詰。湘陰人。洪武中以鄉薦遊太學。選入禁廡書誥。授戶部主事。尙書郁新奇之。與商榷諸司事。劉郎中者忌之。會劾諸司怠事者。上曰。宥之。新請必罪。上怒。新問誰教汝。新免冠謝得已。劉郎中因奏果人教尙書者。意中原吉。上問新爲誰。對曰。堂後書算生教臣。臣愚過聽。萬死。上下書算生獄。劉郎中又奏原吉專尙書柄。言前事實。原吉教尙書。上曰。聞原吉能佐尙書。汝願欲陷原吉耶。劉郎中與書算生皆

棄市。建文皇帝即位。逾月。陞戶部右侍郎。明年。充採訪使。巡福建。未幾。移鎮蘄州。太宗即位。轉左。或言原吉爲建文用事人。不宜大用上。曰。原吉忠於太祖。以故忠於建文。又豈不朕忠耶。逾月。進尙書。永樂元年。吳浙大水。命原吉行視水。遣僉都御史俞士吉。賜以水利集。累遣侍郎李文郁。大理寺少卿袁復。陝西參政宋性佐之。原吉言。浙西諸郡。蘇松最居下流。常嘉湖三郡。土田高多下少。環以太湖。縣五百里。納杭湖。宣歙諸山水。注澱山諸湖。入三泖。頃浦港。漕塞。匯流漲溢。傷害苗稼。拯治之法。宜浚吳松諸浦港。泄其壅淤。以入於海。吳松江袤二百餘里。廣百五十餘丈。西接太湖。東通海。前代屢疏。以當潮汐。沙泥淤積。旋疏旋塞。自吳江長橋至下界浦。約百二十餘里。雖稍通流。多有淺窄。又自下界浦抵上海。南倉浦口。可百三十餘里。潮汐壅障。菱蘆叢生。已成平陸。欲卽開浚。工費浩大。且灑沙淤泥。浮泛動盪。難以施工。臣等相視得嘉定劉家港。卽古婁江。徑通大海。常熟白茆港。徑入大江。皆廣川浚流。宜疏吳松江南北兩岸。安定等浦。港引太湖諸水。入劉家。白茆二港。使直注海。松江大黃浦。乃通吳松要道。下流壅塞。難卽疏浚。傍有范家浜。至南倉浦口。可徑達海。宜浚令深闊。上接大黃浦。以達泖湖之水。此卽禹貢三江入海之跡矣。旣開通。相度地勢。各置石閘。以時啓閉。每歲水涸時。修圩岸。以禦暴流。上從之。役夫凡十餘萬。原吉布衣徒步。日夜經畫。盛暑揮蓋去。曰。衆赤體暴日中。吾何忍。歲饑。奏發粟三十萬石賑濟。二年。還朝。復出治水。水洩。農田大利。召還部。時賞功。封建征夷下番營。北京費億萬計。皆取辦於原吉。從上北巡。兼掌行在吏禮兵部都察院事。八年。上北征。輔太孫留守北京。總理行在九卿事。諭曰。朕以房玄齡視卿。原吉旦入朝。獨近

展前參決機務。朝退，郎官御史環請事。原吉口應手判，不動聲色。駕還，扈還京，尋命侍太孫周行鄉落，取
鬻黍進太孫曰：願殿下味此，知民艱苦。九年，滿考，宴便殿，諭廷臣曰：原吉高皇養成賢德，欲觀古名臣，此
其人矣。命與姚廣孝監修國史。十一年，扈北巡，侍太孫居上營後。十四年，侍太孫還南京。十五年，從幸北
京。十八年，宮殿成，命召太子、太孫於南京。十九年，三殿災，詔求直言。言者輒云：都北京不便，主事蕭儀言
尤峻。上怒，殺儀曰：吾與大臣密議數月，言遷都便。言官遂劾諸大臣。上跪言官大臣午門，難遷都利害。都
御史陳瑛罵言官白面書生，不知大計。上令左右問衆議云何。原吉曰：臺諫職言路，且應詔陳言。臣等備
員大臣，不能協贊大議。臣等萬死罪，再問對如初。上悅，盡釋言官。大臣上御便殿闕門，每召原吉語移時，
左右莫得聞。退則恟恟若無預者。交趾平，上問陞賞，執便對曰：賞費於一時有限，陞費於後日無窮。上從
之。西番大法王來朝，上欲郊勞。原吉以爲不可，法王見便殿，命原吉拜。又不肯拜，上笑曰：卿欲效韓愈耶。
過侍郎楊勉之遠矣。十九年，上議北征。原吉力諫。上怒，繫內官監籍其家。竟北征阿魯台及兀良哈。明年，
又征阿魯台。又明年，北征，還至榆木川，不豫。顧左右曰：原吉愛我，上計至。太子走原吉，繫所呼之。哭曰：楊
榮至，父皇賓天矣。原吉伏地，哭不能起。太子召問國事。原吉言：方今民力竭於東南，戎伍疲於漕運，宜幸
南京。少蘇民困。仁宗卽位，復原吉戶部尚書，會母喪，乞終制。上曰：卿老臣，宜共濟艱難。卿有母，我無父乎。
如卿辭職，朕亦不當在此。不允。立太子，兼太子少傅，尋進少保，兼太子少傅。尚書如故。支三俸，固辭。許辭。
太子少傅俸。洪熙元年冬，無雪，上作憂民吟，授原吉和。手敕樹割鞭背，連坐妖言誹謗之刑。原吉與二三

大臣密議聞上從之。賜田五頃。建第兩京。李時勉廷諍激。上大怒。言時勉當朝辱朕。原吉曰。時勉小臣。豈能損聖德。願少霽天威。下法司議罪。未晚。太子去南京。上崩。昭皇后命原吉急迎太子。太子將至。羣臣郊迎。后留原吉佐襄王居守。宣宗卽位。時時密咨原吉。或袖小帖付之。原吉亦時有所白。宣德元年。漢庶人反。指原吉徵赦。租爲奸臣首。上夜召諸大臣議。原吉免冠頓首曰。臣罪當死。上曰。彼借卿爲兵端耳。命坐屏左右。密議。楊榮首勸親征。上難之。顧原吉對曰。往事可鑒。臣見所遣將。語臣兵事。輒泣。臨事可知。兵貴神速。卷甲趨之。所謂先人有奪人之心也。榮言是。上意遂決。師臨城。庶人猶令人繞城罵原吉。三年。賜範金銀印。曰。含弘貞靜。曰。謙謙齋。曰。後天下樂。從巡邊還。上念原吉老。敕輟部務。俾專論道。左右明年夏。召郭資代。是冬。從閱武郊外。原吉生日。上繪壽星圖。爲詩賜之。五年春。卒。贈太師。諡忠靖。復其家。朝議以宜贈伯。楊士奇不可。後三年。郭資卒。得贈湯陰伯。原吉天性寬平。靡德不報。靡怨不釋。其畫財賦。以愛人節用爲先。酌大體。略煩苛。以故。雖數興大役。供餉贍給。而民不釋騷。雖懼福無矯節。不務悅人。人無識不識。皆謂爲君子長者。呂震嘗於上前短其柔奸。震爲子求官。上問原吉。原吉稱震有守成功。陳瑄於太宗初。欲殺之。後原吉力薦瑄才。總漕運。周忱爲長史。或薦爲郡守。原吉言。郡守不足展其才。忱得陞侍郎。巡撫。當是時。蹇夏齊名。蹇義簡重善謀。原吉弘裕善斷。太宗時。外兼臺省。內參館閣。吁俞可否。期於濟國。三十年間。民安吏治。有古大臣之風焉。屢監修太祖太宗仁宗三朝實錄。太祖實錄凡三修。建文中。徐輝祖監修。永樂初。李景隆監修。再原吉監修。學士解縉表。永樂初修者。元年六月上。凡一百八十三卷。原吉再修。

者十六年五月上。凡二百五十七卷。然於建文事多曲護失實。又寶訓十五卷。原吉治水東南有功。吳人尸祝之。正統間。豪勢家奪水利。溝防盡壞。周忱治之。幾十餘年。又壞。景泰中。侍郎李敏治之。弘治中。又壞。侍郎徐貫又治之。正德末。又壞。尚書李充嗣又治之。

史官曰。蹇夏逮事六朝。爲高皇養成人才。所謂敷求輔後者也。義質實簡厚。無智名勇功。而左右監國。潛多啓沃。每事推讓。有慮懷慎之風焉。原吉外總六曹。內參機務。文帝方之玄齡。東南水利。至今賴之。才大而濟以含弘。誠大受之君子也。天佑人國。壽考充廷。斯仁。宣所以致治歟。

張統傳

張統。字昭季。富平人。父月川。文行著名。統洪武中舉通經。爲東宮侍書。才識通敏。皇太子器重之。十二年。陞通政司左參議。試左通政。十五年。雲南平。擇守臣。改右參政。陞辭。上製詩二章以賜。歷進左布政使。凡土地貢賦。法令條格。祠祀公廡。上下典儀。經費程度。悉統裁定。夷民孚說。遠邇奠安。是時雲南寓賢董倫。王景。韓宜可輩。不問識不識。皆厚恤之。以故遷謫至者如歸。二十年。秩滿入覲。治行爲天下第一。賜敕曰。唐虞之制。外樹州牧侯伯。莫輯民居。人樂雍熙。載諸方冊。雖不備述。略見焉。當時才良並出。所命皆賢。是以君有易位。法令不更。諸侯列上。千載亡異。吁。今不然。道善勿從。縱欲如流。朕起寒微。出望外。統天下。竭氣語。疲精神。諭人爲善。從者罕焉。何其艱哉。西平旣平。爾統撫守實先。今五年矣。言出則蠻方耳入。今布則人信心孚。功出九州十二牧上。朕不待考而知。茲復命仍治。汝往欽哉。賜宴及道里費。統治雲南。既有

次第乃設廟學立功廡錄上敕諭三侯及諸武臣所以經理蠻方者藏之廟學而序其端曰書具六體雖兼著臣言皆君道也故一代謨訓功烈必言命言天而臣奉承之洪武辛酉歲大兵西下雲南自興發之始既奠定之後神機妙算出自上裁有詔有敕或諭大將或諭守臣幕下明見萬里綜理徹密所謂通天下之志成天下之務虞書以典命篇釋者謂册在几上象尊閣之意臣統謹按故事再拜錄藏於文廟之尊經閣上嗚呼西南之地方數千里皆山林幽味種類龐雜性如飛走易惑難化仰惟創業之君輔運之臣風雲際會於一時而威德周匝於四表故能投之斯中取之斯獲豐功偉績如是神也於以見聖人經營之勤睦焉西顧者屢矣詩曰肅肅王命仲山甫將之逸不忘勞安不忘危敢告後之君子二十六年再朝褒賜如前三十一年召爲吏部尙書滇人如失父母時建文新立旁求遺逸日集闕下率命統試鑑識精絕各當其才會修太祖實錄被旨試翰林編纂官考第高下得楊士奇策喜曰此用世才也奏第一授吳府審理副太宗既立仍其官因錄中朝奸臣二十八人統與其數既迎附赦爲尙書如故與戶部尙書王鈇並召曰卿等皆老矣可解職務月給半俸居京師統出遂自經吏部後堂死

史官曰 闕

董倫傳

董倫字安常宛平人遊遊山林間布褐藜藿已懷憂世之志學者多從之遊其先爲恩縣人恩古貝州也因稱貝州先生元末徵辟不出太祖初擢用單縣儒士張甯甯薦倫徵爲贊善大夫事懿文太子陳說多

長厚語。太祖聞而善之。洪武十八年。陞左春坊大學士。東宮薨。二十五年。出爲河南右參政。盡心民事。名其退食之堂曰後樂。方孝孺爲之記。嘗上封事數千言。多當上意。又上書薦肇州吏目葛伯衡。太祖立召伯衡爲陝西參議。三十年。誣誤免官。典教滇南。太孫憐其老。賜道里費。行過成都。蜀獻王深重之。賦詩八章。至滇。作養成就。雖蠻童夷豎。皆知向方。建文皇帝卽位。以東宮舊臣召還。拜禮部侍郎兼學士。與方孝孺同入內閣。侍經筵。御書怡老堂扁。及髮。几玉鳩杖各一。賜之。倫上表謝。略曰。桓榮設几杖於太常。不聞宸翰之賜。晏殊題舊學於神道。未見几杖之頒。自今將杖以戒。噫。則當思四海或有饑餒之民。憑几以安身。則當念一物或有顛連之歎。初御史解縉嘗代夏長文作劾都御史袁泰疏。泰恨縉。中傷縉。上令縉十年讀書。來京擢用。未及期。上崩。縉赴臨。有司嫉之。謂非詔旨。謫縉河州衛吏。倫於縉善。左右之。得詔還爲翰林待詔。倫質直敦厚。富文學。爲時所重。建文間。屢懇言宜親睦宗人。不聽。燕兵至。倫年八十餘。致仕出京。悒悒多疾。數日卒。

史官曰。闕

解縉傳

解縉。字大紳。吉水人。洪武二十一年進士。選中書庶吉士。大庖西。上封事論時政。剴切萬言。其略曰。陛下挺生南服。一統華夷。功高萬古。旣無偏寵外戚。寺人藩鎮之患。又無貨利聲色。遊畋玩好之欲。旣皆遠過於漢。宋。又何遜讓於唐。虞。惟願陛下以天地爲一體。以天下爲一人。令出惟行也。不宜於數改。刑期於無

刑也。甯失於不經。故令數改則民疑。疑則不信。刑太繁則民玩。玩則不清。立國至今。將二十載。無幾時無變之法。無一日無過之人。良由誠信有間。用刑太繁也。臣見陛下好觀說苑。韻府雜書。與所謂道德心經者。臣切謂甚非所宜也。說苑出於劉向。向學不純。溺於妄誕。所取不經。且多戰國縱橫之論。壞人心術。莫此爲甚。韻府出元之陰氏。鄙猥細儒。學孤識陋。蠅集一時。兔園寒士。鈔緝穢蕪。略無可采。陛下若喜其便於檢閱。則願集一二志士儒英。臣請得執筆而隨其後。上泝唐虞。下及殷周。根實精明。隨事類別。刪其無益。勒成一經。豈非太平制作之一端歟。禮記出於漢儒。蕪雜尤甚。宜及時刪改。日御經筵。訪求審樂之儒。大備百王一典。作樂書一經。以惠萬世。若夫配天宜復掃地之規。尊祖宜備七廟之制。奉天不宜爲筵宴之所。文淵未備。夫館閣之隆。太常非俗樂之可肄。官妓非人道之所爲。禁絕娼優。俾於變之民。不遷於淫巧。易制閹寺。尊天子之貴。不近於刑人。執戟陞墀。皆爲吉士。虎賁趨馬。悉用俊良。雖門戶掃除之役。命公卿子弟之賢。任諸侯王於衆職。定久任法。而加封木輅朴居。而土木之工勿起。佈墾荒田。而四夷之地勿貪。釋老之壯者驅之。俾復於人倫。經呪之妄者火之。俾絕其欺誑。斷所謂瑜珈之教。禁所謂符式之科。絕鬼巫。破淫祀。省冗官。減細縣。痛懲法外之威刑。永革京城之工役。流十年而聽復。杖八十以無加。婦女非帷薄不修。毋令逮係。大臣有過。惡當誅。不宜加辱。治歷明時。授時作事。但伸播植之宜。何用建除之謬。伏見陛下拳拳於畏天畏鬼神。而所謂畏民者。則未至也。孳孳於治民治強暴。而所以治心者。猶未至也。棄盛之潔。衣服之齊。修舉之時。儀文之備。此畏天畏鬼神之末事也。簿書之期。獄訟之斷。詔誥之勤。鈎距之

巧此治民治強暴之支流也。近年以來臺網不肅以刑名輕重爲能事以問囚多寡爲勳勞甚非所以厲清要長風采也。夫人自救過之不給何暇刻人之過人自以言爲諱何能有諫諍之言御史糾彈皆承密旨未聞舉善但曰除奸蓋入人之罪或謂無私而出人之罪必疑受賄逢迎甚易而或蒙蔽營救甚難而多得禍也。陛下進人不擇於賢否授職不量於輕重建不爲君用之法所謂取之盡錫銖置奸明倚法之條所謂用之如泥沙監生進士經明行修而多困於州縣屈於下僚孝廉人材冥蹈警憲而咸布於朝省驟歷清華推埋閹悍闖葺下愚者朝捐刀鏃暮擁冠裳左棄筐篋右縮組符剔履之賤袞繡巍峩負販之備輿馬赫奕雖曰立賢無方亦豈忱詢有德古者鄉鄰善惡必記今雖有申明旌善之舉而無黨庠鄉學之規互知之法雖嚴訓告之方未備紀綱不立節目無張臣欲取古人治家之禮睦鄰之法若古蓋田呂氏之鄉約今義門鄭氏之家範布之天下世臣大族率先以勸旌之復之爲民表率此不可視爲迂闊而不切當今之急務也。陛下天資至高合於道徵百家神怪誕妄恍惚無不洞囑其謬然猶不免欲以愚弄天下若所謂以神道設教者臣謂不必然也所謂傳國寶者臣考按前史焚燬久矣屢求屢得真僞莫明卽真有之區區李斯之書秦政之制何足爲寶哉。地有盛衰物有盈歉而商稅之徵率皆定額盈也好點得以侵欺歎也良善困於補納夏稅一也而茶椒有糧果絲有稅既稅於所產之地又稅於所過之津何其奪民之利如此之密也又多貧下之家不免拋荒之咎或疾病死喪逃亡棄失今日之土地無前日之生植而今日之徵聚有前日之稅糧里胥不爲呈州縣不爲理或賣產以供稅產去而稅存或裨辦以當

役重而民困。又土田之高下不均。而起科之輕重無別。或膏腴而稅反輕。瘠鹵而稅反重。欲拯其困而革其弊。莫若行授田均田。常平義倉之法。積之以漸。至有九年之食無難者。王公設險以守其國。近世狃於晏安。隳名城。銷鋒鏑。禁兵諱武。以爲太平。一旦有不測之虞。連郡至望風而靡。武備隳之過也。及今修治。不宜動衆。但敕有司。以時整葺。開武舉以收天下之英雄。廣鄉校以延天下之俊乂。古時多有書院。遺基學田。舊業貢士有莊。義田有族。皆宜興復而廣益之。夫罪人不孥。罰弗及嗣。連坐起於秦法。孥戮本於僞書。今之爲善者。妻子未必蒙榮。有過者。里胥必蹈其罪。況律以人倫爲重。而有給配婦女之條。聽之於不義。則有何取。夫節義哉。尙書侍郎。內侍也。而以加於六卿。郎中員外郎。內職也。而以名爲六屬。御史詞臣。所以居寵臺閣。郡守縣令。不應回避鄉邦。同寅協恭。相倡以禮。而今內外百司。捶楚屬官。甚於奴隸。是致柔懦之徒。蕩無廉恥之節。一爲下官。肌膚不保。甚非所以長孝行厲節義也。臣但知罄竭愚衷。欲言固不止此。急於陳獻。略無次序。亦不暇組織成文。冀以將來取譽。惟陛下幸垂鑒焉。上覽之。喜。縉少年有才志。封事留中。諸大臣皆忌之。上顧數稱奇才。兵部尙書沈縉忌。縉年少得上意。乞改御史使遠上。縉在臺常爲王國用。草諫書。雪韓國善長冤。爲詹徽所嫉。又爲夏長文作劾都御史袁泰疏。泰切齒恨之。縉又時時敢直言。竟作深文得罪。且不測。上憐之。召對便殿。慰諭賜緡曰。汝歸益讀書。益盡心古人。後十年來未晚也。又召縉。父謂曰。大器晚成。若以爾子歸。益進所學。然猶命修元史。誤及踵成宋書。刪定禮經。凡例皆留中。歸家八年。太祖崩。來奔喪。有司劾縉母喪未葬。父年九十。遠詔奔喪。謫河州衛吏。建文元年。詔入翰

林爲待詔。燕王渡江。縉與胡廣等迎出金川門。燕王大喜。及卽位。召縉及黃淮立御榻左。備顧問。遂命入內閣。未幾。又召胡廣、楊士奇、金幼孜、胡儼、楊榮、陸縉侍讀。不數日。進侍讀學士七人。並直文淵閣。內閣預機務自此始。承運庫官張興特寵而驕。嘗笞人左順門下。縉過之。叱曰。御座在此。敢爾違犯禮法乎。興退。永樂初。重修高廟實錄。充總裁官。又修永樂大典。古今列女傳諸書。上寵甚信用。賞賚輒與六卿等。當是時。儲位未定。上密詢縉。縉言。世子仁孝。天下歸心。以尊奪宗。自古致亂。上不應。又頓首曰。好聖孫。上曰。已。遂冊仁宗爲皇太子。進縉翰林學士。兼左春坊大學士。初議頗泄。邱福等謗縉洩禁中語。高煦大恨。欲殺縉。未幾。用兵交趾。縉力言。交趾古羈縻國。通正朔。時賓貢而已。得其地不足郡縣。上遂疎縉。出爲廣西參議。李至剛奏其怨望。改交趾。永樂八年。入奏事南京。會上北征。見東宮辭去。高煦密疏言。縉瞰上出塞。輒遠覲。儲君徑歸。無人臣禮。上怒。逮縉。并至剛下詔獄。十三年正月。死獄中。籍其家。妻子徙遼東。至剛不死。仁宗時。以宮臣得爲通政。尋亦謫遠郡。初。太宗寵信之手書大臣十人。蹇義等名授之。曰。汝疏其人品。縉實封對。以爲蹇義天資厚重。中無定見。夏原吉有德有量。不遠小人。劉儻雖有才幹。不知顧義。鄭賜可謂君子。頗短於才。李至剛誕而附勢。雖才不端。黃福秉心易直。確有執守。陳瑛刻於用法。好惡頗端。宋禮慙直而苛。人怨不恤。陳洽疏通警敏。亦不失正。方賓簿書之才。駟儉之心。奏上。太宗以示東宮。曰。至剛朕已洞燭。餘徐驗。東宮因問縉。建文君所用人何如。對曰。此皆洪武中人材。事往已不足論。又問尹昌隆。王汝玉。對曰。昌隆君子而量不宏。汝玉文翰不易得。惜有市心耳。仁宗卽位。出縉奏示楊士奇。曰。人率謂縉

狂士觀所論評皆有定見。非狂士因教妻子還鄉。官其子禎。期爲中書舍人。正統元年。又盡還其沒產。縉結髮讀書。留心經濟。任事直前。風生電發。早遇聖明。名動天下。晚罹讒毒。中道天關。不盡其用。其重義輕利。遇人憂患。疾苦輒隱於心。苟可用力。盡意爲之。篤於故舊。及名賢世家之後。喜引拔士類。或謂其汎愛者。終不爲變。襟宇闊略。不屑意細故。而表裏洞達。絕崖岸。雖野夫穉子。皆樂親之。求文翰者。日幅帙。率與之無倦。或言有不當與者。笑曰。雨露豈擇地而施哉。文雄勁奇古。新意疊出。長於敘事。詩豪宕豐贍。其教學者。恆曰。甯爲有瑕玉。勿作無瑕石。書小楷精絕。行草皆佳。先是燕兵逼都城。縉與胡廣。金幼孜。黃淮。胡儼。楊士奇。周是修。約死難。是修死。縉與衆迎太宗入。後縉爲是修作傳。乃謂其子曰。當時若同死。誰與爾父作傳耶。當是時。胡廣頗有聲望。金川將啓。縉使人覘廣。見廣如廁。回問家人。餒豬否。縉知之。笑曰。一豬不捨。肯捨性命耶。遂決策迎太宗。

史官曰。太祖網羅英俊。智屈羣策。當時元臣。親如善長。貴如惟庸。廣洋。近侍如安。如濂。如觀。如素。雷霆所震。罔不懾。縉以一少年。上庖西萬言。批逆鱗。無顧忌。而大度優容。令其進學。才難之嘆。猶可想見。規模真弘遠矣。召旋河隴。踐歷清華。密贊建儲。有故老舊臣所不及者。卒罹讒口。莫之與白。悲夫。跡其聞豬易盟。作傳戲謔。縉之狂奚其解諸。

胡儼傳

胡儼字若思。南昌人。洪武二十年舉於鄉。明年會試乙科。授華亭教諭。時年尙少。抗師道。訓勵諸生。敦行

檢爲講說經史。寒暑不廢。內艱服闋。改長垣。乞便養親。改餘千。著爲令。建文元年。陞桐城知縣。心存撫字。政尙寬平。獨通賑乏。除虎驅蝗。表祀循良。歷有惠績。四年。兵事棘。御史大夫練安薦儼學足以達天人之際。智足以資帷幄之籌。下吏部召儼。比至京。燕兵已渡江矣。太宗卽位。擇翰林官。吏部更薦儼。上曰。儼曉天文。宜令欽天監試送翰林供事。欽天監官言。儼果通象緯及風雲氣候。解縉又薦之。遂授翰林檢討。與縉等七人同直內閣。尋陞侍讀。儼每承顧問。應對從容。至論成敗得失之故。必反復明切。上爲傾聽。永樂二年。陞左諭德。兼侍讀。外艱去。詔奪情。道過南京。入見東宮。詢及民情。所對皆救時急務。儼持論少臆。諸同事人頗不能容。乃薦儼學行堪爲師表。陞國子祭酒。出內閣。儼率以身教。士心翕然嚮慕。上幸太學。御彝倫堂。賜坐講經。上俯聽甚說。賜賚優厚。六年。薦修撰吳溥爲司業。八年。上北征。以祭酒兼侍講。掌翰林院事。輔導皇太孫監國。縝密謹敕。上下無間言。洪熙元年。以疾乞休。賜璽書。加太子賓客致仕。復其子孫。儼在國學二十餘年。敦尙思義。時諸生託故告歸者。法坐戍邊。儼申論得免。儼旣出內閣。雖不復預機務。諸大臣不自安。凡朝廷制作。修太祖實錄。永樂大典。天下圖志。皆推儼列總裁。歸田後。乞修白鹿書院。及春秋祀許遜。章丹家食。二十餘年。八十三卒。儼自處淡薄。衣食僅足。閒居。日與學者講求問學。方岳重臣。待以師禮。然終日言不及私。其處是非利害可否之間。審度情理。務求相安。羣倫中有不如意。卽引退。不與辯。以故所至敬愛之。其資急朴諒。問學該博。凡天文地理。歷律醫卜。皆通其說。文章簡質。不事辭藻。晚年沈潛性理。充養益粹。言行慥慥。稱耆俊焉。

史官曰。胡儼端諒。持正頗好直言。嗟夫。三代之遺。莫行於叔季也。跡其平生。絕少奇策異能。而樸重無佻習。師道臣道。兩盡之矣。噫。儼蓋急流中勇退人也。舊稱儼爲祭酒。太宗亦寵之。公卿莫不加嚴憚。士由太學出。卽至巍顯。無不執弟子禮。惟謹。可以知儼矣。

況鍾傳

況鍾。字伯律。靖安人。初以吏員事禮部尙書呂震。震薦其才。永樂十三年。授禮部主事。二十一年。陞郎中。初令五品以上京官得薦士。鍾薦右中允張宗連。上召問楊士奇曰。人皆薦下僚。鍾乃薦朕宮臣耶。對曰。臣與王直擬薦宗連。不意爲鍾所先。上喜曰。鍾能知宗連乎。卽日陞宗連大理寺丞。宣德五年。擇郡守九人。鍾知蘇州府。賜敕乘傳之任。初至郡。佯不解事。諸吏抱案環立判請。鍾顧左右問史。吏所欲行止。輒聽。吏大喜。謂太守愚。越三日。召諸吏詰曰。某事宜行。若願止我。某事宜止。若願欲我行。縛諸吏拷掠投庭下。輒死者數人。諸吏又皆大懼。謂太守神明。鍾乃盡戮屬吏。斥貪墨者五人。庸懦者十餘人。八年夏旱。旣發預備糧賑農。俾得盡力於田畝。復與周忱請究收糧法。由永樂間轉輸北京。餉道遼遠。糧長以一徵三。府二百七十萬石加徵至八百一十萬。除正供及餽車船費。盡爲糧長乾沒。議別立頭同收受。互覺察。除免舊徵三之一。以其二之一爲轉輸費。餘皆入濟農倉。爲來年經費。本是年馬草米數十萬石。及九年夏。稅折布絲數十萬斤。絹數十萬匹。小麥數十萬石。及雜出供費。並代以餘米。上無通事。下無橫科。民大悅。每旱。又輒發此餘米賑活。輒數萬人。二十餘年積弊。不戮一人而盡除。民接遞終歲在官。不得負販。鍾敍

丁差歲不過三日。盡罷其在官者。置綱運簿。防運夫侵盜。又置館夫簿。防非禮需索。綜理周密。簡約易行。大抵鍾爲官。專屬豪狡。拊善良。勢家恣犯法。立死杖下。吏民大驚。奉約束。塞門下。士有行藝者。時時賑贖。諸儒生喜。爲流聲譽。爭獻詩頌美。有鄭亮者。獻詩。鍾稱賞。欲薦於朝。會有以匿名書數亮過失。揭府門者。鍾得書笑曰。彼欲沮吾薦。正速成亮名耳。遂奏亮才學可用。召試授吏刑二部司務。轉監察御史。正統元年。劾御史王連罪狀。法司論逮連罪。歲滿去。民叩闕乞留者八萬餘人。進鍾正三品。仍知蘇州。七年卒。罷市巷哭。送其喪。競立祠祀之。鍾剛正奇偉。潔廉之操。一塵不滓。操履之固。千夫莫回。令行秋霜。靡暴弗馴。惠流時雨。靡悴弗煦。國初蘇州知府有王興宗者。與葉春及魏觀事。詳循良傳。

明書卷一百十九

列傳四

名臣傳四

金善、王英、儀智、鄒濟傳

金善字幼孜以字行新淦人建文元年進士乙科授戶科給事中燕兵渡江迎順太宗即位入內閣改檢討數月陞侍講時翰林坊局官日講經史東宮凡經義皆內閣閱正呈上覽已進講繕閱書士奇閱易廣閱詩幼孜閱春秋上太子春秋直指三卷五年陞右諭德兼侍講七年扈巡北京八年從上征虜上歷指所過山川諭幼孜記之登野狐嶺曰至此看山盡在下矣至興和曰汝觀地勢遠望似高近卽漸平此陰山脊也若因山爲壑因壑爲池守茲巖陰雖鐵騎千羣安能飛渡耶次鳴鑾戍曰此大伯顏山其西北小伯顏山東北卽開平次環瓊圃指塞北山川曰古交河在哈刺火州兩河相交水噴沙出唐碑尙在次小甘泉曰女直有山其巔有水色白草木虎豹色皆如之所謂長白山也至長清塞曰此南望北斗矣經闕溲海曰此周千餘里幹難臚胸凡七河注之賜名玄冥池次通川甸遙指海上石山曰此卽三石山十一年扈巡北京從征虜十二年復從北征陞翰林學士兼諭德十四年還南京明年扈巡北京十八年進文

淵閣大學士兼翰林學士二十年。扈從北征。二十二年。復從征北。次開平。上曰。朕夢神人語。朕上帝好生者三。是何祥也。幼孜時聞軍中有訛言。因力請班師。上曰。善。立命草詔。還次清平鎮。宴羣臣。命內使歌高皇詞五章。曰。此先帝垂諭。敍創業守成之難。戒荒淫酣酗之失。朕嗣鴻業。惟恐失墜。尙相與勉之。遂廣五章。言奉天法祖。勤政恤民事。命內使歌之。榆木川之變。楊榮南討。幼孜留軍中護喪。仁宗卽位。進戶部右侍郎。兼大學士。踰月。加太子少保。兼武英殿大學士。賜繩愆糾繆銀圖書。洪熙元年。陞禮部尙書。支三俸。當是時。法司論死罪多冤。上命臨決。必三大學士會讞奏。幼孜知律例。多平反。未幾。還省。母。母卒。宣宗卽位。起服中爲總裁官。修兩朝實錄。明年。持節出寧夏。冊慶府兩郡王妃。還。上封事。從上巡邊。度雞鳴山。上曰。唐太宗恃其英武。征遼常度此山。對曰。太宗零悔是役。以故建閔忠閣。至宣府還。宣德六年。卒。贈少保。諡文靖。幼孜簡易沈默。溫裕有容。不肯伐善爭名。爲文和平寬綽。類其人。子昭伯。宣德二年進士。王英。字時彥。金谿人。永樂二年。進士。庶吉士。入翰林。未幾。召英及王直入內閣。書機宜奏疏。五年。授修撰。扈上北巡。十四年。進侍講。二十年。從征虜。至闊懣兒海。旋師至威虜。命碎李陵臺驛。令碑沈河中。絕虜爭。上顧英喜曰。秀才二十八人中讀書者。朕需爾爲用。宜宣力勿憚勞。英因言虜遁。幸勿入險窮追。上笑曰。朕爲天下國家計。秀才直不欲黷武耳。又曰。凡軍中一切動靜。或謠言。有聞卽密奏朕。又顧內臣曰。秀才有事見朕勿闌。駐安平鎮。軍中有怨言。上怒。英言。此皆壯士。幸宥其過。稍與恩澤。異日得其死力。上喜。立命兵部尙書李慶給餉及輜畜。二十二年。上崩。榆林川。太子命英與諸大臣定喪禮。議國事。宿內閣。凡七

日仁宗卽位。陞侍講學士。又陞右春坊大學士兼故官支兼俸。明年乞省歸朝。宣宗召入便殿。謂曰。洪武中。學士有宋濂、吳沈、朱善、劉三吾、永樂初解縉、胡廣皆有名。汝英慎自勉。五年陞少詹事兼侍讀學士。七年內艱起復。英宗卽位。充史館總裁講官。陞禮部右侍郎兼侍講學士。正統八年出理部事。領日講。十一年引年不允。十三年陞南京禮部尙書。景泰元年卒。諡文安。英與修文仁宣三朝實錄。文章典贍。尤善草書。寬弘樂易。豪俊豁達。不屑曲檢。顧直諒好規人過。以故三楊皆不喜。卒不得大用。人多惜之。儀智高。密人洪武中薦爲教官。知高郵州。高郵人皆愛之。曰。知州長者。陞知寶慶府。寶慶人健悍。又畏敬之。曰。太守不可犯。永樂二年遷東宮官。陞通政兼右中允。未幾陞湖廣布政使。三年入爲禮部侍郎。十一年元旦日食。禮尙書請賀如常。智獨爭議不可。未幾上令吏部翰林院擇一老儒侍太子。明日太子召問得人未。蹇義、楊士奇薦智。又曰。人鮮知智者。以故議未決。太子曰。吾常舉李繼鼎大誤。悔無及。如智誠端士。然老矣。楊士奇稱智起家學官。明理守正。精神未衰。廷臣中老成正大。無踰智者。是日午朝。上顧太子。問曰。侍太孫講。讀得人未。太子應曰。舉禮部侍郎儀智。議上未決。上喜曰。得人得人。智雖老。能直言。元旦日食。智執議免賀。智可用。智寬平。嚴正。務持大體。尙忠厚。遇事是非。又輒別白。爲太孫陳說。不屑附會。年八十致仕。卒。贈太子少師。諡文簡。子銘。字子新。學於吳訥。天性易直。孝友。舉經明行修。洪熙時。爲行在禮科給事中。內府校書。改編修。陞侍講。正統中。爲邸王長史。景帝初。陞南京禮部侍郎。以立懷獻太子故。加太子太保。未幾。爲兵部尙書。尋掌詹事府事。卒。贈太師。諡忠襄。

鄒濟字汝舟其先嘉興人徙餘杭洪武十五年舉通經儒士授餘杭訓導累官平度知州濟博學修行能文章樂易無崖岸兼通老釋太宗卽位大臣薦修太祖實錄成永樂元年陞禮部郎中已而修永樂大典諸儒臣推濟總裁征安南濟參贊大將軍軍事草獻俘露布八年陞廣東參政十年坐事改考功郎中仁宗留守南京擇宮寮改右庶子進少詹事當是時宮寮多得罪徐善述王如玉馬京梁潛周冕相繼下獄死濟幾陷死地者數矣竟積憂懼成疾東宮憐之書問曰卿善自攝卽不諱卿苗裔余爲提攜不使墜入蓬蒿濟尋卒後仁宗悼念舊學贈太子少保諡文敏建祠令有司春秋祀子幹仁宗監國時遣入應天學給米月二石正統四年進士歷官太子少保禮部尙書致仕年八十四卒贈太子太保諡康靖善述天台人爲左司直郎陞右贊善耿介恬靖汝玉長洲人仕贊善兼檢討坐戍邊東宮特宥之以累下獄死汝玉聰敏過人文章精粹洪熙初贈太子賓客諡文靖善述太子少保諡文肅京武功人洪武十八年進士靖厚端方累官北京刑部侍郎兼宮寮謫戍廣西已而有薦京者竟坐前事下詔獄死洪熙初贈少傅諡文簡潛太和人洪武二十九年鄉舉歷調專知縣太宗卽位召修實錄成陞修撰尋兼贊善永樂十五年以廷臣薦副楊士奇輔太子監國坐事被讒與周冕并逮詔獄卒妻楊氏隨潛北京潛卒慟毀不食亦卒潛闖爽弘毅通諸經尤長於詩易爲文章務去陳言出新意冕寧波人爲右司諫

史官曰文帝雄武蓋世願喜與文士周旋雖行間左右無學士則不樂金幼孜王英皆以縫掖負羈勒以從者也天子幸邊儒臣載筆登陰山脊碎李陵碑南望北斗與銘燕然封狼居胥者同雄心矣儀智鄒濟

皆以宿儒爲宮寮。智老而傅太孫。故獲免。濟傅太子幾得罪。竟以憂死。一時宮臣周冕、梁潛輩皆不免焉。豈博望神策。實啓嫌疑。抑社稷牧圉。居者不如行者之無罪歟。

宋禮

附金純周長蘭芳傳

宋禮字大本。永寧人。洪武中太學生。爲山西按察僉事。坐事左遷戶部主事。謫戍寧夏。建文初。薦授陝西僉事。辛巳。又坐事除刑部員外郎。太宗卽位。命署禮部事。俄陞禮部右侍郎。逾月。轉左。永樂二年。進工部尙書。時營北京宮殿。命取財川蜀。七年。奪憂。伐山通道。深入險阻。時下勅嘉勞之。九年。治漕河。已。又入蜀。十二年。九載考績。十六年。來朝。又入蜀。是歲。理獄江西。十七年。又入蜀。是年病。召還京。理部事。造番舟。十九年。造黃舟。是年。又入蜀。禮初治漕河於濟寧。與侍郎金純。都督周長。修復會通河。置十五閘。用濟寧同知潘叔正策。役夫三十萬。工十旬。獨租一百十萬石。浚黃河故道。用侍郎張信圖策。與興安伯徐享。侍郎蔣廷瓚。自祥符魚王口。至中灤。下二十餘里。殺水勢。河成。賞功。禮居第一。長以徇私。虐人不得賞。又於寧陽築隄成壩。遏汶水。盡入漕河。用御史許堪策。疏洩衛河。至海。豐大古河入。凡四百五十七里。役夫三千。工一旬。自是挽漕京師。罷海運。禮功最大。卒之日。家無餘資。洪熙元年。賜葬祭。正德七年。賜祠祀。會通河上。禮剛果直下。有經濟才。馭下稍嚴。以故事。亦易集金純。泗州人。洪武中太學生。爲文選郎中。出爲江西參政。召爲刑部侍郎。扈駕北征。歷禮工刑三部尙書。太子賓客。所至有政績。淮泗間治水功最著。卒。贈山

陽伯純寬和有容。吏事幹敏。宣德三年夏。暑初。法司疏獄。純數會客宴飲。言官論純淹囚。領繫錦衣獄。上念純老臣。與致仕去。純在刑部。仁宗常諭純及臺寺劉觀。虞謙曰。法司尙羅織。言及國事。輒論誹謗。甚無謂。自今諸告誹謗者。悉勿治。又常曰。朕或嫉惡過甚。處法失中。卿等須執正。周長天長人。有膂力。善騎射。從燕兵白溝。東昌。蕞城戰有功。歷官督府。治漕河。卒贈萊陽伯。諡忠毅。又有蘭芳者。夏縣人。讀書通古今。洪武中。舉孝廉。爲刑部郎官。知吉安府。有惠政。民思之。坐事謫爲辦事吏。從治河濟寧。復爲工部主事。永樂十年。以禮薦陞工部右侍郎。清濂無私。

史官曰。大廈之成。非一木之任也。天下之大。非一士之智也。宋禮修復會通。浚黃河故道。遏汶入河。爲漕輓。百世利。歲運四百萬石。無航海之勞。厥功懋矣。然皆任用羣策而已。受其成。智豈可專耶。故知鯨鱓勿成。敗由圯族。禹功告錫。益在昌言。禮之用智大矣。

郁新傳

郁新。臨淮人。洪武二十二年進士。除戶部度支主事。賜名新。明年陞北平戶部郎中。又明年。超授戶部右侍郎。考滿。上廷中對羣臣稱新才。陞尙書。在戶部者凡十三年。綜理甚密。而取民有節。上嘗問天下戶口田賦。地里險易計數。新應機嚮答。無遺謬。時親王歲祿米五萬石。他賜物又萬石。新議定歲一萬石。并定郡王將軍中尉主君祿。建文中。調兵食各有勞績。太宗卽位。復戶部尙書。永樂元年。言淮河間漕多淺灘。跌坡阻運舟。請自淮安用船可載三百石以上者。運入淮河沙河。至陳州潁溪口。跌坡下。復以淺船可載

二百石以上者。運至跌坡上。別以大船載入河。至八柳樹諸處。令河南車夫陸運至衛輝。入衛河輸北京。二年。上屯田賞罰例。三年。卒。上顧解縉等歎息稱新才。新理邦賦。能會計量出。今誰可代新者。嗟不已。新篤實有禮。家素餘財。慷慨豪舉。喜賓客。樂賑施。

史官曰。闕。

段民傳

段民。字時舉。武進人。永樂二年進士。選庶吉士。與修永樂大典。除刑部主事。又與修五經四書性理大全。累進郎中。永樂十八年。妖賊唐賽兒反山東。十九年冬。陞山東左參政。討平之。廷議擇守臣。當是時。索賽兒急。盡逮山東直隸尼。既又盡逮天下出家婦女。先後幾萬人。民撫定綏緝。曲爲解釋。人情始安。太宗再駕征北虜。勅民轉餉舟自濟寧至通州。俄又令陞轉居庸關出塞。民節約曲算。省財力。民不擾事業。道中忽降勅。令民與巡按御史考所過郡縣吏。宣德二年。召考會試禮部。三年。召入爲戶部右侍郎。滿剌姦垢出納清允。尋改刑部。特賜敕。民廉介端謹。令考察在京百司。先是榜例。越訴者杖百。謫戍邊。民請罪如律。九年。卒。官貧不能喪。吳訥爲經紀。始克殮。成化間。葉盛請褒。不果。民好古力學。精練吏事。廉平勁直。人莫敢干以私。

史官曰。闕。

錢幹附錄
紀傳

錢幹初字習禮名幹以字行吉水人才敏力學永樂六年鄉貢上禮部七年會試中甲科時上北征又明年辛卯始舉進士入翰林爲庶吉士除檢討上喜幹幹之鄉人惡幹者持幹短長幹行潔修無可摘乃指爲練子甯姻宜坐姦黨劫幹幹懼告楊榮楊榮聞上曰習禮有文學史才願陛下憐察上欣然曰使練子甯尚在朕且用之況習禮乎幹感泣自奮勵仁宗卽位陞翰林侍讀知制誥宣德初與修兩朝實錄四年十二月朔霜寒上顧光祿卿文官早朝寒盍賜羊酒又顧幹曰皇祖考臨朝每旦常賜食朕偶忘習禮謹識之五年陞侍讀學士七年上過史館示近臣招隱歌幹頓首曰皇上聖性聰明文章清麗懷賢覽古天趣悠然上喜正統初與修宣宗實錄三年陞學士七年以故鴻臚寺爲翰林院落成諸殿大學士皆至幹不設楊士奇楊榮座問之應曰此非三公府也二楊聞上命工部具座禮部敘位次二楊始自內閣出坐諸學士上九年乞致仕不許十年上特用爲禮部右侍郎或賀幹者答曰吾今且爲有司又奚賀爲未幾陳循高穀等皆得陞侍郎入內閣公尋兼署吏部稱疾辭致仕幹孝友忠信篤於倫誼厚生送死推財賑贖好古秉禮動有矩則文章議論士類宗仰歸山十五年八十九卒諡文肅南城有羅圮成化二十三年進士爲翰林編修時武崗知州劉遜忤岷王被逮給事中龐泮等以救遜下詔獄圮上疏救主事李夢陽論外戚收拷又疏救太監李廣死言官劾文武大臣附廣者請按廣籍斥逐玘言不可暴其名差朝廷宜令諸大臣自陳或坐他事黜便正德中歷陞南京吏部侍郎上大本急務疏言逆瑾逐榮王虛朝廷上未有子諸大臣依違不肯爲國家遠慮忤時宰致仕去潛心學問文益奇偉宏暢甯庶人致百金壽

紀走避深山中。李東陽處瑾、永間，曰：調護善類，犯引大義，責之，願削門人之籍。卒贈禮部尚書，諡文肅。
史官曰：調

胡廣、胡濙傳

胡廣，字光大，廬陵人。父子琪。洪武三年爲御史，疏請遷都關中，已而出爲按察僉事。調知彭州。陸延平知府率建文二年燕兵起，廣對制有曰：親藩陸梁，人心不搖。建文君喜，擢進士第一。更名靖，爲翰林修撰。太宗卽位，召入內閣，陞侍講，復名廣。改侍讀。陞右庶子。永樂五年進翰林學士，兼左春坊大學士，勅吏部廣等侍朕日久，繼今考滿，勿改外任。十二年十一月命廣及楊榮、金幼孜纂修五經四書性理大全。明年九月書成，進文淵閣大學士，兼坊學。再從上出塞征虜。上時召帳殿語移時，或夜漏數刻遣出，道中相失，必急遣兵騎四出尋諸學士。時時顧左右問諸學士來未，廣不知兵，以文墨論議侍上，備顧問，上不得諸學士相與語，不悅也。廣敦質簡重，持大體，存心愛人，上諒其樸厚，信任亞於楊榮。禁廷應對，慎密不洩，操履清謹。廣退輒杜門讀書賦詩，寡交遊，崇儉素，爲文下筆滔滔，制命典冊，多出其手。禮部胡中周訥請封禪，廣力言封禪非禮，上斥訥言。廣因上卻封禪頌，奔母喪，還朝。上問民間疾苦，頓首對曰：百姓頗安給，惟有司窮治建文時姦黨，枝附扳連坐，誣善良甚苦。上立命罷追詰者，人或毀廣，上不信，或遽斥去毀者。廣善書，行草尤善。十六年卒，贈禮部尚書，諡文穆。已而上念廣官其子翰林檢討，仁宗加贈少師。楊士奇曰：我朝文臣有諡，自姚廣孝及公始。然建文時常諡王禕、文節。

胡濙字源潔武進人建文二年進士爲兵科給事中永樂元年陞戶科都給事中時或傳建文皇帝崩或云遜去諸舊臣多從建文去者上益疑大戮建文諸臣遣濙巡天下名訪張儼備又頒書名徧行郡縣察人心及建文安在時又傳建文在滇南濙以故在楚湖南最久十四年內艱起復爲禮部右侍郎明年巡浙江二十一年巡均襄還朝會上駐宣府濙馳夜上謁上已就寢聞濙至被衣急起召入勞濙賜坐與語濙言不足慮也先濙未至傳言建文蹈海去上分遣內臣鄭和數輩浮海下西洋至是上疑始釋太子監國藩王謀奪適造飛語上命濙往察密疏聞具述監國七事言太子誠敬孝謹無他仁宗卽位轉太子賓客兼祭酒南京未幾閱宮中密疏見所述七事大喜謂濙忠憤朕不及知也俄崩宣宗卽位復召爲禮部侍郎兼太子賓客會濙來朝留行在禮部宣德元年進尙書二年賜第給關使三年賜文恭世家清和恭靖二銀章是秋扈駕出會州明年夏再扈巡邊沒常州豪人田宅盡賜濙尋兼詹事六年兼領行在戶部事濙有才猷深厚不洩禮典財賦經畫有章國家大議與諸執政相可否必執正論上嘗曲宴濙及楊士奇塞夏曰濙內無虞四卿力也英宗卽位益禮敬之元年失行在禮部印自劾上不問改給行禮部印九年疏引年不允十四年北征留守京師廷議迎上皇時王文厲色曰孰謂敵可和彼不索金帛且索土地憂方大耳衆相顧不敢言于謙徐曰防變方略我與總戎責也俄旅退賴濙有定執竟上奉迎儀注景泰元年楊善使虜濙言上皇蒙塵已久宜卽附善等進上服食不報又請明年正旦朝上皇於延安門不許二年災異乞歸不允三年以太子太傅加少傅懷獻太子立進兼太子太師是年十一月己巳上皇萬壽

漢乞令百官拜賀於延安門。不許。六月，疾作。又明年，上皇卽位，力疾入，一見，請老去。遣子長甯來謝。上念漢疏屢請，令百官朝廷安門忠悃，授長甯官錦衣世鎮撫。卒年八十九。諡忠安。漢平易寬和，廉靖寡慾，自奉薄簡，與居有常。立朝幾六十年，十知禮部貢舉，未嘗疾言遽色。人皆知爲君子長者。史官曰：文皇雄猜鷲忍，大臣小失意卽頽繫。雖塞，楊不免焉。而胡廣以謹身慎密，出入侍從數十年，持文墨，備顧問，卒鮮過舉。胡漢尤荷心膂之寄。周奚諮詢於父子君臣間，調護甚厚。歷事四朝，典禮文章較然可述。此豈不對省樹，執策數馬之流歟？詩云：小心翼翼，天子是若。二臣有焉。

楊信民傳

楊信民，新昌人。永樂中舉人。宣德間，擢工科給事中。正統間，陞廣東左參議。嘗勦罷按察使，被逮至京。廣中數千人走萬里詣闕，疏伸信民公勤廉能，乞留以安百姓。得復職。適南海盜起，陞僉部御史，守其地。信民宣布恩威，獎勵士卒，屢戰屢捷，撫歸數萬人。景泰元年，卒於官。廣人手香燈弔哭者幾萬人。錄其子玠爲太學生。廣者，民又相率走京，乞立祠祀，著祀典。成化中，諡恭惠。史官曰：聞

顧佐、軒輓、魯穆、熊繡、邵清

附師達、向瑋、周新、潘禮、胡拱辰、王琦、李嵩、朱震、孫需、陶瑛、薛道

傳

顧佐，太康人。建文二年進士。爲莊浪知縣，拜御史，巡廣西，採木四川，防守邊陲。陞陝西按察副使，再陞應

天府尹尋以營建冗棘。改順天。佐歷兩京。尹剛稜不撓。貴戚斂戢。永樂十九年。貴州有夷警。改貴州按察使。蓋以勳戚家不利。佐以故相排擿去。仁宗素知佐廉健。召爲通政使。宣德二年。臣寮奢縱。御史多淫貪不法。都御史劉觀被斥。上問楊士奇。楊榮。廷臣孰可掌憲者。二人未卽對。上曰。未必乏人至此。楊士奇言。通政使顧佐。歷內外臺。有風采。楊榮亦言。佐尹京。威廉。上喜曰。佐乃能如此。擢右副都御史。與璽書曰。都察院朝廷耳目。國家綱紀。用得其人。則庶政清平。羣僚警肅。否則百職怠弛。小人橫恣。近年在京諸司。姦弊紛出。司風憲者不能糾舉。且與和同。國何賴焉。爾佐剛直廉正。簡在朕心。特畀斯佐。其竭誠盡力。恪恭夙夜。毋憚勤勞。彈劾愆謬。毋避權要。毋枉良善。毋縱姦宄。各道御史卽宜審擇。凡廉勤公正。老成醇厚者。留用。不達政體。貪淫無恥。及曾犯贓罪者。送吏部降黜。公差給假。丁憂者亦如之。御史缺。行吏部慎選。不得濫授。欽哉。遂考核御史貪淫不律嚴暉等二十人。謫吏遼東。不達政體李孟宣等九人。降典史。老疾馮斌等三人爲民。五年。暉潛入京。造詞脅人。佐又勦暉蹤跡。詭秘。且欲殺臣。上誅暉西市。陞右都御史。姦吏犯科者。摺奏。佐受隸金私遣歸。上以佐臺端。不欲發其過。密示楊士奇。且曰。爾不舉佐廉乎。士奇閱奏。謝曰。事有之。顧中朝官祿薄。僕馬薪芻。或資之隸。遣隸。隸得歸耕。官得資費。中朝官皆然。臣亦然。蓋自永樂至於今。先帝固知之。以故增中朝官俸。上怒曰。朕方擇佐用。小人輒誣佐。必下法司法。對曰。末事不足干上怒。請付佐治。恩法並行矣。上召佐授吏狀。且諭曰。此不足爲卿累。小人不樂卿檢制。敢誣正人。汝自治之。佐頓首謝。佐呼吏至。言上命我治汝。汝宜改行。吾且貸汝。上聞之益喜。數月。又有囚告佐久淹不理。上

又怒召士奇諭曰此必死囚教之欲中佐立命三法司會鞠實出千戶臧清清殺無罪家三人奏當死繫獄上曰不誅清佐安能行法立命磔清西市正統二年佐請老家居十餘年卒佐性嚴重守正嫉邪人知敬憚以故竟擠之去先是有師遠者東阿人太宗北巡常問太子南京羣臣孰廉太子對曰皆廉上曰從朕北來者率好貨惟吏部侍郎師遠一人廉耳遠起太學生歷御史按察使堅貞有風裁永樂元年陞兵部右侍郎改吏部領行在兵部事征敵總軍餉陞南京戶部尚書兼領吏部遠孝行絕至操履端潔又有進賢向瑤洪武十八年進士歷職方員外郎九年滿陞通政使不能言對自陳改應天尹建文中坐累謫廣西永樂元年復府尹坐繫獄數年左遷運司判官仁宗知其廉直召爲副都御史兼詹事宣德初蒞南臺致仕瑤有文學履經窮阨介節不渝蔬食水飲布衣泊如也

軒輓字惟行鹿邑人永樂二十二年進士督漕淮上嚴冬忽墮水援出裹紗有司急進衣卻去竟俟舊衣乾除行人司副陞監察御史正統元年與御史十六人出清理軍政清修苦節嚴明不苟人畏服之陞浙江按察使四時一布袍蔬食不厭約諸僚三日出俸易肉一斤故舊經過輒留飯惟一肉或致傷雞見者皆驚異軒廉使殺雞爲客大破費遭喪卽行僚屬尙未及知時守浙監丞阮隨亦清謹安靖與輓善輓旣去陳璇代亦清嚴浙臬稱治景泰四年起爲副都御史巡撫浙江改入南臺內艱天順初首用輓爲刑部尚書耿九疇爲右都御史二人廉介有名海內信向未幾九疇欲去石亨不果反爲亨逐輓亦病請致仕上召輓至文華殿面諭留視輓疾不可強與致仕及陞辭上復問之曰昔浙江廉使考滿歸家僅二籠是

汝乎。輒頓首謝。又問卿年未老，病愈再可用乎。輒又頓首辭疾。上賜金爲道路費。輒去。上復思之，召爲左都御史。督南京糧儲。輒嚴毅，歲時詣禮部拜表慶賀，屏居一室，撤燭朝服端坐，寂無一言。鼓嚴出行禮，禮畢，竟御肩輿歸。僚儕聞其來，輒避去，不樂與之處。南武庫郎沈琛常言留都大臣，惟輒及魏驥、廉平、峻偉，不務文飾。聞令吏寫公牘數十冊，卒後修史，有司從其家取行實，無有也。輒前有南海周新者，永樂中爲浙江按察司，廉梗有威，爲錦衣紀綱，中傷死。仁宗每悼惜之人，稱新爲冷面寒鐵公。

魯穆，字希文，天台人。永樂元年進士，爲監察御史。仁宗監國時，列上漢庶人不法罪狀，留中。陞福建按察僉事，雪冤濫，懲貪墨，摧豪強。泉州人有李姓者，妻吳美，舊與富姻。林私李調官廣西，林令二僕從李行，殺李道中，並殺其姪。吳竟適林。李宗人訴之郡，得賂反坐。李宗人誣，又訴按察司，司得賂如郡，十餘年未決。穆故廉得蹤跡甚詳，一訊林卽服。漳富人周允文初無子，後兒子已過嗣，而妾有子，與兄子貲三之一，託以己子。周死，兄子言妾子非周子，逐去。盡奪其貲。穆大召縣中父老及周宗人詢之，皆曰：妾子本周種也。兄子始服罪，其斷讞多類此。超陞僉都御史，召入臺。正統七年，巡視應天。穆幼舉動異常兒，稍長，攻苦食淡，力學博經史，常大書座右，咬得菜根，百事可做。比入官，請寄不行，問遣並絕。歷官中外三十餘年，家無餘資，歿不能殮，公卿贈賻，僅足棺衾。

熊繡，字汝明，道州人。成化二年進士，爲御史。坐事謫清溪知縣。累官都御史，巡撫延綏，操勵潔廉。儼廩有羨，不入私室。在鎮西寇三年，不窺邊，人以爲韓范。復出憂去，起拜兵部侍郎。陞兩廣右都御史，逾年召入。

南臺。正德三年。中官李榮。忽傳旨。能繡致仕。繡屏居山中。斷絕書問。生事蕭條。俯仰益困。卒。長子已夭。繼子又夭。巡撫秦金。爲請於朝。贈南刑部尙書。明年。太僕少卿何孟春。上疏曰。竊見故都御史熊繡。事母能孝。事兄能友。居貴能貧。居常能儉。剔歷中外。四十餘年。守法徇公。推賢嫉惡。不邀時譽。不狃近功。言無爽於屬垣。行無虧於顧影。往年都御史戴珊。張敷華卒。其門生屬吏子孫。咸請易名。主事張鳳翔。孔琦卒。鄉人請卹其家。聖朝表勸清賢。不吝恩濡。繡才節操履。無讓珊等。賜諡卹寡。惟宸衷軫允。幸甚。詔繡繼給子。子端米月一石。諡莊簡。時有工部侍郎潘禮。歸德人。清廉恬退。未老乞休。弘治間。八十一。巡撫韓邦問疏言。禮歷官居鄉。益堅晚節。草廬蔬食。不求安飽。詔給月米三石。南工部尙書胡拱辰。涪安人。著勞績。晚益清謹。弘治間。御史上其貧薄。特給輿廩。正德初。遣行人存問。年九十二卒。贈太子少傅。諡莊懿。邦問亦仕。至尙書致仕。年九十卒。仁和有王琦。字文進。舉人乙榜。授汝州學正。陞御史。山西僉事。提學。改四川。乞致仕歸。清介自持。不治生產。冬大雪。僵臥不能出門戶。或唁之曰。吾求無愧於心耳。雖饑寒無不樂也。天順間。竟以饑寒卒。臨潼李崙。字世瞻。篤實莊重。雖祁寒暑雨。手不釋卷。成化六年。進士。歷知廬州府。陞河南參政。清慎絕俗。吏事克修。卒之日。貧不能葬。妻郝不免饑寒。守臣爲奏上。得給米終其身。沙河朱裳。字公垂。正德九年。進士。少勵清節。貧困裕如也。提學御史顧潛。知袁。檄府資裳學京師。裳不受。躬自炊汲。爲御史。寒約如故。巡按山西。山東。有風采。人稱裳爲長齋御史。出爲鞏昌知府。歷浙江副使。福建按察使。浙江布政使。副都御史。治河乞歸。再起裳治河。卒。清堅自信。士頌其廉。民懷其惠。饒州孫需。字孚吉。成化八年。

進士。歷官南京吏部尚書。守法畏公議。白首清風。嶢然不滓。雖不能發揚功名。有赫赫之譽。顧正德間大臣多掎克回通。需獨以廉約稱。卒。贈太子太保。諡清簡。絳人陶琰。字廷信。成化十七年進士。歷仕至都御史。三理漕事。嘉靖初。爲工部尚書。授南軍兵部尚書。參贊機務。乞致仕。加太子太保歸。琰宏才偉度。累試繁劇。恤國勤民。動著聲績。中忤權侍。屢進屢退。方毅直亮。喜愠不形。自奉儉節。每飯一蔬。微行罷歸。蕭然行李。三竹筒相隨者數十年。卒。年八十四。贈少保。諡恭介。子滋。正德九年進士。爲武選郎中。論大禮。謫戍薛遠。原籍無爲州人。祖祥。佐太祖有開國功。歷陞工部尚書。以怨言閒下獄死。家徙瓊。遠遂爲瓊州人。以進士授戶部主事。天順初。使交南還。陞右侍郎。母憂去。起復爲工部侍郎。治河河南。尋鑿揚州河四十里。成化初。兵討兩廣叛獠。改戶部。調兵食。諭衆能破賊者。卽有其輻重。人人奮勇。師至大藤峽。賊平。陞左侍郎。三年。進尚書。總督京儲。六年。行視漕河。十三年。致仕。又明年。起爲兵部尚書。參贊軍務。十六年。致仕。弘治八年。卒。年八十三。遠於禮樂兵刑。天官律歷。無不涉獵。尤熟國朝典故。在戶部最久。文移奏劄。悉出其手。改定戶部事例。芟繁正訛。均積委節。內外遠近。多寡輕重。咸有品式。會校出納。吏胥拱手。時中外競陳利害。始一人以爲可行而行。又一人以爲可罷而罷。公一切弗聽。居官四十年。家無長物。食無兼味。室無媵妾。曰。吾少事親。恆不足。今安忍有餘。

邵清。字士廉。江甯人。甫三歲。母疾革。置之別室。哭不已。謂家人曰。死者吾母也。曷俾我一視。聞者哀之。爲弟子員。卽以文行爲常路。所推許。屬頒制諸郡。應天尹冀綺欲以此贈之。擇維揚運司委焉。辭不往。弘治

壬子領鄉薦。明年授江西德化學諭。正己率人流俗問遺。無敢及門者。乙卯秋。主山東試。去取咸自主。事竣。就道。有謁贊者。拒不受。滿九載。留於家。督學邵寶。巡撫林俊。累疏薦之。吏部移文趣行。十月。詣部試。第一。吏尚書馬文升。都御史戴珊。廉其賢。授監察御史。委督蘆溝抽分。痛革宿弊。姦無所容。近侍蕭敬。陳寬。託院堂相囑。不少貸。正憲改元。以清督皂禁諸役。原額百名外。院長及年深御史用之。清悉核以應役。戚畹張延齡。奏人負券若干緡。得旨追給。清曰。御史執法之官。豈爲人索私負者耶。駙馬崔元。都御史張敷。華咸。以爲囑。清不從。隨進二疏。一崇大信。以全國體。二停織造。以清鹽法。所論劾皆中貴人。下戶部議行之。七月。按鹽長蘆。兼理河道。清核餘鹽。革買補。恤竈丁。禁應捕。勢豪鹽商。糜廩重足立。貪吏多棄印。授去。自天津抵濟寧。一路夫力。清壹意節縮。逮諸姦豪。倚威宦爲窟者。論如律。權倖及中人。多不利。於是閣馬永成家。僮及諸賈人。合謀妄奏。閣瑾因遣官校逮清。榜於午門外。家人泣。清慰之曰。我非自敗名節。以辱先人至此。況得失在我。何哭爲。抵家。杜門屏居。灌蔬課子而已。瑾怒未釋。撫清所陳。停布匹。疏罰米一百石。及保舉都御史雍太。罰米二百石。瑾伏誅。都御史李克嗣。巡按王完交薦。嘉靖二年癸未。起陞雲南僉事。至任。適巡撫王啓惡。臨安推官江魚。嚇千戶龔勝。鰥魚欲坐以貪淫黜之。清知其誣。擬以公罪還職。啓大不悅。後巡歷新建諸寨。繕兵旅。修城垣。來商賈。疏溝洫。爲久遠計。滇南多珍奇。所入糜祿柴薪而已。比齋賀詣京。行李圖書之外。無一長物。事竣。回滇。分巡洱海。會參議趙淵。往勘武定土官。約敕甚嚴。下至胥吏。輿臺。一無所染。夷人悅服。後以觀察當調。聞報卽南。家居逾時。桂萼重其名。檄取赴京。以疾辭。八年己

丑。又檄補廣西。至巡桂林。後改左江。兵備忠州。龍州。士官罪惡日甚。清不動一兵而坐擒之。疆圉晏然。巡撫以其清苦之節。明敏之才。方倚重之。而清倦游。上書兩乞休。得請歸。無室廬。係外氏以居。日中或未舉火。意豁如也。督學御史林有孚往訪之。笑語移時。貧無茗具可設。林歎息而去。禮尙書霍韜以沒官田餽之力。卻不受。二十五年丙午秋卒。年八十。陳鳳贊曰。嗟嗟介士。邦之司直。可賤可貴。篋篋必飭。萬里來歸。葆茲固窮。蕭然素業。邈矣高風。

史官曰。傳曰。無欲實難。故既富方毅。明主下以苦節概天下。幸而有其人。則褒異寵卹之者無不至。凡以磨鈍而去貪也。如賜顧佐之覆書。識軒輓之竹籠。周熊繡之孤。給潘禮。胡拱辰之輿廩。使人皆豔其名而愛其鼎。若夫介性天植。嚼然不滓。如王琦之僵臥冬雪。曰。吾求無愧於心。雖饑寒無不樂。薛遠之言曰。吾少事親恆不足。今安忍有餘。斯其人豈以名實毀譽動其心哉。蕭然素業。邈矣高風。雖爲之執鞭。所欣慕焉。

劉實傳

劉實。字嘉秀。安福人。宣德五年進士。改庶吉士。未常投足權門。自陳才薄親老。乞教職。會有詔汰庶官累千人。實意且得教職。竟爲同知金華。在金華三年。不以妻子隨。不與流輩伍。廉操直節。綽有聲稱。金華旱。賦逋叢積。催科急。民或鬻子女。實疏得免。又贖還其子女。公餘輒探閱經史。卽視事掩卷。已則復然。羣僚或竊笑。不爲改。郡有孝子顏宗。忠簡呂東萊祠墓。爲之修葺。鄭義門合爨久不能給。又買馬出力給傳山。

西爲疏乞免役。擢順天府治中。景泰中召修元史。筆削任心。無所咨承。屈遜見他人書不合己。竟輒大笑。聲徹閣陛間。聞者驚愕。相戒勿以藁示實。尋擢南雄知府。南雄當嶺南孔道。商稅鉅萬。知南雄者輒盈鑿。推其餘餽。過客得其歡心。且爲游聲譽。實至存稅十一。繕郡學。補張九齡大庾嶺松。不肯私一錢。未數月中。官使嶺外。至南雄。意得重賄。不得。苛辱之。郡人擁之。竟出。中官去。至詔。詔人爲言南雄守廉。且驛言中官橫索賄辱太守事。中官懼。急傳馬馳奏。實抗敕使毀敕。大不敬。詔逮至京下獄。獄中上書言臣蒙恩仕官三十年。不以妻子自隨。餐粗衣敝。欲爲國家養愛小民。不忍勞費。以是觸忤天使。無所逃罪。上不復更窮治。不數日。竟卒獄中。實喜著書。尤長於春秋。中夜有得。蹴童子燃燈起書。如獲至寶。生平清強。甘心貧窶。與古廉吏范丹李及無異。彭時稱其躬過人之操履。立絕俗之儀矩。利誘不回。勢惕不沮。

史官曰。國



明書卷一百二十

列傳四

名臣傳五

高穀王直林聰傳

高穀字世用興化人永樂十三年進士改翰林庶吉士授中書舍人二十二年改春坊司直郎洪熙初爲翰林侍講正統元年楊士奇薦穀學術醇正充講官修實錄五年陞侍講學士十年入內閣陞工部右侍郎兼前職十四年上北征曹鼐從行穀居守景泰初進工部尙書兼翰林學士是年敵數請使迎上皇侵我上谷雲中急廷議相顧忌不能決中書舍人趙榮毅然獨請往穀壯榮解金帶贈榮曰子忠義人也上皇將至京穀言奉迎禮宜厚會有千戶龔遂榮投匿名書穀所穀袖入朝傳示羣公卿羣公卿不敢出一言言官疏聞上不喜詰匿名書從何所得穀曰得自臣所遂榮恐累穀自縛闕下下詔獄上亦不深罪遂榮也二年進少保東閣大學士明年廢東宮爲沂王而立懷獻爲太子穀悲憤不爭加太子太傅穀亦不辭是時內閣不相能穀上疏言內外諸司惟賢是用況經筵日講關係聖德尤在得人遂薦大理少卿陳詢侍講楊鼎充日講官左都御史王文大理寺卿蕭維禎庶子王詢入內閣上令詢鼎侍經筵文遂得入

內閣文既入內閣。又輒與穀相擠。五年。敕穀視南畿災。尋還朝。力救都給事中林聰不死。七年。加少保。爲謹身殿大學士。是年。首輔陳循及王文。皆以子不得舉。訐順天考試官劉儼。上令穀覆試。穀曰。貴胄與寒賤爭進。已不可。況從而爲之辭。奏斥林廷一人。事遂已。英宗復辟。內閣諸臣皆流放竄殛。惟穀以忠謹故。英宗曰。穀在內閣。每議迎駕及南內事。輒左右朕。穀無他腸。可致仕。既歸田。杜門不接賓客。人有問及正統景泰天順間事。輒不應。穀官至台鼎。而家業蕭然。敵廬瘠田。僅足衣食。身沒未幾。子孫貧窶。其方穀端靖廉潔無私卓然有古大臣之風。一時內閣七人議論。每相齟齬。穀獨持正。常曰。清議可畏。以是見忌於同列。亦以是受知於英宗。成化初。吏尙書姚夔及王佐鄭瑩前後上言。穀鯁直不回。端亮有守。始以翰林學士侍英宗經筵。入內閣輔政。孜孜爲國。恪持公論。景泰間。力主遣使迎鑾之議。及其還駕。獨建備禮郊迎策。天順初。以老疾乞歸。進退有道。始終不渝。加之贈諡。庶表臣節。得贈太保。諡文義。

王直字行儉。秦和人。永樂二年進士。爲翰林庶吉士。召入內閣。書機密文字。尋授修撰。上巡北京。留黃淮楊士奇及直輔導監國。再巡。扈駕。憂闋。陞侍讀。洪熙初。進侍讀學士。立太子。陞右庶子。兼故官。記注聖政。聖訓。宣德初。進少詹事。兼職如故。英宗初。總裁實錄。成。陞禮部左侍郎。兼學士。尋典制誥。正統六年。出部。佐胡濙。八年。爲吏部尙書。代郭璉。十四年。上北狩。學士周敍自南京貽直書曰。永樂宣德間。常仰望少師東里先生。然迹其舉措。究其底裏。士大夫公論不容掩也。易曰。知幾其神乎。書曰。慎終於始。又曰。惟克果斷。乃罔後艱。竊思三楊輔政之初。一幾也不深思熟慮。身任其責。惟陽斂陰施。掩人耳目。雖曰自保。其實

誤國。故致今歲七月之禍。此時先生與諸君子輔政之初。又一幾也。宜鑒覆轍。爲宗社生靈永遠之謀。失今不圖。噬臍莫及。豈得卽能效子房之從赤松。晉公之營綠野乎。敍官至學士。又冒膺宋史之修。儻卽死。成此一事。竊名穹壤間。他富貴皆無所望。所念者國家安則民皆安。敍輩亦可偷生。畢其素志。今歲以來。因朝廷屢有更張事。不敢避禍。屢有所陳。未審朝議以爲可採否。自是以往。亦不敢瀆告一語矣。尋被勅得白。初上欲親征敵。直率廷臣疏止。不獲命。留守加太子太保。景帝初。進少傅。屢乞遣使奉迎上皇。不允。景泰元年。禮部議奏復迎上。御文華殿門諭大臣言宜絕虜。直言報使便。勿使有後悔。上不悅。曰。朕無意大位。若曹過爲朕宜。今奈何異。于謙曰。天位已定。孰敢他議。祇答使舒邊急耳。上意始釋。曰。從汝從汝。羣臣退。纔出文華門。內臣興安匍匐而呼曰。疇堪使者。有文天祥富弼其人乎。衆未答。直而亦厲聲曰。是何言。臣皆王臣。惟上是使。敢弗行乎。言至再。詞色愈厲。安語塞。遂遣李實羅綺使虜。三年立東宮。加少師兼太子太師。何文淵以左侍郎加太子太保爲尙書。佐直中書舍人何觀勅直。上不聽。未幾文淵去。王翔代。文淵爲御史。隸綱等論勅直。累請老。不許。英宗復位。請老去。直方面修髯。氣宇宏偉。性嚴重。寡言笑。居家儼然。及接人和氣。可掬。學富才敏。詩文精緻。在翰林三十餘年。恭勤不息。既秉銓軸。益廉慎。時方面官罷。廷臣薦舉。專屬吏部。直留意人才。于請斷絕。奔競稍息。居第隘陋。曾不屑意。臨川聶大年常誚直。直不爲憾。大年卒。泣銘其墓。恨未能薦大年也。時江西有二王名。東王謂直。西王謂英。卒年八十四。贈太保。諡文端。直歸田康樂。常言西楊不欲予同事內閣。出予理部事。當是時。不能無憾於西陽。若使不出部。丁

丑正月當坐首禍能免遼陽之行乎。

林聰字季聰甯德人。正統四年進士。爲刑科給事中。劾石亨楊洪孫鏜諸大將。及內臣善增金英。著風裁。景泰元年遷都。給事中。上皇將還。會有投匿名書者。王直得之高穀所。直與胡濙欲聞上。曰此所謂禮失而求諸野。已而或出危言。事且止。聰疏言直濙皆股肱大臣。不得私言齟齬大政。詔按之。穀曰得之小隸。小隸曰得之道路。上怒急捕千戶龔遂榮。挺身自白。曰迎上皇禮本常厚。遂榮投此帖。冀感動。無他腸。甘死無悔。已乃下廷議。或言也。先遣使行成。虜不可信。卽迎駕。一車二馬足矣。聰言上皇北狩。與陛下迎鑾。皆社稷綱常大計。宜厚無他日悔。竟從其議。三年抗議易儲。改右司直郎。四年商輅薦復爲吏科都給事中。劾吏部尙書何文淵。刑部尙書俞士悅。通政司李錫。工部侍郎張敏。諸大臣益多忌之。嗾御史屢劾其挾持吏部。擢選教官。得善近地。下廷議。按致聰賂不得。坐比擅選法死。胡濙不肯署。稱病臥數日。上遣中官問。對曰老臣本無病。聞欲殺林聰。殊驚悸耳。上聞意立解。乃左遷國子學正。英宗復辟。超陞右僉都御史。賑山東饑。進副都捕江淮鹽賊。天順三年內艱。明年起復。又明年曹欽反。起大獄。牽連冤濫。冒功者至割乞兒頭上功。都人不敢夜出。聰時署院事。力請禁戢。平雪讎嫌。成化二年江淮旱。人相食。聰往賑。奏裁漕粟數十萬。明年九載滿秩。陞右都御史。七年出撫大同。將吏用命。邊事稍甯。逾年致仕。越二年起掌南院。又三年召入爲刑部尙書。加太子少保。十五年與定西侯蔣琬按事遼東。馬文升及御史強珍。竟坐謫戍。明年乞致仕。不許。十八年卒。贈少保。諡莊敏。聰徇徇和易。身若不勝衣。遇事可否。大義毅不可挽。抗議

易儲直聲大振。

史官曰：景帝時迎鑾之議，廷臣窺上意指，環顧不敢發。惟一、二小臣毅然請往，請從厚，俱主高穀。穀之忠義可倚也。王直而斥興安，林聰抗議易儲，皆義激於心，惻隱故主，皇計復辟之後，身名獲全乎。成躋上壽，爲四朝耆老，厚德之報也。

楊士奇楊榮楊溥傳

楊士奇初名遇，以字行。江西泰和人。早孤，從母。敦敏力學，手不釋卷。年十三，通舉業，爲鄉里師。有隙生攜書數冊過館，下色，甚。士奇問故，云有母不能養也。士奇曰：嗟乎！人孰無母，亟分徒十五與生，弱冠游章貢。章貢守儒者，重士奇，令攝琴江教事。琴江令亦儒者，重士奇。士奇道令平恕，邑有冤囚，士奇爲言，令得解。因懷金爲謝。士奇曰：吾以教爲職，縣官事吾安所預聞。辭不受。已而游楚中，楚中人皆慕士奇。諸楚中吏欲薦之，輒辭。建文初，廷臣薦士奇名儒，徵授教職。時年三十六，未任。會修高帝實錄，留翰林充編纂官。尋命吏部考第史館諸儒，尙書張紱見士奇策，驚曰：時務有用之才也。奉第一。除吳府審理副。明日，復召入翰林，燕兵至江上，與衆迎順，導侍入金川。太宗卽位，遂擢翰林編修，尋陞侍讀。時方開內閣於東角門內，命士奇等七人處其中。因諭士奇曰：朕知爾文學，親擢至此，爾但盡心，勿自疑畏。二年，立皇太子，兼知春坊左中允。一日講大學，士奇呈講義，上覽畢曰：先儒謂堯典、克明峻德章，一部大學皆具矣。侍講學士王遼講乾九四，舉儲貳以說。皇太子疑其言，問士奇對曰：此宋儒胡瑗之說，曰：與常人言，亦舉此說乎。對

曰。程子嘗曰。卦中六爻。人人有用。聖賢有聖賢用。衆人有衆人用。君有君用。臣有臣用。無所不通。王昭素嘗爲宋太祖言之矣。講臣非有據。豈敢妄出意見。五年。廣東布政徐奇來朝。載領南土簞諸物。或得其目以進。上閱之。無士奇名。獨召問士奇。對曰。徐奇自科臣受命赴廣東。衆皆作詩文贈行。故有此餽。臣不與名者。以當時臣病未往贈也。今衆名雖具。而受否未可知。且其爲物微甚。常無他意。上遽命燬其目。是年陞諭德。六年冬。以巡狩北京。詔告天下。命士奇視草。既稱善。卽命與諸尙書皆觀。兵部尙書劉儻私謂士奇曰。請以有字易自字。衆謂二義不相遠。且上旣稱善。可勿易。士奇奏曰。國家大體。常用儻言。上喜曰。士奇能服善。則何有敗事。七年。車駕巡北京。命蹇義金忠黃淮與士奇專職輔導皇太子。春坊贊善王汝玉每以詩法進皇太子。士奇曰。詩以言志明良喜起之歌。南薰之詩。皆言志也。殿下明經講道之暇。若娛意文字。兩漢詔令皆可觀。非但文辭高古。亦可裨益治道。九年。上還南京。一日召士奇問曰。爾輔導宮日久。果何如。士奇對曰。殿下聰敏無比。上使言其實。曰。凡有事宗廟。祭器皆親閱。去年時享。頭風作。醫言當漢殿下。漢卽不敢蒞祭。左右請遣代。曰。上以命我。可遣代乎。遂親祭。祭畢。漢徧體疾遂愈。每進御用物。皆躬閱封識。而後遣行。不敢輕任下人。上曰。此子道當然。士奇曰。從古聖賢亦皆盡其當然者耳。且存心以愛人爲本。將來必不負陛下付託。上悅。十二年。正旦日食。上問諸臣。正旦日食。百官行賀與否。禮尙書呂震曰。日食與朝賀不同時。當賀。侍郎儀智曰。同日宜免賀。士奇曰。日食天變之大者。宋仁宗元旦日食。富弼請罷宴徹樂。呂夷簡不從。弼曰。萬一契丹行之。恐爲中國羞。後有自契丹還者。言虜是日罷宴。仁宗深

悔之上曰。君子愛人以德。士奇與智言是也。遂免賀及宴。十四年。上在北京。聞高煦有異志。還京欲發其事。獨召士奇問曰。昨問蹇義漢府事。義對曰不知。若朕未知。爾輩疑有離間不敢言。今既知矣。言之何害。耶士奇對曰。臣與義俱事東宮。故外人無敢與臣言者。但漢王始封國雲南不肯行。改青州又不肯行。今知將徙都北京。惟欲留守南京。天下皆疑其心。惟陛下善處父子兄弟間。全天恩爲永世利。上默然起還宮。後數日。悉得其反狀。及所爲戰具。大怒。褫其冠帶。繫之西華門內。以東宮力救得免。削其兩護衛。處之樂安州。曰。此去北京甚邇。卽其作禍。可朝發而夕擒也。是冬。周王楚王來朝。謁孝陵。上命皇太子太孫及諸皇孫陪謁。問翰林諸臣拜位。士奇對曰。二王尊屬。當分別在前。東宮稍後。居中。皇太孫又後。亦居中。諸皇孫與太孫同班。分別兩傍。上出所書位次。與士奇合。卽遣鴻臚官持赴陵。少頃復命。以宸翰上。上遂以與士奇寶藏之。皇太孫勤學好問。上命吏部翰林舉老成侍講讀。士奇蹇義同舉儀智。衆以爲老。士奇曰。儀智道理明。執守正。富今廷臣未見其比。上曰。智雖老。能直言不阿。向言元正日。食宜免賀。朕識之。二十二年八月。上北征崩。學士楊榮歸自行在。以聞。仁宗卽遣皇太孫往迎梓宮。時京兵皆隨征。城中空虛。慮趙府爲變。因秘不發喪。顧急未有所與。士奇言上所用東宮圖書。請暫假以行。上卽取付太孫。曰。有啓事。以此封識。此卽當歸汝。汝就留之。旣而謂士奇曰。卿言誠是。昔大行臨御。儲位久未定。浮議喧騰。吾今就以付之。浮議何由而興。且曰。朝廷事卿與蹇義當悉究心。吾當重用卿。士奇曰。此收人心之一機也。思之所及。必先扈從征行之臣。臣兩人不應先及。仁宗卽位。九月癸未。尙書呂震言於上曰。今喪服已踰二十

七日請如太祖做漢制易吉服。上未答。震退。徧語羣臣。易從吉。士奇謂震曰。今未可比此例。蓋洪武中有遺詔。且仁孝皇后崩。太宗皇帝仍素衣冠。絰帶者數月。今上於皇考。可遽卽吉乎。震厲聲曰。朝廷事爾。每執異。尙書蹇義兼取二說。羣臣皆素衣冠。黑角帶。遂以聞。上亦未答。明朝。上素冠麻衣。絰出視朝。文臣惟學士。武臣惟英公。如上所服。罷朝。上諭左右曰。梓宮在殯。吾豈忍易。士奇言是。自左春坊大學士進禮部侍郎。兼華蓋殿大學士。尋進少保。是時大理寺卿虞謙。上封事過激。上怒。降謙爲少卿。而以屬吏楊時習爲卿。士奇執不可。上從之。復其官。本年十二月。加少傅。進階榮祿大夫。時天下官皆來朝。兵尙書李慶言於上曰。民間馬畜已散。軍伍尙餘數千。請令朝覲官領之。少蘇民力。正官領牡馬。佐貳官領牝馬。太僕寺苑馬寺歲課其息。有虧。罰與民同。士奇執不可。慶忿不納。士奇奏曰。朝廷選賢授官。今乃使養馬。而課責與民同。豈貴賢賤畜之意乎。明日復奏曰。必行此令於天下。賢者誰復肯仕。蓋虧損一馬。則必賠償。破家產。累子孫。朝廷可負此名於天下後世乎。上許罷其事。已而不報。明日。士奇又奏曰。兵部已督朝覲官領馬。所領多駒。南人脆弱。不能控制。立視其奔逸。而號泣於道。臣恐將來遠慮者。非但不願仕。亦恐無志於學問矣。此令所失。非小。上曰。吾偶忘之。當卽批出。午刻。上御思善門。召士奇論曰。內批豈真忘之耶。聞李慶呂震輩皆忿卿。朕念爾孤立。恐爲衆所傷。不欲以卿言而罷耳。出一章。乃陝西按察使陳智言畜馬不便者。曰。卿等今可草敕止散馬也。士奇頓首曰。陛下知臣不孤矣。但已領者如何。上曰。已領者准洪武中官員乘例。不責生駒。虧損不責償。未給者止勿給。復謂士奇曰。繼今令有不便。惟密與朕言。李慶輩不

識大體不足語也。時上以梓宮在殯，新正朝儀不用樂，及鴻臚習儀，仍用之。士奇乞敕禮部設而不作，上是之。洪熙元年正月，兼禮部尚書，尋改兼兵部。士奇辭曰：「臣爲少傅，大學士已踰分，尚書一職，更不敢當。」上厲色曰：「黃淮金幼孜皆三職，卿獨二職，人將謂何？」士奇請辭俸，曰：「尚書月俸六十石，可養壯士六十人。」臣受二俸已過分，安敢復加尚書。義言宜聽辭，學士俸，士奇言辭祿當辭厚，何用取虛名？上曰：「朕成卿志，乃聽辭。」於是黃淮亦辭戶部尚書俸，上監國時，御史舒仲成嘗以事逆旨，後已陞爲湖廣按察副使矣。及卽位，尚書蹇義因以他事奏，仲成命都察院逮治。士奇疏曰：「向來小人得罪者多，陛下卽位，皆悉寬宥，令追理，仲成卽詔書不信。漢景帝爲太子，召衛綰不赴，卽位用綰，前史譴之，上喜，卽罷治仲成，賜士奇米及鈔幣，且降敕獎諭。」二月，賜士奇田二頃，士奇懇辭，上曰：「卿事朕表裏一誠，資益良多，卿前辭祿，今又辭田，何也？」士奇曰：「臣起自寒微，今受恩踰分，幸少延殘喘，得更事陛下二三年，獲全歸山林，受賜多矣。大理少卿弋謙數言事，廷臣交奏其賣直，士奇進曰：「古人有言，主聖則臣直，惟陛下容之，上猶不憚，因免謙朝。」士奇又進曰：「陛下有詔求言，言不當者不加罪，四方朝覲之臣咸在，豈能盡知謙過，第謂朝廷不能容直言耳。」上惕然曰：「朕非怒謙，乃其言自有過者，卿可以朕心諭之。」士奇曰：「臣言安足信，當以璽書開諭。」上遂命士奇書敕引過，而待謙如初，令百官言事，毋以謙爲戒。四月，蹇義夏原吉及奇侍，上問昨夜星變見否，對曰：「未見。」上慘然曰：「天命也。」歎息而起，又明召士奇及蹇義，諭曰：「朕監國二十年，讒慝交構，心之艱危，吾三人共之，賴皇考仁明得保全，言已泣。」二臣亦流涕慰上，上曰：「卽不幸，後誰復知吾三人同心一誠也。」特

賜士奇璽書其略曰朕膺監國之命而卿侍左右屢歷艱虞曾不易志及朕嗣位嘉謨嘉猷入告於內明予于治茲以己意創製楊貞一印一枚用藏於家傳之後世惟卿子孫由是知卿克致顯榮不易惟艱共思保守惟朕子孫亦由是知卿弼朕之功以保全爾子孫與國咸休永世無斁上嘗論科舉須兼取南北士但北人學問不逮南人士奇曰長材大器多出北方豈但南人有文可用今試卷例絨姓名請外書南北二字南十六北十四則南北人材皆就用矣宣德元年漢庶人高煦反上親征擒庶人尙書陳山迎見請移師彰德襲趙王上問楊榮榮亦力贊上又問蹇義夏原吉二人依違而已榮隨傳旨令士奇草敕士奇曰事常有實今以何爲辭榮曰今逆黨已言實與趙謀何謂無辭士奇曰如此能服人乎乃往見義原吉言不可狀義原吉曰上特信榮言不係吾輩可否乃往見榮曰太宗皇帝惟三子今上惟二叔其有罪者不可恕無罪者當加厚庶幾仰慰皇祖之靈榮曰汝不草敕吾當以聞俄復召義原吉二人乃以士奇言白上上不懌而止而言者不止乃特召士奇曰論趙事者日益衆如何對曰今日宗室惟趙與陛下最親上曰吾固念之欲封羣言以示令自處士奇曰善須更得一璽書於是趙王得書喜曰吾生矣卽獻護衛上表謝恩而言者頓息上召士奇曰吾與趙不失親親者爾之力賜白金文綺楮幣二年十月黎利反矯陳氏有嫡孫嵩爲表乞立上密示張輔輔曰此黎利譎詞當發兵誅討示蹇義等皆曰利不可信與之無名徒示弱明日召士奇與榮榮曰永樂中費數十萬人命得此至今勞者未息困者未蘇因其請而與之便士奇曰榮言是也太宗初心本欲求立陳氏後求之未得乃郡縣其地數年來兵民困於交趾極矣

此皆祖宗之赤子。體祖宗之初心。保祖宗之赤子。正陛下盛德。何謂無名。漢棄珠崖。前史以爲美。何爲示弱。臣侍仁廟久。聖心每憾此事。恐有意外虞。願陛下勿疑。上意遂決。六年秋。上頗微行。夜半從四騎。至士奇家。比出迎。上已入門。立庭中。士奇悚懼伏地。言陛下奈何。以宗廟社稷之身。自輕擾擾塵埃。昏昧中上。笑曰。思一見卿談。夜闌乃還。明旦遣太監弘問曷不謝。對曰。至尊夜出。愚臣追今。中心慄慄未已。豈敢言謝。又數日。遣弘問堯不微行乎。對曰。陛下恩澤。豈能徧洽幽隱。萬一有冤夫怨卒。窺伺竊發。誠不可無慮。後旬餘。錦衣獲二盜。嘗殺人。捕急。遂私約候駕之玉泉寺。挾弓矢伏道傍。林莽中作亂。捕盜校尉變服如盜。入盜羣。盜不疑。以謀告。遂爲所獲。上歎曰。士奇言不虛。遣弘賜金綺。七年二月。士奇言方面及郡守。請令京官三品以上。及布政按察使。用犯贓連坐。凡因保舉授官。而有指告其罪者。先逮問餘人有驗。然後及之。庶不爲小人所誣。英宗卽位。加少師。特進光祿大夫柱國。時有言方面官及府州縣正官。專用保舉。爲恩出於下。欲如洪武永樂故事。第令吏部選除。士奇奏曰。宣德七年以前。藩憲二司及府州縣正官。多不得人。百姓受害。是以宣宗敕令大臣舉保。自茲以後。多稱得人。間有一二菲才。蓋緣舉主一時審察不至。亦或實是徇私。所司不行糾舉故耳。且宣宗臨御之時。體祖宗之心。以行仁民之政者尙多。保官乃第一事。當時不聞人有異議。多以得人爲喜。今乃以爲不美耶。唐太宗命在京三品以上官。舉郡守縣令。後來至天下斗米三錢。今謂保官恩出於下。夫衆臣舉保。吏部審實。具名奏請。聖意允俞。然後授官。不允卽不得除授。恩豈出下。近年有等京官。無人舉保。造爲謗語。專欲墮壞先帝良法。使小人皆得進用。伏望聖

斷只依先帝敕旨施行。但所舉之人，後有犯贓，必須明正舉主之罪。則人知警畏，不敢濫舉。官必得人，臣受四朝大恩，慚無寸補。惟念用人賢否，國家治亂所關。是以竭誠盡言。詔如士奇議。六年，麓川反，太監王振主征討，命王驥爲總督，而以刑部郎中楊甯參軍事。士奇以爲不可，贈詩有征夷勿遠圖之句。其後師雖有功，實爲南方大病。八年，士奇子稷坐事逮繫，給事中廖莊等御史陳員帽等劾士奇不能教于齊家，何以服人事上。士奇疏乞致仕，上優旨留之。九年，服賜璽書曰：卿歷事祖宗，實惟簡在。暨朕繼統，啓沃彌贊，厥勞尤多。卿子既乖家訓，干國紀，朕不敢私卿，其以禮自處，以副倚畀。士奇感泣積憂，遂不起。卒年八十。贈太師，諡文貞。仁宗嘗幸文淵閣，問今之山林有知名士否，對曰：東吳有陳繼，善爲文。仁宗召至，吏部擬授國子監博士。上曰：此當在禁庭，乃改翰林五經博士。繼字嗣初，公初未相識。因夏原吉治水蘇州，得繼文以歸，偶見之，故薦焉。又士奇偶見屈昉詩，一日崑山知縣羅永年以事入京，士奇問崑山有屈昉，永年茫然，漸報而退。未幾有詔舉明經修行之士，士奇以昉應詔。除南海縣丞，其留心人才如此。又國初諸司皂隸主驕從，宣德間始有納銀免役者。因士奇言京官祿薄，改名曰柴薪銀。天順以來，始以官品隆卑定立名數。每歲銀解部以巨萬計。京諸司則皆出畿內，并山東、山西、河南州縣。南京諸司則皆出南畿州縣。宣宗嘗奉太皇太后謁陵，士奇蹇義、楊榮等皆從。士奇等進見，勞問慰勉，加以厚賜。既數日，上諭士奇曰：太皇太后爲朕言，皇考往在宮中，談卿等姓名及行事甚熟，其間才學優劣，孰肯任事，不任事，皆有評議。言蹇重厚小心，但多思少斷。卿能持正言，不避注意。方議事時，先帝本不從卿，然卒從卿，始不敗事。士

奇對曰。此太皇太后之盛德。仁宗皇帝之盛德。願陛下常奉聖訓。太皇太后大漸。召士奇等至榻前。問朝廷尙有何事未辦者。士奇首對三事。其一建庶人。曾臨御四年。當命史官修其實錄。仍用建文年號。太后曰。歷日已革除。豈可復用。對曰。歷行一時。史信於萬世。豈可蒙洪武之年。以亂實。后頷之。其二。后亦首肯。其三。方孝孺已誅。太宗詔收其片言一字者論死。乞弛其禁。凡文辭不係國事者。聽令存而傳之。嘗疏乞極刑之家。有賢子弟勿棄。宣宗曰。劉翀亦極刑家。今不在近侍乎。遂弛其禁。又宣德中。上謂朝臣貪濁。奈何。士奇對曰。貪風始自永樂末年。上問何故。對曰。永樂中。太宗數疾不視朝。扈從之臣。請託賄賂。公行無忌耳。問今日誰最貪。對曰。莫甚劉觀。上撫掌歎曰。除惡務本。觀去誰可代。於是乃以顧佐代觀。又英宗嘗立文華殿。召士奇。屏左右。言張瑛嘗謂榮畜馬甚富。今察之。皆邊將饋榮者。士奇對曰。榮屢從太宗北征。典兵馬。以故得接諸將。今內閣臣知邊將才否。阨塞險易遠近。及虜情順逆。惟榮耳。臣等皆遠不及。上笑曰。朕初卽位。榮數短卿。而非義原吉。卿願爲榮地耶。上奇頓首曰。願陛下以曲容臣者容榮。又云。裕陵卽位冲年。高皇后臨朝。獨委任士奇。嘗乞屯田以省漕運。獨通慎獄。作養士民。嚴覈百姓。推薦才傑。公卿藩臬。頗稱得人。上又高拱九重。不事巡幸。南北供億。十減三四。閣瑾上畏母后。下憚士奇。猶自斂戢。七年。昭皇后崩。又明年。士奇卒。振乃大肆。士奇預修四朝實錄。太祖實錄凡三修。初建文時。王景總裁。永樂初。解縉總裁。再修則士奇總裁。人謂寢失其真。言壬午事多謬。所著有沙漠臺石臺臺文籍志。法書志。東里集。三朝聖諭錄。人稱爲西楊。又曰東里先生。

楊榮字勉仁。初名子榮。建安人。領福建鄉薦。解額。建文二年庚辰進士。高等。授翰林編修。太祖卽位。上爲更名榮。簡入內閣。初入閣之臣七人。惟榮最少。最警敏。一日晚。甯夏報被圍。上急召解縉等六人皆已出。惟榮在上。示以奏報。曰。爾後進。甯解此。今當何處兵往救。遣榮曰。不須救。臣嘗奉使至彼。彼城堅。人皆習戰。今其已發十餘日。敵必退矣。但敕守臣固守。及鄰近諸堡隄備。夜半報至。敵圍解。詰旦。上以報示榮曰。何料之審也。進修撰。陞侍講。永樂二年。七人侍。上勞曰。天下事。朕與若等相商確。非若六卿分理。並賜三品服。皇太子立。陞右諭德。仍兼侍講。四年疾。上命御醫守視。時時報。瘳乃已。五年丁亥夏。奉甘肅規畫軍務歸。奏對盛暑。上取瓜親割賜榮。六年外艱起復。明年內艱。會上北巡。又起復。留扈從。賜錦衣狐裘鞍馬。甘肅總兵官何福言虜脫脫不花王來歸。榮復至甘肅受降。還復命。又持節詣亦集乃軍中。封何福爲甯遠侯。又往甯夏。與甯陽伯陳懋規畫邊務。還復命。陳邊境便宜十事。上皆嘉納。八年庚寅二月。從征北敵。壬戌。上度野狐嶺。召胡廣及榮指示山川形勢。各於馬上賦詩。榮有聖主尊居四海安天教。戎敵自相殘之句。未幾。諜知敵情。本雅失理。與其下阿魯台讎殺。東西奔遁。亟召榮諭曰。敵自相殘。前詩果讖矣。三月。駕發凌霄峯。榮與胡廣金幼孜金純四人失道。太宗命中官率兵士追尋得之。時已夜。中官馳去。榮等復迷入窮谷。幼孜墜馬。胡廣金純不顧去。榮下馬爲幼孜整鞍轡。不數武復墜。鞍裂。榮以所乘馬讓之。而自乘驢馬。從夜至旦。登高涉險。至午方詣軍中。太宗見之大喜。笑語幼孜曰。此中狼多。汝非楊榮。殆將不免。五月。駕至驢駒河。賜名飲馬河。上親選勇士三百護衛。以榮領之。班師。軍士食乏。榮言宜召乏食者。卽日

赴中軍。以御前所儲散給。并下令。凡軍士糧多者許假貸。回京。官倍償。軍得飽食。秋七月。至開平。召榮還。南京計事。事竣還京。冬十月。扈駕南旋。上賜鞍馬。錦衣路費。九年辛卯。乞奔母喪。賜金幣。六月還。詔復其家。命侍諸皇孫讀書。文華後殿。十年壬辰。冬十一月。甘肅守臣宋琥言。老的罕等叛。數入赤斤蒙古爲邊患。上以榮曉暢軍旅。命至陝西。會豐城侯李彬議進兵方略。還具言。出嘉峪關。千里險阨。乏水草。餉道弗能通。又沔寒。士馬疲瘠。不足以勤大軍。罷中國。彼小醜當自來歸。上從之。未幾。叛者皆附。十一年。從幸北京。明年甲午。三月。扈征瓦剌。時皇太孫侍行。上謂榮曰。朕長孫聰明英勇。今令從行。俾知用兵之法。且使躬歷行陣。知將士勞苦。命榮兼掌號令宣傳之事。敕旨旗牌。不得榮奏。允不發。乙卯。師次大石鎮。上坐御幄。召問足食足兵之策。榮對。宜擇將帥。力屯田。將得人。則軍士弗擾。軍士安。則耕不違時。不患兵食不足。秋八月。還北京。賜鈔幣。十三年乙未。命榮督修性理大全成。宴禮部。賞賚有加。十四年。陞學士。庶子。冬。扈駕南還。十五年三月。復從幸北京。屢召問民情。賜鈔幣文綺。十六年。掌翰林院。上眷注益隆。諸臣多忌之。屬北京缺祭酒。衆薦榮。上曰。榮可。但求可代榮者。於是衆意銷阻。十七年。進言十事。皆指斥五府三法司積弊。上覽而喜曰。實切時病。但汝爲心腹臣。言之則羣臣益猜疑忌。當使御史言之。御史鄧真上之。上飭諸司校改。十八年。陞文淵閣大學士。兼學士。十九年四月庚子夜。三殿災。火勢烈。切近密閣。榮奮身直入。麾衛士三百人。將御書圖籍文書。畀之東華門河次。上嘉之。賜銀盃酒古銅器各一。鈔千錠。時侍讀李時勉等爲飛語所中。上大怒。榮力救得免。是冬。兵尙書方賓得罪死。逮夏原吉等皆下獄。呂震侍左右。言夏

原吉儉邪諛罔上益怒榮極言其無他上釋不問二十年三月從征沙漠秋還京九月宴隨征者榮坐前列賜鈔幣及二品金織襲衣冬又將西征或以建文中江西聚集民兵與饒連丁夫十餘萬可徵發榮曰此兵夫昔有詔令復業且二十年復徵非信動衆非仁料兵非勇上笑曰善二十一年秋從西征八月駐宣府軍務一切悉付榮晝夜或三五接或宣詔但稱楊學士而不名冬十月次天成甯陽侯陳懋奏番王也先士干納款衆疑懼莫敢定議榮親往受降二十二年甲辰三月復從北征五月榮言軍士疲甚宜遣使諭敵釋其不順之罪請班師時巡按浙江御史王復奏處州山寇反請發兵誅捕上問榮榮對曰愚民爲有司所苦艱衣食不得已嘯聚勦則毒民宜遣使撫諭當遂散旣而撫之皆順服七月丁亥上坐翠微岡帳殿諭榮以傳位太子之意榮曰太子仁孝天下歸心必不負上託辛卯次榆木川上不豫召榮等受遺命遂崩時皇太子在南京衆倉卒莫知所措榮謂太監馬雲等曰六師去京尚遠不宜發喪所至宜上食如常儀時議有假他事作敕用寶馳報者榮曰先帝在稱敕今稱敕是詐也罪孰當之榮乃先馳計皇太子八月至北京致遺命仁宗卽位陞大常卿仍兼前二職九月加太子少傅兼謹身鎮大學士錫銀印一其文曰繩愆糾繆且諭榮曰卿國家舊臣祇事先帝二十餘年又輔朕東宮今嗣位須協心匡輔或政務缺失朕弗聽言則用此印密疏以聞至於再三慎毋憚煩加工部尙書仍兼二職洪熙元年五月詔修太宗實錄榮爲總裁辛巳仁宗崩升遐時皇太子守南京中外洶洶榮急迎太子入卽位是爲宣宗益推心委任修仁宗實錄榮復爲總裁宣德九年八月漢庶人反皇太后召榮計榮力贊親征曰彼謂陛下新

立必不自行。故敢爾。若出其不意。以天威臨之。事無不濟。臣請先行。皇太后壯之。與上從其計。榮卽起行。晝夜疾馳。至卽合圍。督軍士築土山。山成而大駕至。庶人出降。事平。賜鞍馬白金鈔幣。交趾黎利以立陳氏爲名。據地反。大臣皆言發兵滅此賊。榮及楊士奇請乘交趾界陳氏。是年秋。從上出喜峯塞。召榮問曰。人君馭世之權。孰重。對曰。命德討罪。上曰。然。二者天下公器。舜舉十六相。誅四凶。而天下服。以天下之好惡爲好惡也。齊威王烹阿。封卽墨大夫。不以左右之好惡爲好惡也。人君賞罪。至公無私。然後能服天下。榮頓首稱善。曰。願陛下勿忘今日之言。還進少傅。賜範銀圖書五。其文曰。方直剛正。忠孝流芳。關西後裔。建安楊榮。楊氏勉仁。十一月己未。皇太子生。上親酌酒賜榮。并賜白金鈔幣及金酒器。十二月。召至東苑。詢訪政務。三年元霄節。賜文武大臣觀燈於萬壽山。榮進元霄賦。二月。命榮同蹇義等十八人。至入內苑。登山泛舟。上乘馬。至召士奇與榮。詢問民情甚悉。賜酒。八月。扈駕巡邊。給內廐良馬。班師。榮進平胡頌十篇。五年。兩朝實錄成。賜白金綵幣羅衣鞍馬。宴於中府。二月。上奉皇太后謁陵。召見榮等五人於行殿。諭之曰。皇帝數言卿等忠勤。今天下清寧。民生無事。皆卿等贊翼之功。丙申。上親賜宴於文華殿。八年。少傅滿三載。賜宴禮部。九年。扈駕巡邊。給天閑名馬。英宗卽位。命榮視山陵。秋九月。修宣宗實錄。充總裁。正統元年。少傅滿六載。進光祿大夫柱國。宣宗實錄成。加少師。五年。從耕籍田。禮成。請告展墓。詔許之。命內侍伴行。力疾就道。次杭州。卒於武林驛。年七十。計聞。上慟悼輟朝。贈特進光祿大夫左國太師。諡文敏。遣禮部尙書胡深等諭祭。仍命中官護喪歸里。工部營葬。予世指揮使。先是都御史盧睿在邊。以敵使入境。節

捐供給爲中官所毀。下獄。或謂盧本爲公家。榮曰。事固有輕重。使吝其小費。而遠患或生。則所費益不資矣。此不可不知。太宗英武。羣臣奏對。少能稱旨。惟愛榮。自編修入閣。未嘗一日離左右。或值上不樂。至怒。榮至輒霽威。事亦隨決。有濟人利物之仁。榮從不卻人之餽。凡人有餽。必先詢訪其人之貧富。若貧則酬以別物。如所餽焉。榮總裁四朝實錄。經理三帝山陵。累從出塞。屢受遺音。撫順討逆。羈勒萬里。運籌設險。折獄理財。隨機應變。靖重不撓。濟險解紛。調停有術。果而能容。謀而善斷。內行修謹。胸度圓融。祿厚財豐。瞻賑窮阨。貴賤賢愚。皆歸心焉。所著有北征記。默庵退思二集。靜軒雲山二藎。訓子編。兩京類藁。

史官曰。宋儒有言。德勝才謂之君子。才勝德謂之小人。信斯言也。豈得謂之才哉。夫國家多難。羽檄旁午。匪才弗達。上下多危。蕭牆交構。匪才弗定。強敵窺伺。內猜外疑。匪才弗靖。姦雄僭竊。彼甲此乙。匪才弗協。是故陳平燕居深念。張良借箸前籌。才矣而謂之小人可乎。或謂士奇正而不譎。榮譎而不正。烏乎可。

楊溥。字弘濟。石首人。建文二年進士。爲翰林編修。太宗卽位。侍東宮。爲洗馬。兼編修。皇太子觀漢書。稱張釋之對曰。釋之誠賢。非文帝寬仁。亦未得行其志。思采文帝事。編類以獻。皇太子大悅。時漢王巧中東宮。宮寮多得罪。永樂十二年。東宮遣使迎上。遲。上怒。黃淮先至。下獄。楊士奇金問繼至。上曰。且有士奇。問何人。乃得侍太子。下法司訊。詞連溥及芮善。王豈遂與工部侍郎陳壽俱下詔獄。溥在獄中。勵志讀書。不輟。獄中人止之曰。命且叵測。無徒勞苦爲。應曰。朝聞道。夕可死。奈何。輒自乘經史。諸子讀數周。太宗崩。仁宗立。釋夏原吉。並釋溥。溥出獄。哭太宗。伏地不能起。上亦哭。陞翰林學士。宣德元年。陞太常卿。兼學士。入內

閣是年仁宗崩。先是仁宗欲近寵之。建弘文閣。思善門左。命溥掌閣事。又選侍講王龜侍直。改博士陳繼學錄。楊敬爲編修。訓導何澄爲給事中。輪對。上手弘文閣印授之。曰。朕用卿左右。非止助益學問。亦欲廣知民事。爲理道助。卽有建白。封識以進。溥嘗密疏言事。上褒答。至是。上還弘文閣印。宣德元年。上召與語。次及治兵。溥曰。兵貴訓練。有方。撫養得宜。上曰。養之厚。則得其心。練之精。則得其用。若素不訓練。一旦驅之矢石間。進退失措。安望有濟。三年。扈上出喜峯口。征敵。四年。上坐齋宮。召諭曰。朕每念創業難。守成不易。夙夜惓惓。今幸百姓稍安。願禍亂生於不虞。嘗爲憂惕。邇來羣臣好進諛詞。令人厭聞。卿宜勉輔朕。溥頓首謝。臣不敢忘報稱。上曰。直箴朕過。報朕多矣。溥又頓首謝。曰。直言求之非難。受之爲難。上曰。然是年秋內艱。遣中官護行。賜葬母一品夫人禮。遂召復入弘文閣。是冬。從巡塞上。度雞鳴山。六年冬。上坐文華殿。三楊並侍。上諭曰。朕念祖宗積德累善。篤生太祖。繼天立極。創業垂統。太宗迅掃姦回。再安宗社。皇考恢弘治化。增高累厚。以固鴻業。朕承天位。夙夜不忘。記曰。先祖有美而不知。不明。知而不傳。不仁。是用撰述成詩。揭之座上。朝夕覽觀。勉圖繼述。庶幾永保天命。今以刻本賜卿等。當亦思祖宗開創之難。守成不易。盡心輔朕。國家安。卿等亦與有榮焉。尋陞禮部尙書兼學士。英宗卽位。昭皇后宮內助理。溥復入內閣。首言聖帝明王莫不務學。先帝在時。屢諭臣等勸學東宮。遣音尙在。靈鑒如臨。皇上肇登寶位。必明堯舜之道。以圖唐虞之治。乞早開經筵。預擇講官。必得學識方正。言行端謹。老成厚重。達大體者數人。以共其職。及選宮中左右朝夕侍從之人。亟養本源。輔成德性。昭皇后喜。一日。后坐便殿。上西面立。后傍。召三楊

及英國公輔尙書濬。諭曰：卿等老臣，嗣君冲年，幸并力同心，共安社稷。又召溥前，諭曰：先帝每念卿忠，屢形愁歎，不謂今日復得見卿。溥伏地泣。昭皇后亦泣。左右皆悲愴。先是永樂中，太宗時巡北京，太子居守，以讒故，宮寮大臣輒下詔獄。陳壽解縉馬京，徐善述王汝玉，梁潛周冕，相繼死獄中。溥及黃淮一繫十年，瀕死者數矣。仁宗每與后言及東宮時事，慘然泣下。以故昭皇后爲言，后又顧上曰：此五臣三朝簡任，俾輔後人，皇帝萬機，宜與五臣共計。正統四年，宣宗實錄成，進少保，兼武英殿大學士。溥夙稟淳實，操性直剛，不尙機警，每崇忠厚，至議政決疑，與諸大臣爭可否，或有躁心浮氣，能舍己從人，略無係吝時候。三楊學士文貞爲西楊，文敏東楊，溥南楊。正統五年，楊榮卒，又明年，昭皇后崩，又明年，楊士奇卒。十一年，溥卒，而王振肆，十四年，遂有土木之禍。卒年七十五，贈太師，諡文定。

史官曰：楊士奇，玉質金相，通達國體，隨事納約，不詭於正，而意嘗近厚。轉導監國，保身濟主，有大雅之明哲焉。楊榮，揮斤游刃，遇事立斷，蚤遇英主，相得益章，累從出塞，羈勒萬里，文經武緯，俱展其長者也。楊溥，安貞履節，中更險難，遲二楊者二十餘年，更入弘文，昭后臨朝，與民休息，調羹釀醴，參合成名，故天下俱稱其美矣。

范理傳

范理，天台人，性安義，自守。登宣德庚戌進士，授知江陵縣。時楊溥在內閣，其子自石首入京，因述所過州縣，迎送餽遺之勤，獨理不爲禮，以告父。溥因而奇之。後廉其能，卽薦知德安州。其爲縣才八月而已。後尋

薦陞貴州布政使。所至多惠政。或勸宜致書謝。理曰。爲朝廷用人。非私於理。及溥卒。理乃祭而哭之。以謝知己。後仕至吏部郎。

史官曰。宰相以得士爲功。士以守己爲正。溥之待理。與理之自處。可謂兩盡之矣。世道下衰。好進之徒。且無因而登宰相之門者。又有朝薦一人。夕不登禮。卽以爲薄。而後中傷之。吁。讀此。其可愧感乎。





明書卷一百二十一

列傳四

名臣傳六

呂原傳

呂原字逢原。秀水人。正統七年進士。性質樸渾厚。貌容端偉。未冠已讀書博洽。能出入經史。父景州學官。歿不能歸喪。或勸之火葬。原痛哭不肯從。權厝景州。時時至墓痛哭。景人及道旁行聞者皆酸慟。已而躬掖母南歸。家甚貧。攻苦力學。知府黃懋閱秀水學官文。奇。學官對曰。此邑里中呂生文也。呂生貧不能補弟子員。學官致家熟教諸子。懋輒歎郡中乃有文士如呂生。遺草萊中者。急召之見。原入見。衣藍縷甚。試以舉業文。詞理皆勝。問以經書。輒能默誦。懋益驚異。與之新衣。謝不受。會理葺爨舍。與之諸徐材木。又謝不受。懋曰。生家貧。粥此且得善價。又謝不受。懋益大奇原。當是時。太守得輒補學諸生。懋卽補原入學。是秋舉浙江鄉試第一。明年進士及第。第二人。授編修。時選翰林講讀官。裴綸。杜甯。謝璉。王玉。江淵。陳文。李紹。商輅。劉俊。及原十人。習制誥於東閣。十四年罷。景泰中。倪謙及原。初教小豎黃賜等書於文華東廡。上一日至廡中。命謙講詩國風。原講書堯典。上悅。問二人官。謙對臣左中允兼侍講。原對臣右中允兼侍講。

上又問中允講讀官品。二人對曰：皆正六品。上曰：品同安得相兼？令左右取官制再三覽。顧二人曰：進汝二人講讀學士兼中允，二人頓首謝。他日上再至，二人遷坐旁壁下。上曰：何跼蹐乃爾？二人頓首對君父當臨坐，臣子避不敢當。上喜，二人敬愼。後至館，輒立語，或東西行，不復坐。天順中，改通政司右參議，兼侍講如故。入內閣預機務，尋陞翰林學士。曹石寵用事，知敬原。原朝會青衣袍，享笑曰：行爲先生易緋，原不答。未幾，岳正暨原列上曹石罪狀。上留中不發。曹石微覺上意，大恐，遂共謀摘承天門災詔中語，謂內閣臣訕上。上大怒，坐便殿，召對近臣，厲聲正大膽，固敢爾。原素謹厚，左右正何也？正去，原得留。原與李賢同在內閣，賢通達，見事立斷。原守正謹恪，稍濟之持重。修大明一統志，充總裁。母憂去。道景州，啓父窆歸合葬。或以陰陽五行家說沮之，不聽。奉載舟中，寢苦枕塊，極哀毀如初喪。竟病抵家，尋卒。贈禮部左侍郎。諡文懿。原任內閣六年，端潔不苟，取子性儉約，身無執綺，篋中惟賜衣，輒分祿贍宗姻貧匱者。清心寡慾，稠第無隱過。至老勤學，晨夕不少輟。子蠶廢試中書舍人，舉順天鄉試。歷官南太常卿，有學行。

史官曰：闕

劉儼傳

劉儼，字宣化，吉水人。正統七年進士第一人。除翰林修撰。憲宗在東宮，儼爲左春坊大學士，充國史副總裁。陸太常少卿兼侍讀學士。景泰七年，考順天鄉試。內閣陳循王文有子試，屬儼，儼不爲地，皆不得舉。二人令其子錄試文，訟其閱文不明。取士徇私，會謂官劉瀆卷。注翰林考中，送入貢院。比書榜，竟落瀆名。二

人因勅違制并摘命題雖欲自絕語請如洪武中劉三吾等例坐罪重開科試士上命高穀覆試穀力言二臣之子文亦可觀故鮮有定額儼等無罪上重違二人意令順天府准其子會試王文復疏辯上不喜曰敢再言者以大臣壇法□乃已先是廬陵羅崇獄舉順天第一以詭籍斥還縣學時人爲之語曰榜有姓名還是學生榜無名氏京闈貢士明年英宗復位二人得罪其子竟不得試禮部儼尋卒贈禮部左侍郎諡文介儼學有沈潛文無險塞取予明潔而剛直之氣百折不回人稱爲鐵漢

史官曰

李時勉陳敬宗孫鼎魏驥陳選謝鐸

附夏寅張悅魯鐸傳

李時勉名懋以字行號古廉先金陵人徙居安福永樂二年進士公少有大志甫成童每自勵曰顏曾希聖四勿三省選入翰林爲庶吉士預修太祖實錄憂去服闋授刑部主事召入修書書成進翰林侍讀十九年三殿災求直言條上十五事未幾讒搆下獄二十一年出獄復其官仁宗卽位時勉有疏諫疏留中不知所指云何上怒縛至便殿命力士捶十八瓜折其觔幾死明日改監察御史又明日下午詔獄宣德九年十月上恨時勉言懋觸仁考怒令縛時勉來朕而鞠必殺時勉已又令王指揮縛時勉斬西市王指揮出端西旁門時勉已爲先輩使者縛入端東旁門門中相左王指揮至獄知其入亟走還縛送西寺然已得見上顧憐時勉忠臣能直言立脫其桎梏復其官預修兩朝實錄陞侍讀學士正統三年進學士尋陞國子祭酒是時祭酒缺楊士奇歎祭酒難其人時勉曰豈遂乏人耶程信在旁言無過公者時勉不悅竟

以爲祭酒。初時勉與陳敬宗在翰林。袁忠徹、曳二人並列。曰：二公他日功名相埒。陳儀觀魁梧。時勉貌少寢。聞者未信。後二人皆至祭酒。陳方嚴肅。下時勉平恕得士。並著聲太學。時勉每崇廉恥。抑奔競。別賢否。示勸懲。變士習。諸生貧不能婚。病不能醫。死不能喪者。節縮餐錢。力爲贍給。督諸生讀書。寢興有常。燈光達旦。書聲不絕。恩義浹洽。不啻父子。王振惡其守正不阿。事搆之。荷校國學門。諸生石大用上章。願以身代。號哭奔走闕下。請赦時勉者數千人。以故得解。尋乞致仕去。諸生走涕泣送。觀者塞途。商賈爲罷市。又明年聞北狩信。北面頓首號慟。上疏言選將練兵。迎還車駕數事。景泰元年卒。年七十七。諡文毅。成化中。贈禮部侍郎。改諡忠文。

陳敬宗。字光世。慈溪人。永樂二年進士。時選庶吉士七十餘人。再選留。曾棨及敬宗等二十八人。讀書文淵閣。上時臨試。勗其文行。預修永樂大典成。授刑部主事。永樂十二年。預修五經四書性理大全。入史館。預重修太祖實錄成。改翰林侍講。獻北京賦。平胡頌。及爲善陰罵頌。十七年春。卿雲見。甘露降。獻聖德瑞應頌。是冬。甘露再降於孝陵。松柏復獻頌。又獻龍馬麒麟獅子驕虞賦。內艱去。宣德改元起復。修兩朝實錄。未及成。轉南京國子司業。秩滿陞祭酒。敬宗美鬚髯。容儀端整。步履有定。則久居太學。力以師道自任。嚴立教條。痛革舊習。日勵諸生進學成德。是時。睿宗之政。肅於朝廷。因以是得名。亦以是致怨。僚屬生徒。懷忿。訟之法司。語逮理。周忱曰：盍疏申雪。卽爲屬草。不果上。事亦白。時關中楊鼎發解。試禮部下第。疏乞入南監。從敬宗學。上從。鼎至監。清苦力學。後舉禮部亦第一。廷試第二。仕至戶部尙書。敬宗善飲。飲襄城。

伯李隆所隆知重敬宗寶能輒留再飲飲酪酌言貌儼然若未嘗飲者一夕飲過劇兀坐喧頽中人伺敬宗見其拳握最謹其矜嚴如此敬宗剛正介潔不見喜愠官太學二十餘年諸生多位至卿貳敬宗獨久不調時北監祭酒李時勉約束諸生身教亦嚴世稱南陳北李景泰元年引年與魏驥同致仕敬宗德望文章名聞朝野既退家居不輕出入別號澹庵居士至是又號休樂老人云有詩文十八卷曰澹庵居士集天順三年卒年八十三

孫鼎字宜鉉廬陵人永樂間以鄉舉歷江浦松江學博士甚得士心彬彬多興起者楊溥薦爲監察御史督南畿學政鼎教一以德行爲先而文義次之學置本源錄錄諸生善行以身爲率不事譏防行部令勿先之從單輿猝至諸生集輒閉門面試一文隨閱隨定畢便開門呼名而出案牘隨之先後允愜私囑者無所措手常見庭橘方熟命左右摘嘗因公畀諸生同啗之一生獨取其二鼎問之以奉親對鼎大賞倍遺之時應天苦旱饑甚奏免其租什七賑濟萬三千餘石賴以全活者甚衆景泰元年庚午秋試時英宗北狩鼎小試罷謂諸生曰諸君從有司試當饗花燕饒今日爲臣子枕戈之秋老夫不敢陷諸君於不義乃與飲茶今從中道行自步送出門旣而詣闕上疏請隨所用以效死不報乃自矢於文信公祠去葢所部道遇尙書金濂慷慨對泣有萬里丹衷扶日月兩人清淚對山河之句其忠憤如此庚午敕封其父母得告歸省父聞恩命至擁騎郊迎鼎塗行控御甚虔觀者榮之明年還朝念親老請致仕歸後祭酒司業缺當道屢薦不起郡守金陵張宣疏鼎孝追曾閔學踵程朱宜起居論思之職名卿大夫過其鄉者必禮

於其廬。鄉人子弟考德問業無虛日。守若令以下。時從乞言焉。居六年。爲天順元年十月朔卒。年六十六。魏驥。字仲房。蕭山人。永樂三年鄉舉。明年爲松江府學訓導。諸生讀書學宮。或夜攜茶粥勞問。諸生益感。激自奮。滿九載。諸生楊珙等詣闕乞留。景帝監國。令還任。復教三年。十七年。師遠薦陞太常博士。宣德初。陞行在考功員外郎。轉南京太常少卿。三年。召試行在吏部侍郎。踰年爲真。八年。老辭。調禮部。又辭。調南京吏部。正統十三年。陞尙書。景泰元年。年七十七。致仕。公嘗至京師。大學士陳循驥所取士。謁驥曰。先生雖位冢宰。未嘗得立朝。願少待。驥曰。君爲輔臣。宜爲天下進賢才。不得私一座主。英宗復位。進榮祿大夫。居家二十年。布袍糲食。簡約廉勤。性好吟咏。矢口適情。自有雋味。老年事其兄教諭。愈恭謹。成化間。監察御史梁昉疏。有德有壽。請如漢故事。優禮。時遣行人存問。賜羊酒。有司加粢。月三石。驥病。遺書子完。勿擾鄉里。營墳墓。已有司得請。如例葬祭。完以遺言力辭。驥身不勝衣。言不出口。清德雅望。海內達尊。卒年九十八。諡文靖。

陳選。字士賢。浙江臨海人。父員。縉。景泰間爲福建右布政使。選自幼端慤寡言。潛心理義。銳然以聖賢可學而至。悟克己求仁爲進修之要。因號克庵。凡古格言。多手錄不倦。舉順天鄉試。庚辰會試第一人。登進士高等。授監察御史。貌古而粹。接應人言。若不出諸口。其執法也。正色直言。不忌權貴。憲宗卽位。首疏論君子小人進退。治道所係。不可不慎。言甚剴切。時學士倪謙錢溥嘗教中官書。時欲授幸闈柄。用選力擊之。遂得不進。修撰羅倫以論大學士李賢奪情起復謫官。選抗疏直之。不報。出按江西。貪殘吏望風解綬。

人稱名御史。風紀大振。布按長貳謁。每易素服入。選曰。此非憲綱體也。人臣覲君。服必視其品。顯獨殺於御史前乎。未幾。督學南畿。時念學者不修實行。而競爲浮詞。取科第。力欲變其故習。校士一以德性爲本。試卷。明列諸生姓名。不彌封。曰。吾且不信。何以信於人。修古禮儀。令諸生以時肄之。每按部。就止學宮。徐行密觀。周旋磐折。絃歌蓬豆。古風郁然。前後三載。變色之言。不施於衿珮。而成就興起。至不可縷數。人稱謂南督學第一人。遷河南副使。仍視學河南。如南畿。會閹汪直被命巡郡國。都御史以下。咸匍匐趨拜。選獨長揖。直怒。白爾何官。敢爾耶。選曰。提學。直愈怒。曰。卽提學。甯大於都御史耶。選曰。提學非都御史比。但宗主斯文爲世表率。雖死不可屈節。直見其詞嚴義正。而諸生皆集門外。不可犯逆。改容曰。先生無公務。相關。自是不必來。選徐步而出。尋轉按察使。卓有善政。雪冤獄。除苛細。凡諸宿弊。一切罷去。獨於賊吏不貸。服闋。起爲廣東布政使。任廣數年。首除徭役。罷和買。備賑濟。以蕤疲困。先是有閩人賴克哥等三十人。漁於海。爲風漂至潮州。守者獲之。官司以通番論。又邑民黃福等十九人。被誣爲盜。選皆廉其情。悉處分。有閩弟冒武職。逼妾孀婦。選爲奪還之。時市舶太監韋眷。倚進貢爲姦利。招集無賴。驅僧數百人。分布郡縣。專魚鹽之利。役戶苦於供需。選奉減其數。番人馬力麻與海商通私販。詭稱蘇門答刺國使臣。眷利其貨。不問。選因發其僞擊之。奉遣歸。眷深銜之。時又有撒馬兒罕使臣泊六灣。以獅子入貢。得厚賞。比還國。又欲航海滿刺加國。市獅子邀賞。選言此西域賈胡爲圖利耳。使墮其謀。必貽諸番之笑。且珍禽奇獸之好。不可以示外夷。罷中國事。竟止。眷每縱黨通番。番出知縣高瑤發其贓。鉅萬。都御史宋晏不敢詰。選獨

移文獎瑤。眷以每事爲所沮抑，亦不勝悲憤。於成化二十二年，遂奏誣選以他事。朝廷遣員外郎李行會巡按御史徐同愛鞠之。時兵民數萬人，填益衢巷，向詔使號訴。眷復以賂啖選，所黜吏張裝者，證誣裝死，不敢枉。時勘者鞠實不得，必欲文致以罪，竟逮赴京。行時民數萬，擁留之，不可挽。汨夜從行者數百里，入見選，鈐赭囊頭，坐舟中，夾道哭不休。已而疾作，至南昌卒。年五十八。友人張元禎，歿以疏綌，或咎其薄。元禎曰：公平生清苦，殮以時服，公志也。而張裝走京師，上言：臣聞周公元聖，而四國之謗，乃致上疑於其君。曾參大賢，而三至之言，不免搖惑於其母。豈成王之不明，參母之不親哉！凡以口能鑠金，而毀可消骨也。陛下明並日月，恩同父母，詎圖怙冒之中，尙罹屈抑，覆盆之下，復有沈寃。竊見廣東布政使陳選，少崇正學，夙抱孤忠。子處羣邪之間，獨立衆憎之地。太監章眷通番敗露，而知縣高瑤按法持之。移文嘉獎，以儆貪懦。固監司之體也。奈何宋晏徐同愛，怙勢保姦，首尾兩覲，以致眷橫行胸臆，汗蠟清節，營惑聖明。勘官李行承眷風旨，鍛鍊成獄，竟無左驗。臣本小吏，以誑誤觸法，爲選罷黜。實臣自取，眷妄意臣，必憾選，以厚賂陷臣，令扶同陷選。臣雖胥徒，安敢欺昧心術，顛倒是非。眷既知臣不可利誘，乃嗾行等逮臣於理。彌日拷掠，身無完膚。臣甘死籲天，終無異口。行等乃依傍眷語，文致其辭，劾選勘災不實，擅便發倉，曲庇屬官。意圖報謝，是毀共姜爲夏姬，詬夷齊爲盜跖也。頃年嶺外地震水溢，漂民廬舍，屬郡交牒報災。老弱引領待哺，而撫按藩臬，若罔聞知。選獨抱隱憂，食不下咽，謂展轉行勘，則民命垂絕。所以便宜議賑，志在救民，非有它也。選素剛正，不堪屈辱，乃爲勘官凌侮，煩懣成疾，旬日而殂。李行幸其就死，不爲醫療，又潛遣養

子密報選死於眷。以快其忿。宵人佞毒。一至於斯。司寇之屬。要在詰姦刑暴。安取此輩爲也。夫選砥節奉公。橫羅讒搆。君門萬里。孰諒其冤。臣以罪人。擯斥田野。乘來自給。百無取圖。敢冒死披陳。甘心鼎鑊者。誠痛忠廉之士。銜屈抑之冤。長讒按之姦。爲聖明之累也。奏入不報。第以它事罷眷鎮守。選雅尙澹泊。無異韋布。每食飯一盂。韭數根。或雞子半枚而已。凡事涉風教。必捐俸爲之。日使醫者振木鐸。以徇道路。置深衣幅巾。擇耆民有德者。予之以教子弟。聽訟不事刑。扑隸人。惟令業網巾於左右。以閱其心。與訟者約。自持一票。詣被告家。使自詣官。罔不如期者。民感其德。皆不敢欺。其學識粹然。一出於正。其操行確然。一出於誠。爲文理綴精密。讀之有味。選正直忠厚。立朝不究所施。人多惜之。正德中。追贈光祿卿。諡恭愍。初選做范文正置田百四十畝。祀先周族。名思遠莊。迨卒。族人以選甚貧。舉田還其子戴。戴不可。曰。先人行義。戴取而私之。獨不愧乎。人讚其有子云。

謝鐸。字鳴治。浙江太平人。天順甲戌進士。資性澄朗。膺懷儒素。以古人自期。選庶吉士。成化元年授編修。預修英宗實錄。校勘通鑑綱目。上疏言宋神宗好通鑑。理宗好綱目。而不能推之政治。因勸上親賢講學。以史書質經傳。窮理義。則大本立而萬目自隨。皆嘉納之。進侍講。以艱去。孝宗卽位。起修憲宗實錄。李東陽貽書。勉以乘運拯世之義。乃勉力入朝。供事史局。於汪直王越開邊事。書之不諱。正氣屹屹。嗜義如渴。見不善。若將浼然。清修勇退。恥絕功利。不爲時局所惑。弘治中。爲兩京祭酒。以道義廉節爲教。復嚴約束。明出納。廣建置。上疏正文廟祀典。及申明補敝舉墜。凡所建白。皆師古義。不徇俗。以希世。正德初。閣瑾用。

事矯旨致仕。五年卒。年七十六。贈尙書。諡文肅。所著有真西山諸書記。伊洛淵源續錄。四子釋言。赤城志。方石文集。鄉人方孝孺。隕身滅族。沈鬱百年。鐸不避忌諱。收綴遺文。梓之以傳於世。嘗著說曰。我太祖有度。越歷代者五事。攘克夷狄。收復諸夏。一肇基南服。統一天下。二威加□國。鋒刃不交。三躬自臨業。臨御最久。四申明祖訓。家法最嚴。五聞者以爲格論。

夏寅。字正夫。華亭人。正統十三年進士。幼岐嶷。有巨人志。日記數百言。稍長。益肆力問學。初爲南京吏部主事。歷郎中。杜門誦經史。百家言。久之。發爲文章。淵宏奧密。脫去流俗。自成機杼。陞江西按察副使。提學。專崇實行。黜浮華。閱卷一目數行。下又善鑒別。復文山祠。葺白鹿書院。修陶侃讀書臺。陞浙江參政。處州民苦虐政。走山谷。招不聽。曰。須夏參政來。寅檄至。卽散。成化二十二年。進山東右布政使。敬簡有容。愛民節用。寅誠心直道。無黨無援。自筮仕爲郎。二十年。爲副使。十六年。未嘗以淹屈降志。常曰。君子有三惜。此生不學。一可惜。此日閑過。二可惜。此身一敗。三可惜。

張悅。字時敏。華亭人。天順四年進士。少凝靜。篤學力行。鄉里推重。及居官。奉職守法。自刑部郎出爲浙江提學副使。初糊名鄉士。尋曰。我且自疑。人誰信我。請託覲覲。屹不爲動。成化二年。陞湖廣按察使。朝覲時。東廠尙銘忌悅。伺察無所得。不得陞者久。人未及銘敗。歷陞工部侍郎。孝宗卽位。改禮部。再改吏部。六年。大旱。陳六事。又上修德圖治二疏。時王恕在吏部。倚信之。王恕致仕。衆望屬焉。徐溥邱濬皆不喜悅。建議用翰林入吏。爲侍郎。出爲南吏。尙書。尋改兵部。參贊機務。嘗謂人曰。古之聖賢。凡所猷爲。至公無私。故其

事業光明俊偉。今之人去古遠矣。竭公忠猶恐不至。況復濟以私乎。或言有善讀書不善作官者。悅笑此正不善讀書耳。四年六疏乞歸。上爲賜璽書。加太子少保致仕。歸處舊廬。杜門不出。見風俗奢靡日甚。益崇節儉。常有言揭屏間曰。客至留饌。儉約適情。殺隨有而設。酒隨量而傾。雖新親不臺飯。雖大賓不宰牲。匪直可久。亦以安生。卒贈太子太保。諡莊簡。楊守陳嘗曰。吾友三人。時勉廷秀。鳳儀。皆始仕刑。爲名卿。魯鐸字振之。景陵人。弘治十五年進士。庶吉士入翰林。閉門斂跡。不事交游。爲編修。益沈潛學問。不專爲文詞。歷司業祭酒。端飭自勵。日危坐焚香。讀五經四書。不肯言人短長。及時政得失。虛心約己。清慎不滲。屢請告。屢起。屢歸。羣情鄉慕。益競持名節。嘉靖初交薦不起。卒年六十七歲。諡文恪。

史官曰。儒林之官。四海淵源內之司成。外之學使者是也。非其道德可師。坊表可樹。節概可風。如昔賢廉頑立懦者。而徒取儒雅章句之末。糊名易書之文。以示公程藝。欲得人而釀化也。不已細乎。南陳北李。著聲太學。而李尤苦勁。頻死者數矣。陳選爲提學。不屈節權奄。石亭之死。何異夕陽。魏驥不受座主之私。孫鼎請淚山河之憤。謝鐸表章正學之文。皆不避死。壁立千仞。高風偉節。百世可師。以之化民成俗。何多讓焉。

劉珣傳

劉珣字叔溫。壽光人。少溫篤。事親孝。母沒廬墓。時父曷在。珣味爽入家問安。畢復詣墓所。人稱所居曰仁孝里。正統十三年進士。改庶吉士。授編修。陞修撰。天順二年陞右中允。七年陞侍講學士。侍東宮講讀。憲

宗卽位。陸太常少卿兼侍講學士。英宗實錄成。進卿。仍兼職。外艱服除。還任。成化十年。陸吏部左侍郎兼官如故。明年兼翰林學士。入內閣與機務。珣在經筵久。上甚重之。呼爲東劉先生。特賜圖書。十三年。進戶部尚書。明年加太子少保。兼文淵閣大學士。十八年。修續資治通鑑綱目。纂文華大訓成。進太子少保。謹身殿大學士。珣鄙薄萬安。時對客罵安負國無恥。安積聞深恨之。百計中傷。二十一年九月。乞致仕。允之。歸家卒。贈太保。諡文和。珣美姿容。善談論。遇人無矯飾。景泰初。議迎鑾。成化初。議睿皇后喪禮。末年論李孜省左道亂政。動搖國本。密疏昌言。卒定儲位。有大臣之節。當是時。珣與劉吉同在內閣。人因上呼珣東劉。因謂吉爲北劉。林俊常曰。余以妖僧孽寺。售術賈邪。肆興土木。不揆狂躁。上千宸怒。萬頸俱縮。縛下詔獄。鬼錄爲伍。惟公立爲上解。乃得薄譴。崔銑曰。公秉心不疑。諒直無顧。而讒嫉肆作。構惡於羣。小假威於遷卒。竟去位。嘉靖二年。言官疏。珣孝友。孚化於鄉閭。爲立昭賢祠祀之。

史官曰。闕

陳音傳

陳音。字師召。莆田人。執古有烈士風。登天順八年甲申進士。成化元年。授翰林編修。常上疏陳時政數事。如起用李秉。張元禎。復羅倫。章懋。用陳獻章。革法王佛子名號。語多剴切。當道者或銜之。不爲動。時中官最貴。有母喪。或議往弔。音奮然曰。堂堂翰林。而拜內侍之庭。奈天下笑何。議遂寢。丙申。侍讀。加從五品祿。侍經筵。會憲宗首闢西廠。坐以中官緝事。勢彊不可當。其黨章瑛者。夜帥邏校入兵部主事楊士偉家。并

掠其妻。晉居比舍。亟乘墮呼曰。爾何人。乃擅辱朝臣。其人曰。爾何人。乃不畏西廠。晉曰。我翰林侍讀陳晉也。聲氣愈厲。其人爲之少戢。放其妻縛。成化庚子。大學士劉吉有父喪。詔起復視事。吉已疏辭。陰託外戚萬喜言於上。固留之。晉貽書勸其力辭。吉不報。晉業詩經。學者多從之。若太常卿齊章。運政吳裕。少詹事王鏊。皆其所授經弟子也。歷官至南京太常寺卿致仕。

史官曰。闕。

商輅傳

商輅字弘載。號素庵。涇安人。舉宣德乙卯鄉試第一。正統九年會試。明年廷試。皆第一。爲翰林修撰。十四年。景帝監國。入內閣。備顧問。預機密。陞侍讀。時北敵入寇。人心洶洶。輅力主羣議。請郕王卽眞。以安反側。時有議南遷者。輅唾面斥之。敵逼都城。輅與文武元僚。經略戰守。遣官撫輯。旬居之敵。征各邊寨。選兵入援。揭榜敵營。購敵人首。僞爲善甯報誘也。先書敵得榜與書。自相疑。遁去。景泰紀元。陞翰林院學士。本年八月。迎上皇於居庸關。景泰三年。陞兵部左侍郎。歷兼左春坊大學士。翰林學士。太常少卿。賜居第。議易儲。輅獨曰。此國大事。有皇太后在上。臣下誰敢議此。時錦衣指揮盧忠。妄言南內事。中官阮浪死之。猶窮治不已。輅極言。儉言不可聽。以壞大倫。傷骨肉之情。由是忠始坐罪。衆得釋。五年。章綸請復儲。上怒下獄。輅力救得免。景帝不豫。太監興安。銜廷臣云何。輅於公疏。援筆增二語曰。陛下宜宗章皇帝之子。當復立。宣宗章皇帝之孫。他非所當立者。疏未及進。石亨輩奪門。英宗復辟。卽日以迎立事。置于讞。王文等極刑。

召輅與高穀入便殿。慰曰：朕在南宮，知爾二人無偏向心。今正欲用爾，其安心辦事，勿憂惶也。因議改元年號。草詔頒敕，石亨密語輅曰：今歲敕文須一抹光，不須別具條款。輅曰：祖制孰敢擅改？亨等不悅。騰誣謗輅，欲附致于謙刑案。興安爲輅解，而上亦怒。興安奏曰：當時北輩附和南遷，不省將置朝廷何地。今有奪門功，卽復爾耶？上怒乃解。但削輅爲民。輅去，上每念商學士。朕所取三元也。旁有擠者，久之竟不復召。憲宗卽位，明年追念舊學，遣使驛召至京，以野服見。復官，入內閣，首疏八事，勤政納諫，儲將材，飭邊備，革冗員，設社倉，崇先聖之號，以配天，開入德之基，以造士。又言文廟從祀諸賢，洪武中增董仲舒，正統中增胡安國、蔡沈、真德秀，但仲舒止稱舊官，安國等贈諡，未稱乞如伏勝等封伯爵。四年，議慈懿皇太后喪禮，得耐葬祔廟。是年，慧星見。言官勸輅力求退，上怒，詰言官曰：唐太宗用王魏，朕用輅，何不可？輅又力請宥言官。上喜曰：輅稱大臣，言官得不問，尋陞兵部尚書兼學士。五年冬，燬七年慧星，再見。天田入太微垣。八年，天下大水。輅上弭災七事。崇正道，謹命令，親賢臣，慎賞罰，納諫諍，勵官守，恤軍民。十年，改戶部尚書。十一年，兼文淵閣大學士。上常召見，從容議及郕王監國時事。輅言：景泰有社稷功，當復帝號。左右聞者皆泣。上亦泣。遂下詔，上尊諡。輅因對請立皇子東宮。先是，悼恭太子薨，上憂念已，而知西宮有子六歲矣。但畏忌無敢言。輅上疏略曰：皇太子聰明岐嶷，國本攸繫。天下歸心，重以昭德宮貴妃撫育保護，恩踰己出。百官萬民皆謂貴妃賢哲，近代無比。但外議皆謂皇子之母因病別居，久不得見，揆之人情事體，誠爲未順。伏望敕令就近居住。皇上仍煩貴妃撫育，俾朝夕之間，便於接見。庶得遂母子之至情，愜朝夕之公論。

上召輅擬皇子名。逾月皇子母紀氏薨於永壽宮。輅舉宋李宸妃故事。言得贈淑妃。殮殯悉如禮。是年十一月立皇子爲太子。十二月加太子少保吏部尚書。十三年建玉皇閣宮北。輅疏言。皇上爲此。上爲母后祝釐。下爲生民祈福。聖心誠敬。人所共知。但稽之於古。未爲合禮。昔傳說告高宗曰。黷於祭祀。時謂弗欽。禮煩則亂。事神則難。乞停罷神祠。像送宮觀。祭服祭器樂舞之具。盡送太常收停。一應齋醮之事。悉皆停止。勿爲褻瀆。庶幾天心昭鑒。可以變災爲祥。上從之。是歲進謹身殿大學士。會黑霄見。條上八事。曰。番僧國師不得重給符券。四方常貢外。勿受玩好。諸色人許直言。自達公府。遣部使者慮囚理冤。抑停不急營造。實三邊軍儲。守沿邊關隘。增置雲南巡撫。時汪直開西廠羅織。數起大獄。臣民恐悚。輅疏言。近日伺察太煩。政令太急。刑網太急。人情疑畏。洵洵不安。蓋緣委聽斷於汪直一人。而直又寄耳目於羣小。如韋瑛王英輩。并條直十罪。又云。直不去。天下必危。上怒曰。用一內臣。輒能危天下乎。命太監懷恩傳旨詰責。輅正色曰。朝臣無大小。有罪應請旨逮問。渠敢擅抄扎三品以上京官。大同宣府京師北門守備。一日不可缺。渠一日擒械數人。南京祖宗根本重地。留守大臣。渠敢擅自收捕。諸近侍。渠敢擅易置。直不黜。國家安得不危。恩咋舌而退。奏上。乃卽日撤西廠。由是諸內臣大忌輅。會楊榮孫璉及董瑛以罪逮至京。詞連及輅。直從中主之。誣輅不自安。同列又輒從旁切擠。輅遂請老。加少保致仕。輅去。萬安得爲首輔。遂復西廠。直掌之。諸大臣皆諂事直矣。輅家居十年卒。年七十三。贈太傅。諡文毅。輅丰儀岳峙。方果好直言。與王文陳循高穀彭時萬安劉吉先後共事。每遇大議。能持正。劉吉常曰。吉與商公處數年。未嘗見其筆下妄殺。

一人馬文昇曰。我朝賢佐。商公第一。楊文貞李文達不及也。子良臣爲翰林侍講。

史官曰。商輅方正端亮。見事透朗。處永壽昭德間。順以濟險。斯實難矣。說者謂其廬高峯四合。千巖撐豁。殆間氣所鍾也。及讀國史。見諸疏侃侃有大節。嗚呼。宋之王旦王曾宋庠。俱以三魁致位宰相。若輅者。視古先哲何愧耶。

周忱傳

周忱字恂如。吉水人。永樂二年進士。時簡進士二十八人。進學文淵閣。公乞預。上喜。公有志。改翰林庶吉士。十年授刑部主事。陞員外郎。盡心簡牘。二十二年爲越府右長史。宣德五年。東南財賦煩敝。廷薦陞工部右侍郎。巡撫南直隸。忱辭。越靖王。至江南。召父老問利病。興革之人悅服。滿九年。轉左。正統六年。兼巡撫湖二府。十四年八月。陞戶部尙書。改工部。仍巡撫。景泰元年。引年不允。明年請老。召還京。致仕。又明年卒。凡在江南巡撫二十二年。先是。胡概巡撫江南。用法嚴刻。忱濟之以寬。凡告訐輒不省。或面詰忱。不及。胡卿使我下情。不能上達。忱笑應曰。胡卿敕有祛除民害語。我敕但云撫安軍民。朝廷委任自異耳。常是時。蘇州府逋稅七百九十萬石。常松亦然。忱閱牒大駭異。詢父老。皆伏地哭。言蘇吳豪富有力者不出耗。并賦之貧民。貧民不能支。多流徙。忱創爲平米法。官田民田并加耗。蘇稅額二百九十餘萬石。忱與知府況鍾曲算。疏減八十餘萬。舊例不得團局收糶。忱令縣立便民倉。水次每鄉圖里。推富有力一人。名糧長。收鄉圖里人夏秋兩稅。加耗不得過十一。又於糧長中。差力產厚薄爲押運。視遠近勞逸爲上下。酌量支

撥京通正米一石支三。臨清淮安南京等倉。以次定支。爲舟檣剝轉諸費。填出銷入支。撥羨餘各存積。縣倉號餘米。米有餘減耗。次年十六徵。又次年十五徵。更有羨。縣爲倉名預備倉。水旱不時賑貸。及農乏食。網運風漂盜奪者。國復轉假。至秋抵斗還官。其修圩築岸。開河澆湖。人支口糧。以爲農事。故不責償。時插蒔農借貸。必驗中下事力。及田多寡給之。秋與糧并賦。凶歲再賑。秋熟不償者。來歲不復給。時裏河漕軍與民半軍。船出官廠。民率僱舟。又經年往復失農業。忱與平江伯瑄議。奏軍舟民至淮安。或瓜洲水次。交兌江北衛所漕者。出通關。還繳淮安一石。兌加五斗。瓜洲五升。如裏河舟未渡江。南京諸衛抵倉兌者。加與過江米。及襯墊蘆蓆與折米。民間馬草。歲運兩京。勞費不資。忱請通州草場立官庫。每束折銀三分。千束銀止三十兩。南京輕齋赴買上北京。文武職官俸糧。皆支南京米。賤時銀一兩得米七八石。忱請江南重額官田。極貧下戶。兩稅准折納金花銀。銀一兩准米四石。解京折支京官俸。蘇有官布匹。准糧一石。舊例匹重三觔。比解。又以紗麤十退八九。忱言農間布匹。觔重紗麤。價願賤。紗細布輕。價益高。不拘觔重。務在長闊如式耳。傳中馬衣被諸應客者。舊皆領於馬頭。馬頭豪者橫科。弱者鬻產。忱令田畝收米升九合。與糧俱征。驗馬上中下價直給米。正統初淮揚災。鹽課虧。忱巡視。奏令蘇州等府撥剩餘米。縣撥一二萬石。運貯揚州鹽場。准爲縣明年田租。聽竈戶上私鹽。給米時米貴鹽賤。官得積鹽。民得食米。公私大濟。時采繪宮殿。計用牛膠萬餘觔。朝廷遣官敕忱上供甚急。會忱議事赴京。遇諸塗。敕使速忱且還治。忱不應。至京言京庫貯牛皮歲久朽腐。請出煎膠。歸出餘米。市皮還庫。上從之。十四年邊事急。工部索兵杖數百。

萬計。忱出餘米造上。明盜者須水磨。非遲歲月不可。忱令且沃錫。旬日畢辦。正統六年至海鹽。築捍海塘。令郡七縣。合役萬夫。自七年正月。至十一年。費萬計。皆出忱度支。海竟不能不患。每遇凶荒。輒便宜從事。補以餘米。賦外更無科率。凡百上供。及麻舍學校賢祠古墓橋梁道路溝渠修葺。一切取給餘米。歲不下萬計。施給僧道。問報饋遺。往往不吝。各得其歡心。江南之人。愛戴如父母。沒而尸祝。永思周尚書不去懷。忱字量恢。宏才識通敏。蒞事精勤。臨民和易。有善謀者。雖卑官賤吏。破去崖岸。開心訪納。性尤機警。籌畫諸郡錢穀鉅萬。一屈指無遺算。嘗爲冊歷。記日所行事。及陰晴風雨。有告報。輒按據詰訊。人莫能欺。每出會計。視地豐凶。事緩急爲弛張。調劑變通。民無逋負。官有餘積。前後理財者。皆不能及。卒年七十三。謚文襄。先是。塞義乘銓。夏原吉。握利權。皆二十七年。劉大夏。尚書。兩京三十九年。而在交南者。十有九年。胡濙。爲禮尚書三十二年。忱。巡撫江南二十二年。皆久任責成。以故用人理財。禮樂征伐。諸大政事。文經武緯。各盡所長。後鮮能及焉。

史官曰。善理財者。權萬貨輕重。操奇贏轉輸。以利其餘。名不加賦。而用足。其敝或與商爭息。雖劉晏趙開。不免焉。若周忱。止爲江南貧民平賦。減耗耳。而疏剔之餘。不可勝用。至於備凶札。給上供。興利補壞。百廢具舉。而民不告病。誰謂理財無大道乎。然忱善用人。其鈞算蘇賦。以況鍾。條畫漕輓。以平江伯迪。知忱所以不勞而成功也。

明書卷一百二十二

列傳四

名臣傳七

鄺莖王佐傳

鄺莖字孟質。宜章人。永樂辛卯鄉貢士。理刑都察院。以廉平名。十一年爲監察御史。時駕在北京。有言南京鈔法滯。衆謂將起大獄。莖往撿市豪一二歸。奏曰。市人聞令懼。鈔法通矣。事遂已。十六年石州人告變。擢陝西按察副使。敕莖事。卽實。會官軍勦莖。察其誣。乃反獄亡命。妄言冀脫死。聞上止弗問。誅誣者。宣德四年陝西饑。移粟煮粥。全活衆生。莖最清謹。父又賢。常市褐寄父。父貽書罵。何處得此褐者。以不義污我。父教官。莖欲見父。聘陝西考鄉試。父又大怒罵。辭不至。歸憂服除。陞應天尹。與利去害。市征田稅。皆酌其平。豪滑不得爲輕重。正統元年進兵部左侍郎。時尙書王驥西征。莖獨任部事。有勞。上與除戎籍。四年京師淫雨。壞廬舍。莖言此陰陽爲沴。兵陰也。臣等不職所致。乞罷歸。不許。久之進尙書。時欲變易軍伍。使南北人各適土性。下羣議。莖曰。此舊制不可紊。稍有變易。將不勝其弊。各將誰歸。卒不動。十四年上北征。敵力止不允。比出關。又請回鑾。王振惡之。矯旨令與戶部尙書王佐隨老營。至淮安。墜馬幾殆。從者請留就

醫藥曰。天子在前。可託疾求自便。力病至雲南。還至宣府。敵大至。瑩再上章請疾。驅入關。而嚴兵爲殿。皆不報。最後詣行殿。力請。振怒曰。腐儒安敢談兵事。再妄言必死。瑩曰。我爲社稷生靈言。何得以死懼我。振愈怒。叱左右扶出。明日次土木。師覆遇害。贈少保。諡忠肅。佐海豐人。永樂中貢士。爲給事中。正統初陞戶部侍郎。六年陞尙書。十二年兼吏部事。佐狀貌魁梧。器宇深厚。政有體要。心無苛隘。恥不若人。晚事學問。贈少保。諡忠簡。

史官曰。土木之變。自英國張輔學士曹鼐而下。死事者數百人。或諫或否。史不勝錄。然未有如鄺瑩王佐之數。請回鑾。力折逆閹。幾以死諍。而回天無術。竟以身膏草野也。瑩父子俱嶽嶽。屢平大獄。賑饑民。活人無算。而遭家不造。罹此物凶。天下尤痛之。

樊瑩傳

樊瑩。字廷璧。常山人。天順八年進士。爲御史。巡兩淮。豪有力者。憚其清介。莫敢撓阻。條上清軍事宜行之。著爲令。又巡雲南。交人誘邊氓掠盜。殺吏民。有議用兵。瑩移諭禍福。交人畏其清梗。皆納款。出知松江府。府故富贍。瑩布衣蔬食。孚於士民。有議折徵米穀。減布縷征。通幹漕法。數事行之。後人遵守。再知平陽。以黃孔昭薦陞河南按察使。未幾爲應天府尹。三年陞南工部侍郎。改都御史。巡撫湖廣。計擒錦田賊酋。散解其黨。奏省諸藩王營造費金兩百萬計。尋以疾致仕。薦起撫治鄖陽。鄖襄流冗安輯。馬文升又薦召爲南刑部侍郎。雲南晝晦五日。敕瑩考察雲貴諸吏。罷遣千餘人。召還部。爲尙書。十八年致仕。正德三年。閹

瑾評登妄理隆平侯事。及擅減上供布收贖。奪其官。瑾誅。登卒已三年。詔復其官。十四年。贈太子少保。諡清簡。登明習律令。潔己好修。侃侃自樹。交遊稀寡。人皆敬而畏之。

史官曰

王概傳

王概字同節。廬陵人。正統七年進士。達敏有才。暢習吏事。初授刑部主事。歷郎中。屢遷河南按察使。所至案無留牘。獄無冤訟。天順初。被評下獄。會襄憲王入朝。上問所過官吏賢否。王對曰。臣過河南。百姓遮道訴王廉使冤。且言王廉使清勁。鋤豪拊善。有恩有威。殿下幸爲百姓奏皇帝。還我王廉使。上喜。立命法司雪概。還任。尋陞右副都御史。巡撫陝西。設法救荒。全活數萬人。流徙歸業。天順七年。入爲大理卿。出入十年。凡兩法司及畿藩讞奏。參錯情法。多所平反。時吏諳律比者。類多深刻。概獨持明允。濟以長厚。諸所審駁。會文切理。倫要簡暢。轉相傳錄。類成卷籍。成化八年。遷刑部尚書。疏陳時政十事。上嘉納。商輅深知之。薦代姚夔爲吏部主議者。不喜。竟用尹旻。十年卒。諡恭毅。子臣。成化五年進士。翰林侍講。出爲廣西參政。託病歸。

史官曰

崔恭傳

崔恭字克讓。廣宗人。正統元年進士。爲戶部主事。有能譽。出督延綏邊儲。大學士李賢薦知萊州府。府庫

故歲入漕海市數萬。輒涸爛。破庫人家。恭請量留漕海市餘。並出爲軍餉。不踰年。布盡歸。守庫者八百家。十三年。萊旱蝗。捕蝗發賑。乞免下邑逋租。又善辨疑獄。人稱神明。明年。敵犯京師。集兵數千。遣官部署勦。王在萊六年。吏畏民懷。景泰三年。陞湖廣右布政使。盡革諸冗費。及和市苗賊侵武岡。督餉訓民兵勦賊。賊皆聽撫。公安監利流民相殺。恭曰。勿急急且大變。下令流民願附籍者聽否。且俟秋成遣歸。衆遂定。調左江西。囊中惟律比圖書。衣數襲。江西省有黃濟庫者。庫官吏乾沒至五十萬。恭發其姦。都御史韓雍覓法連坐。布政使失職。郡邑肅然。制爲役法調輕重。任一歲之勞。得九年之逸。天順二年。陞右副都御史。巡撫蘇松。所至進耆老。詢利害。爲興革。會都督徐恭請浚儀真漕河。恭役夫六萬人。程工贍廩。民不告勞。又浚常鎮河。避江險。四年。王翱薦爲吏部左侍郎。成化五年。代李秉爲尙書。不久罷歸。九年起爲南吏部尙書。卒贈太子少保。諡莊敏。恭寬平坦易。中無芥蒂。好善惡惡。出於天性。臨事剛而不亢。柔而不褻。其在吏部。慎惜人材。獎拔後進。廉靖自居。人知嚴憚。

史官曰

王翱郭瑾李秉年富傳

王翱字九皋。鹽山人。永樂十三年進士。先是北士入南京者甚少。舉進士者往往弗獲前列。是年初會試。北京。翱兩試皆高等。上喜。召見。賜食。改翰林庶吉士。授大理左寺正。以寺事誥誤。遷行人。宣德元年。楊士奇薦陞行在御史。謹重達大體。十年。陞僉都御史。正統元年。鎮守江西。未幾。巡浙江。拊善推姦。吏民畏愛。

四年松番用兵不效。黜出贊理。六年鎮陝西。七年敵入塞殺掠吏民。我師敗績。遼東西震動。且據漁陽。黜提督軍務。敵退。明年陞副都御史。留撫遼東。十二年出塞破敵有功。陞右都御史。十四年改左。是年秋敵分犯廣甯。清野困之。敵退去。景泰三年召還臺。尋加太子太保。四年建州長李滿住上番書乞留。期遼東不許。會南蠻寇兩廣。兩廣副總兵董興武毅。觀望不肯戰。巡撫侍郎揭稽李棠不相統。賊益熾。于謙請用安遠侯柳溥總督兩廣軍務。如溥未可出。臣謙及戶部尚書金濂。左都御史王黜。乞用一人。上曰。黜練兵務。可督兩廣。明年蠻平。召還臺。是年夏。吏尚書何文淵下獄致仕。黜轉吏部尚書。官銜如故。初。黜入四川。專布恩信。招懷降附。出賜金市牛酒。慰犒番酋。商巴等十八寨來歸。不煩兵力。松番遂定。遼東法令久弛。不復知有朝廷賞罰。以故敵至不戰。戰亦不力。黜至。會諸將責之曰。某某玩寇。喪師失律。當斬。軍中股慄。頭搶地。言自今效死用命。得釋。黜卽出巡邊。起山海。抵開原。繕濬塘溝。五里爲堡。十里爲屯。烽燧斥堠。千里相望。敵見嚙指走。黜益簡練卒伍。賑賙窮乏。偶配饑寡。人情大悅。邊塞孤遠。宣輒輒。緣俗立法。細大收贖。十數年間。得金穀馬牛羊數十萬。邊用充饒。器械明利。士馬飽騰。人皆願戰。報王公。逾年。督諸軍出塞。大破敵。斬首千餘級。比至嶺南。亦用收贖法。時。黜威望素著。諸蠻聞其來。大懼。黜略兵威。推誠撫諭。盜寇止息。會長信向。黜常言蠻戎撫捕。各有機宜。以故四川兩廣得免騷擾之患。黜初入吏部。佐王直。天順初。落太子太保。直致仕。專任黜。黜嚴考察。公銓注。抑奔競。杜請謁。一時任使。並稱得人。時李賢爲石亨逐去。英宗召見。黜問賢何如人。黜力言賢才行。得復留內閣。益見倚任。賢在內閣。亦左右黜。上進退大臣。時

時召黜而可否稱先生而不名。黜屢乞休不允。以故得行其志。五年加太子少保。上常諭李賢曰。今六部尙書庶皆得人。但慮吏部尙書王黜老爾。時黜年七十八。賢對曰。臣聞祿命之說。黜壽最高。尙有十年。上喜曰。如此無慮。又曰。如戶部年富不易得。賢對曰。若繼黜吏部。非富不可。上曰。然。憲宗卽位。免其雨雪朝。成化元年復太子太保。三年致仕。卒年八十四。贈太保。諡忠肅。黜善知人文。武大吏。施聚焦禮。范信。耿九疇。軒。稅年富。李乘程。信。皆其薦用。黜本北人。常召對。英宗每曰。北人質直雄偉。雖文章藻飾。似不及南人。顧緩急得力。非北人不可以。故黜推轂。北人爲多。至姚夔爲吏尙書。皆反黜。往往右南人。清譽稍不及。黜功名損於禮部時。黜端方強毅。清白儉約。立心制行。循守禮法。惕厲憂勤。仰思待旦。居第三十餘年。不改於舊。上特命有司起第。縣西。公餘退宿朝房。惟朔望時令歸謁先祠。曹欽反。亦知重黜。不忍加害。李賢常曰。皋陶言九德。王公有其五。亂而敬。擾而毅。簡而廉。剛而塞。強而義。彰詔曰。王黜淡然無欲。不識姜姬。而況苞苴乎。古三不惑於黜見之矣。人皆以爲確論。子虵世錦衣副千戶。郭璉。北直隸新安人。初名進。以太學生於永樂中。爲戶部郎官。質直寬簡。臨事從容。不見喜怒。精練吏事。簡約有條。宣德初。爲行在吏部左侍郎。兼少詹事。上爲改名璉。四年代蹇義爲行在吏部尙書。罷兼職。五年冬。上諭曰。以朕用人之柄。付卿。卿宜爲朕擇才。昨郡守多缺。命廷臣薦舉。古人當斯任者。必勤於咨訪。有得卽錄。故官不乏才。呂蒙正夾袋。虞允文材館錄是也。慎留意。正統元年。進士李賢入選。璉試賢嘉禾詩。卽目賢爲輔相材。特奏授驗封主事。未幾旱蝗。侍臣言大臣尸位妨賢。內批令自陳。諸大臣遂皆乞去。

謝天譴。璉獨不可。曰：主上冲年，吾輩皆先朝簡任，受付託，一時請去，誰與共理？宜引罪乞改過。璉老矣，官至冢宰，豈敢貪位？願君臣恩義如此，衆服其言。疏上，盡留諸大臣。璉乘銓十四年，名不及蹇義，然潔廉，務探實行，不用浮薄游聲譽之士。雖爲內閣所侵，能堅忍持正，自行其志。正統七年請老歸。

李秉，字執中，曹州人。正統元年進士，爲監察御史，才識宏博，議論持正，已負公輔之望。景泰二年，以僉都御史總督宣府邊儲，參贊軍務，卽勦蚤緣內附都督董斌去之，又盡更置諸不才將校。三年秋，瓦剌入貢，上言：迤北使臣納哈赤等三千人，馬駝畜四萬餘匹，除進貢外，存養宣府日支草料，宣府草不過二十萬束，料二萬石，我兵尙不給，何以供敵使？且永樂宣德間，敵使進馬，官驗不堪者，令塞草地牧放，不許入境，駐劄窺伺，正統間許往牧大同，以故深知地利，數犯邊。今敵使畜多，譎詐之計，不可不防。是年冬兼巡撫，尋改提督軍務，秉遂薦葉盛參贊獨石諸城軍務，勦總兵紀廣副總兵楊能，上曰：塞圍方棘，不得以細故措大將，下巡按御史勦報。廣亦訴秉專權，召秉還京，以右通政蔣琳爲僉都御史代之。言官交章請留秉，上爲且留琳，遣言官卽勘，改琳貴州鎮守督軍務，巡撫秉留宣府四年，掩土木鶴兒嶺戰沒遺骸萬五千，請下大同紫荆諸鎮，并掩凡十數萬，是秋病乞代，不許。許一子視疾，後起復，起巡撫遼東，其在遼東能節用愛人，恩威兼濟，吏民畏服，又能識拔將校，斥遠烽火，塞上無大寇深入，卽小入輒先覺，驅出塞卽已，以故邊民得休息，軍無冗費，敵亦知秉名，輒徙帳避去。成化二年，董山誘海西寇遼東，秉及武靖伯趙輔討降山，逮山至廣甯誅之，徙其黨廣西，加太子少保，尋入掌都察院，爲左都御史。四年轉吏部，代王翱爲尙

書請寄不得行。五年春致仕。先是乘與王竑並以剛方負時望。坐廢再起巡撫。乘遼東。竑陝西。未行。改淮揚。尋都給事中張甯薦乘爲兵部尙書。竑左都御史葉盛入內閣。時盛自廣東入議事。御史呂洪言乘尤可薦。葉聲名損於嶺南不可薦。薦乘及王竑。上用竑兵部。乘都察院。葉亦改宣府。未幾乘入吏部。其在吏部時。崔尹爲侍郎。不相能。適巡檢事爲考功郎中張寰所持。御史康定又以星變。合諸言官乞汰京。京且勅禮部兵部尙書馬昂姚夔程信。學士商輅定向與乘善。諸大臣益忌之。請會臺官考察京官。大臣被勅聽自陳。上留姚程商而馬罷去。又有御史戴壽者。請方面官復如正統間例。聽在京三品以上大臣薦舉。語侵吏部。御史劉濤又言薦舉開競門不可。是年朝覲。斥退者衆。又多大臣嬖黨。兩侍郎時短乘。科臣遂勅乘下廷議。兩侍郎唯唯曰。吾二人常言之。奈不肯聽。何。乘遂致仕。與來朝被斥官同辭。竟快諸讒忌者。諸言官又疏言王概欲入吏部。彭時爲之內主。以故逐乘時不自安。稱病。商輅欲彌羣口。請用崔侍郎。吏部尹轉左。葉聲右。侍郎代尹。康劉二御史並謫官。薦家居。朝臣屢薦。大臣忌其方鯁。竟不起。卒諡襄敏。年富。字大有。懷遠人。本姓嚴。籍訛爲年。永樂中鄉貢。爲山東德平訓導。疏乞修定先師廟配享從祀。封爵禮儀。召爲吏科給事中。糾正違失。務存大體。陞陝西參政。巡歷郡邑。察民隱。革姦弊。興學勸農。尤嫉賊吏。正統九年陞河南布政使。饑民流聚十數萬。剽掠鄉邑。撫輯散解。力行節儉。卻侈靡。風俗爲之一變。時敵也。先數侵邊。陞左副都御史。提督大同軍務。舉廢政。革科徼。抑豪橫。廣屯田。民始有更生之望。軍功爵賞必覈無濫。襄垣王遜燁誣富。富請老。戶部言富廉威爲姦豪所忌。不可許。景帝爲敕王守法度。勿得汚風。

憲大臣。黠卒吳淮。誣富不法。謂侵郭總兵。坐總兵上。于謙上議曰。穰苴布衣監莊賈軍。以軍法誅賈。卒破秦晉。齊以一穰苴。故稱強列國。裴度御史中丞。督諸大帥平蔡。我朝近日左都御史王翱。右僉都御史鄒來學。皆坐總兵上。以軍令出翱等。淮妄言沮軍法。宜究主者。事遂寢。富又嘗按山西參政林厚。坐厚法。厚亦誣富。臺置獄訊。景帝曰。厚怨富。富執法公廉。誣富得自便。朕以邊事付富。終不以一人辱富。厚竟削籍。富又按分守內臣章力轉貪虐。力轉又誣富。巡按御史爲雪富。誣狀事得已。天順初。石彪倚亨。中富危法。逮詔獄。上素知富。大學士李賢又力爲解。得致仕。未幾賢薦賈銓爲戶部尙書。召銓至。又薦富。左右不悅。富者。輒巧譖沮之。上諭賢曰。戶部非年富不可。對曰。人多不喜富。上曰。富執法宜。司國計。竟召爲戶部尙書。時王翱年七十八。上又諭賢曰。繼翱吏部。非富不可。富經理財賦。蒞以勤廉。不動聲色。出納節適。八年春。陝西用兵。督餉非人。屢乏軍興。富薦楊瑄。余子俊。吏部疏論富侵官。富上言。薦賢爲國同心共濟。若事輒任已。動率尤人。恐乖推讓之風。自失寅恭之義。且乞致仕。不許。富剛正樸忠。簡言寡慾。遇事直前。不顧利害。氣節才識。世不易得。卒年七十。諡恭定。

史官曰。郭璉乘銓十四年。潔廉能自行其志。賦嘉禾而識宰相。未易才也。王翱李乘年富。皆以封疆之臣。入參密勿。功名著於邊徼。及統均司計。皆剛方有執。衆正連茹。使人主計其祿命。以爲昆任。於都哉。王明並受其福。君子論世而有餘慕焉。

何喬新傳

何喬新字廷秀廣昌人景泰五年進士父文淵進士常知溫州府廉靖平恕郡中稱治召入刑部爲侍郎請告歸正統中薦起吏部侍郎景泰中進太子太保佐王直同爲尙書被劾乞致仕去喬新幼敏穎有奇質讀書發難出人意表初爲南京禮部主事歸葬父卜地不得吉會宋疏密陳文定葬父廣昌子孫貧欲鬻其葬地衆謂比吉壤喬新曰暴人父而葬吾父吾不忍爲轉刑部郎中孤介嚴冷持法平卽執是莫可撓奪爲按察副使福建擒豪強捕海盜減礦課罷牛租控險設縣表儒賢政績高偉不瑣屑簿書陞河南按察使諸貪殘吏倚強援莫敢詰喬新盡鐫暴坐法去撫輯南陽山谷流冗六萬戶陞湖廣布政使會荆襄大水漂千家民饑喬新均賑平徭列九等授役成化十七年進副都御史巡撫山西督三關兵事會山西又旱饑出倉粟賑糶三十萬石敵自河曲入塞急遣伏兵灰溝旁斬敵大敗去召入爲刑部左侍郎敵人擁衆犯大同殺邊將紫荆居庸告急敕喬新巡邊遣諜觀敵營聲言遣兵搗其巢敵懼不戰遁去山西又饑人相食卽命喬新賑贖得便宜行事因請內帑淮鹽銀及粥祠部僧道牒得粟數十萬石分部賑恤又獄饑人疏溝渠出粟償直凡活人三十餘萬播州宣慰司楊輝嬖妾仍寵其子友欲奪嫡子愛諸小虜不肯從輝矯奪大壩鎮罕夷寨立懷遠宣化二長官司又割播州凱離五十二寨安甯宣撫司立友爲使張都御史輒爲輝畫請得旨會愛母死友母益橫專其家結凶黨愛反交通唐王朝廷疑愛遣喬新卽訊友母子又輦金寶賂諸權貴人欲喬新囚愛待命衆藉藉爲友遊說必欲去愛喬新至盡得友子母姦惡罪狀條上白愛無反謀革友宣撫削官銷印遷保章與產業自給播州遂定陞南刑部尙書疏奪內臣守

備蘆洲還民。孝宗初召爲刑部尙書。喬新執法嚴毅。凡中外貴有力請寄。一切不得行。上疏乞禁京師邊服邊語。鄒御史者凶橫。欲躡大理丞。喬新薦郎中魏紳。鄒御史恨之。會喬新外氏與鄉人訟。卽評喬新得金錢與行賂。輒下上其手。要地人又從中主之。喬新杜門引咎辭位。下諸根連人詔獄窮治。無蹤跡。事雖幽白。竟不安其職。請老去。公卿臺諫交薦起。竟不得起。卒。久之得諡文肅。喬新守官清慎。律己方整。博學精法律。敏於吏事。事無難易夷險。不避嫌怨。必行其志。

史官曰

調

陳俊傳

陳俊。字時英。莆田人。正統十三年進士。歷官戶部郎中。徵秋青草。天津諸衛。俊言舊負未蠲。新額薦積。人不能堪。詔減三十五萬束。天順五年。兩廣合兵討叛蠻。假俊便宜。敕督軍興。內艱奪情。明年蠻平。解兵。始奔喪。成化元年起陞南京太常少卿。四年召爲戶部右侍郎。俊練習銀穀。凡四方災傷。邊鎮請芻粟。爲裁盈縮。條析利害。曲折。尙書楊鼎。鼎亦能聽其言。七年京師大饑。敕俊出太倉米百萬斛賑糶。俊禁絕射利者。請石以上閉不與。八年敵入河套。兵出。俊督餉。上便宜。乞內帑助邊。除徑道。發丁飛輓。軍興不乏。榆林大捷。進俸一等。明年改吏部。十三年侍郎。九載陞南京戶部尙書。歷兵吏二部。又九載請老。俊孝友廉慎。沈毅簡質。南曹務閑。惟戶部金錢布穀出納。與內外諸司相關。多撓阻。不可盡如法。俊一按典則。制國用。省財不啻數十萬。卒諡康懿。

史官曰

林鶚傳

林鶚字一鶚。浙太平人。景泰二年進士。初爲御史。時言官得志。輒妄言。摺推中傷人。益交結。橫甚。鶚獨持大體。略細故。常監試禮部。內閣陳循。王文子。不得舉。誣考官劉儼。又以鶚。邑子林挺。得舉。誣其私挺。逮挺考訊。且并逐鶚。及校挺文。文固有辭理。事得白。英宗復位。盡左遷諸言事。瑣狽挾勢。鴟張者。簡諸守正持大體者。爲大郡知府。鶚知鎮江。比辭。召見。賜食及楮幣。諭擢用意。鶚至郡。汲汲與利除害。不出一言。暴前人短。一江漕河孔道。往經孟瀆險。議鑿河。自七里港。引金山上流。通丹陽。避孟瀆。鶚言。道遠多石。又壞民廬墓。請按京口。剛甘露壩故迹。稍深浚。通川。春夏啓閘。秋冬渡壩。道里近。功力省。又不捐居民。地利甚便。竟停役。從其言。未幾更劇。治蘇州。鶚一切簡靖。卽有建革。必審核再三。吳人重其名。旦夕責效。頗笑守迂緩。已而見其深思。曲算。圖久遠利。卽又稱林太守康濟才也。超拜江西按察使。平反冤獄。必據律。不肯輒重輕。徇上下意。廣信有妖賊。妄稱天神。夏尙書等。旁近邑。盡驚。鶚榜縛其魁。事遂解。否且用兵。或起大獄。歷兩布政使。歲饑。奏減民田租十五萬石。嶺南有獠寇急。調兵食。捍境上。寇不得入境。成化六年。陞南刑部侍郎。審訊刑獄。必從容調劑。僚屬間務適情法。內艱服闋。召刑部侍郎。時年未五十。譽望出諸卿右。衆冀鶚大用。未幾卒。官貧。無以爲殮。黃九昭謝鐸二人。爲經紀歸其喪。鶚秉禮直義。造次必恭。愼公餘。輒危坐。閱書史。臨古帖。作楷書。寢必夜半。漏盡卽起。馭下稍嚴。交遊不苟。事母程極敬愛。母不說。跪請移時。必

母說乃起。歷仕中外二十六年。家無益產。篤行孝廉。君子也。嘉靖二十二年。贈刑部尚書。諡恭肅。
史官曰

周洪謨傳

周洪謨字堯弼。長甯人。正統十年進士。少有奇質。歷官翰林春坊。專心問學。爲文詞簡直有理致。不爲奇澀語。而言意宛轉可愛。尤熟國家典故。議論建白。緣飭吏事。應對賓客。出入經史。初在翰林。卽勸英宗勤經筵。以明聖學。謹內治。以敦政本。未幾。上時政十二事。條蜀寇防禦便宜。成化初。爲祭酒。兩任國子。表率生徒。規閑整峻。又上言祀禮儲蓄省刑。減役薄稅。禦敵撫夷等十事。明朝尊崇孔子。冕服循前代。用天子制。而禮樂不稱。封號不加。洪謨以爲闕典。宜更議。下禮部尚書鄒幹不可。憲宗用洪謨議。增籩豆十二。舞八佾。十四年。陞禮部右侍郎。尋轉左。十六年。陞尚書。二十三年。加太子少保。洪謨又言書蔡氏傳。璿璣玉衡。非是以故。占步不合。乞更定。有西番烏思藏者。合諸族來貢。徵賞賚舊額。歲益至三四千人。河西諸番。又詭烏思藏。益不可詰。洪謨請視海中倭夷。給與符二十道。每貢書。貢使名及貢物符上。識以舊賜金印。至關驗。是納。否斥去。成化末月。常食不食。衆議宜賀。洪謨言。月能抗食。陰盛故也。不可賀。竟不賀。弘治元年。致仕歸。聞有敵驚。力疾上安中國御四夷十事。又三年卒。諡文安。

史官曰

夏時正傳

夏時正字季爵。其先慈谿人。徙仁和。正統十年進士。歷刑部郎中。讞獄福建。會上杭大饑。盜且起。輒發倉賑贍。不待報。上聞之喜。不問。天順初。進大理丞。以母老乞致仕。不許。乞移近地便養。改南京。進少卿。成化初。改太常。已又進南京大理卿。七年歲大饑。巡視江西。斥貪墨吏二百二十人。革冗徭。理庾賦。放無名之稅十餘萬。勸民粟七十萬石。賑饑民三十三萬。修南昌城隍。城不得壞。長河洞人叛。單車撫定。疏時弊三十事。常路者不悅。謂其好名。遂致仕歸。傲居民舍。布政使張瓚爲西湖書院於孤山處焉。久之書院火。歸慈谿。已又還杭。凡家食三十年卒。年八十八。時正博學高才。工詩文。善書。多著述。尤詳禮文之事。葉盛稱其文如春空層雲。動含雨意。又如簇置抽絲。秋鶴引吭云。

史官曰

明書卷一百二十三

列傳四

名臣傳八

姚夔傳

姚夔字大章桐廬人。正統七年進士。爲吏科給事中。條上政務八事。內艱闋。復入科。會寇變。累疏言禦寇方略。景帝監國。議卽眞。夔預議有力。景泰元年。超陞南京刑部侍郎。三年。改南禮部。敕考察雲南諸吏。四年。還朝。留禮部。上不豫。羣情洶洶。英宗復辟。調南刑部。未幾。召還禮部。天順二年。楊溥薦。改吏部。代孫弘佐王翱。七年。代石瑄爲禮部尚書。上顯夔儀度豐碩。奏對都雅。喜甚。憲宗卽位。率羣臣上思艱難。戒逸欲。重名節。數事。成化四年。疏請謹小星葛藟之分。以召百男之慶。容皇后崩。議合葬禮。又議祔廟禮。上以孝肅太后故。輒報聞。夔疏言。先帝治命。錢后與我合葬。書內閣。無忘朕言。此綱常大事。臣不忍誤朝廷。又率文武百官伏文華殿門哭諫。頓首再三。請太后竟從。百官議。孝宗嘗見夔及彭時疏。謂劉健曰。先朝大臣。忠厚爲國如此。五年。李秉去。商輅欲薦夔。彭時欲薦王概。而尹旻又欲得尙書。相持久之。乃以崔恭爲尙書。是年六月。夔代恭。七年。滿九載。加太子少保。是時屢有災變。夔力陳薦遭殺異禍。亂將起。疚心危論。冀

上感悟因乞歸不許未幾卒贈少保諡文敏夔姿儀山立論議河懸雄才偉度遇事立斷獎誘後進振拔淹流意所交識不避親故成化初夔言少保黃福得諡忠宣土木死事大臣尙書王佐鄺瑩雖贈少保未得易名佐操存正大經略弘遠瑩心術端介處事嚴恪沒於王事乞諡如福例制曰可諡佐忠簡瑩忠肅史官曰

于謙傳

于謙字廷益其先河南人七世祖基仕於金爲汾州節度使子孫世世爲大官至高祖夔仕元爲河南江北行中書省參知政事封河南郡公曾祖九思仕湖廣宣慰使都元帥最後遷杭州路總管卒老於杭遂爲杭人祖文始仕明爲兵部主事改工部父彥昭有隱德謙生而頤哲美容止七歲僧蘭古春善相見而大奇之曰異日救時宰相也爲諸生時按察僉事督學責諸生過峻爭噪而倚之方詎攘問僉事墮泮宮池諸生皆驚走謙獨前掖之起僉事督乃欲以罪歸謙謙徐曰噪公者走不噪公者留此易曉事也今不罪噪公者而罪不噪公者猶可而因以罪援公者其謂何僉事悟乃止謙由此顯名宣德中舉進士年二十三歲拜監察御史謙風骨秀峻音吐鴻暢每奏對宣宗前上必爲傾聽是時顧佐爲總憲御寮屬嚴獨才謙以爲已弗如也按江西辯明誣獄出數百人之冤死者蕃國挾和買爲市應害謙復按懲之一方若滌歸復偕錦衣官校搜捕官河之匿私鱗者所按覈於權幸不少避扈蹕下樂安州漢庶人降上卒命謙數其罪謙肆口而成其言皆正大剴切高煦俯首服上大悅還師賞鈔幣與大臣同久之議增補各部右

侍郎治諸鎮糧稅兼練卒撫民上手書謙授吏部遂超拜兵部右侍郎兼治河南山西奉璽書以往時年僅三十三謙感上知遇夙夜拊循郡邑延訪父老以便益病苦歲饒則多出官糴民粟歸庾儉則吐庾粟減值以糶公私得相贖而於下尤利齊秦民饑徙入河南者謙令邑各給田初與之牛種而以次責其稅毋令與土著淆河勢將潰謙厚築隄障之多植榆柳其上五里有亭亭有長暨卒責以修補乃至所過經由官道俱責種樹間鑿井以利行者其在山西則以大同在塞外巡按御史稀至地往往玩狎請別設御史併上谷治之而又盡奪大同鎮將之役卒墾私田者爲官屯邊用充溢謙於吏術民事亡所不精剴而尤以足兵食明舉措振綱紀爲急當是時居政本者三楊皆重謙所奏請朝上夕報可以足得行其志滿九載遷左侍郎食二品俸謙旣在官久威惠流聞嘗輕騎自河內歷太行遇盜有伏窺者謙厲聲叱之皆大驚走曰不知爲我公死罪幸赦我謙異數當入朝議事人謂卽不橐金往甯無一二土物如合薊乾茵裹頭充交際耶謙笑而兩舉其袖曰吾惟有清風而已因賦詩見志入朝舉參政孫原貞王來自代是時三楊前後卒閣振持乘勢強甚以謙無私謁嫌之勒給事中廷劾謙以久不遷怨望擅舉人自代亡人臣禮下法司論斬繫三月暑獻上振怒適解乃謂大臣吾嘗見一故御史名若于謙者恣甚欲治之今乃非此于謙耶赦之以爲大理寺左少卿而所薦孫原貞王來自顯名景泰中至尙書與謙略相埒謙甫出獄而山西河南吏民伏闕上書請借留謙者以千數周晉諸王亦言之乃以少卿復撫二省又明年復兵部右侍郎召距其初至鎮十九年矣是時南北屢用兵大盜時起尙書鄺莖以清幹著而謙佐以弘斷部

事雖稍飭。然尙扼於王振。不能大展。亡何爲正統己巳。外國也。先旣破略。獨石馬營諸鎮。至秋益猖獗。振遂挾上下詔親征。謙與鄺瑩上言也。先醜豎子耳。諸邊將士足制之。陛下爲宗廟社稷主。奈何不自重。奉以與遠人角乎。請毋煩六師。上不聽。瑩乃從治兵。留謙治部事。駕至土木蒙塵。報至京師。大震。皇太子幼不能監國。太后乃命鄺王攝政以輔之。王御左順門。時王振雖已歿。敵中外恨欲食其肉。於是九卿臺諫廷劾振罪。請用反法於其家。奏未竟。而錦衣指揮馬順者振黨也。妄傳王旨叱衆退。給事中王竑起直前。擒順曰。此正所謂翼虎者。今日猶敢爾。衆爭捶之立死。又捶二閹之嘗私振者死。時衛卒聲洶洶。王懼欲退。諸大臣皆披靡。有趨匿者。謙獨直前掖王。且啓王下令曰。捶順與二閹死者。義激無罪。少選俟得請皇太后。卽族振。且籍順等家。衆始退。於是王乃起。謙徐徐步出掖門。吏尙書王直者。最爲篤老臣。執謙手歎曰。朝廷正藉公耳。今日雖百王直。何能爲。尋進兵部尙書。謙辭弗允。乃上言。愿覩文武臣。有預軍事進止。當以失機論。卽死亦不宜濫卹報許。鄺王旣卽大位。益賢謙。虛己委焉。入對慷慨泣奏曰。敵得志挾我大駕。勢必長驅而南。今軍實武庫兵盡矣。司馬宜急分道募兵。及留漕卒自益。司空宜併日而蒐乘繕械。九門要地。宜令都督孫鏗。衛穎。雷通。張軫等分守之。都御史楊善給事中王竑等參焉。凡兵皆出營郭外。毋令避而示弱。郭外之民皆徙入內安插。毋令失所。而囂通州倉欲守之。或不能。委以與敵則可惜。宜令官軍皆給一歲祿奉。聽其自運。仍以贏米爲之直。敵所急者草。諸廠宜亦聽軍稱力取之。不盡則焚之。毋以飽敵馬。而是時石亨方坐繫。楊洪亦以逗遛當譴。謙惜其才勇。請赦之。與安遠侯柳溥爲大帥。而身總其

機宜進止。不效則治臣之罪。以謝天下。景帝皆嘉納之。敵報益急。而侍講徐理者。以曉暢軍事聞。且好言天象。上使中官召詢之。則力謂紫微中宮皆有變。必反。故都而後吉。諸中官之鼠竄者。戀土者。相軋未定。而縉紳士人多遣其私重歸。謙乃慟哭。廷諍曰。京師天下本。宗廟社稷山陵富此。百官萬姓帑藏庾廩萃此。此而不守。去欲安之。今日足一動。明日大事去矣。且敵乘勝驕。實不足畏也。上聞之曰。善。其一聽謙處分。十月也。先挾太上皇帝。破紫荆。直窺京師。石亨議毋出兵。第堅壁以老之。謙曰。不可。賊張甚矣。而我又先示弱。是佐彼張也。亟擐甲統大營。營於德勝門外。諸門皆有兵。總二十二萬。敵見我兵盛而嚴。不可輕犯。以數騎來嘗我。謙乃設伏於空屋。使數騎誘敵。敵遂以萬騎來薄我。伏發。敗之。孫鏜毛福壽復敗之。西直門謙使諜諜上皇車駕遠。夜令人以火炮擊其營。死者千計。賊遂退。詔褒嘉加少保。總督軍務。謙固辭不許。口退語人曰。四郊多壘。卿大夫恥之。今謙不能死。而以邀功賞。能無重恥哉。復上疏固辭。又不許。大同參將許貴奏請遣使贖其幣。以款敵。而徐爲討伐計。謙謂前者非不遣使。都指揮季鐸指揮岳謙遣。而敵隨入犯。通政王復少卿王榮遣。而不獲徵太上一信。其狡焉侮我而齷我。何似而可言和。況敵不共戴天。讐也。理固不可和。萬一和而敵遂肆無厭之求。從之則坐敵。不從則生變。勢亦不可和。因劾貴以介胄臣。委靡退怯。法當誅。於是邊將人人言戰守。敵不能挾重相恫喝。抱空名不義之贊。始欲歸太上。而謙之伏禍肇矣。謙以添易眞保諸州郡。爲京師拱衛。力單甚。乃皆宿兵。使都指揮陳旺等分將之。以右都督楊俊帥焉。皆屹然成重鎮。俄諜報敵逼總兵朱謙於關子口。明日復報追石亨於鴈門關。烽火連屬。衆皆恐。

請大發兵援之。謙策大敵尙遠，塞必張疑兵以脅我。乃上方略授亨等，使皆堅壁，而令各營秣馬厲士。使若將大舉者，已而賊果不至。中官喜甯者，故俘賊也。下蠶室得近，而後復沒敵爲敵用。諸所要挾皆甯謀。謙密授計楊俊，捕而磔之。復授計侍郎王偉，誘誅爲敵間者小田兒。敵自是計益屈。時復議遣使與也。先和，且迎太上。羣臣王直等請之力。上意不釋，曰：我非貪此位，而鄉等強樹焉。而今復作紛紜，何衆不知所對。謙從容曰：天位已定，甯復有佗言。和者說以解目前，而得爲備耳。上頷而改容曰：從汝從汝。於是左都御史楊善以奉使往。而上皇返駕，先朝處降敵近畿也。先入犯，多從之。而北會西南方用兵。謙與上謀，每征行輒挾其精騎以往，厚與之資，有功則官之，已而更遣其妻子。自是肘腋少它患。楊洪既自獨石入衛，而所留老弱，凡八城悉歸也。先，然彼亦不之守。謙謂此宣府垣屏也，不可棄。乃復授都督孫安計，使以精兵由龍門關出據之，而募民屯田。且戰且守。八城遂復。貴州苗寇久未平，侍郎何文淵請罷二司，專設都司，而以大將鎮之。謙曰：不設二司，是棄之也。棄之何以通滇粵道。且無故而棄祖宗所設地，不祥。遂寢。當是時，浙閩則有鄧茂七，葉宗留，廣則有黃蕭養。又有獠獠，而三楚之貴竹苗獠，處處蜂起。前後命將將兵，皆出謙獨運。號令明審，動合機宜。雖宿舊勳臣，小不中程律，卽請旨切責。究治不貸。片紙行萬里外，電燿霆擊，靡不慙慙效力。毋敢飭虛辭以抵者。以故天下咸服謙，而歸景帝能用人。太上旣歸，上奉之南城。又欲易皇太子，謙以非所職不敢爭。而皇太子立，內閣九卿俱加師傅等官。謙得太子太傅，且命兼支二俸。羣公皆一辭，謙獨再辭。其文婉約以示風。上弗許。時已巳城下之後，石亨功不如謙，而得世侯爵，心愧之。

乃推謙功。詔予一子副口戶。謙辭至再三。有云。縱臣欲爲子求官。自當乞恩於君父。何必假轉於石亨。亨聞益愧。且恨。上復賜謙闕西甲第。謙辭曰。敵人未滅。何以家爲。去病。鑿子尙知此意。臣獨何人。而敢饜此。又不許。乃置上前。後所賜。璽書袍。鎧冠帶弓劍之屬。於堂。而加封識。歲時一謹視而已。謙多寓直房。以便朝謁。一日病痰壅。上使中官與安撫醫視之。云。治痰必需竹瀝。上爲親幸萬歲山伐竹賜。且命計謙日用所需。悉出自尙方。謙惶恐謝。且乞歸。詔免朝謁。尋賜璽書。褒予備至。太宗以北伐故。宿兵燕中甚盛。而會承平久。不能無老弱。公侯中官。往往役占土木之難。半以委敵。其額雖有五軍神機三千諸營。將不相屬。相支調爲恆。謙議選精兵十五萬。分十營。營以一部督令之。五千人爲一小營。營以一部指揮領之。餘兵散歸五軍等營。以備次調。雖有楊洪石亨柳溥爲大帥。而進止賞罰一由謙。洪亨皆老將宿將。而亨尤貪縱侈自快。謙每事裁之。洪死而子俊恃勇。驚桀不可馴。嘗疏請悉發京營與諸鎮兵。大舉逐敵。而犂其王庭。可以得志。謙持不可。曰。大舉未必能值敵。值敵未必勝。而彼率其別部異道而擣我虛。甯萬全策也。俊語塞。後竟以不法爲謙亂論削。享有從子彪。以驍勇著。亨恃而強。謙出之爲大同遊擊將軍。以是益恨謙切骨。而中官曹吉祥劉永誠者。與謙共兵事。亦銜謙氣凌之。景帝不豫。石亨謀與吉祥等發南城鋼。迎太上復辟。甫御殿。而執謙與大學士王文下獄。謂謙文與中官舒良王承張永等謀迎襄王爲帝。坐以謀反律。凌遲處死。然實無顯跡可據。而廷鞠日亨等加鉗鎖鍛煉。文不勝憤。辯之苦。謙笑曰。亨等意欲死我。辯何益。既奏上。上猶豫曰。于謙實有功。若何時徐有貞與亨比。前曰不僂謙。此舉爲無名。謙遂論斬棄市。籍

其家自上賜外無長物。謙死之日，陰靈翳天，行路嗟歎。吉祥麾下，有達官指揮采耳者，以一觴酌其地而勸。吉祥悲扑之，明日復酌，勸如故。先是杭之西湖涸，龜底孫原貞時填其地，語人曰：哲人其萎乎？吾甚虞于公謙死，而陳汝言者亦亨黨，代爲尙書，不一載而敗，籍其資列內廡，上召大臣入視，已愀然曰：于謙終始景泰朝，被遇若一身而死，無餘資，汝言抑何多耶？俄西北邊報甚急，上憂之，時恭順侯吳瑾侍，進曰：于謙在不令敵至此，上爲默然。是歲有貞以內閣首輔與吉祥爭權，下獄，流金齒。又三年，亨下獄，庾死。家籍彪棄市。又二年，吉祥與其從子欽反族，謙有子冕赦歸。憲宗初，上疏白冤狀，上憐而復其官，賜祭。有云：當國家之多難，保社稷以無虞，惟公道而自持，爲權姦之所害。在先帝已知其枉，而朕心實憐其忠。天下誦而稱之。孝宗初，加贈特進光祿大夫柱國太傅，諡肅愍，賜特祠於其墓。曰：旌功冕，改文累選，遷至應天。尹有幹用聲無子，其族繼者數世而至嵩，嵩爲都督僉事，鎮福建，謙爲文肆筆立就，詩亦爽儻，然少裁割，獨其於奏疏明切，嘗口授兩吏傳寫，指腕爲痛，所存奏牘若干卷，文集若干卷，萬歷中改諡忠肅。史官曰：李夢陽爲謙記曰：謙死一時痛之，爲語曰：鸞鷲冰上走，何處尋魚噉。當敵之擁太上而南至宣府，宣人登陴曰：賴天地祖宗之靈，國有君矣。至大同復如之，而謙又獨闕言曰：社稷爲重，君爲輕，斯言也。功以之成，福以之生，然歟否耶？謙以本兵，分不言和，而言戰守，當太上之迎復，謙不爲梗，小梗者王文楊俊耳。景帝之信謙，謂其能固圉，非有布衣腹心之素，一不合則睽，再不合則去。夫人主以私愛欲易太子，雖留侯不能得之漢高，而謙能得之景帝乎？故天命所歸，大寶中奪，小人貪功，伏機叢發，元勳甫就，膺此禍。

烈智不及避，勇不決，悲哉。

劉定之傳

劉定之，字主靜，永新人。正統元年進士，授翰林編修。四年京城大水，詔求直言，定之上十事留中。進侍講，景帝登極，又言十事，乞奪德勝門戰功陞職，以崇廉恥，作敵愾，陞洗馬，尋進右庶子。北敵邀使，廷議未決，定之言宜遣使糜敵，我得益修內治。天順元年改通政司參議，兼侍讀。成化二年大學士李賢卒，上欲得人入內閣，敕王翱慎簡，擬上柯潛、萬安定之。葉盛、吳節、上特用定之。陞太常少卿，兼侍讀。學士三年，進工部侍郎，兼翰林學士。明年改禮部，定之在內閣，再進密疏，皆國家大計。定之博學能文，性尤孝友，微時苦家貧，授徒資束脩爲養，既仕分祿，自甘菲惡，色溫氣和，與物無忤。至居官論議，據理直言，略無沮忌。卒贈禮部尚書，諡文安。

史官曰

楊繼宗傳

楊繼宗，字承芳，山西陽城人。天順元年進士，性鯁直，言動磊落，初爲刑部主事，獄中重囚數百，久桎梏，多臭腐死。繼宗巡獄曰：此曹罪皆死，卽未死亦宜善視。時與食飲，櫛沐，蘇人無算。會廷議擇郡守，王翱薦知嘉興府。繼宗攜一蒼頭書一篋，署中蕭然如旅舍，與學勸士，憫農賑災，夙夜不懈。民有事至郡，和顏曲問，盡得郡中諸豪姦及良馴狀，與民所疾苦，爲調劑興革。有孔御史者，挾威凌有司，杖殺人，繼宗榜通衢，孔

御史酷撻人至死者言府孔御史見之卽之旁郡去嘉興常江南孔道內臣往來百方索賂繼宗直與菱藕歷日內臣曰我無用此太守幸與我金或好布絹繼宗曰諾卽出牒取庫金云與太監市布絹金錢在也幸與印券附案他日磨勘內臣咋舌不敢受繼宗有大節持風裁藩臬御史皆憚敬之在郡誅鋤姦豪盡束手斂跡但得改過卽止不深究滿九載民遮道扶攜不忍舍去爲立生祠祀陞浙江按察使繼宗在嘉興廉聲正氣滿天下比至浙臬威信益著貪墨吏望風走避盡革諸司和市鎮守內臣橫日索供萬錢繼宗一符下杭盡革未幾內艱歸一篋自隨惟衣數襲制律書數冊而已制閱起爲僉都御史巡撫順天永平戚宦莊田占民者盡奪還民成化二十一年上疏忤旨左遷雲南按察副使弘治元年陞湖廣按察使再陞僉都御史巡撫雲南卒於官繼宗好善惡惡出於天性與人不苟合人亦憚其方嚴居官三十餘年所至民懷父母吏畏神明忠孝諒直光明俊偉雖庸人孺子皆知其名或言其別白太明節目太疏言論太激非知繼宗者也孫新民熹宗朝爲御史有聲清節大著有祖風

史官曰

張甯傳

張甯字靖之海鹽人景泰五年進士授禮科給事中七年大學士陳循王文以其子不得鄉舉順天考官劉儼幾中傷得罪甯疏言元宰私其子陷考官失大臣體天順中數數裁曹石請乞事上以是知甯朝鮮毛憐仇殺內降遣甯與都指揮武忠偕往既行遼東奏至敕臣取便進止甯時至遼陽拜敕言君仁臣忠

敢自便乎。竟至朝鮮致命。憲宗卽位。乞經筵進講大學衍義。又薦起王竑。李秉爲兵部尙書。都御史。諸大臣不說。皇太后壽誕。設齋醮禮官。斂大臣金錢祈福。甯言人臣當和衷敬德。仰贊聖孝。上綏懿社。釋老不當崇奉。瓣香非可祝釐。行之祇壞風俗。傷名教。南京給事中王徽等劾李賢。獲罪謫邊。甯又合六科申救。以故諸大臣益忌之。適廷薦甯及岳正。可任。清黃侍郎都御史者卽其疏。竟陞爲汀州知府。及至汀。先教化。後刑罰。盡除厲民弊政。勵學生。造祭器八百事。表節義。恤孤獨。禁遊惰。郡事一新。諸上官故忌甯才。甯爲給事中時。才高不屑下人。人以故輒推挫之。甯亦抗志。求致仕歸。家居三十年卒。甯貌偉。修度。雄文直道。御命萬里。專對不辱。出守南郡。勤恤民隱。早見遯歸。養高林壑。閑家有則。孤蹤無玷。

史官曰

徐有貞傳

徐有貞。初名瑄。字元玉。後改今名。吳縣人。生而短小精悍。目光炯炯。注射。穎敏絕世。十二三卽能爲古文辭。以其業贊都御史吳訥。太子賓客胡儼。皆賞異之。宣德中舉進士高第。是歲以三月選進士尹昌等爲庶吉士。僅六人。至十月而復選庶吉士。得十三人。而有貞居首。上甚屬意焉。居二載。上爲御文華殿試之。有貞仍居首。授翰林編修。預修實錄。玉牒。進侍講。有貞博洽而好習兵法。及刑名水利諸家言。於天文風角占驗。尤精究不倦。人或謂有貞。此豈公職耶。有貞笑曰。待職而後習。則已晚矣。英宗卽位。天下承平久。執秉者新。方從事西南夷。而不虞敵。有貞憂之。上封事千餘言。皆關係國家大計。而於備敵事尤切。下所

司議行久之也。先犯宣府大同諸陵。閻王振挾上北伐。且啓行。而有貞指天象。謂所親曰。茲行也。必敗。上不歸矣。已而敗。問至。大駕果蒙塵。中外籍籍。謂有貞知兵。郕王監國。召有貞入。使大璫與安等問計。有貞爲言。紫微垣俱已動。急乘敵未深入。還故都爲便。與安等而叱之。尙書于謙。廷請斬倡南遷者。刑部侍郎江淵。亦自稱知兵。次入對。以固守之說進。得直文淵閣。而有貞屈景帝卽位。有貞以才舉。行監蔡御史。俾鎮河南。以備緩急。援有貞請於執政者。必便宜行事。易璽書而後發。時所治彰德郡。民驩聞變。爭亡匿山谷間。有貞擇倖丞之屬。素見信者。使拊之。皆歸業。有貞乃建牙幕。兵入衛。且萬人。然多太行羣盜。有貞厚其餼。教以坐作進退擊刺之法。使自相團結。而不籍其實址。以故其人雖難制。皆踴躍願爲官用。會敵退。有貞罷鎮。徵還京師。充經筵講官。進右春坊右諭德。仍兼侍講。有貞既負材譔。急欲大顯用。邑邑不自得。乃以玉帶獻大學士陳循。而進日者之術。曰。先生帶且玉矣。居無何。循加少保。心喜有貞。數爲上言之。上不答。國子祭酒缺。循以言。上曰。是徐瑛耶。南遷之謬也。而可長成均也。有貞久之不遷。不能無望。循循見之。第云君無仍舊名而已。有貞悟。始改今名。是冬河決張秋。石璞治之久無功。集議文淵閣。推有貞擢僉都御史。治河。有貞自北東沮南。西踰濟汶。沿衛及沁。循河道濶。范究源流。度地行水。上疏曰。臣聞平水土。要在知天時。地利人事而已。蓋河自雍而豫。出險之夷。水勢旣肆。又由豫而兗。土益疏。水益肆。沙灣之東。所謂大洪口者。適當其衝。於是決而奪。濟汶入海之路。以去。諸水從之。而洩隄潰渠。淤澇則溢。旱則涸。此漕途所由阻。然欲驟壅。則潰者益潰。淤者益淤。今請先疏其水。水勢平。乃治決。決止。乃濬淤。多爲之方。以

時節宜俾無溢涸。必如是而後有成。制曰可。有貞往來經營。作治水閘。疏水渠。渠起張秋金隄。西南行九里至濮陽灤。又九里至博陵陂。又六里至壽張沙河。又八里至東西影塘。又十有五里至於白嶺灣。又三里至李舉。由李舉而上。又二十里至蓮花池。又三十里至大瀦潭。乃踰范既濮。又上而西。凡數百里。經瀘淵以接河沁。有貞曰。河沁之水。過則害。微則利。乃節其過而導其微。平其水勢。既成。渠名廣濟。閘名通源。渠有分合。而閘有上下。凡河流之旁出不順者。則堰之。堰之九。長袤皆至萬丈。九堰既設。其水遂不東衝沙灣。乃更北出濟漕渠河。西鄆東曹南鄆。北出沮洳。而資灌漑者。爲田百數十萬頃。又參綜古法。就長擇善。加神用焉。爰作大堰。其上鍵以水門。下捍以長隄。堰崇三十有六尺。厚什之。長百之。門廣三十有六丈。厚倍之。隄之厚如門。崇如堰。長倍之。架濤截流。柵木絡竹。實之石而鍵以鐵。蓋合土木火金以平水性。又導汝泗之源。出諸水。匯澶灤之流。納諸澤。又濬漕渠。由沙灣北至臨清。凡二百四十里。南至濟甯。凡二百一十里。復作放水閘於東昌龍灣魏灣。凡八。爲水之度其盈。過丈則洩。皆通古河以入於海。上制其源。下放其流。既節且宜。用平水道。初議者欲棄渠弗治。而由河沁及海以漕。又欲出京軍疏河。有貞因奏瀕河民馬牧庸役。專力河防。以省軍費。紓民力。工部請如有貞言。不中制。以是得成功。是役也。聚而問役者四萬五千人。分而常役者萬三千人。用木大小十萬。竹倍之。鐵斤十有二萬。錠三千。錘八百。釜二千八百。麻百萬斤。荆倍之。藁秸又培之。而用石若土不可算。然用糴於官。僅五萬石。爲日五百五十有九。先是有貞嘗欲築一決口。下木石則若無者。而恠之一僧居山中有道術。有貞往叩焉。僧無所答。第云聖人無欲。

有貞沈思。覺日而始悟。曰：僧蓋言龍有欲也。此其下有龍穴。吾聞之。龍惜珠。吾有以制之矣。鐵能融珠。乃溶鐵數萬斤。沸而下之。龍一夕徙。而決口塞。夫有貞知制龍欲。而不知龍之以欲見制人也。功成。景帝大悅。召對。褒勉之。進左副都御史。駁駁用事。不能稍自制。而比於石亨。從迎太上皇於南宮。始亨與許彬善。以謀語之。彬曰：善。應天順人。功莫大焉。雖然。彬老矣。無能爲也。必徐元玉而後可。亨乃謀之。有貞指天象曰：豈其復爽耶。遂與共決南宮錮。而英宗復辟。捕于謙等下之獄。有貞之銜治河命。則大學士商輅與有力焉。至是併陳循等。皆弗能救。從之下石。卽日進兵部尚書。兼翰林院學士。直文淵閣。于謙等之禍。中外咸側目。有貞而有貞意。殊自得。請於石亨曰：願得冠側注。而從兄後。石亨爲言之。上曰：爲我語。有貞但戮力。不患不封也。居旬日。亨復言。上乃下詔。封有貞奉天翊衛推誠宣力守正文臣。特進光祿大夫。柱國武功伯。歲祿一千一百石。子孫世爲錦衣衛指揮使。進兼華蓋殿大學士。領文淵閣。賜貂蟬冠。玉帶。公服。旬月之間。恩賜赫奕。與石亨張軏等埒。時上旣以虛己委有貞。而石亨與閣吉祥。數干預大政。有貞積不能平。而私讎上於亨吉祥。不能無厭色。乃稍稍裁抑之。且爲上微言其貪橫狀。上亦爲之動。會御史楊瑄。糾亨吉祥。侵占民田。諸不法事。上復以問有貞及李賢。有貞等對與瑄合。乃獎瑄敢言。俾覆覈所侵田。於是御史張鵬等。遂具草悉糾亨它罪狀。將上之。而兵科都給事中王鉉密以告亨。亨馳訴於上。謂鵬乃已僂兇豎。永猶子。結御史爲永報讐。上遂御文華殿。悉收諸御史。而詰之。諸御史具亨事。俱有驗。上怒曰：亨卽實。汝曹何不早言之。下錦衣獄。究主使。詞連有都御史耿九疇。副都御史羅綺。皆下獄。亨復訴。

於上謂有貞賢實便之。於是併下獄。獄具有貞謫廣東右參政李賢謫福建右參政諸御史獨楊瑄張鵬戍。而九疇綺等從輕比謫官。尋以李賢素謹重。不預情。留之。有貞既行。而有以飛章謗國是者。其語復多侵享吉祥。於是復訴之上。謂有貞實又使之速歸。置獄拷窮極鍛鍊。無所得。而摘其誥詞。攢禹神功語。謂爲所自草。坐大逆不道。當死。以雷震奉天門。宥爲民發雲南金齒安置。有貞謫金齒之四年。而復指天象語人曰。曹石禍作矣。是慘於我。我且歸。而石亨死獄中。籍家。其冬上御文華殿。諭李賢王翱曰。徐有貞才學亦難得。當時有何大罪。爲石亨張軛所陷。如後世議何。可釋歸田。乃赦還里。又二年吉祥族誅。有貞時尙壯。負其材。謂上思我。必且召。上竟弗召。天下亦頗惜有貞才。而惜于謙才甚於有貞。其冤有貞。又不知冤于謙。以故里居者十餘年。無推轂者。晚乃放浪山水間。頗以詞翰著聲。文雄奇。詩亦遒勁。竟鬱鬱不得志而卒。

史官曰。徐瑄狡狴傾險。怙恃才技。幸天下有事。沾沾自喜。當駕出而私語所親。驅妻子去國。不聞叩馬之忠。及北狩而倡議南遷。傾搖人心。幾蹈靖康之禍。賴廟堂君非宣和。臣有宗李。屹然不惑。再奠鍾虜。而瑄自愧其言之不酬。包藏禍心。嘗欲動危天下。而已有大功奪門之役。所自來也。玉帶賂陳循。貂冠此亨。軼志驕意得。潛伏殺機。遂至蔽鵬舉之誅。碧葭弘之血。貽人主藏弓之悔。傷天下忠臣義士百身莫贖之心。理之肉豈足食哉。跡其守國之智。曾不如金英。而媚嫉之才。乃甚於林甫。千秋萬世。當比於盧之殺顏。張之殺岳。並汚青史。區區河功。何足道哉。

莊昶傳

莊昶字孔暘江浦人。成化二年進士。選庶吉士。授翰林檢討。與羅倫陳獻章友。未幾與編修章懋黃仲昭上培養君德疏。曰。成化三年十一月二十九日。內閣遣郎中韓定持小揭帖到東閣及史館。分與太常卿兼侍讀學士吳節等。令各賦詩。臣等各授一帖。內開花果煙火等項。面帖詩讚題目。仍令依舊格擬進。及觀舊格。俱是玩好之物。鄙褻之詞。臣謂陛下卽位之初。下溫詔。放田租。絕貢獻。停不急之務。與民息肩。天下欣然。承望太平久矣。及觀去年以來。如遣人造楮。國家舊制也。一聞大臣之言。而遂寢。節令宴樂。每歲常例也。一聞大臣之疏。而遂罷。且因災異。敕諭羣臣同加修省。凡此數事。臣未嘗不頌陛下從善如流。今日之舉。或兩宮在上。陛下欲極孝養。以奉其權耳。然大孝養志。不在玩好。母后恭儉。德著天下。不在煙火。況兩廣弗靖。四川未甯。遼東離亂。北敵毛里孩包藏禍心。江西湖廣大旱數千里。正宵旰焦勞。不遑暇食。兩宮母后同憂之日。臣知陛下決不暇爲此也。且翰林以論思代言爲職。雖供奉文字。而鄙俚不經之詞。豈宜撰進。嘗伏讀宣宗翰林箴。曰。啓沃之言。惟義與仁。堯舜之道。鄒孟之陳。煙火之舉。恐非堯舜之道。煙火之詩。恐非仁義之言。臣是以不敢妄陳。疏入。謫桂陽州判官。給事中毛弘御史陳莊論救。改南京行人司副。久之。以家艱去。不復起。居定山垂三十年。因薦召至京。徐溥言。當復昶官翰林。止復行人司副。遷南監封郎中。得風疾。居野寺。明年乞休。不允。輒歸。先是。廷臣薦邱濬惡之。曰。我則不識莊定山。卒不獲入翰林。及補行人司副。張居正語人曰。景復能作大字拜帖耶。人謂景不如不出。景家居。潛心理學。從講者常

數十人海內望如羽儀。人稱定山先生。

史官曰

陶魯傳

陶魯字自強，鬱林人。父成爲按察副使，從擊賊，兵敗死之。上旌死事者，贈官，錄一子。魯得一冑，盛年二十，授廣東新會丞。魯機明內蘊，而神觀不足，或從令尉列見上官，獨昏睡。雖督榜不恤也。大藤峽諸作亂，兩廣都御史韓雍總師討之，檄魯隸麾下。雍威擬王者，二司長吏見長跪白事，慴悚若不自勝。一日，顧峒賊最強險難下者，方設策。魯時直飲食，侍左右。漫謂曰：「丞揣我何意？」魯曰：「得非某賊耶？」雍曰：「然。」丞能往否？曰：「匪直能，且易耳。」雍怒曰：「賊銳甚，又楹阻自衛，非大兵不可入。」部下文武數百千人，熟視無可當吾寄者。吾方欲身往，安得易？且使若食粟能之耳。」叢爾邑不能理，乃言擊賊。若妄當筭，魯不拜，抗言曰：「夫賊難攻者，非賊難也，我難其攻賊者也。謂魯解食粟，不解擊賊者，明公未悉魯也。」蔣琬龐統廢邑事，後乃爲蜀名臣。公幸無棄魯，使得畢技，當悉縛諸醜以獻。雍異之，改容曰：「若所將幾何而辨？」曰：「三百人足矣。」曰：「何少也？」曰：「魯猶以爲多，兵貴精，請仕選擇。」雍曰：「任爲之。」魯乃標式約曰：「有能力舉百鈞，矢射異二百步者來，二軍之士十五萬人，其比於式者得二百五十人。」曰：「未也。」請復下令幕幕數日，魯乃爲別將，日操練陣法，椎牛酒犒，甘苦共之。士爭願爲死，率以先登。大破賊，斬首無算。賊穴所得士女金帛，悉以分於三百人，己無與者。衆益奮。韓雍大稱賞，言於朝，擢爲令。累功進同知肇慶府按察僉事副使。左右布政使錄其子爲錦。

衣千戶。魯前後任廣東。所殺及降者二萬七千餘。賊聞陶家軍。駭悚遁避不及。遇卽叩首。乞爲良民。得無死幸甚。所由終此三百人。魯有以服其心。累用不躡。語有之一夫決。萬夫避。況茲三百。

史官曰

闕



明書卷一百二十四

列傳四

名臣傳九

儲瓚傳

儲瓚字靜夫。秦州人。成化二十年進士。歷南京考功主事。文選郎中。弘治七年調考功。十年陞太僕少卿。瓚與物無競。而自守介然。在考功出入三年。臧否不淆。交遊稀寡。嘗薦張吉等五人。可任諫官。論救科道龐泮等。不宜以言事下獄。武宗初陞太僕卿。明年僉都御史。總糧南京。閒局無事。專心經史。訪輯國朝故事。又明年入爲戶部侍郎。閣瓚專權。公卿奔走瓚前。瓚愧憤引疾去。李東陽與瓚善。得允致仕。上以瓚有才望。行且起之。去數月。瓚誅乃起。時瓚雖誅。諸倖佞繼用。瓚亦不樂。明年又乞休去。七年起南京戶部侍郎。是年冬改南京吏部。辭益力。起益數。其瀆易恬靖。人皆慕之。卒諡文懿。

史官曰 閱

李東陽傳

李東陽字賓之。茶陵人。祖以戌籍隸金吾。居京師。東陽四歲能作大書。景帝召見。命書龍鳳龜麟十餘字。

奏上大喜。抱諸膝。賜寶籙。及上林珍果。六歲八歲。復兩召試。講尚書益稷篇大義。命肄業京庠。年十六。舉順天鄉試。天順八年甲申。進士二甲第一。選翰林庶吉士。成化元年授編修。十年陞侍講。十九年進侍講學士。明年充東宮講讀官。憂去。弘治二年己酉。遷左庶子。兼侍講學士。四年預修憲宗實錄。成。陞太常少卿。仍兼前職。掌翰林院事。充日講官。七年擢禮部右侍郎。兼侍讀學士。典誥敕。八年乙卯。命兼文淵閣大學士。入內閣預機務。時占城爲安南侵擾。請賜詔。上命中官往問東陽曰。春秋王者不治夷狄。安南雖奉正朔。修職貢。然恃險負固。積歲已久。今遣官至其國。徒掉寸舌。小必掩過飾非。大或執迷抗命。若置而不問。損威已多。卽問罪興師。貽患尤大。宜勿聽。十年中官李廣以燒煉齋醮被寵。東陽與同官上疏曰。我祖宗自洪武至天順間。而召儒臣。咨議政事。今朝參外。不得一觀天顏。且經筵日講。成就君德。裨益治道。今每歲進講。不過數日。夫人君之心。必有所繫。不繫於此。必繫於彼。正士旣疏。則邪說乘間而入。近有以齋醮燒煉進者。此乃異端惑世之術。聖王之所必禁。宋徽宗崇信道流。及金兵圍城。方士郭京誑稱作法。卒使乘輿播遷。社稷顛覆。求福不得。反以致禍。至若燒煉。其禍尤慘。金石之藥。性多酷烈。一入腸腑。爲禍百端。唐憲宗藥發致疾。雖杖殺方士柳泌。竟亦何益。今上清龍虎宮神藥祖師殿。及番經廠。皆焚燬無遺。神如有靈。何不自保。天厭其穢。亦已明甚。矧焚惑失度。太陽無光。天鳴地震。草怪木異。四方奏報。殆無虛日。伏望嚴早朝之節。復奏事之期。勤講學之功。優接下之禮。遠邪佞之人。斥誣罔之說。太平之業。可保矣。適武岡知州劉遜以侮闈逮繫。科道公口奏救。上震怒。俱下獄。東陽復上疏申救。得釋。尋召至平臺。奏事。

云十一年戊午皇太子出閣加太子少保禮部尚書復召見面議團營總兵官去留是年清甯宮災東陽復與同官上疏曰近年以來災異頻仍內府火災尤甚或以爲天道茫昧變不足畏此乃慢天之說或以爲天下太平患不足慮此乃誤國之言或以齋醮祈禱爲彌災此乃邪妄之術或以縱囚釋罪爲修德此乃姑息之計熒惑聖聽莫此爲甚且賄賂公行賞罰失常紀綱廢弛賢否混淆工役繁興軍民困憊下情不達上澤不宣愁歎之聲上干和氣災異之積止此之由其時又有爲李廣乞祠額者東陽執不可及清甯宮成召能仁寺僧入大內慶讚東陽又執不可上皆從之十二年己未給事中華昶劾程敏政考會試通私命東陽覆試十五年會典成賜玉帶十六年加太子太保戶部尚書謹身殿大學士十七年命祀闕里還上時政疏十八年上召問東陽極言奏討鹽法之弊語具食貨志上不豫召入御几前受顧命武宗卽位加光祿大夫柱國少傅餘如故正德元年丙寅上不親政又與同官上疏曰近日視朝太遲免朝太多奏事漸晚嬉游漸廣夫奢靡玩戲非所以崇儉彈射釣獵非所以養仁鷹犬狐兔田野之物不可育於朝廷弓矢甲冑戰鬪之象不可施於宮禁正人不親直言不聞而此數者交雜於前臣竊憂之近六月中風雨飄蕩雷霆震怒正殿鴟吻太廟脊獸天壇樹木禁門房柱摧折燒燬災異尤甚惕然省悟側身勵精庶可回天慰人不聽又與同官上疏語在健傳又陳政令十失是冬加少師兼太子太師吏部尚書華蓋殿大學士二年閣瑾擅權益恣暴尚寶卿崔濬御史姚祥主事張偉爲選卒誣執荷校長安門外東陽力救得戍邊大治內苑御船爲獵獸之戲上疏曰今歲自端陽後金鼓炮火聲徹都邑廐牧廝役紛充禁廷

大臣畏忌不敢言。小臣震懼不敢諫。不知祖宗分職設官。朝廷糜祿養士。將焉用之。伏望鑒古道以端好尚。視朝加早。則炎暑不侵。進膳有時。則元氣日盛。三年給事中安奎。御史張彥。忤瑾荷校。東陽又疏救。釋之。都御史楊一清逮繫至。東陽又力救。是夏早朝。有投匿名文書數瑾罪者。瑾怒。留上坐東角門。凡五品以下羣臣班相近者三百餘人。悉逮詔獄。即日仆地死者數人。東陽又力救出之。五年夏旱。蠶上疏條四事。有山東梁姓者。自陳常捕盜七十八人。乞陞土官巡檢。都察院覆奏。請查七十家窩主鄰佑。俱發遣籍沒。東陽執不可。曰。七十家尙未必真。況若干無辜耶。皆得免。瑾又巧取橫斂。因窘迫文臣。凡公移錯謬。以姑免。提究爲名。各罰粟。初二二百石。漸至千五六百石。俾輸邊。東陽委曲開導。瑾不從。乃奏移邊倉爲關倉。地稍近。猶不堪。後因瑾欲天下府州縣預積倉粟。東陽言各官罪納。在邊關多勞少益。不若使納之原籍。其隨事應變類如此。四川鎮守太監羅籥。請便宜行事。瑾主之。東陽力言不可。因上疏。以爲太祖設官定制。在外都布按三司。都司管兵。而不管錢穀。布政司管民。而不管軍馬。按察管糾劾刑名。而餘則不預。其權蓋分而不專。此祖宗防微杜漸之深意也。永樂以後。漸差。都御史在外巡撫。其有番漢去處。則置鎮守總兵官。後差內臣一同鎮守。撫安軍民。防禦賊寇。其權雖同而不專。故敕諭之詞曰。會同計議。停當而行。毋得偏執違拗。未有一人專制之方者。且如四川所奏。王府宣慰。皆其綜理。夫以親藩之隆重。土官之強悍。彼心不服。則罅隙必生。又如舊有草寇生發。則調兵征勦。土官必須奏請。所有關係。尤非細故。今既革其巡撫。若并付鎮守。任其進止。非惟事體不便。恐鎮守一人亦自擔當不起也。百五十年所未有。豈敢一

且增添。若天下鎮守比例而行。則其所係又不止一方而已。上從之。遂止便宜。陳俊之得罪也。瑾因及漕運總兵官平江伯陳熊。以溼潤米等銀爲贓。致大獄。必欲置之死。東陽力爭。瑾謂熊所犯罪重。不宜姑息。東陽曰。某誠姑息。但非姑息陳熊。乃姑息陳瑄耳。瑄在太宗朝。開河通漕。有大功。金書鐵券。子孫免死。豈可盡革以傷世臣之心。瑾曰。國初功臣如常鄧。皆百戰功。今子孫且革。陳瑄不從。所殺有功。豈足深惜。東陽曰。漢高親定十八功臣位。以蕭何不曾所殺。但因供餉不足。遂以爲萬世之功。位居第一。蓋足食然後足兵。使當時餽餉不繼。雖百張良十韓信。豈能成功。蕭何餽餉。猶是一時爭戰之日。陳瑄通漕。每歲四百萬石。至京師。誠國家萬世之利也。瑾不答。止革熊爵。會竄鑄之變。朝廷命將出師。詔誥天下。內一款。取回各處差出官校。瑾不然。曰。是要革行事衙門。此係累朝舊例。如何可革。東陽曰。舊例行事官校。止在京城。今差四外。聲勢煊赫。驚疑天下。姦詐之徒。因而矯託。眞僞莫辨。今已累犯朝廷處分。若眞者取回。則僞者無所容矣。因以天順元年舊藁示之。瑾語塞。會張永發瑾姦伏誅。上以東陽有反正功。加特進左柱國。廢其從子兆蕃爲尙寶丞。是時籍瑾文書。得秦府永壽王爲瑾慶壽文。中間稱謂過於卑詔。上見大怒。欲降敕切責。東陽諫曰。自古定亂賊者。正名定罪。誅其身。昔漢光武平王郎。得交通文書。會諸將焚之。曰。令反側子自安。歷代相傳。以爲故事。況劉瑾亂政。假上威福。以劫天下。天下誰不屈意奉之。書信往來。雖於法有礙。但因畏罪。避惡。多不獲已。況王府懿親。若指此論罪。則遠近傳聞。各不自安。事有不可測者。今瑾旣誅。惟聖明置一切不問。悉燒燬。以滅其跡。使人心安帖。上以爲然。悉取文書焚之。無延及者。東陽見上。

多乖政。乃上疏曰：天下者，祖宗之天下，上天所付託，生民所仰賴。高皇帝櫛風沐雨，十餘年而後定，何其勞也。文皇帝南征北伐，定鼎貽謀，二十餘年而後成，何其難也。列聖相承，兢兢業業，罔有怠荒。先帝願命，惟欲陛下早嗣大位，早成大婚，光前裕後，衍無疆之澤，聖慮所及，何其深且遠也。臣願念上天付託者重，思祖宗授受者隆，體生民仰賴者切，每於朝奏講讀之暇，安處宮闈，溥施恩澤，起居以節，游豫以時，保養天和，培植國本，則六氣莫能侵，百邪不敢近矣。不報。七年，流賊數十萬，殘破半天下。王師屯德州，惠安伯張偉不能出，馬中錫以祖墓恐為脅制，倡為撫議。東陽憤然主勦賊，就平。上以為有功，加廕一子錦衣指揮。辭上以京軍不習戰陣，使至邊練習，調邊軍衛京師。東陽疏陳不便者十曰：京邊官軍各有分地，無事而動。一、京軍不習戰陣，恐傷國威。二、京軍出則駭人耳目，致驚疑。三、京軍在外特勢，擾奪淫汙，將官護短不肯禁，小民受害不敢言。四、邊軍在內，狎恩市愛，傲視軍民，蔑視官府，治之則或不能堪，縱則愈為恣肆。五、遠鄉井背骨肉，或風氣寒煖不相宜，或日費不繼而嗟怨。六、正糧之外有行糧，布花之外有賞賚，非緊急不得已之時，為糜費無極之計。七、往來交錯無寧日，或變起道途，或患生肘腋。八、示京營之空虛，見中國之單弱。九、西北諸邊見報聲息，唇齒之地，正須策應，脫有疏失，咎將誰歸。十、不聽遂乞休。卒年七十。贈太師諡文正。有謂東陽撰劉瑾造立真觀碑極其稱頌，人始以其泄捕瑾等事故得全，而鄭曉謂東陽慧悟夙成，文章流麗，代言敷奏，明暢爾雅，又能獎進才雋，推挽聲譽，風韻所漸，人皆嚮附，事孝宗稱忠勤，武宗時周旋曲濟，保護善類，清謹弗渝，休休不專，政歸卿寺，人願思之。

史官曰。李東陽高才絕學。掩映一世。而休休容物。使慕之者傾。忌之者服。故能譽謬於治朝。委蛇於亂世。弘濟時艱。保護善類。天下陰被其澤。而人不知也。夫陳實不去。以全鉤黨。呂好問不去。以圖反正。彼以潔身之義見繩。惡知龍蛇之用乎。

馬文升余子俊葉盛傳

馬文升字負圖。鈞州人。生有異質。貌瓌奇。多膂力。童時常與羣兒戲。每仆羣兒百十地下。識者知爲異人。年二十六。登景泰二年進士。爲御史。時王文王綸領院。皆嚴重鮮可。而獨以文升爲國器。出巡晉楚。有神君之名。天順七年。陞福建按察使。憤鎮守中官擾民。輒繩以法。民戴其德。謠謠載道。成化元年。進南大理寺卿。未幾。憂去。四年。固原土胡滿四反。據石城。我兵屢敗。卽家起右副都御史。爲巡撫。佐總督項忠。率京邊諸軍五萬討賊。文升馳急傳。十日至陝。時兵已發。則簡練其留後者。申約束。通餉道。五日而嚴馳至軍。偕項忠屯中路。文升言於忠。使盡焚城傍草。斷汲路。賊始稍稍困。石城潰。先後俘斬七千六百有奇。獲其男女老弱二千六百。捷聞。轉左副都御史。賜金帛。時流賊起。漢中李鬚子。潼關火蝸兒。滿城王彪。聚衆劫殺敵官軍。文升悉計翦除。又破敵阿樂。出亂加思關。八年。敵入寇平涼。臨鞏。追至黑水口。擒其平章鐵烈孫。斬首多。遂上時政十五事。及禦邊三策。尋命節制三邊九嶺。敵至。遇伏驚遁。盡棄輜重。獲之不可勝記。擒斬二百。勒石以紀。又勦平岷州叛番。擒其首。文升每奏捷。不爲夸張。中亦無主之者。至十二年。始召入兵部。爲右侍郎。出總遼東軍務。制五花營八陣圖。訓士皆成精兵。上禦邊十五事。敵退。轉左。加俸一等。十

四年巡撫陳鉞誘屠殺貢夷屬。由是羣夷譁懼爲亂。命文升偕大通事往撫。時汪直恃寵倖功。陰主鉞議。邀文升偕行。文升弗聽。竟疾馳至鎮撫。乃盡赦其被屠家黑嶺忒等數百餘人。撫以好語。給以布粟。而海西三衛皆嚴兵來聽。文升察其詐。乃具言狀而行。諸路伏兵以待。俄果入寇。伏兵發。斬首二百餘級。生擒數十人。敵駝馬稱是。因以兵威諭都督產察。悉請歸命。比汪直至。敵已解散。直無所獲。忌文升。鉞行事乖方。文升多更置約束。不得動。亦大憾。文升會直巡邊。鉞具戎裝遠逐。除道。飭廚供張。鮮備。賄託。僂從。文升獨與直抗禮。又無所遺。奴視其左右。左右多譽鉞。詆文升。鉞乘間譏毀。直還奏。文升妄起邊釁。謂三衛諸敵皆以文升禁不與易農器。故屢寇塞。上遣直及刑部尙書林聰卽訊遼東。直稍禮聽。上報盡如直言。遂下文升詔獄。文升上言。實禁鐵器。非農器。竟謫戍重慶。已而直敗。鉞亦敗。下詔獄。文升得雪。復官致仕。十九年起爲左副都御史。巡撫遼東。禁輯科害人。無敢犯。文升三至遼東。皆樹奇績。明年進右都御史。督漕。兼江北巡撫。旋入爲兵部尙書。念天下方困於兵。會貴州都勻苗叛。守臣請合三鎮兵討。文升不可。惟遣官勘處。卒無它。人服其識。尋方士李孜省寵倖。欲有所薦引。取中旨。改南京。參贊機務。弘治元年入臺。爲左都御史。是春上耕籍田。旣宴。教坊以雜劇進。出狎語。文升厲色曰。爾曹第陳農家作苦。使新天子知稼穡艱難。豈宜以此瀆亂宸聰。卽斥去。二御史以糾彈下獄。文升言卽位之初。不宜輒罪言官。遂得釋。又上時政十五事。上特命提督十二團營。掌院事如故。時子總以鄉貢士待選。文升使請外。曰。必大臣子而京秩。誰當外者。明年改爲兵部尙書。京城大雨。上時政十事。於貴幸多所侵。又嚴覈六軍諸校。斥其貪。

黷選揆者二十餘人。以是有怨家。夜持弓矢驚文升門。又飛書射入東長安門內。事聞。上嚴令錦衣官校緝訪。而給金吾騎士十二出入爲文升衛。文升因乞休。優詔不許。屬文升有小疾。而敵小王子以數萬騎駐大同邊外。勢洶洶。上使內臣挾醫視文升疾。文升謂此敵方敗於它部。勢已絀。無能爲也。請密爲備。而揚聲逼之。敵果徙去。南安侵奪占城五州地。詔勒還之。數支吾不服。會二國各入貢。乃請而折諸廷。安南詞服。因諭以恩威利害。厚賜之歸。還其侵地。廣西土守岑欽。與其姪溥相讎殺。巡撫欲討之。文升不許。第令騰書戒飭。已皆悔悟和解。時天下多水旱。文升力請救撫。臣發庾以賑。方馬政弊甚。民苦孳生寄養。請覆覈減定其額。著爲令。加太子少保。又加太子太保。時傳陞畫工張玘等爲錦衣千戶二十七人。文升力諍。謂此先朝弊孔。賴上初窒之。今復啓之。無功而冒武職。徒使邊將解體也。江南歲祲。有司請募民入粟。授以指揮等官。文升復諍。以爲予指揮。亦能使邊將解體。宜第予散官。上皆爲停之。四年內艱起。復敵伏當加叛。繫至京。不服。文升折數語。伏地請罪。竄南海。先是哈密忠順王者。故元遺孽。太宗寵其王。予金印。居哈密。忠順王死。王母當國。爲土魯番鎖檀阿力所擒。奪金印去。弘治四年。鎖檀阿力久故。子阿黑麻以金印。城池來歸。文升言哈密國回回畏兀兒哈喇灰三種共居一城。種類不貴。又有小列禿也。力克數種強敵。時肆侵凌。至難守。必得元遺孽襲封。理國事。可僭服諸番。與服哈密。不然禍變未已。且搖甘肅。動關隴。因訪得陝巴襲封忠順王。主哈密。未幾阿黑麻復虜陝巴及金印去。邊臣檄聞。適阿黑麻遣寫亦滿速兒等四十餘人入貢。邱濬曰。哈密事重。煩公一行。衆言文升不可去。甘涼委四方邊事。始以兵部侍郎張

海都督僉事緜謙往經略。修嘉峪關。捕通阿黑麻黠詐。回回二十餘人戍廣西。文升言此虜既遣使入貢。復虜陝巴金印。迫敕使往。輒久不報。其心輕中國。不大創不戢。請以寫亦滿速兒等安置兩廣福建。閉關示絕西域諸番入貢。孤其勢。且使歸怨阿黑麻。無何阿黑麻復令頭目牙蘭率番虜二百餘據哈密城。文升曰。事急用兵。不可以已。願方略何如。召肅州撫夷指揮楊燾至京。問襲牙蘭策。文升遂薦許進爲河西。巡撫。與總兵劉甯彭清統番漢兵。入哈密城。襲牙蘭。牙蘭遁去。阿黑麻以故悔過。遂遣使入貢。并以陝巴金印來歸。於是文升奏還其貢使。賞責誠諭。而哈密復時。皇清甯宮災。太皇太后皇太后同居仁壽宮。上命文升與工部議修建。文升言。圍營軍欲於役。不可復苦。楚蜀災不勝採伐。三廠有儲木尙可材。太僕馬惜薪。薪其價。可以資工匠。木石費儉不足。則幸發內帑數萬金足之。故落成而民不覺。皇太后徙居大權。賚予有加。十一年皇太子出閣。文升上疏。略曰。太子國之儲貳。天下根本。宜擇老成純謹之士。以資啓沃。不宜雜以浮薄之流。恐虧損盛德。上嘉納。十三年虜酋火篩擁衆寇大同。京師戒嚴。上賜宸翰。又召入便殿。咨戰守方略。文升薦保國公朱暉等。整兵爲備。敕各邊謹斥堠。修戰具。又遣文武大臣許進陳。銳率師出宣大。分遣諸大臣守天壽山。湖河川。居庸諸關。尋虜遁去。十四年拜吏部尙書。十五年加太子太傅。十七年早朝畢。上坐煖閣。召文升而諭。明年天下覲吏畢。至卿用心採訪。大彰黜陟。對曰。聖心圖治如此。宗社之福也。臣敢不盡心。命中官掖下階。明年考察來朝官。汰不職。無異議。加少師兼太子太師。孝宗崩。梓宮出德勝門。文升徒步號哭二十里。武宗立。吉凶之費。計黃金白金約百八十萬兩。戶部計無所之。欲裁

諸王賜并借公侯助親莊田租課。文升言人主卽位例推恩。恩未下而先奪之。非禮也。命與戶部搜括那借。而大禮具舉。內臣王瑞以大婚禮欲用儒士七人。篆刻西天番字。已得請。文升力言。方杜塞倖門。堅執不肯從。不聽。給事中安奎疏乞聽文升言。不可墮姦計。大臣垂首喪氣。直道何由得伸。非國家之利端。漸誣文升拒命。賴諸大臣力辨。事始白。文升累上二十一疏。求致仕去。會閣瑾用事。恨文升持正。三年。焦芳構中官坐薦。許進雍泰爲朋黨。削籍。調文升子錦衣百戶琇鈞州所。瑾誅復官。琇錦衣五年卒。年八十五。贈太傅。諡端肅。文升立朝五十餘年。以身殉國。不避艱險。凡有大議。衆莫敢決。文升至一言而定。性介特。寡言笑。不尙華侈。舉止嚴重。修鬚偉貌。望之知爲異人。居官重名節。厲廉隅。雖位極人臣。名聞夷夏。退然不敢自居。至於值事變。臨利害。屹然如山。不可搖奪。無幾。大盜趙鐔亂河南。行剽至鈞。戒其賊黨。此中有馬大人。家不可動。捨弗攻。去攻泌陽。獲焦芳家。劓其先塚。時焦芳先跳匿。鐔取芳衣冠。縛草爲人而戮之。曰。恨不爲天下殺此賊。

余子俊。字士英。青神人。景泰二年進士。幼孤。有大志。迥異常兒。爲戶部主事。陞員外郎。開霽精敏。有吏才。兩勢家爭田。久未決。子俊一言立斷。出爲西安知府。西安關中都會府也。民事戎務。諸節鎮大臣使車往來。極冗繁難治。子俊酬酢從容。上下孚悅。西安民苦城中水饑。飲輒病。子俊爲開新渠。引山泉。而徧城市。人人得戶汲。至今便利。號余公渠。涇陽山高水下。溉田病。迅不得畜。子俊出府金。責清強吏。鑿水開山道。瀉斥滿。灌田千餘頃。歷左布政。轉副都御史。巡撫延綏。延綏自正統中。命都督王禎鎮守榆林。未城也。禎

始城榆林及十八寨移鎮榆林尙未衛也。成化七年始置衛。八年子俊請廣榆林城增三十六營堡。乃請盡釐陝中伍籍之詭落者。及罪謫南戍子孫不能南風土者。皆聽還伍。實榆林衛。又擇俊子弟教之讀書。請建學立官師。爲弟子員。俗多棄地不圃藝。子俊又教之樹蔬果。開界石外地。與屯田歲得糧數十萬石。自是榆林始爲重鎮。東渡河連大同。西接寧夏。虜不敢復肆出入。子俊又上疏言陝西有三邊。延慶寧夏甘肅三邊之中。延慶爲內地。國初逐北出虜。遠遁黃河外。至正統初渡河犯近邊。始於沿邊立界石。創營堡築墩臺。天順以來。虜知東西諸邊各據險以守。難窺伺。惟延慶一帶地無險阻。可以馳突。屢來犯邊。掠我邊人爲嚮導。遂知河套所在。入屯其中。自是虜顧居內。而我列屯守禦。反在其外。臣以爲莫若於沿邊一帶墩臺空處。築爲邊牆。立砦堡。況舊界石一帶多高山陡崖。依山形。隨地勢。或剗削。或累築。或挑塹。縣引相接。爲邊牆。便報可。於是東起清水營紫城巖。西至寧夏花馬池。東西二千里。每二三里爲對角虜臺。巖連比不絕。空處築牆。如新月狀。以偵虜避射。凡爲堡十有二。崖砦八百一十九。小墩七十有八。大墩一十五。兩月成。自是虜犯益稀矣。十二年移鎮陝西。會詔議彌盜安民之策。選將厲兵之方。條上七疏。皆行之。著令。十三年陞兵部尙書。子俊在邊久。熟知虜情。及將校勇怯。地里險易遠近。虜所出入。故凡邊臣奏請從中調度。輒中機宜。未幾致仕。復召加太子太保。改戶部。子俊又能知錢穀經費。曲算盈縮。諸吏少年敏悟者。自謂不及也。十八年出總督宣府大同山西三關軍務。言禦虜利用戰車。條式奏上。二十二年再出宣大還京。以左都御史致仕。復召爲兵部尙書。乞致仕。不出。子俊凝重簡默。外和內嚴。正不詭俗。廉不

近名每奏對符檄揮筆立就會文切理不事文飾平生仕宦多在西北故榆林修邊之功爲最已而入兵部出邊鎮欲推榆林法盡修大同宣府兩鎮邊牆沮於讒忌功方有緒竟不能就常曰人臣事君當隨事盡力凡有建樹卽近且小亦必爲百年之計又曰大臣謀國遇有大利害當身任其責豈得養交市恩爲遠怨自全之地以故鎮榆林時怨謗紛起堅執不撓卒能成功垂利百世卒年六十一贈太保諡肅敏子俊巡撫榆林時羅山徐廷璋以選舉巡撫寧夏亦浚濠築墉繕亭障有功馬文升巡撫陝西稱關中三巡撫。

葉盛字與中崑山人正統十年進士授兵科給事中己巳之變率同列請誅將臣扈從失律者謝天下然後練兵選將討虜復讎如此則大綱旣正大義自伸一日三疏悉中機宜虜退請明賞罰言效勞如孫鏜死事如謝澤韓清宜賞以示勸守關不嚴赴難不力不可不罰以示懲陞都給事中監守城兵勦于謙德勝之捷時北虜方張大臣有奏留邊兵守京師者盛言今日之事邊關爲急往者獨石馬營不棄則六師何以陷土木紫荆白羊不破則虜騎何以薄都城邊關不固縱守京師不過九門耳如陵寢郊壇田里生靈何急宜固守宣府居庸便會河南陳州流民聚爲變敕盛往視除貪虐賑饑寒稍解散得安輯景泰元年春還朝疏進沒名書請迎駕者留中三年遷山西右參政督宣府軍餉尋以李乘薦協贊獨石諸城守備都督孫安軍務獨石馬營入城被虜殘毀未復列上利害可興革八條得次第罷行又設暖鋪便行旅均蔬園給將士贍死扶傷興學練士制度品式織悉備具又請官銀買牛千頭摘戍卒不任戰者屯田給

事中諸費七年外艱去。天順二年召爲右僉都御史。巡撫兩廣起復。盛至廣。請令鹽商入米餉邊。與都督楊彪破賊砦八百所。斬首萬級。八年移鎮宣府。代李秉修。建屯堡。虜至烽堠輒發。不得掠人畜。養老幼。與賢才。留意風教。盛在兩廣時。邱濬不喜。以故李賢亦惡盛。遂有謗盛殺降。至斥益勞擾嶺南者。成化二年賢卒。上欲得人入內閣。敕王翱慎簡之。翱薦柯潛。萬安。劉定之。及盛。吳節五人。上用定之。四年陞禮部侍郎。五年改吏部。六年奉命賑圻內。八年北虜入河套。議增兵設險。或請大舉搜套。驅虜出河外。沿河築城堡。抵東勝。徙民耕守其中。敕盛往議方略。上言搜河套。復東勝。未可輕議。惟增兵守險。可爲遠圖。宜令守臣剗削邊牆。增築城堡。收新軍以實邊。選士兵以助奇便。上從之。九年轉左。盛在吏部。留意人才。務求實行。議論恆守經義。未幾卒。年五十五。諡文莊。盛博學宏才。清修苦節。言行相孚。文武兼濟。每稱慕范希文之爲人。尹旻常問張甯。宣德以來制科中人物誰第一。甯曰。季聰。旻曰。季聰何敢望與中。

史官曰。好水川之捷。馬文升武功爲最。至其安海西。款黔粵。率坐制勝。算不以武力。可謂伐獯豸而威蠻荆者矣。項忠坐困滿四。處置荆襄流民。余子俊增築墩牆。使榆林屹然重鎮。葉盛修復獨石。破兩廣賊砦。皆功在巖疆。聲聲彪炳。而不免於讒。故知衡禹作相。甘陳沮封。充國功成。主由魏相。自古爲然矣。

黃孔昭傳

黃孔昭。初名曜。以字行。改字世顯。浙太平人。天順四年進士。年十四。遭父母喪。哀毀骨立。既長。執友建甯守賀沈知其賢。薦松溪訓導。不果。歎曰。士有志用世。乃藉人薦舉耶。樓居讀書。刻苦特甚。志忘寢食。清介。

有守。自舉進士。卽著廉名。爲工部屯田主事。察友忌之。嗾姦吏誣奏。事竟白。同寮坐傾險去官。孔昭以故譽益起。陞都水員外郎。調吏部。歷陞文選郎中。持銓清慎。汲汲以人才爲慮。常曰。國家之用才。猶農家之積粟。粟積於豐年。乃可濟饑。才儲於平時。乃可以濟事。自頃矯激沽名。以閉門謝客爲高。天下人才何由知之。凡出署客至。輒見詢訪。有得必書於冊。量其才。隨其地望。參之輿論。薦用各當其才。或因勢家干請。欲私用其人。輒力言不可。卽不能盡阻。後其人多自敗。孔昭不妄交遊。陳瀛謝鐸。獨以道義相好。奉詔薦應天府尹樊瑩。福建按察僉事章懋。孔昭體貌嚴重。不躁語戲笑。沈靜自守。厚儉睦族。讀書尙理致。尤精詩格。謝鐸言其在文選。每見色喜。則知賢者之得進。如見色憂。則知小人之不得退。如是蓋有十五年。始終一節不少變。陞右通政通政使。五年陞南京工部右侍郎。王恕屢薦之。竟未及柄用而卒。張悅稱其學純志潔。公正剛直。重如山。不依勢以動。介如石。不逐物以移。嘉靖中贈禮部尙書。諡文毅。子備亦爲文選郎中。備子綰官生。從張瓊桂萼後論大禮。歷官禮部侍郎。遣使交南。陞尙書未行。落尙書。以侍郎致仕。

史官曰

王鴻儒傳

王鴻儒。字懋學。南陽人。成化二十三年進士。鴻儒自少聰悟天成。書過目成誦。作字端勁有古法。里人有爲府史者。常致鴻儒佐書府中。知府段堅見其書。顧奇。史對曰。史里人王生書也。堅卽召見。曰。子風神清徹。豈塵埃中人。卽留讀書府中。續食授衣。入郡學爲諸生。提學副使陳選異其文。曰。此生文章經世。非

直舉賢。未幾發解河南第一。筮仕南京戶部主事。進郎。弘治九年陞僉事。山西提學。十五年進副使。仍提學。在晉九載。孝宗勵治思賢。常召見劉大夏論人材。曰：藩臬中如王鴻儒。他日可大用。正德改元。乞致仕。賜詔。四年卽家拜國子祭酒。不數月憂去。七年又拜南戶部侍郎。十年召入吏部。歷左右侍郎。常曰：惟誠與直能濟國事。趨名者亦趨利。於社稷生民無益也。時吏部尙書陸完有才名。與宸濠通。鴻儒極稱夏原吉王翱二人賢。可師法。完意不悅。十四年二月陞南戶部尙書。是歲六月宸濠反。完敗。鴻儒出督餉留都。至九江聞變。遡流欲入武昌。約守臣起兵討賊。又聞武宗南巡。益憤懣。疽發背卒。諡文莊。鴻儒博聞多識。凡祖宗設政任人。及先輩立朝行己。歷歷能言。至論時務。要決成敗。可否通窒。如探囊指掌。待物開誠。不問人私。人亦不敢以私問也。南陽知府段堅。蘭州人。治南陽。脫略簿書。宣導化理。官至山東右布政使。致仕。廉清有吏才。

史官曰：明

劉鉉傳

劉鉉。字宗器。長洲人。樸不離俗。介不附權。有上世君子之風。以楷書選翰林秀才。舉順天鄉試。授中書舍人。宣德初預修兩朝實錄。成遷兵部主事。正統初再預修宣德實錄。進侍講。常因內閣曹鼎薦。命教庶吉士。十四年己巳進侍講學士。景泰改元。充經筵官。遣祭濟瀆。先是鉉有同鄉人楊彞。侍上於王邸。至是常被召入內殿。彞因主於鉉家。雅識其爲人。手疏鉉可大用。以上授太監宋某曰：俟有缺言之。久之莫聞也。

會宋病。召醫盛叔大治之愈。問醫何許人。曰長洲人。曰長洲有劉先生者識乎。今爲何官。盛以劉草窗曰爲吏目。宋曰非也。翰林學士爾。盛曰劉學士古板人。宋曰上亦察之。且將召之矣。盛退以告鉉。且欲與同見。鉉謝曰見之何爲。旣而怒曰上奚從知我哉。必蠹之言也。主於我而言我何貴哉。時易儲之議漸萌。會部缺兩正卿。廷議可任者。宋卽出手疏於上。上令送閣曰可用。學士爲之。大學士陳循等遂擬鉉以進。時江淵不喜鉉。乃退語內侍曰鉉素不能幹事。不可用。乃用編修薛琦。鉉聞喜曰江公知我者。三年陞國子祭酒。壬申嚴條規以淑諸士。未幾報易儲。諸司無大小俱勸進。同官司業言於鉉曰百官俱勸進。國子獨無可乎。鉉答國子監課士則可。勸進則不可也。遂止。後英宗復辟。閱諸疏見勸進無國子監名。問徐有貞曰祭酒何人。官幾年矣。有貞以鉉對。上曰吾欲一識之。乃召對文華殿。上曰卿可還傳東宮。遂命爲少詹事。尋卒。贈禮部左侍郎。諡文恭。錄其子啓爲尙寶少卿。

史官曰昔人謂鉉介特自持。言行不苟。楊士奇楊溥常過其所居名假菴。甚湫隘。亟稱爲古人。歎賞久之。觀其不謝中貴。則與薛瑄之不枉見王振同一貞操。不表易儲。則當時於商高陳諸人且輸一籌多矣。如鉉者豈非可大用而不究其所用歟。



明書卷一百二十五

列傳四

名臣傳十

陳鎬 附弟
欽 傳

陳鎬字宗之。系出會稽。以祖嵩通天官學。徵赴南京。占籍欽天監。父瓚由鄉舉爲豐城教諭。鎬賦質卓穎。少受庭訓。以文行聞。成化二十二年丙午鄉試第一。明年成進士。授禮部主事。乞便養。改南吏部郎中。晉山東提學副使。爲人明敏。有吏幹。董學時。校閱精核。公廉詳慎。始終如一。諸生登降之序。皆自書之。不假手吏人。輯洙泗誌。振發士習。諸生感其風誼。興成就者甚多。齊魯間稱名督學。必首推之。晉江西參政。正德五年庚午。晉湖廣布政使。會漢沔盜起。流劫郡縣。民之貧無賴者。蟻附其間。徒黨日衆。鎬設方略。督官兵以次討平之。餘賊未盡。朝廷卽晉鎬都察院副都御史。巡撫其地。鎬曰。良民可驅而爲賊。頑不能還。賊爲良民乎。於是移檄諸郡。脅從者不治。湖湘素服其威信。見檄卽盡散歸農。蓋負固阻深者。咸喁喁有更生之樂。七年壬申。以疾乞歸。命未下而卒。所著有矩菴漫藁。金陵人物志。弟欽。字諒之。早負文譽。兄弟齊名。成化丙午。丁未。同登科甲。授南武選主事。署選軍事。秉持清格。峻拒請託。豪貴者側目。咸思中之。會

武庫郎中婁性被誣下獄取勘同部人皆搖手避莫敢暴白欽獨奮身疏其冤狀詔并逮欽同繫者二年性病日寢賴欽周旋得不死久之性乃獲免而欽亦以此名聞天下出知廣平廣平爲畿輔要郡簿書填委欽洞達民隱臨事果決至則踔厲風發百發具輿以時巡行屬縣問民所疾苦廉有司賢不肯而勸懲之有望風解印去者郡人號爲陳母弘治乙丑入覲吏部舉天下卓異者十人請加宴賚以欽爲首皆廣東提學副使條教甄別士方嚮風以疾卒時論惜之欽嚴毅方正所與游必當世名人於物非其義不取服官二十年樸素一如寒士爲文典則閑遠知其於忠愛孝友甚隆也所著有自菴集四卷海山聯句集史官曰

王竑羅通傳

王竑字公度其先江夏人祖戍河州遂爲河州人正統四年進士竑正直剛毅有經濟才初爲戶科給事中竑王監國初在午門南面視朝百官劾王振誤國讀彈文未起錦衣指揮馬順振黨也從旁叱言官去竑獨前掉順首曰此正姦臣當亟誅百官批殺順又索毛王二長隨監國爲擊死血漬丹陛內臣滌血長史儀銘曰勿滌爲若曹鑿復彈籍振家并其黨是冬虜犯京師命竑監守北城軍當是時北城諸將獨戰勝退虜京師解嚴竑上言虜去不大挫必再至宜急爲戰守計勿遂謂無事陸僉都御史守居庸關訓練士卒繕塞險隘軍政一新又能諭以大義感動羣心北門屹然尋病還京以蕭啓代景泰二年漕淮上兼巡撫清理鹽法賑濟有方民多賴之劾巡河御史王氓貪淫謫民戍開平四年會災傷上疏言山東河

南東昌開封抵江北徐淮。去年正月大雪異常。夏秋雨水。人民廬舍漂蕩。麥稻淹沒。老穉顛連流徙。邇者新春風雨連月。寒沍倍冬。不識天意何在。常觀易泰卦象曰。內陽外陰。君子道長。小人道消。否卦象曰。內陰外陽。小人道長。其候類秋冬。是陰盛陽微。殆食祿者君子少。而小人多故也。然小人之行。豈懦而不用。鈍而不敏。訥而無言。愚戇而冒犯天怒者乎。必其欺詐若誠敬。便佞若忠鯁。大貪若廉。大姦若愚。卽書所謂靜言庸違。孔子所謂色厲內荏者是也。伏望皇上念祖宗社稷之重。上天咎徵之戒。責有位之臣。痛自修省。改圖進君子。退小人。裨忠良者任政。姦邪者屏處。又必省刑罰而止聚斂。節財用而抑貢獻。罷無益之工。嚴無功之賞。散財以收民心。愛民以植邦本。庶幾人事修而天變可回。然欲知君子小人邪正。又必本於聖德之明睿。伏望皇上日親講臣。俾陳二帝三王與祖宗列聖養心修德之要。以清出治之源。則庶幾君子小人莫逃天鑑矣。臣濫處臺憲。致茲災異。無所逃罪。伏乞罷歸田里。上覽曰。賢哉都御史。勿自劾。乃自引咎。敕諸大臣修省。下災郡邑賑濟。竝又上疏言饑民流徙就食。臣分遣屬吏沿河贍賑。每遇過舟。董令出米爲粥。分給。賴存活者一百八十五萬八千五百人。勸諭富有力家出米麥穀粟。二十五萬七千三百石。銀三千六百七十兩。錢緜布半之。量給被災者五十五萬七千四百七十九家。缺農具種子七萬四千三百九十七家。亦以官物賑給。民流去撫來。復業者五千五百九十三家。他境流冗安輯者萬六千餘家。幸賴聖明。盜賊稀少。願鴻鴈之哀鳴。方思鷓鴣之棲戢。未寧更藉休養。庶民康寧。四年陳循金濂皆薦。竝心純政平。委曲調劑。弘濟民艱。況總督漕運。姦貪畏憚。兼理巡撫。民兵慕戴。陞副都御史。仍治淮安。

上皇復辟。謫浙江參政。英宗百嗜曰。竑者是請我弟籍振者也。尋除名。編管江夏。居半歲。放歸田。天順五年。李來犯陝西。我兵再敗。薦起竑視師。會虜退。再蒞淮上。威行惠戢。聲望益重。憲宗卽位。收用名賢。陞兵部尙書。時兩廣蠻反。竑薦前侍郎韓雍有文武才。宜令帥師討蠻。而雍新得罪。衆難之。竑曰。天子方棄瑕錄瑜。疑雍罪不當用。乃竑非罪廢者耶。議乃定。竑守法嫉邪。人多嚴憚。不能盡行其志。三閱月。請老去。歸。二十年乃卒。正德中。諡莊毅。竑與李秉皆一時名臣。比居鄉。竑抗志寡交。乘出入里閭。博奕諧謔。竑聞之曰。執中八座大臣。胡逐細民戲狎不自愛。乘亦語竑曰。所謂大臣者。豈立異鄉曲。矯激爲哉。

羅通。吉水人。弱冠舉永樂十年壬辰進士。授監察御史。巡四川。有風節。十九年。通偕諸御史上疏諫。忤旨未發。亡何交趾通。上詔諸御史爲其地知州。通得清化。已而黎利叛。來攻清化。通累擊卻之。時成山侯王通擅與利媾。棄交趾。拔吏士歸。檄至。通怒。髮上指。謂衆將曰。王通不奉上命。喪地辱國。此城乃羅通生死所耳。衆將曰。如教。於是獨不與利清化。利大發兵八萬。晝夜攻圍。通以少擊多。殊死戰。大敗之。踰年而詔使至。如王通議。乃羣吏士歸。上怒。收成山侯下獄。關死。贖爲庶人。餘皆罷謫。有差而獨召見通。改戶部員外郎。久之。坐法免。徙邊。赦歸。正統初。起兵部職方郎中。從尙書王驥甘肅。征阿台。朵兒只伯有功。十四年冬。英宗北狩。報至。以通守居庸關。給事中孫祥守紫荆關。廷議並授僉都御史。時景帝初卽位。面諭吏部。誤云副都御史。二人竟得副都御史。歲十月也。先脫脫不花以三萬騎逼居庸。通飭將士冒矢石固守。虜去。而宣府參將楊俊者。以精騎入衛京師。道關。夜遣人告通。通伏劍厲聲曰。若欲保京師耶。保京師。保居

庸足矣。下令有一人一馬南渡者斬以徇。乃止。會天大寒，令老弱汲水灌城，冰堅滑不可破。虜乃趨紫荆，選兵追敗之。未幾，虜酋那言帖木兒五千衆南襲，至拘羊山，通率兵斬捕虜有功，召入參贊軍務，理院事。景泰元年，通疏乞敕石亨、楊洪各率精銳，亨自紫荆出大同，洪自居庸出宣府，巡哨提督官軍堵塞關口，修理牆棹，勦除賊寇，防護耕種。又疏言邊軍妄報首功，虛張虜勢，德勝之戰近在都門，斬虜幾何。陞六萬六千有餘。又疏言腰玉珥貂者皆苟全性命，忌能憎言，與于謙不協。謙上言德勝當先一萬九千八百八十八人，陞一級，陣亡三千一百一十八人，陞二級，餘皆給賞。何至六萬，因乞罷兵柄，放歸。府部院翰林科道疏乞留于謙，亦言通志在滅賊，爲國計無他，謙等宜同心協力，勿互猜嫌。是年通乞下令擒斬也。先伯顏帖木兒喜甯者賞萬金，封公侯。于謙上言口外軍民連歲被兵，不能種藝，恐虜犯野無所掠，擁衆以送，駕爲名突至太原，則山西搖動，而河南、淮甸之間亦可憂矣。宜選有謀略文職大臣住鎮山西，上以命通。時昌平侯洪乞差文大臣率兵出鴈門，用鹿角擡營護山西，餽運大同。兵部請命通，通意不欲行。疏言于謙、楊洪建此策，乞令與臣同行。奏下，謙復疏曰：當國家多事之秋，非臣子辭勞之日。臣謙諳熟山西事情，謙宜去。上仍令通往。三年冬，通言虜恃馬力出入塞下，今也先使臣有馬四萬，宜增價酬之。價重則馬益至，不數年塞馬自空。此坐弱強虜之策也。是年督兵逐虜懷來，至長安嶺，又斬首有功，加太子少保。龍門鷗鷗諸城殘破，守將撤兵內徙，遺芻糧數萬。通言上虜來有鄉導，欲奪芻糧，守則軍力不足，運則民財不足。焚則國用不足，乞廷議。戶部尙書金濂奏下，通及總餉侍郎劉璉、總兵朱謙共計上。已而虜退，通請班師。

還京協贊軍務。四年上將傳要略。命以訓練將士。是秋進右都御史。天順二年致仕。弘治十八年。隆興父老。奏己巳之變。通守關有保障功。敕祠居庸關。

史官曰。任天下事者。必有蓋天下之氣。方睿皇北狩。中外岌岌。莫敢誰何。手掉姦臣之首。血漬殿陛者。王竑也。邊帥入衛。伏劍厲聲。不令隻馬南渡者。羅通也。可謂有蓋天下之氣矣。卒之守居庸。遇虜騎。北門屹然。皆得兩臣之力。豈徒以抗厲自雄者乎。

顧璘傳

顧璘。字華玉。上元人。弘治丙辰進士。授廣平知縣。陞南吏部驗封司主事。進稽勳郎中。正德五年。庚午。知開封府。癸酉。謫知廣西全州。丙子。起知台州府。陞浙江左參政。嘉靖改元。陞山西按察使。以病免。庚寅。起爲江西按察使。未行。陞浙江布政使。壬辰。進右副都御史。巡撫山西。疏乞終養。忤旨。落都御史。以布政使致仕。丁酉。再起爲右副都御史。巡撫湖廣。己亥。陞刑部右侍郎。改吏部。會顯陵肇工。改工部。領山陵事。進工部尙書。事竣。還朝。改南京刑部尙書。璘融朗闊達。精於吏理。能激昂任事。初。蒞廣平。甫弱冠。判決敏利。摘伏若神。至爲開封。盜起燕薊。流劫中原。所在騷擾。彭澤領兵壓境。上簡璘自輔。璘練兵轉餉。取具呼吸。折衝勘亂。謀畫居多。鎮守中官廖堂恃瑾黨。圍奪自恣。璘每折其萌芽。瑾誅。堂罷去。而王宏者尤諂諛。繼堂出鎮。璘故不爲禮。有所徵需。一不答。歲時展謁。長揖而已。用是積忤宏。宏方恃錢甯爲援。矯詔逮赴詔獄。璘抗言條對。一無所承。甯無已。遣邏卒陰探郡中。無所得。乃文致他比。以上。鐫三階徒。全僻荒遠。陋

璘不鄙夷其民而拊教之。久之民用乂安。士興於學。甫三年移台州。台武衛錯居。俗獷而喜訐。胥吏並緣爲姦。璘爬疏剔抉。求得其利弊所在。次第興除之。故事武衛諸城郡爲修築費。率爲主者乾沒。恆歲一築。築輒壞。璘鈎得所侵漁。悉沒入爲城費。擇人經理。故所隸三城特完。郡瀕海。貧民業鹽自食。苦邏卒窘之。相賊殺不止。璘爲弛禁。俾得負販出郡下。而薄其稅入。往軍餉不時給。貧軍多稱貸。璘得肆侵牟。璘支放有期。軍皆給足。而姦民無所牟利矣。郡南瀕江多水患。有中津橋且壞。公修復之。因築石隄而樓其上。凡數十楹。人莫喻其旨。已而潦水猝至。民居得依樓以避。所活以千計。乃服其先見云。璘久於台。悉浙中事宜。繼起爲參政。與左布政日益練達。展采措事。惟志所欲爲。若賦發科誦。調補吏胥。皆吏蠹蟠結。前政所不敢問者。璘排根絕蔓。振刷不少縱。文牒糾紛。隨事刺裁。司無留政。御史按浙者皆斂手無所事事。迨撫湖南。提封數千里。撫臣尊重。受計坐理而已。璘輶車徧歷州郡。跋涉險阻。不爲厭。故事行部。以藩臬守臣自隨。悉謝去。供頓次舍。才足周用。民不知勞。念荆湖沃衍。而流庸情弛。科輸煩擾。故所至勸農業。平徭稅。民用安集。而歲亦登。比在鎮逾年。多爲建白。首言地瘠民貧。兵食不足。藩祿無節。後繼爲難。又以湖湘控扼邊徼。地大事繁。御史按部歲一代。勢不得徧。欲添差御史。分蒞湖南北。以廣詢謀。又言外臣多茂異。比限以藩府戚屬。不得內徙。非舊制。乞越例推選。以收滯才。時雖不盡行。聞者以爲篤論。顯陵之作。經費不資。璘長於料簡。程省弗懈。視他所營。率損費十五。而功實倍之。且規制宏偉。民不告病。爲刑尙書。不肯執轍徇人。苟權於辜。必以法繩之。而怨讟是興。蓋璘負天下重望。高視闊步。遇權貴或傲然不爲意。而與

山林文學行誼士。乃講均敵禮。孳孳獎進之。惟恐不給。坐視忌者側目。雖晚躋尚書。卒困於讒。以沒。人多惜之。平居事親孝。父病疽。時已五十餘。與同臥起。吮濯扶掖。肉血淋漓。十指皆潰。曾不肯委勞於人。處羣從兄弟。尤極友愛。少學於李璠。璠死。妻萬困饑寒。日爲資給。又爲其子置產。旋置旋廢。而其子卒困以死。乃迎萬養於家。死爲殮葬。而給其孫如子。終其身不衰。至於里黨族屬婚喪緩急。多倚成之。爲文不事險刻。雄深爾雅。詩尤雋永。時出奇峭。樂府歌詞。不失漢魏風格。自少已有名世志。舉進士。卽自免歸。與侍講陳魯南太僕王欽佩及從弟副使璉相友。聲望奕然。出入所雅遊。若李獻吉何仲默朱升之徐昌穀。皆海內名流。而璠頡頏其間。所歷沅湘天台衡岳。皆山水勝處。雖簿書鞅掌。不忘觚翰。所至領客讌遊。感時懷古。臨觀賦詩。風流文雅。炤映林壑。有古高賢特達之風。所著有國寶新編近言顧氏七記浮湘葦山中集息園集憑几集登衡小記總若干卷。弟璉有奇節。著寒松齋集。並行於世。

史官曰

耿九疇黃紱高明傳

耿九疇字禹範。廬氏人。永樂二十二年進士。宣德六年爲禮科給事。議論持大體。有清譽。正統二年。兩淮鹽法大弊。擢運司同知。九疇性節儉嚴肅。尤慎交接。無毫髮私。吏胥豪商勢家。凜凜不敢肆。常條奏鹽法便宜事。著爲令。內艱。鹽場數千人走闕下乞留。奪情陞都轉鹽運使。常坐水旁。童子曰。水清不若使君清。已而被誣。逮下獄。得釋。進都御史。仍清理兩淮鹽法。景帝初陞刑部右侍郎。屢辯疑獄。勢利不能休。有婦

訟其夫坐離異。九疇不可杖其婦歸夫。尋又出理兩淮鹽法。已而兼江北巡撫。歲凶盜起。九疇善循拊流民復業者七萬家。敕錄諸郡大辟囚寃得釋者甚衆。有婦人來何苟家者。去而死。婦家訟苟與弟殺婦。苟誣服。九疇疑之。釋苟兄弟。已設法。竟得殺婦者。代還京。景泰三年。王文當出陝西鎮守。代陳鑑。文不欲行。諷諸御史留己。九疇以侍郎出陝西鎮守。除弊屏貪。威望益著。先是巡撫多部。寺司堂上官文移不得輒下。按察司下亦不肯受約束。九疇奏得徑下。邊將請增臨洮諸衛戍兵。下九疇議。言邊城士卒不爲少。將官能嚴紀律。精練習。勤撫恤。絕侵漁。養銳氣。何不可一以當百。加之賞罰明信。則人人自奮。不然徒冗食耳。竟不增戍。是秋。敕九疇考察陝西方面官。四年冬。陝西左布政使許資言侍郎鎮守。與御史不相攝。文移輒礙。改九疇右副都御史鎮守。會有旨。市羊角爲上供燈。九疇疏論曰。昔宋神宗買浙燈。蘇軾諫止。今買羊角製燈。無乃類是。書曰。不矜細行。終累大德。上遂止。天順元年。公來自陝西。留爲右都御史。掌院。敕考察諸御史。是年。諸御史劾曹石逮詔獄。并逮九疇。降江西布政使。尋調四川。上知九疇清正。一日對輔臣論人才。言九疇去非其罪。李賢對曰。九疇操行誠不易得。未幾。以禮部右侍郎召。至京。陛見。上憐其老。改南京刑部尚書。曰。遂卿優閑耳。四年卒。上聞之。歎曰。可惜此老。九疇孝友純至。居喪秉禮。平生無他嗜好。退食焚香。讀書而已。交遊不泛。請寄不至其門。雖權貴亦敬憚不敢犯。論事是非。確然不肯詭隨。好善嫉邪。別白太過。以與故乘寡合。累遭讒困。謚清惠。子裕。裕字好問。景泰五年進士。入翰林。爲庶吉士。七年除工科給事中。天順元年。九疇在西臺。改翰林檢討。是年。石享被御史劾。恨九疇斥去。謫裕爲泗州判。

官。改定州。成化元年召還翰林。歷國子司業。祭酒。誨教有恩義。時異姓諸侯年幼者。令學於國學。裕類古。諸侯勳戚。言行可法者。爲書授之。十二年陞吏部右侍郎。尋轉左。二十二年進尙書。代尹昇。清慎簡平。鈐法疏理。諸請寄者不便。忽改南京禮部。而以工部尙書李裕代。孝宗卽位。改南京兵部。參贊機務。弘治元年召爲禮部尙書。婚喪諸大禮。傳經律酌古今行之。崇王請朝。下廷議。裕請遵祖訓。遣書王勿朝。西夷由南海貢獅。裕曰。賈胡嗜利。輒開海道。宜卻去。六年復改吏部尙書。代王恕。加太子太保。天順初。德秀諸王出閣。李賢言四王講讀官八人。翰林官少。擇新進士授翰林檢討。充王講讀官。至是諸王將出閣。亦按故事。選十進士侍王。十進士詣吏部請。九年滿考得陞。改出王府。裕以爲例不可。十進士語不遜。裕劾十進士。首爲除名。餘調外。裕在吏部。薦進賢才。務協輿論。愛憎毀譽。莫能淆奪。守正立身。干謁斷絕。卽內降斜封。封章抗議。杜塞倖門。父子清修。不營產業。不治居宅第。約儉蕭然。無異寒素。裕偉幹修髯。儼然神明。學問該洽。文章雅正。弘治八年卒。贈太保。諡文恪。

黃紱。字用章。封邱人。曾祖思豫。事太祖。掌太常事。以罪編氓沅州。又徙戍平越。紱以故爲平越諸生。舉雲南鄉試。正統十三年進士。爲行人。歷南刑部郎中。爲人廉直。遇事颯發。卽重忤時貴。不恤。必欲行己意。人或笑黃郎中呆。紱正色抗言不移沮。亦竟以是得名。人皆稱曰黃呆。譚千戶者。大猾任俠。結權貴顯人。常奪民廬場萬畝。貴顯人業與譚千戶酒飲食往來。卽知民枉。不能直。紱竟盡法。直蘆場歸民。歷四川參議。參政。右布政使數年。初督松茂軍餉。劾治將領侵冒。擒諸倚勢豪肆邊上者。參政時過崇慶。忽旋風起。輿

前絳曰。卽有冤且散。吾爲若理。遂止抵州。沐而禱於城隍。夢中若有神言。州西寺云。絳密訪州西去四十里。有寺常孔道。倚山爲巢。絳旦起。率吏兵急抵寺。盡繫諸僧。諸僧中一人少而壯。甚獐惡。詰之無詞。牒卽塗醋壘額上。曬洗之。隱有巾痕。絳曰。是盜也。卽訊諸僧。諸僧不能隱。盡得其姦狀。蓋寺西有巨塘。夜殺投宿人。沈塘中。衆共分其囊資。有妻女則又分其妻女。匿妻女隱窖中。恣淫毒久矣。絳盡按律殺僧。毀其寺。搜出人妻女。給資還。倉吏倚王親。侵沒官糧萬計。王曲庇倉吏。絳竟按如法。絳爲錢穀吏。精律比。輒能發摘姦伏。威行川中。青神令聞風解綬去。爲右使時。奏閉建昌礮。爲左使。湖廣妖僧繼曉。至勢薰人。絳曰。繼曉以妖術故。不離上左右。今且得罪。雖名掃墓。實逸賊。檄武昌府館之後堂。好飲食。無令得出入。俄事敗。檻送京師伏誅。陞副都御史。巡撫延綏。劾庸弁。擒豪奸。絳行道望見川中飲馬婦。片布遮下體。大慚。俯首歎曰。我爲巡撫。令健兒家貧至此。何面目坐臨其上。亟令豫出餉三月。邊健兒素貧苦。延綏特甚。往往巡撫者。輒厚自奉。健兒雖凍餓不問。延綏人素忠樸。至死無怨言。聞其慚歎。人人感泣。願出死力爲黃都堂。一戰虜虜亦不至。俄有詔毀菴寺。絳令汰尼。盡傳軍門。給配軍中。壯無妻者。至絳去。延綏多有攜子女拜道傍送者。進戶部尙書。威稜絕然。盡革財賦內外諸積弊。改左都御史入臺。天下仰望其風采。絳懸直崖。異忤人。自恐伏禍。不可測。請老去。未幾卒。

高明。字上達。貴溪人。景泰二年進士。爲御史。巡河南。糾斥不職吏六十餘人。會黃河南徙。民耕淤地。畝收歲數斛。議者欲履畝坐稅。明不可。曰。河徙無常。稅額不改。平陸忽復巨浸。常稅猶按舊籍。民何以堪。天順

四年御史趙明等疏劾來朝吏語觸上怒詰疏出誰手明任實草疏都御史寇深言累年奏牘皆屬高明乞貸明過上怒亦解顧喜曰高明能御史先是明劾兵部尚書陳汝言怙勢納賂下獄死汝言潼關人代于謙爲尚書不數月姦賊萬計誅石亨明及門達籍亨家明言亨無反謀蒼頭得免死者百人王翱薦陞山東按察使上嘗謂李賢曰高明宜內用又謂寇深曰高明可都御史南京南京久弛縱明振綱紀劾罷諸貪殘吏會淫雨極言內自宮禁外至夷狄皆陰盛陽微急宜修省以回災異揚州鹽寇起守兵失利敕明勦捕明造巨艦榜籌亭往來江南北督戰又授方略御史戴琥顧以山擒賊九百餘人並江置邏堡高山望候賊出沒露蹤跡不得逞江海間稍靖中官粥私鹽縛儀真指揮羣卒大鬪明盡籍其鹽劾中官又條劾戶部及諸巡撫縱法狀及陳利害十餘事衆始忌明明亦三疏請終養成化二年前杭賊起卽家賜明敕便宜討賊明力疾赴閩先諭撫賊降賊恃險不應進兵搗其巢大破賊俘四百人誅其渠魁十一餘並輕坐析上杭溪南里爲永定縣控賊海口民燭令幕亡初謀不軌明不欲再起大獄或至用兵坐誅妖言衆遂定卽上疏乞休納符敕去常曰孔戣三宜去司空圖三宜休吾無才一宜退有病二宜退親老無兄弟三宜退及治盜微宜再起賊平疾作宜再退自稱五宜居士明天性孝直俊暢有通才難進易退出處儼然

史官曰明制設都御史出撫軍民入總臺憲任至重也樹威以德倡法以廉故埋輪攬轡而天下安之若耿使君之清逾止水黃都堂之俯恤健兒斯稱其職矣高明能劾陳汝言貪賂必有以自立者宜其有能

御史之目也。

李賢傳

李賢字原德鄧州人。生而氣宇凝重。宣德七年舉於鄉第一人。方宴鹿鳴。有鶴數十旋繞廳事上。布政使李昌祺舉酒酬曰。將必有名世之士乎。明年成進士。才藝有名。以核荒使山西。時辭瑄以御史家居。賢往學。益好學沈潛。英宗卽位。上疏言帝王之道。赤子黎庶。羈縻外國。理一分殊。愛有差等。今京師隸官萬餘。以俸言之。指揮月俸三十五石。而實支一石。隸官則實支十七石五斗。是隸官一當華官十七有差。冗食橫賜。其何能繼。況非我族類。其心必異。晉胡迭亂。殷鑒不遠。乞敕兵部漸次徙之於外。不惟省國家萬萬之費。亦可以消未萌之患。雖議者難之。而已已之變。羣起應虜。言始驗矣。正統元年授驗封主事。上言國家都北京以來。頹弛莫甚於太學。繕飾莫多於佛寺。興措如此。可謂大舛。尋詔新太學。又有旨文武誥敕三年不得請。必待九年。賢上言此獎勵臣下之良法。九年得者少矣。無以分貪廉。立勸懲。上從之。十年陞考功郎。轉文選。選法公平。十四年。扈駕土木得還。景帝初立。上正本十策曰。勤聖學。願箴儆。戒嗜欲。絕玩好。慎舉措。崇節儉。畏天變。抑貴近。振士風。結民心。景泰二年。詔議禦虜長策。賢請用戰車火劑。行可禦虜守境。止可衛民力耕。然善用長技。存乎將士。善馭將士。存乎賞罰。是年冬。陞兵部右侍郎。明年奉命察四川諸有司。又明年癸酉還京。改戶部。上言也先弑君。併吞諸夷。包藏禍心。今聽其講和。貢馬。削浚膏血。輩送金帛。醜類日強。民生日困。持此悠悠。實非良策。乞敕邊兵臣練兵觀隙。于謙壯其言。請下賢章勵邊臣。

五年轉吏部。采君鑑中孝友恭儉事爲鑑古錄獻上。英宗復辟。一時輔臣多竄殛。遂召賢入內閣。兼翰林學士侍郎如故。山東饑請賑金內帑。徐有貞持不可。曰：散銀有弊。無益饑者。賢曰：天下之事。未嘗無弊。願奉行何如耳。散銀有弊而不貸。是視民饑死而不救也。因噎廢食。豈爲人上之理。力請發三萬兩。上特增四萬。當是時。曹石表裏姦橫。弄威福。上不堪。密諭輔臣稍抑其干請。會御史楊瑄劾吉祥。亨。上壯瑄。令吏部籍瑄名。且大用瑄。曹石意出內閣。哭頓首訴上。奴輩萬死一生。迎復皇上。有貞賢必欲傾奴二人。使無噍類。又伏地哭不已。上不得已。諭言官劾有貞及賢下詔獄。是日忽雷電大風拔木。損殿宇。公署瓦木。上悟釋之。詔調外。亨吉祥亦輒對上言。天怒有貞賢。故變意如此。上不應。賢得調福建參政。瀕行。適吏尙書王翱得專對。語有間。上曰：賢不當與有貞同罰。翱因頓首力言。賢醇謹可大用。請改南吏部。翱意賢且遠去避禍。上顧不喜。曰：南京遠。仍留賢吏部左侍郎學士。亨吉祥又大恨。顧上意屬賢。不得已。匿怨接慝。勤得同召對。輒喜。獨召賢卽不喜。疑賢或短毀。踰月進尙書。天順二年。東宮將出閣。領春坊事。吳與弼聘至上。上問授何官。對曰：與弼老儒。可授春坊諭德。侍東宮。與弼辭再三。賢請從。與弼請勵風節。三年。亨坐誅。上因問賢迎復事。對曰：當時有要臣者。臣不敢從。上怪之。賢曰：天位乃陛下固有。若景泰不起。羣臣表請復位。名正言順。何須以奪爲功也。奪之一字。何以示後。此輩貪富貴。非爲社稷計。萬一景泰先覺。此輩不足惜。不審陛下何以自解。幸而事成。此輩得以貪天之功。然天下人心歸嚮陛下者。以正統十數年間。節用愛人。與民休息。今爲此輩十壞七八矣。上竦然。詔革奪門功陞者凡四千人。中外肅然。是年賜第於京師。

之是時上視朝左右顧必呼賢與錦衣門達語良久乃已五年虜騎來入雲中塞至鴈門明年虜又入河
西塞賢薦將帥顏彪等調兵食畫上五事籌邊時江南北大水賢請下詔寬恤之遂罷所取花木板枋及
暫免采柴追馬清匠刷卷諸事歲省銀三十餘萬兩曹欽反擊賢傷首及耳又劫賢疏申救賊敗上急召
見賢請下寬恤詔解散逆黨開言路加太子少保賢以西師未解而京師有變王竑白圭出禦虜虜引去
賢上言兵出在外可暫不可久暫則爲壯久則爲老且虜安能保其不來若慮其更無休息之期況人民
其輸疲困已極宜班師使民得屯種上從之章皇后崩值冬享太廟上問賢請俟釋服七年癸未上以足
疾不視朝召問賢曰遣官攝大事可乎賢請駕出郊壇卽不能行禮人心亦安遣攝不可也上力疾至齋
宮復召問賢曰朕拜下不能起起須人掖禮可藉人掖否對曰疾而□行禮見敬天之誠掖何不可二月
空中有聲賢言上不恤民厥有鼓妖請下寬恤詔靜慈仙師者宣帝廢后也上念之問賢更諡恭讓章皇
后錦衣門達寵而橫訐臨川弋陽二王陰事訊無左驗賢請戒緝事者達又誣袁彬下彬獄有疏雪彬者
達又并誣疏出賢賢乞罷不允未幾達坐附中官譎戍嶺表時禁中有讒言謂憲宗不宜復位東宮者上
疑之一日上不豫臥便殿召賢諭曰今庶事頗甯而大者反搖奈何賢頓首伏地曰此國本也上曰然則
必傳太子位乎賢又頓首賀曰宗社幸甚上起立召太子至賢扶太子曰謝謝太子謝上抱上足泣上亦
泣讒竟不得行八年憲宗卽位進少保華蓋殿大學士餘官如故會災異屢見奏請出宮人又請簡近侍
左右人大風電拔郊壇木飄瓦賢上疏乞無狎左右聽其冒誘吳后廢飛語欲害賢上遣衛士宿賢家出

入呵護。會奪門功冒陞者。又羣囂訴乞復官。賢言曰。自石亨輩此舉之後。人以得富貴之易。貪利者惟幸有事。宜早治之。且請復于謙官。以雪幽枉。上是其言。有司請造鹵簿。賢急入言。先朝所造未經御者。尙多貯庫。今恩詔方頒。何須以此擾民。上寢其事。成化二年二月外艱。詔起復。賜賻甚厚。遣內臣護行。營葬事。畢。促上道。五月入京。上慰勞有加。疏言古大臣若張九齡寇準。雖常起復。人無非議。以其才足勝任。臣非其人。乞賜矜從。不允。修撰羅倫極論賢不當起復。謫官。賢上道中所見軍民利病八事。又率廷臣言。天下盜賊未息。災傷未止。惟祖宗創業垂統。宮禁甚嚴。內外閉密。內帑充積。無得妄費。遊有常所。無起離宮。賜有常度。無開侍穴。祖訓一書。載此明備。願垂省覽。十二月十四日卒。於賜第。年五十九。贈太師。諡文達。賢恭莊端重。練達政務。不屑爲小廉曲謹。先後薦用耿九疇。軒輊。年富。王竑。李秉。程信。姚夔。崔恭。白圭。許貴。顏彪。馮宗。諸文武大吏。皆得其人。天順四年。上諭選庶吉士。必北人。賢曰。立賢無方。何限於地。政務任九卿。議擬不相侵奪。時於上前參酌。可否爲行止。王九臬馬昂在吏兵部。皆上信任。賢又能調護。以是兩尙書得行其志。景帝葬時。左右請汪妃殉。賢請存妃。以全其母子。上是之。先是上思建庶人幽大內六十年。欲赦之。問賢。賢對曰。陛下此念。太祖在天之靈實臨之。堯舜存心。不過如此。上意遂決。亦並赦吳庶人於東內。命中官護送鳳陽自便。

史官曰。漢文自代來。絳侯等欲請間。文帝謝曰。所言公。公言之。所言私。王者無私。大哉言乎。杜萬世邀立。邀功者之倖門矣。英宗以啓寵北轅。及復辟之日。貪功怙勢。實繁有徒。倒持太阿。使天子不得舉手。微李

賢忠以犯難，勇以斷割，知以常機，奪羣小威福之柄，以還天子，其不蹈土木之轍者幾希矣。賢之功以是爲烈，至於止汪后之殉，出建庶人之綱，其言足貫幽明，古稱社稷臣，何以尙諸。

彭時傳

彭時，字純道，安福人。時自小端重寡言，及領鄉薦入國學，祭酒李時勉以公輔期之。正統十三年戊辰會試第二，廷試第一人，歷官翰林侍讀。十四年與商輅同日入內閣，景泰元年乞終繼母喪，忤旨去。三年除服，不得入內閣，供職翰林。初入閣與陳循共事，稍周旋，相可否。天順元年九月，岳正許彬謫罷，上召見文華殿，令近榻前問曰：「汝十三年狀元耶？」對曰：「臣不才，誤恩拔擢，因頓首。」上又問：「第二陳鑑，第三岳正乎？」對曰：「唯。」又問：「汝年幾何？」對曰：「臣犬馬齒四十二。」上笑曰：「正好用。」賜酒飯出。當是時，內閣進退甚經，召見後命以太常少卿兼翰林侍講，復入內閣，尋典機務。陞翰林學士，上嚮用李賢，每召獨對，或并召吏部兵部王馬兩尙書相商榷。賢陽退，每諧時，時持正論不相徇，或至失色爭議，定不相嫌。賢每語人曰：「彭公君子也。」天順末，錦衣門達怙寵，中傷賢，上曰：「去賢，行專用時。」內臣或語之，時矍然曰：「李公有經濟才，胡遂至此。」因力辯其誣，謝內臣曰：「李公去，時不得獨留。」語頗聞上，賢事竟雪。戊寅春，上皇列慈聖皇太后徽號，詔天下，時謂李賢曰：「此事宜有恩典及人。」賢曰：「一年兩赦，恐非所宜。」時曰：「非謂赦也，謂宜因此遂行優老之詔。若朝官父母年七十者與誥，敕百姓年八十者與冠帶，是則老吾老以及人之老。如此始與徽號相合。」賢擊節曰：「是也。」卽擬進呈，上大悅。後因著爲例。河南衛官強橫凌人，刺事者誣謀反，煨鍊成獄，時持不可，坐如律。

活其家百口。憲宗卽位，進吏部右侍郎兼學士，尋進兵部尚書。議上兩宮徽號，時力持同尊，及加二字，事詳宮闈紀。成化二年，賜歸省，還朝。三年，四川宣府遼東地震，上疏陳六事，上嘉納之。英宗實錄成，加太子少保兼文淵大學士。時侍講江朝宗、楊守陳以實錄成，陞洗馬，久之以不兼翰林銜，不得與院事。二人疏乞兼舊官，且言祖宗來宮寮，未有不兼翰林者。下內閣，時言諸君考滿時，或言寧無兼官，得陞二級足矣。願復有此疏，謂余不練朝章乎。永樂中，楊士奇以翰林學士改左春坊大學士，未嘗兼舊官，竟不許。四年，慈懿皇太后崩，詔大臣議葬所，乘相視莫敢發。時曰：梓宮當合葬裕陵，主常祔廟。具疏言漢文帝合葬呂后，宋仁宗合葬劉后故事。此國家綱常，宜從典禮。卒從時議。是年秋，彗星見，起三台，時儲位久虛，時乞修省疏，言外庭大政固所當先，宮中根本尤爲至急。望正名均愛，廣繼嗣爲宗社大計。又言大臣進退，皆宜斷自聖衷，不可專委旁近。如皇上素知其人，亦宜召吏部而議，或召臣等參詳。庶權歸朝廷，人無希幸。七月，陝西土達滿四反，時請追問激變之故，行間參劉清敗績，兵部請命各鎮兵赴援，聲息益急。復請調京軍往，以都督劉玉總兵副都御史項忠提督軍務。項忠未至，軍多敗衄。玉忠至，分兵圍賊於石城，會毛忠戰死。京師聞益危懼，以撫甯侯朱永領京軍四萬助戰，命已下。永難之，奏定賞格。時見其張大，難於遽止。第令且整軍裝待。十一月，忠知別命將，乃請星馳赴援。儻破賊，則一面奏報。上命中官召兵部尚書程信至閣議。信謂事急宜行，時曰：賊若四出攻劫，誠不可緩。今入山自保，我軍圍守甚固，不一二月，賊必窮困。就擒京軍何用再行。因問信曰：京軍何時可至。曰：來春。時曰：事之成敗在歲終，此益緩不及事。信忿忿。

出危言曰。忠軍若敗。必斬一二人。然後發兵。相知者盛爲時危。時曰。諸公勿爲時危。時觀忠疏曲折。知賊決可平。但彼聞已遣將。不敢自任。故也。已而十月執四賊。羣言始息。五年無雪。疏言自古旱災。皆由下民怨苦。感動天變。近日光祿寺買辦各城門抽分。陪尅太甚。而獻珍珠寶石者。倍估增直。規取府庫。以萬民膏血。充姦佞囊橐。伏望懲革。以惠生民。進吏部尙書大學士如故。七年冬彗星復見。疏言德政之要。一罷佛事。二謹命令。三請退朝之暇。延接大臣。面議政事。兼問軍民休戚。訪人材賢否。察治體風俗得失。四重官賞。節刑獄。五聽受直言。六戒勵百司。陪尅之禁。太監劉永誠沒。家人陳有軍功。乞贈伯爵。公力阻得寢。八年水旱。復疏時政闕失。乞放歸田。不許。十一年正月。加少保。卒贈太傅。諡文憲。時資稟旣異。充養學問。敬謹粹溫。休休好善。乘謙抒誠。終歲未常一二宴會。卽會未常有音樂。愛惜天物。片楮寸墨。不輕費。非其義。一毫不取。

史官曰。彭時練達朝典。能斷大事。觀其並尊兩宮。全人主。坐策西師。止京軍之行。皆有定識。定力卽韓琦之調護。魏相之決策。不是過也。與南陽同心輔政。曰賢去不獨留。又古者師師休休之風矣。視崇說之齟齬。何如哉。



明書卷一百二十六

列傳四

名臣傳十一

徐溥傳

徐溥字時用。宜興人。景泰五年進士。授編修。天順元年兼司經校書。成化元年陞右庶子。兼侍講。十年陞少詹事。兼侍講學士。十六年轉太常卿。兼學士。明年禮部侍郎。二十二年改吏部。孝宗卽位。以吏部侍郎兼學士入內閣。是年十一月陞禮部尙書。兼文淵閣大學士。弘治四年。憲宗實錄成。加太子太傅。改戶部。進武英殿。七年加少傅。兼太子太傅。改吏部。進謹身殿。是年上言機務日繁。誥敕委積。正統中王直王英皆侍郎兼學士。在內閣專誥敕。上從其言。用李東陽謝遷。未幾星隕地震。京師雨土。飛蝗乞罷不允。八年命撰三清樂章。率同官上言。天子祭天地。夫天至尊無對。故禮以少爲貴。祭不過南郊。時不過孟春。牲不過特牛。漢祀五帝。儒者非之。況三清乃邪佞之說。謂一天之上有三大帝。乃以李昉居其一。是以人鬼列於天神。非禮也。至於郊祀樂章。皇祖舊制。今所傳樂章。雖在永樂大典。是書博采弗精。不可以黷禮。臣等誦習儒書。若邪說俚曲。尤所不習。且初設文淵閣。命學士居之者。實欲其謀議政事。講論經史。培養本源。弼正闕失。非欲其阿諛順旨。以取容悅也。上嘉納。欽天監正李華者不職。罷。忽傳旨復職。溥言。皇上卽位。

來大小陞除皆出題擬。別無內降指揮。以故干請斷絕。華選張巒葬地有勞。宜量與賞賚。傳帖既行。侍門遂啓。臣等不敢阿從。十年三月。章太監急走內閣。言上坐文華殿。宣四先生。溥及劉李謝倉卒問故。章對不知。溥等至殿頓首。上曰。近前。溥等前。諸司禮皆環跪御案傍。上曰。看文書。諸司禮取諸司題奏與溥及劉健。以片紙數幅與李東陽謝遷。每一疏。上必曰。與先生輩議。溥等擬批答。上上覽。或更定二三字。或刪去一二句。應手疾書。略無疑滯。溥等懼不能稱上意。頓首請曰。疏中事多者。臣等請將下閣看詳擬上。上稍不說。曰。文書尙多。欲書閱。閣中亦闕。盍就此面議。諸輔臣又頓首曰。惟自英宗召見李賢等後。四十年。憲宗初歲。不過一二見。道二三語。是日溥等得見上。天質明睿。聖心仁厚。大喜。願應對不能副上意。又輒慚懼。自是不復召。十一年溥目眚乞休。卒年七十二。贈太傅。諡文靖。溥在相位數年間。六部多得其人。當其人災異屢見。旋復消滅。虜犯跳梁。亦竟遁去。天下稱平。溥能任人。凡弘治中所上章疏。皆屬李東陽。而溥因事納忠。隨才器使。屢遇大獄。保全善類。從容調劑。引謗消讒。雖無勇功智名。而培養國家元氣爲多。溥常置義田八百畝。贍族。請下戶部著籍。

史官曰。語云。遠視其所舉。況端揆以用人爲職者乎。徐溥在憲孝之世。雖無大建明。然能舉李謝自輔。六官之長。罔非民譽。休休不專。此亦有足多者。太平旣兆。奉身而退。視李謝晚節。則又幸矣。

王恕傳

王恕。字宗貫。三原人。正統十三年進士。庶吉士。入翰林。翰林業治古文辭。而恕不喜古文辭。務以明體適

用博綜經濟無意文事所以不得留出爲大理評事遷左寺副條上刑罰之不中者六事上俞行之景泰五年出知揚州府屢辨疑獄歲饑發廩不俟報且給醫藥多少全活出資政書院教郡子弟天順四年以考最治平第一超拜江西右布政使嶺寇犯贛州恕奉檄率師討平之安輯流冗有方轉河南左布政使成化元年陞右副都御史撫治荆襄南陽時以襄南多山秦楚之流民萃焉而豪多爭礦殺人特開府鄖陽恕首隸之會兵搗襄盜平其巢餘悉解散蝗生乞避位因勸上去奢崇儉俄內艱會荆襄大盜起起復會朱永勦之劉千斤石和尚作亂佐王師三年討平之帥欲縱兵搜山恕不可下令曰擅殺者斬因榜示流民各使復業流民爲建生祠繪像祀恕母憂歸四年卽家起復轉左巡撫河南賑災均賦獎廉抑貪人多稱之明年陞南京刑部侍郎外艱七年改刑部總河道濬隄刊溝省河隄吏有成功九年改南戶部十二年復爲左副都御史巡撫雲南時朝議以雲南在萬里外西控諸夷南接交人鎮守中官橫甚欲借恕彈壓恕心知所謂單車攜二僮往中官錢能使其麾下指揮郭景等以玉帶龍衣美裝玩好馳驛謁安南王黎灝灝報以異寶生金犀象諸物景等復與其國互市稱載還恕廉得之遣騎道執景景迫投井死因悉銀鑄其從者下之獄而沒入其賄飛章露勦能私通外夷罪當死當是時灝別爲私郵通滇欲乘間取我至是其謀始杜而錢能使之乘驛以黃鸚鵡進恕復上章極言萬里勞人進一羽族微物恐天下有以窺上意因盡發能貪贖暴肆諸狀又言昔交趾鎮守非人致一方陷沒騰衝啓釁致麓賊叛逆今日之事殆又甚焉上爲不得已召能歸安置南京黔公諸大帥以及士酋皆懷奉三尺恕在雲南九閱月疏二十

上十三年進右都御史。明年召掌南都察院。兼參贊機務。往返衣書一襲而已。條上□操京操事宜。盡攝營將之占役者。一卒不得走私門。禁番使毋得互市。考選軍政。卽同事者無干瀆。又明年改兵部尙書兼副都御史。巡撫南直隸。兼督糧餉。恕以天下一切納貢賦者。苦收取過重。至破家。乞嚴禁革。光祿寺歲供白粳。概及庖人賤工。請爲裁省。皆從之。常州時有羨米。請以六萬石補其夏稅。又以補戶口鹽鈔六百萬貫。官田賦太重。減耗米十餘萬。明年水災。奏免秋糧數十萬。草半之。而周行賑貸其貧者。計二百餘萬口。三吳之人。以爲自設巡撫來。幾一甲子。獨恕與周忱。二十八年。恕二年。以忱仿姚崇。恕仿宋璟。時中官杜福。以中旨下常州。取古玩諸物。擾民。恕上言古之明王。有投珠抵璧。卻千里馬。焚雉頭裘者。非不知珍玩之可愛。恐因而妨政害事。力爲屏絕。以固結人心。爲宗社計也。乞崇恭儉爲天下先。召還織造官。明敕中外。無獻珍玩奇物。生民幸甚。中官王敬乘傳至東南。大索奇玩。所至驚懼。恕上言當此凶歲。謂宜遣使賑濟。而乃橫索玩好。昔唐太宗遣使諷梁州獻各鷹。明皇令益州織半臂。背子捍撥。鑲牙。李光亮蘇頌不奉詔。臣不敢不效之。又中官王敬垓。千戶王臣。以妖術取中旨。齎御帑金。收市圖籍珍玩。因而張皇聲勢。搜括富人財寶。人情洶洶。恕乃極言敬暴失人心。損國體。傷和氣。而召災沴。盡條其狀罪。三劾奏之。上立詔戒敬。久之。敬等俱收捕下獄。斬王臣。梟其首於江南。并戍其黨十八人。中外稱快。二十年。轉南京兵部尙書。參贊機務。時錢能復。蚤緣守備南京。與恕共事。語人曰。王公天人也。吾有敬事而已。尋加太子少保。會刑部員外郎林俊論妖僧繼曉建寺下獄。督府經歷張馘救俊亦下獄。恕上言二人志在盡忠而得罪。

恐人自此以言爲諱。設有姦邪誤國。誰復肯爲朝廷言者。疏入不報。會侍郎馬顯乞致仕。內批附恕名。落宮保。與顯並致仕。主事王純言恕忠亮不可去。下純獄。謫思南推官。當是時天下無事。內則宦戚。外則閣部。各引私朋。置清顯。及汪直李孜省。內外交結。得進退大臣。大臣皆類首甘心依附。惟恕著節不撓。孝宗卽位。召爲吏部尙書。加太子太保。恕薦楊守陳。彭韶。張悅。周經爲左右侍郎。耿裕。何喬新。倪岳皆引置。執政。忠諫久廢。如王徽。黃仲昭。賀欽。剛直被抑。如周英。祁順。並皆薦用。裁抑僥倖。廢獎名節。無敢以私干者。劉吉在內閣。每持恕。恕直己不屈。南科道劾吉。薦恕宜入閣。吉惡南科道。會南守備內臣與南科道相訐。南科道多貶斥者。恕力言宮中府中俱爲一體。陟罰臧否。不宜異同。知州劉概。御史李興以忤吉下獄。恕力解得減死。內旨通政司經歷高祿爲本司參議。恕言祿出科目。自能遠到。而越次超陞。非所以愛祿。幸以天下之官待天下之士。勿以親戚妨公議。徐生。諸醫也。傳陞院判。恕執奏。下吏部。會禮部。太醫院同御藥房太監選用。恕力爭。祖宗來未有吏部會內官推選官員例。成憲不可更。上曰。徐生善藥。與院判。恕遂乞休。屢疏上。上曰。卿持正輔佐。朕心知之。勿辭。恕遇事輒言。有不合卽引疾求退。上每溫言留之。內閣滋不悅。謂爲好名。滿三載。授柱國。上念恕老。風雨免朝。徵王乞陞鈞州爲府。晉王乞爲世子。別設典膳。恕皆論止。兩廣都御史秦紘。劾安遠侯柳景不法。反爲景所誣。坐致仕。恕極言紘不當罷。卒留紘爲南戶部尙書。恕在吏部時。臺諫劾巡撫。又潘郡官。內批下罷斥。恕以爲不得其職。連疏乞休。皆不許。南臺又薦宜入內閣。內閣宜忌之。上曰。朕用審義王直故事。任恕吏部。若有謀議。亦無不聽也。弘治六年。時邱濬忌恕。爲

御醫劉文秦草疏指斥。恕。恕疏辨。上留恕。恕力求去。遂致仕。恕仕四十五年。凡上三千餘疏。皆忠直凱切。蓋憂世之志如范仲淹。濟世之才如司馬光。直諫如汲黯。惠愛如鄭僑。年九十猶考論著述。言動必按矩度。常言我垂老方理會學問。卒年九十三。贈太師。諡端毅。子承裕。歷官南戶部尚書。諡康僖。史官曰。明制文極六曹。天造無倫矣。蹇夏經綸。惻惻。太宗北征。全國是屬。三楊熙績。臺省坐臻太平。君佚臣勞。所謂代天之相。英廟之遇李賢。密書顯斷。萬機精覈。局體一變。成化間。王恕。王竑。秦紘。居則岳屹。動則雷霆。大事斧斷。小細海蓄。帷幄佞幸。請劍必殛。使見之者畏。聞之者攝。斯其人死生富貴足動之哉。然較之天順以前。則殊矣。時與位不同耶。抑委任權力殊耶。弘治中。劉大夏。韓文。馬文升。許進。周經。耿裕。倪岳。劉宣。咸稱名卿。然志存納約。行在精密。苟濟其事。小枉安焉。局體又一變矣。雖形迹罔暴。義遵矯直。亦運數然歟。

劉大夏傳

劉大夏。字時雍。華容人。天順七年舉鄉試第一。明年中會試。又明年成進士高等。改翰林庶吉士。解館爲職方主事。歷郎中。時有獻取交南策者。下部索永樂中調兵食數甚急。大夏匿其籍。徐以利害告。尚書余子俊力阻得寢。朝鮮使貢。苦建州敵遮道。請改道由鴨綠江。中官有朝鮮人爲地。下部議。大夏曰。朝鮮貢自鴨鵝關。由遼陽經廣甯。過前屯入山海。迂回三四大城戍。此祖宗微意。若自鴨綠江抵前屯。山海路大徑。恐貽他日憂。不可從。塞有虜入。尚書必問劉郎中云何。劉郎中言輒行。行輒效。尋出爲福建參政。巡海。

海道兵又弛。大夏至追哨船。葺倉計儲。立收支法。寨設一館。往來督察。不半年海道肅然。陞廣東右布政使。常過崖山。弔大忠祠。宋慈元后陵。泣然曰。后與陸張二臣同死國。今大忠有祠。而慈元不祀。義弗稱。謀立廟。人感其義。不日而就。轉左浙江。弘治六年。河決張秋。擢右副都御史治河。不能塞。再遣平江伯陳銳。內臣李興。山東按察副使楊茂元疏。乞召還銳興。專任大夏。及抑損外戚。以回天意。茂元謫長沙。同知大夏集山東河南首臣上議曰。河性湍悍。張秋乃下流喉襟。未可輒治。治於上流分導南行。復築長隄禦橫波。且防大名山東之患。候其循軌而後決。可塞也。遂疏孫家渡口三十里。四府營河十里。築長隄。起河南胙城。盡徐州經滑長垣東明曹單諸境。長三百六十里。量能任功。五旬而事竣。十年虜入塞。師行乏軍興。進戶部侍郎。經畫饑需。或曰。邊糧草半屬京貴子弟。此行剛且取禍。大夏曰。處天下事。以理不以勢。定天下事。在近不在遠。俟至彼圖之。至邊。召問父老。得其要領。一日榜通衢云。某倉缺糧幾千石。每石給官銀若干。凡境內外官員各商家願輸者。米自十石上。草自百束上。聽卽中貴子弟不禁也。不兩月。積蓄有餘。蓋往時糴買法。糧百千石。草千萬束。方聽。以故貴子弟爭相爲市。轉買邊人糧草。結運牟利十五。此法立。有糧草家自得告諭。貴子弟卽欲收糧無所得。邊人言自劉侍郎收市法行。倉場有餘積。私家有餘財。十一年。三章乞致仕。賜歸。杜門修勵。築草堂於東山。天下因稱曰東山先生。十三年。卽家拜右都御史。總督兩廣軍務。卽擢二童行。兩廣人聞大夏來大喜。大夏至。旌賢才。斥貪穢。裁冗費。更役法。上下不便者一切更正。十五年。陞兵部尙書。時邊事急。上以兵事屬內臣苗達。謀出兵掩虜。上召大夏問。力言不可。上曰。太

宗類出塞破虜。今何不可。對曰。皇上聖武。固同符太宗。奈今兵將庸疲。遠不逮昔。當時淇國公邱福稍違節制。數萬甲兵。一日陷虜。今之將又在福下。不若且令各邊料虜戰守。猶似得策。上曰。善。一日。召問天下衛所軍士。何如。對曰。貧與民同。安能養其銳氣。上曰。諸軍居有月糧。出有行餉。何以故貧。對曰。江南困於運糧。江北困於京操。此外浪費。猶有不能盡知者。翌日。即詔各衙門條上軍民疾苦。有造飛語帖宮門。誣大夏者。上曰。宮門外人不能至。必內臣忿不得私役軍士耳。修清甯宮。敕下部軍役萬餘人。大夏請減十五。督工訴上。上令內臣語內閣擬上詰責之。大學士劉健曰。惜軍力。兵部職。近劉尙書輒以老辭。朝廷下濫旨。勉留尙請未已。若詰責彼。將以不職固辭。更於何處得如此人用。內臣以告。上欣然。如大夏議。是年以災求去。不許。因上十事。皆兵食要務。下諸司議興革。上常詔諭曰。事有不可。每欲召卿議。又以非卿部事而止。後有當行罷者。卿揭帖啓朕。大夏對不敢。上問何也。曰。先朝李孜省可戒。上曰。卿與朕論國事。豈孜省比。曰。臣下以揭帖進。朝廷以揭帖顯行。何異前代斜封墨敕。陛下宜遠法帝王。近法祖宗。事之可否。外付府部。內咨內閣。如用揭帖。上下俱有弊。且非後世法。臣不敢效順。上曰。善。常召問天下何時太平。朕幾時得如古帝王。對曰。求治不宜太急。凡用人行政。即召執政大臣而議行之。但求順理。即治太平。上曰。劉健常薦劉宇才堪大用。朕觀宇小人。內閣亦豈可盡託。上常召問近日外議云何。曰。近有旨釋李夢陽。中外權呼聖德如天地。上曰。夢陽指斥威曉。且語言狂妄。朕不得已。下詔獄。比奏上。朕試問左右云。何應。曰。付錦衣撻而釋之。朕知此輩得旨。即重責致死。以快中宮之怒。使朕受殺直臣名。不忠如此。朕以故釋。

復職刑部尙書閔珪讞大獄忤旨批答從不下。大夏獨對上因語及之對曰人臣執法不過效忠朝廷珪所奏無足異上曰且道自古何君何大臣亦當如此對曰臣幼讀孟子見舜爲天子皋陶爲士瞽瞍殺人皋陶亦執之而已似未可深責上頷之明日允珪議十七年北邊缺總兵上諭內臣語大夏用李傑本外戚所薦也內臣言大夏得傳帖尙執奏安肯聽奴口語上默然一日朝罷召大夏上手一帖付之帖書李傑名大夏退至部語同列曰此非將材豈可爲大帥明日別推二人上內批竟用李傑去鎮無幾勦章至上謂大夏曰悔不用卿所薦先是大夏應詔陳言盡罷光祿無名供億歲百萬計又議革騰驥四衛軍士內臣恨之上召與密議又或及裁抑內臣事一日上召大夏入御榻前上左右顧近侍內臣退避去奏事畢復來對久欲起不能上命太監李榮掖大夏出榮且扶且請曰吾輩行事多失老先生幸隱惡揚善大夏曰聖上天性聰明某於政事外未常敢輕易毀譽人某今日立求退上曰李榮每稱卿某於老太監蹤跡疏遠何以得此榮曰常朝大臣公名第一榮何敢蔽賢時戴珊爲左都御史上有大政事每召大夏及珊面議十八年春二人對畢上賜二人白金二錠諭曰朕聞朝覲日文官避嫌有閉戶不與人接者卿二人雖開門延客誰復以賂通乎以故賜卿二人又曰勿朝謝公卿知之且懷愧懼上崩大夏慟哭不能起正德元年加太子太保致仕二年閔瑾專政劉宇恨大夏孝宗時面對不爲宇地謂瑾曰籍劉尙書家可得幾十萬金瑾因尙書潘藩總兵毛銳獄詞有大夏名三年夏矯制逮詔獄且欲殺之下廷議屠藩曰檢律劉尙書無死罪謫戍肅州四年至河西買墓地五年赦歸田瑾誅復官致仕大夏平生不以勢位自居

所至愛民如子。民亦愛之如父母。遇事有常行。未嘗先洩。有疑未明者。不以公移顯行。雖屬官亦具手簡直述其事。紙尾書名。以故所委事。無大小無不盡心力。不相欺負。功名富貴。子孫福澤。泊如也。常預作壽藏。東山陽記曰。予常見士大夫家子弟。愛其父兄者。俟其身後。必求名儒大筆。鋪張行業。以誌於其墓。作國史者。或憑而采之。予無似。承祖宗世澤。竊科甲官祿。前後四十年。在家在邦。無一事可述者。萬一後人私所親。謬言以誤名筆。縱可欺人。獨不自愧於地下耶。用是述平生履歷。書而勒諸石。付兒祖生等藏之。以俟他日。其詞雖俚。其事則核。予心安焉。又常曰。居官以正己爲先。所謂正己。不特當戒利。亦當遠名。李東陽曰。東山乃昔人所謂與物無競。臨事有爲者也。卒贈太保。諡忠宣。

史官曰。弘治最多名臣。內閣則劉健、李東陽、謝遷、六曹則耿裕、倪岳、余子俊、周經、張悅、戴珊、閔珪、韓文。侍從則楊守、陳賢、吳寬、王鏊。方鎮則秦紘、王越。要末如恕、文升、大夏之灼灼者也。恕直諫。重天下。然不難於孝宗。而難於憲宗。孝宗、仁君也。然而頗以齟齬然。豈非所謂事君數斯辱耶。文升數更中外。歷權寄不屈。不挫。蓋以才力勝。大夏仁心爲質。道授法守。晚際魚水。密勿都俞。庶幾有三代之風。所恨造膝之語。少有傳者。

程信、秦紘、鄧廷瓚

附程敏政
朱英姚鏗傳

程信、字彥實、休甯人。生於河間。正統七年進士。十年選給事中。景帝卽位。疏薦薛瑄。虜犯京師。信監軍守

西城上五事曰。新號令以振軍威。募勇敢以備警急。召勤王以遏南侵。設武備以防內變。養銳氣以備戰守。都督孫鏜禦虜西城外失利。諸將不相援。鏜急呼城門求入。信不肯。疏言鏜小失利。卽開城納鏜。虜益張。人心益危。趣鏜戰。必效死。士上立詔勿納鏜。虜逼城。鏜兵亦附城戰。信與都督王通都御史楊善城上鼓噪發鎗。破佐鏜。虜退。遂請勒石亭于謙移營關鄉外禦虜。且號令諸將。景泰元年使蜀還。言道過畿輔。民饑乞賑貸。又言河間因虜患。罷官生徒并府學。乞復舊。廷議奉迎太上皇。時有龔千戶者。投密書高毅家。言禮宜厚。語漸聞。莫敢發。信倡同列會疏入。上取書。留中不報。明年上中興固本十策。曰。敬天求賢納諫。謹災節用。詳刑。選將。練兵。尙儉。隆師。又明年上修德疏。陞山東參政。備兵遼東。憂去。六年服闋。改四川理簡松番。天順元年入賀。會錄景泰間進言者。陞太僕卿。信案故事。理營衛馬。三營大將石亨孫鏜。曹欽並疏言。太僕苛急。請馬隸兵部。信言。高皇帝諭馬數勿令人知。今隸兵部。馬登耗。太僕不得聞。卽有警。馬不給。請以責兵部。上是其言。歸。太僕如故。二年陞僉都御史。巡撫遼東。虜董山通朝鮮。受僞制。爲中樞密使。信廉得僞制。疏請先發伐其謀。上爲遣給事中使朝鮮。錦衣譯官出遼東塞。董山匿不承。出僞制示之。皆愕懼。乞貢馬謝罪。會虜李來欲犯遼東塞。信提兵出境。屯三月解。遼東總兵海甯伯董興倚吉祥姻。又昵都指揮夏霖。恣不法。分巡僉事胡鼎發霖姦賊罪四十事。信條上。詔錦衣指揮郭英逮霖籍其家。英得霖貨。未滅霖。寇深。遂劾信惑外臺官。瀆聖聽。詔詰信。不肯引咎。徵下詔獄。降南京。太僕少卿。五年召還。陞刑部侍郎。憂去。成化元年起爲兵部侍郎。當是時。兩廣川陝荆襄諸路用兵。獨署部區畫方略。皆中機宜。

先是四川貴州山都掌蠻叛。兩鎮守將不相下。兵久無功。朝議遣憲大臣督戰。科道官在軍中者。或告捷得賞。未幾諸蠻又叛。據大壩山箐險。破合江上九縣。三年進信。尙書督軍與襄城伯李瑾發川廣雲貴番漢兵討賊。信至永甯。分大軍三道。自督入金鷲池。四川軍由戎縣。貴州軍由芒部。雲南軍由普市入。期會大壩。大軍進至李子關。渡航鋪。賊恃險拒敵。飛梭下壘。石如雨。我軍發神鎗勁弩。賊卻。扳崖上。順風舉火。焚其龍背豹尾二寨。賊退保大壩。貴州軍已騎其後。四川雲南軍角其左右。賊驚散不支。連破諸賊寨。斬首五千。擒二千餘。賊復走入天井水磨二洞。洞窻幽暗不可入。窒洞圍守月餘。賊死幾盡。九姓土獠附賊。乘還師撲勦。又大捷。請移瀘州衛渡航鋪。控諸蠻。分山都掌故地。隸永甯芒部。更大壩爲太平川。立長官司轄熟夷。論功兼大理卿。言官論信上首寇不實。信四疏請老。不允。七年無雨雪。信應詔修闕政。言兵事可更張者四。兵弊可申理者五。其大者延綏兩廣歲遭殺掠。邊以捷聞。朝以捷賀。上下相蒙。戎夷益肆。四方流民盡聚荆襄。不早區畫。變起中土。天子六師。馭輕居重。京營士馬。疲耗器甲。頓朽非大更張。緩急可憂。是歲改南部參贊機務。信曰。參贊謹非常。有司事非所宜預。八年合南都大臣言。興利除害三十餘事。乞召還給事中王徽。勅退南京守臣應城伯孫繼先。明年致仕。又明年卒。贈太子少保。諡襄毅。以功得世錦衣百戶。信才雄氣果。然沈思曲算。顧不輕洩。先是敵久據河套中。議遣大同守備楊信將兵十萬搜套。信執不可。信征南蠻制詞。賞殺皆得專斷。迄班師。不敢輒賞殺一人。曰。刑賞天子大柄。願闕外事不易集。假大臣東攝人。卽幸事集。輒自專。非分有奇禍。少時力耕養父母。及貴。寡慾自檢。花鳥書畫。不接耳目。割

田五百畝爲義莊。贈姻族人子敏政。字克勤。成化二年進士。敏政幼靈異。少時讀書。一目數行下。以奇童薦入翰林。登甲科。益攻學問。淹貫經籍。成化弘治間。翰林稱敏政學最博。贍李東陽文章俊麗。陳音性行真純。敏政爲諭德。侍講武宗於東宮。弘治十年起復副總裁。修會典。辭不至。明年召至京。以太常卿進禮部侍郎。兼翰林學士。復侍東宮。又明年主考禮部。忌敏政者。謗敏政洩會試題。弼進士。得金錢無算。言官輒劾上。逮治午門前。敏政素負時名。不能忍辱。下人朋輩要津人。亦幸敏政敗污。蠹去。不可復起。不復相左右。敏政竟奪職。逾年憤懣卒。敏政讀書著述。尙本實。議論孝經。義參法理。惕惕行檢。凡此皆讒忌之口也。敏政少詹時。請正文廟祀典。謂戴聖。劉向。賈逵。馬融。何休。王肅。王弼。杜預。八人。宜褫爵罷祀。鄭戩。盧植。鄭玄。服虔。范甯。五人。各祀於鄉。后蒼說禮。萬言。號曲臺禮。戴聖等皆受業。今禮記。非后氏不傳。王通。胡瑗。身立師道。百世如新。宜加封爵。從祀。乞別祠祀。啓聖王。以顏無繇。曾點。孔鯉。孟孫氏配享。程珣。朱松。從祀。大抵敏政議與宋濂相表裏。疏下禮部報聞。又請錄開國功臣後裔。嘉靖中議禮考文。敏政言多採行。敏政又請楊時。從祀文廟。請孝穆太后比周姜姬。別廟享所。輯有道一編。心經附注。新安文獻志。皇明文衡。瀛賢奏對錄。宋逸民錄。進二百卷。

秦紘。字世纓。單人。景泰二年進士。初爲南京御史。有風裁。劾中官。降北黃驛丞。御史陳綱薦。知雄縣。禁中官捕獵。誣得禍。幾不測。民數千走擊。登聞鼓。訟冤。得有。調知府谷縣。陞知葭州。調秦州。成化初。爲鞏昌知府。清廉自守。禁官府和市。吏民畏愛。十三年陞陝西參政。有軍功。坐事調廣西。十八年陞僉都御史。巡撫

宣府破虜柴溝堡。轉巡撫陝西。時秦府旗校肆橫。苦軍民。悉擒治。不少貸。王不能堪。訐絃。凌親王。憲宗怒。逮下詔獄。命內臣尙亨籍其家。得黃絹一匹。故衣數事。亨還言絃貧狀。上親閱其資。嘉歎良久。立釋之。且賜鈔萬貫。旌其廉。命巡撫河南。會汪直至。他巡撫率屈禮。絃獨與抗。密疏直多帶旗校擾地方。直還。上問各省撫臣賢否。直獨稱絃廉能。上出絃疏示直。直頓首伏罪。益稱其賢。弘治三年。以右都御史總制兩廣軍務。破岑欽於鷓鴣嶺。走匿四城。遂克田州。又破海南黎及隴水後山賊。四年勅總兵安遠侯柳景貪不法。逮景下刑部獄。追賊鉅萬。褫其爵。干內降滅賊。因摭他事誣絃。亦被逮。坐免。臺諫交章論救。上報聞。王怒在吏部。極言絃廉直。忠信不可棄。上特旨用爲南戶部尙書。八年乞致仕。不允。十一年致仕。十四年虜報急。以王錮馬文升故事。召絃。戶部尙書兼憲職。巡撫陝西。十五年總制陝西三邊軍務。整化馬池鹽課。買馬開豫。望成屯田。先後斬首九千。修城堡。關塞一萬四千所。剷山崖三十里。十七年乞致仕。不允。加太子太保。是歲革總制。召還部。辭得致仕。十八年卒。年八十。贈少保。諡襄毅。絃剛毅廉介。歷官四十餘年。提兵南北。列位孤卿。所居僅蔽風雨。妻孥菜羹麥飯。不改其舊。及卒。家無餘資。未幾子孫貧乏。不能自存。閔瑾專政時。絃義兒丁玉。與其繼妻弟楊瑾爭。許瑾因誣絃子。略有資萬計。瑾喜。卽籍其家。無所得。鄧廷瓚。字宗器。巴陵人。景泰五年進士。爲瀘安知縣。問民疾苦。專施惠政。不求赫赫名。終九載。無知者。兵部尙書張鵬。時以都御史巡撫廣西。知廷瓚。薦知梧州府。會母憂去。貴州程番府在萬山中。夷獠雜聚。難治。以廷瓚知程番。廷瓚悉心規畫。凡城郭街衢。廟宇廡舍。以次興建。榜諭諸夷。使受約束。政令公平。莫不

感悅。墾田不踰界入市不二價。四境晏然。蔚如中州。超陞右僉都御史。巡撫貴州。適黑苗久叛益肆。守臣告急。敕廷瓚往視。兼提督軍務。初撫不從。始合衆謀調兵食。決策征勦。兵至其地。號令嚴明。將校用命。斬首六千。獲二千。械首惡俘京。寇旣平。奏言都勻清平。舊設二衛。所屬九長官司。其人世祿驕縱。稔惡釀患。致夷人侵田奪貨。逞欲無厭。已四十餘年。軍疲於戍守。民困於轉輸。其害不可勝言。今幸黨惡削除。非大更張。不能爲保境安民之計。條上十一事。下兵部議行。始設都勻府一。獨山麻哈州二。清平縣一。更設流官與土官兼治。以右副都御史召入臺。未幾出鎮梧州。兩廣自成化初。韓雍平寇後。開府梧州。率以憲臣有才望及官高者。總督軍務。兼巡撫。廷瓚性不瑣瑣。益思安靜爲治。屬吏有賢者輒薦舉。或不職。特去一。二太甚者。奏除諸冗吏。曰。祿俸出於民。毋徒費。顧羣蠻以劫掠爲常。往往出沒閩楚諸郡。廷瓚言都御史金澤巡撫偏方非宜。宜以江西一省付澤。使二司聽節制。庶軍馬錢糧可以調度。其湖廣衡州可以設兵備。憲臣遷治所郴州便。又以廣東瀧水爲賊巢。宜卽其地設千戶所。調軍守禦。仍宜給隙地屯種爲久計。廷瓚於羣蠻結以恩信。兵不輕出。出則成功。若鬱林川雲鍾天桂諸種作亂。以次討平。其後四會諸下縣。饑盜竊發。勢尤熾。廷瓚所獲首惡李景光覃傑及其黨二百餘人。餘悉解散歸農。廷瓚歷官。處事求濟。待人無疑。雅寬廓如。莫規其際。所設施動中機宜。其中明炳。人莫能及。卒贈太子少保。諡襄敏。兩廣總鎮。又有桂陽朱英。正統十年進士。初爲御史。禦賊葉宗留處州。勅外賊汪金內臣善增。陞廣東參議。葉盛每事詢英。參政陝西。調兵食。征固原。巡撫甘肅。條邊事。陞兩廣督撫。專意安輯。兵革久困。民得休息。流人復業。

者十五萬家。出八十年。召入臺。加太子少保。卒贈太保。諡恭簡。英性度宏暢。才通敏。剛介而仁恕。所至有惠政。慈谿姚鏐。弘治六年進士。有文學。達吏事。個儻有負荷。嘉靖中督撫兩廣。土寇岑猛積凶。數十年。鏐討誅之。遺讒而去。三人齊名。兩廣祀之。稱爲三神公。

史官曰。兩粵多深崖箐險。爲羣蠻窟穴。與黔楚夷獠相表裏。往往有事。朝廷嘗遣大臣威武者鎮之。韓雍尙矣。秦紘廉威尤著。西陲南越讐焉。庶幾馬羊金粟之風矣。至結以恩信。不草艾其民。廷瓊之德甚厚善矣。程信之言曰。兩廣歲遭殺掠。邊以捷聞。朝以捷賀。上下相蒙。戎夷益肆。然則不貪功。不黷武。如數公者。威愛允濟。庶幾招攜懷遠之略歟。

劉健謝遷傳

劉健字希賢。洛陽人。父任華州教諭。先時大母張氏夢一偉人。致上帝命。持紫玉帶。賜其家。驚而寤。恍然如有見也。時母白己有身。比寤則報生男矣。父大異之。景泰四年。癸酉。舉於鄉。天順四年。庚辰。登進士。改庶吉士。授編修。成化十年。甲午。進修撰。丙申。陞春坊右諭德。丁酉。進左庶子。丙午。陞少詹事。凡三任。皆職輔導。皇太子。二十三年。丁未。孝宗卽位。錄輔導功。陞禮部右侍郎。兼翰林院學士。入內閣。參預機務。賜湖騎夷奴。戊申。改元。弘治。知經筵事。辛亥。進禮部尙書。文淵閣大學士。甲寅。加太子太保。賜麒麟服。進武英殿。戊午。加光祿大夫。柱國。少傅。兼太子太傅。戶部尙書。謹身殿大學士。癸亥。加少師。兼太子太師。吏部尙書。華蓋殿大學士。是年五月。一品滿九載。賜宴禮部。賚予有加。當是時。國家治平。上顧健喜。諭曰。勞卿久。

矣。兼支大學士俸。先是率同官上疏。近有旨令中官往武當山設像。懸旛修醮。命臣等撰敕并祝文者。竊惟茲山宮官像設已極壯麗。復有此舉。實爲無益。矧今災異迭出。民生困苦。苗賊肆亂。軍旅方興。轉餉繕兵。猶恐不及。君門萬里。豈能悉知。宜斥邪妄。以遏無良。十七年又率同官上言。近有旨朝陽門外修建壽塔者。臣等竊惟人主信佛。莫梁武帝爲甚。卒饑死臺城。信老莫如宋徽宗。卒囚斃塞地。本以求福。反以致禍。觀諸往事。可爲鑒戒。我祖宗相傳以治天下者。堯舜周孔之道而已。以此異端。蠱財惑衆。何關於治。佛塔之供。非所以訓天下垂後世也。又令撰真人杜永祺等誥命及封號。疏言臣等竊惟異端不可信。誥命封號不當與。夫誥命朝廷所以獎貞勵能。雖卿士大臣。必待秩滿考最。乃得頒給。況祖宗廟號不過十六字。親臣及文武大臣有功德者。號止一二字。此輩何賢何能。封號多至十八。流布朝野。傳聞後世。皆曰此朝廷所賜予。儒臣所擬撰。天下後世其謂之何。十八年進左柱國。支正一品俸。時上憂勞求治。益明習機務。眷念民瘼。而健亦身任天下之事。凡進用大臣及政事臧否。反覆竭忠悃。上未嘗不嘉納也。健又引李東陽謝遷入同輔政。上數御文華殿及平臺。召健等至。則屏左右。俾不得聞。左右大懼。每從屏隙窺。但聞上數數稱善而已。健確直見事稍遲。東陽才敏達。遷方質。三人同心。時人語曰。李公謀。劉公斷。謝公尤侃侃。上性至孝。望治甚切。而謹守成法。不輕易。有時語宮府。欲毅然創議。盡洗刷近侍權。復太祖之舊。健贊成之。不遺餘力。上大漸。召健等入乾清宮。進御榻前。執手款歔。令皇太子侍立。具言軍國重事。命健等悉心匡輔。健等皆泣受命。莫能仰視。語祕不傳。武宗卽位。健以願命大臣。翼新政。舉故事。百度振肅。海內安。

然。屬閣劉瑾竊柄。姦黨盤據。國事日非。健率同官自劾上奏。其略曰。陛下卽位之初。詔書一下。天下延頸。想望太平。而朝令夕改。迄無寧日。百官庶府。倣倣成風。非惟廢格不行。抑且變易殆盡。建言者以爲多言。幹事者以爲生事。累章執奏。則謂之再擾。查革舊弊。則謂之紛更。憂在於民生國計。則若罔聞知。事涉於近幸貴戚。則牢不可破。以一二人之私恩。壞百年之定制。而不顧。以一二人之邪說。破滿朝之公論。而不恤。臣等叨居重地。徒擁虛御。或旨從中出。略不預。或有所擬議。徑行改易。似此之類。不能一一備舉。臣等心知不可。義所當言。累有論列。多不見允。比爲戶兵等部議處。鹽法功次諸事。具本上陳。極言利害。拱候數日。未蒙批答。若以臣等言是。則宜俯賜施行。臣等言非。則亦明加斥責。而乃留中不報。視之若無。使臣等趨向不明。進退無據。深憂極慮。寢食弗寧。亦知內告外順。人臣之常。但政出多門。咎歸臣等。捫心反顧。無以自明。展轉於衷。事非獲已。若誘願命之名。而不進輔導之實。因循玩愒。竊祿苟容。既負先帝。又負陛下。用是共瀝愚議。上塵天聽。伏乞聖明矜察。特允退休。別選賢能。代茲重任。少道分毫之罪。幸延犬馬之齡。則陛下優待舊臣之心。勵精新政之義。兩盡而無遺矣。不報。健又率同官上奏。政令十失。極其凱切。上付各該衙門查奏革之。未幾。戶部尙書韓文首倡九卿共劾劉瑾。及太監王岳。范亨。徐智。共爲內應。仁等助之。獨焦芳。媚瑾。以健不附己。力攻健。希入內閣。致上震怒。傳旨捕岳等繫獄。令劉瑾入司禮監。瑾等先常奏內閣。納賄行私。欺壓內官軍職。形於劇戲。上已信之。至是。遂令健與謝遷自陳致仕歸。李東陽相餞。歎欷泣下。健厲聲曰。何用哭爲。使當日出一語。則與我輩同去矣。瑾尙恨不已。矯詔奪其官。謫劉粟。瑾

欲起大獄。盡殺諸不附己者。矯敕將內官王岳、范亨、徐智及劉健、謝遷、韓文、戴珊、楊守隨、林瀚、郎中李夢陽、主事王守仁、王綸、孫槃、黃昭、檢討劉瑞、給事中湯禮敬、陳靈、徐昂、陶諧、劉蒞、艾、洪、呂、卿、任、惠、李、光、翰、戴、銑、徐、蕃、牧、相、徐、邈、張、良、弼、葛、嵩、趙、士、賢、御、史、陳、琳、黃、安、甫、史、良、佐、曹、蘭、王、弘、任、諾、李、熙、王、蕃、陸、崑、張、鳴、鳳、蕭、乾、姚、學、禮、黃、昭、道、蔣、欽、溥、彥、徽、潘、銓、王、良、臣、趙、祐、何、天、衢、徐、珏、楊、瑋、熊、倬、朱、廷、聲、劉、玉、爲、姦、黨、榜、示、朝、堂、健、益、懼、杜、門、謝、客、瑾、誅、得、復、官、致、仕、聞、上、數、巡、幸、輒、泣、不、食、曰、吾、死、無、以、見、先、帝、矣、世、宗、入、繼、詢、求、遺、老、方、欲、召、用、而、健、年、已、九、十、矣、乃、降、詔、存、問、明、年、遣、撫、臣、就、其、第、致、束、帛、餼、羊、上、尊、卒、年、九、十、四、贈、太、師、諡、文、靖、健、有、知、人、之、鑒、先、是、何、景、明、年、少、而、文、人、謂、其、必、宜、在、翰、林、健、曰、此、子、福、薄、能、詩、文、何、用、景、明、自、中、書、舍、人、至、副、使、而、卒、人、服、健、之、議、

謝遷字子喬。餘姚人。成化十一年甲午鄉試第一。明年會試第三。廷試進士及第一。授修撰。滿九年。考陞右諭德。孝宗卽位。推恩宮寮。陞左庶子兼翰林侍讀。弘治四年。以憲宗實錄成。陞少詹事兼侍讀學士。憂去。八年。與李東陽同入內閣典機務。十一年。戊午春。皇太子出閣。加太子少保兵部尚書兼東閣大學士。十二年。己未。加一品服。會典成。進太子太保。改禮部尚書。武英殿大學士。十八年。加少傅兼太子太傅。尚書大學士如故。孝宗大漸。入受顧命。武宗卽位。閣瑾專政。遷不得其職。正德元年。乞致仕。許之。歸。瑾矯敕榜姦黨。列遷第二。成化弘治間。翰林聲望最重者。吳寬及遷二人。皆以進士第一人。遷儀韓修整。寬溫粹含弘。遷明暢亮直。優於政事。寬詩文尤有古意。一時並負公輔之望。邱濬卒。寬適憂去。遷入內閣。十餘年。

間號能持正。不失爲賢相。寬竟不得入內閣。劉健爲首相。遷數言寬。健曰。吾且去。用之未晚。他日又言。又曰。我且去。用之未晚。遷曰。吾豈私原博耶。願渠科第先予。年齒先予。望實先予。予越次在此。慚甚。故言之。而公終不聽耶。健笑不答。正德初天變。輔臣皆上章自劾。遷求去不得。復上疏薦寬及王鏊。自代。遷初入內閣。徐溥劉健相繼爲首輔。當是時。東陽位在遷上。凡條答敷奏章疏。皆出東陽手。遷與健並敕致仕。而東陽爲首輔矣。鏊以時望所屬。焦芳欲援以爲重。告瑾。內閣宜南北各用一人。以故芳與鏊同入內閣。先是焦芳入閣。憾遷嘗舉王鏊。吳寬而不及己。會鄉人以賢良薦。芳和闈瑾謂遷遠。詔格。與劉健俱褫職。又矯旨令遷弟武選郎迪致仕。子編修丕除名。庚午。瑾誅。詔復職致仕。世宗入繼。遣行人齎敕存問。迪起參議。丕復任。寤其子正爲中書舍人。遷上謝疏曰。臣匪才。誤蒙孝宗知遇。顧託之重。欲圖報稱。不自知其力之不足。旣而格心無術。輔導不效。引身退避。杜門省愆。俯仰懷慚。罪責難道。分與草木同腐。幸溝壑未填。遇皇帝聖明。嗣承天統。一新萬化。疲困更生。如臣衰朽。特軫聖慈。不加負國之誅。重錫優老之典。龍命下及。慚懼交并。顯茲垂暮之年。諒無圖報之日。惟有一言獻納。庶幾少效涓埃。臣聞傳說告高宗曰。學于古訓。乃有獲。又曰。監于先生成憲。其永無愆。古訓者。二帝三王之典謨訓誥。及諸經史之所載者。是已成憲者。聖祖神宗之典章法度。凡今諸司之所職者是已。仰惟聖性睿哲。生知而聖德成就。必資問學。經筵儒臣。分直進講。所以薰陶涵養者在是。燕閒之時。尤宜博覽羣籍。以廣見聞。苟有疑議難明。卽召勸講之臣。而賜質問。務求通解。戒一暴十寒之失。積日就月將之功。則聖學緝熙。追蹤古昔帝王之盛。近代不足

言矣。我朝祖宗之法。斟酌古今之宜。諸司而能恪守。萬世可以常行。奈何世遠人亡。政久弊積。漸失其初者有矣。聽覽之際。宜申飭百司。講求成憲。苟有窒礙難行。卽召執政之臣。而加商榷。務合舊制。究詰舛訛之端。振革廢弛之弊。則聖政有恆。而聖治之成。可以紹休祖宗。垂裕無疆矣。夫一日萬幾。固未易縷陳。而一心萬化。惟在於知要。臣故特舉君道之至要。以裨聰明之萬一。其他軍民利病。政治缺失。陛下明詔。許諸人直言無隱。況以言爲職者。林立於廷。必能爲陛下次第陳之。惟望留神省覽。兼聽廣納。不以疏淺而或遺。不以拂逆而見拒。則宗社幸甚。生靈幸甚。嘉靖六年春。復召入內閣。時年已七十九矣。十月抵京。進少傅。戶部尙書。大學士如故。明年三月乞歸。十一年辛卯卒。年八十三。贈太傅。諡文正。

史官曰。常孝宗之朝。君明臣良。劉健相而李謝連茹以進。所造膝密陳。皆天下大計。或謀或斷。蓋有房杜之風焉。晚際冲主。姦閹擅朝。機事不密。幾蹈訓注之禍。連翻去國。以明靖獻。語及顧命。未嘗不隕涕也。嗚呼忠哉。均躋上壽。以俟河清。斯平格之佑矣。



明書卷一百二十七

列傳四

名臣傳十二

戴珊張敷華傳

戴珊字廷珍。浮梁人。天順八年進士。成化三年爲監察御史。督學南畿。成化十四年出爲按察副使。督學陝西。窮鄉下邑。無不躬至。約束堅明。風雨不爽。二十年陞浙江按察使。尋陞福建兩布政使。弘治二年進右副都御史。巡撫鄖陽諸府。豪右多窟。流聚爲利。珊刻日令自首。嚴練兵伍。自製爲營陣法。蜀盜野王剛越境入竹山。平利諸縣守臣畏罪莫敢發。珊請合湖陝兵誅其首惡。縱脅從千餘人。事遂定。四年陞刑部侍郎。卽訊荆晉兩王府獄。明允。九年陞南京刑部尙書。十三年改左都御史。益自檢飭。務持風紀。雖簿書之細。必極精核。上親鞫大獄。撫司震悚。珊從容應對。時有開折。天威頓霽。上知珊清慎。每廷宣接膝面咨。至移晷刻。引疾求去。必優詔勉留。命醫賜食。間有慰諭。若家人父子。珊不覺泣下。上亦爲動容。一日珊私懇劉大夏曰。珊老病子幼。萬一客死。異鄉不瞑目。公同年好友。受知主上。獨不爲我一言乎。一日上召大夏議事畢。因問珊病。大夏言珊久病。累疏乞休。本出情實。乞憐允。上曰。渠倩卿奏乎。對曰。珊在告。臣往視。

珊瑚恐微誠不能動天聽。令臣見陛下日。爲彼達情悃。上曰。卿去說與珊瑚。朕以天下事推誠付託。猶家人父子。太平未兆。何忍捨朕而歸。大夏以上語告珊瑚。泣曰。吾不得返家矣。十八年卒於官。贈太子太保。諡恭簡。珊瑚性和粹。顧耿耿不苟合。而洞達無城府。奉職守法。不爲物撓。而意常近厚。祿仕四十餘年。家無餘資。辰入酉出。窮寒暑不變。數歷中外。所至有聲績。學政尤著。

張敷華字公實。安禮人。天順八年進士。父洪進士。爲御史。沒於土木。敷華少有奇氣。里中有竹木爲怪。年年歲卽指麾小兒盡斬去。入翰林爲庶吉士。與劉大夏同出爲兵部主事。歷郎中。大夏醇亮端恪。敷華方毅坦直。並負時名。成化十一年陞浙江參議。景甯有礦盜。衆且議用兵。敷華力請撫。執十二人。寘法。餘悉解散。弘治元年陞湖廣左布政使。會歲大饑。敷華給粟散粥。藥病掩骼。高值來商。卑旦告糴。亟修學宮。資其備直。以業餓者得全活甚衆。三年陞右副都御史。巡撫山西。憂去。六年復巡撫山西。奏增解池鹽課。補藩祿餉。大同多折色。民困。敷華請太原北可車行者致米。八年改陝西。會妖僧據山中爲逆。朝議發兵討之。馬文升曰。張都御史能了此。不數日。敷華果授計山中父老。縛妖僧至。明年陞南京刑部侍郎。十二年右都御史總漕。巡撫江北。盡斥武臣諸貪刻者。時例漕司負算。假銀太倉。稍寬其息。明年來償。償前負。又復假。前後相尾。負益積。敷華曰。下剝上攘。漕是以窘。國貨取息。大非政體。奏勿假。築高郵湖隄。溝殺水勢。又築隄寶應。民賴之。十四年改右都御史。總南臺。與林瀚林浚章懋稱南都四君子。十八年遷南刑部尙書。尋召還北都察院。首請嚴禁奔競貪酷者。上知其名。與劉大夏馬文升戴珊瑚同心效職。一時並稱名卿。

正德元年。瑾矯旨。逐歸田。又明年卒。病且革。儼衣冠。掛家廟。退終正寢。敷華風采。凝重義利。介然學問文章。賞飾吏治。贈太子少保。諡簡肅。

史官曰。孝宗語戴珊曰。朕以天下推誠付託。猶家人父子。太平未兆。何忍捨朕先歸。君臣魚水。情溢乎辭。此與帝歌皋唐何異。讀史至此。未嘗不感慕而三歎也。妖僧事起。朝議發兵。馬文升曰。張都御史必能了此。當此之時。非但君知臣。臣亦知君。臣亦知君。臣亦知君。於乎盛矣。

倪岳周經董軒傳

倪岳。字舜咨。上元人。父謙。正統四年進士。歷陞左春坊大學士。兼侍講。天順元年。晉學士。侍東宮。上大學諸直解。又明年考順天鄉試。勢家子弟不獲倖進。被誣謫戍。開平八年赦還。外艱去。歷仕至南京禮部尚書。卒。贈太子少保。諡文僖。謙常奉命祀北獄。夫人姚夢緋。袍神入室。生岳。因以爲名。岳瓌偉秀異。目光炯炯。望之如神。爲文敏捷。若不經意。天順元年進士。入翰林。爲編修。考校纂綴。精詳安雅。進講上前。敷古義。傳時政。言意凱切。音吐洪亮。上喜。歷陞侍講。至學士。留心世務。經史之餘。凡生民休戚。財計登縮。戎禦利害。無不諳暢。每大廷集議。慷慨持正。論一時儀文古典。軍國重計。多岳裁定。又長於奏議。一寫千言。春容豐達。下至瑣屑案牘。吏人旁候。運筆如飛。成化二十三年。憲宗升祔。詔禮官集議。時耿裕爲尙書。岳侍郎。疏言國朝九廟已備。令憲宗祔廟。議者咸謂德懿僖仁四廟。以次當祔。至太祖爲百世不遷之祖。是知尊太祖而不知太祖之尊其祖也。昔周既追王太王王季。又上祀先公。以天子之禮。國家自德祖以上。莫推

其世則德祖比周之后稷不可說明甚。懿儔仁三祖。以次當禘。太祖太宗爲周文武百世不遷禮也。憲宗升祫。當禘。懿祖一廟。宜於太廟寢殿後。別建藏禘之所。如古夾室之制。每歲暮則奉禘主合享。應古禘祭之制。又有言孝穆太后當祫廟者。下廷議。岳言周姜姬爲帝譽次妃。后稷之母。故周禮有享先妣樂舞。蓋指姜姬。而魯頌闕宮之詩。特見其名。此別廟之證。且唐宋以來。皆有故事可考。如奉先殿儀。奏上詔可。時釐正京師諸淫詞。剔刮諸冗費。議皆出岳手。耿裕方正持大體。禮文事多屬岳。見岳疏稱善。不啻己出。禮科左給事中張九功。少詹事程敏政。又欲改定孔庭從祀諸賢。及七十二子。岳言馬融王弼之徒。其立身不無貶議。然秦漢以來。六經出於煨燼。賴諸儒抱遺經。專門講授。經得復存。自唐之注疏。咸祖其言。而今之經傳引用。尙多其說。何可盡廢。況七十二子名字。自司馬遷以來。相沿已久。今生千百年後。安敢臆定。尋進左侍郎。會災異求言。與尙書共疏。寅畏天戒。七事未幾復。自陳八事。守嶺南。內臣韋眷誘撒馬兒罕。貢獅子。開海道。岳力言南海非西域貢道。禁不許通。斥還貢物。六年代裕爲尙書。內臣韋泰傳召旨。國師領占竹於四川。岳抗言領占竹。僧號法王。淫昏矯僞。上初登大寶。首納諫言。削奪斥遣。傳聞四方。共稱聖德。今復召復。殊駭羣聽。馬文升言成化間累度僧道非便。下禮部議。岳言成化二年度十三萬二千有奇。十二年一萬二千有奇。二十二年二十二萬四千有奇。十年一度。國板日耗。異端日繁。愚耗民財。坐寢民食。宜立嚴科。痛加條革。如文升議便。九年改南京吏部尙書。加太子少保。未幾改兵部。參贊機務。乘正達變。百廢頓舉。十一年清甯宮災。條上修省疏。勸聖學。開言路。減齋醮。省供應。節親藩。懲欺蔽。恤困窮。核名

實疏淹滯。擇將領。節差遣。慎公賞。停工役。斥姦貪。進忠直。恤刑獄等二十八事。十三年召爲吏部尙書。釐正品類。獎恬抑躁。不恤恩怨。正色正言。干謁消沮。或勸岳母別白。賢不肖太過。且召怨。輒撓沮。不得盡行其志。岳曰。冢宰職固如是。岳才學識量。優於經濟。狀貌魁梧。又足稱其志意。於諸卿中。推遜馬文升。至論國事。亦不肯相徇。先是弘治六年。文升言五嶽之名宜從京師。我朝北嶽。乃在京南。乞改北嶽。下禮部議。岳言北嶽恆山。祀曲陽。歷漢至今二千餘年。不可輒改。上從禮官議。昔金世宗時。議者以都燕。請別議五嶽。太常卿范拱言。軒轅居上谷。在恆山之西。虞舜居蒲坂。在華山之北。未常據都改嶽。岳議良是。文升又常言。今天下財力大耗。計無所出。獨蘇松折糴銀價。今宜稍增。以足國用。下廷議。岳曰。東南民力已竭。又復重之。且生變。謂仕其咎。因是得止。十四年卒。贈少保。謚文毅。國朝父子爲學士。翰林。得並謚文。自岳父子始。文集並傳。自王禕後。再見云。岳奏議多不錄。錄其論西北備邊事狀。略云。論事者貴審理勢。酌古今。凡肆夸大。恥雷同。皆非爲國忠謀者也。近歲邊寇毛里孩。阿羅出。李羅。忽亂。加思蘭。大爲邊患。蓋緣河套之中。水草甘肥。易於屯割。腹裏之地。道路曠遠。難於守禦。是以轄於榆林者。若孤山。安塞。安邊。定邊。諸路。轄於寧夏者。若花馬池。興武。高橋。萌城。諸路。皆其入寇之所。迤東則延安。綏德。鄜州。諸路。迤西則環慶。平涼。固原。諸路。皆其騷掠之處。擁衆長驅。遠者逾千里。近者不下數百里。沿邊諸將。或嬰城自守。或擁兵自衛。輕佻者挫衄。怯懦者逃避。既不能折其前鋒。又不能邀其歸路。虜遂源源而來。洋洋而去。進獲重利。退無後憂。取於我者衣食自恣。屢起盜心。處於彼者窟穴旣安。遂無去志。虜勢不輯。邊患不寧。上僅廟慮。

遣將徂征。奈何四年三舉。一無寸功。或高臥而歸。或安行以返。乃析圭擔爵。優游朝行。釐帛與金。充牣私室。且其軍旅一動。輒報捷音。賜予濫施。官爵輕授。殺傷我士卒。悉泯弗聞。撥拾彼器械。虛張勝勢。甚至濫殺被寇平民。妄稱逆寇首級。未常至其敗北。輒以奔遁爲言。未常有所斬獲。輒以鉤搭爲解。考其功籍所載。賞格所加者。非私家之子弟。卽權門之厮養。而骨委戰塵。血膏草野者。非什伍之卒。卽轉餉之民。天怒人怨。禍機日深。非細故也。況夫京營之兵。素爲冗怯。臨陣退縮。反墜邊兵之功。望虜奔潰。久爲虜人所侮。此宜留鎮京師。以壯根本。顧乃輕於出禦。以嬰天威。且延綏邊也。去京師遠。宣府大同亦邊也。去京師近。彼有門庭之喻。此無階楯之嚴。可乎。項兵部建議。遂於宣府出兵五千。大同出兵一萬。併力以援延綏。而不計其相去既遠。往返不逮。人心厭於轉移。馬力罷於奔軼。況聲東擊西。虜人姦態。搗虛批吭。兵家奧策。精銳旣盡。而西老弱乃留於北。萬一北或有警。彼未可離。首尾受敵。遠近坐困。謂爲得計乎。臣又聞軍旅之用糧食爲先。今延綏之地。兵馬屯聚。芻粟之費。日賴資給。乃以山西河南之民。任飛芻輓粟之役。仰關而西。徒步千里。夫運而妻供。父輓而子荷。道路愁怨。井落空虛。幸而至也。東芻百錢。斗米倍直。不幸遇賊。身已去矣。他尙何計。輸將不足。則有輕齋。輕齋不足。則有預徵。嗚呼。水旱不可先知。豐歉未能逆卜。如之何。其可預徵也。至甚不得已。則令民輸芻粟以補官。然媚權貴。私親故者。或出空牒而授之。而倉庾無升合之入。又令民輸芻粟而給鹽。然恃豪右。專請託者。率占虛名而鬻之。而商賈費倍蓰之利。官級日濫。鹽法日沮。而邊儲不充如故也。又朝廷出帑藏以給邊者。歲爲銀數十萬。山西河南之民。輸輕齋於邊者。歲

亦不下數十萬銀日積而多則銀益賤粟日散而少則粟益貴而不知者遂於養兵之中寓其養狙之智或以茶鹽或以銀布名爲准折糧價實則侵剋軍儲故朝廷有糜廩之虞士卒無飽食之日至於兵馬所經例須應付平居之時一日之數人米一升馬草一束追逐所過一日之間或一二堡或三四城豈能俱給哉而典守者陰懷竊取之計巧爲影射之謀凡其經歷之方悉開支給之數背公營私罔上病下莫此爲甚由是觀之賊勢張而無弭之道兵力敵而無養之之實徒委西顧之憂於陛下誰果分憂盡心效力乎採之建白察之議論則又往往紛紛據指掌之圖肆胸臆之見者率謂復受降之故險守東勝之舊城則東西之聲援可通彼此之犄角易制是非不善也第二城之廢棄既久地形之險易未知況欲復城河北以爲之守必須屯兵塞外以爲之助出孤遠之軍涉荒漠之地輻重爲累饋餉爲艱彼或佯爲遁逃潛肆邀伏或鈔掠於前踞襲於後曠日持久露行野宿人心驚駭軍食乏絕進不得城退不得歸一敗塗地聲威大損其有懷敵愾之心馳伊吾之志者率謂統十萬之衆裹半月之糧奮揚威武掃蕩不規使河套一空邊陲永靖是亦非不善也然帝王之兵以全取勝孫吳之法以逸待勞今欲鼓勇前行窮搜遠擊乘危履險徼倖萬一運糧遠隨則重不及事提兵深入則孤不可援況其間地方千里緜亘無際旣無城郭之居亦無委積之守彼或往來遷徙罷我馳驅或掩襲衝突撓我困憊邊虜安望於成擒中國復至於大創失坐勝之機蹈覆沒之轍必矣至有欲圖大舉以建奇功者謂必窮□州之衆除朵顏之徒乘勝而西遂平河套夫祖宗之於□州朵顏諸衛不過羈縻保塞以固吾圉今若是將使虜人生心藩籬頃壞遺

孽難盡。邊釁益多。是果何知。誠爲無策。甚者至謂昔以東勝不可守。既已棄東。損今之延綏。不易守。不若棄延綏。則兵民可以息肩。關陝可以安枕。夫一民尺土。皆受之於天。於祖宗不可忽也。向失東勝。故今日之害。萃於延綏。而關陝騷動。今棄延綏。則他日之害。鍾於關陝。而京師震動。賊逾近而莫支。禍逾大而難救。此實寡謀。故爾大謬。嗚呼。一唱百和。牢不可移。甲是乙非。卒莫能合。成功既鮮。高談奚取焉。臣所尤不滿者。徒以書生典兵。謂詢謀爲無益。乘人言而不顧。謂專斷爲無傷。執己意而不回。處置乖方。指揮失義。若向之圖復西戎。既爲苟且之舉。已指威而失信。近之議制南夷。復倡隄備之說。以啓釁而示怯。遠居中制外之權。昧以大字小之體。推是以往。其他可知。徒使下弛兵機。上墜國紀。又皆此輩舞文之過。重貽後時。噬臍之悔者也。故以臣論之。不若卽古人已用而有成。及今日可行而未盡者。舉而措之。其爲力也少。其致功也多。曰重將權。以一統制而責成功。曰增城堡。廣斥堠。以保衆而疑賊。曰募民壯。去客兵。以弭患而省費。曰明賞罰。嚴間諜。以立兵紀而覘賊情。曰實屯田。復漕運。以足兵食而紓民力。其論邊漕略曰。今關陝所需。皆山西河南所給。而三方之地。俱近黃河。其間雖有三門。析津。龍門之險。然昔漢唐糧餉。由此而通。卽今鹽船木筏。往來無滯。且以今戶部所計。山西米豆。必令運貯榆林。及保德州縣諸倉。河南米豆。必令運貯潼關。衛及陝州諸倉。其諸州衛地。皆瀕河。可通舟楫。踵往古故跡而行。免當今陸運之害。公私之利。奚啻萬萬也。況今河道。當潼關之北數十里。接連渭河。可通陝西及鳳翔鞏昌。渭河西流數十里。接連洛河。可通延安。及北上源。可通邊堡。渭河西流三百餘里。接連涇河。可通慶陽。又龍門之上。舊有小河。

徑通延綏。儘加修濬。必可行舟。此宜簡命水部之臣。示以必行之意。相度地形。按求古跡。某處避險。可以陸運。某處可建倉以備倒運。某處可造船以備裝運。淤塞悉加導滌。漕河務在疏通。毋憚一時之勞。而失永久之利。如是則不但三方之困可紓。雖四方之物無不可致矣。

周經。字伯常。陽曲人。天順四年進士。父瑄。字廷玉。宣德乙卯舉於鄉。初爲刑部主事。歷官南京刑部尚書。致仕。瑄寬大詳雅。修髯長身。善議論。守官廉。故鄉無田宅可歸。寄家江陵。卒。諡莊懿。贈太子少保。經歷官翰林。至春坊中允。侍孝宗東宮。講文華大訓。東宮每起立拱聽。內閣言太子勞。經宜跪請東宮坐聽。經不從。弘治二年進禮部侍郎。條奏傳經議。改吏部。靈壽姦民以其縣山水之間曰大明川。民田獻太監李廣。戶部執議不得允。經會諸司奏。覓奪田歸民。八年諸大臣以災故上言。屬經草疏。請早視朝。勤聽政。節侈費。省遊幸。止貢獻。斥樂戲。語甚切直。頗傳蹤跡。此疏出。誰耿裕曰。疏名首吏部。裕實具草。經又曰。疏草本出經。卽有罪。罪經。王卒不問。十年陞戶部尚書。凡諸上請河湖稅錢。執不與。中官出南京織造者。請長蘆鹽八千引。粥兩淮。准給鹽銀二萬兩。又執不與。中官織造浙江者。請諸竹木稅。又執不與。上說經言。併停織造。大同缺戰馬。文升請出太倉銀市馬。經言糧馬各有司。祖訓六部不得相壓。兵部輒侵戶部官。非祖訓。上是其言。更命太僕銀市馬。給事中魯昂言。國用不足。請盡括諸省稅役金錢。輸太倉。經曰。國用不足。宜儉於國。不宜股於民。織造賞賚醮土木費益廣不節。乃欲括天下財。盡歸京師。給事中言非是。上從之。中官傳旨。取太倉銀三萬兩爲燈費。經又執不肯發。內靈臺奏增灑掃卒。當給月廩。經再疏。竟不與。修

清甯宮議調役山東七千人。經曰：山東歲歉，民貧，不可輒動。請以戶部羨銀催役。壽甯侯家有賜田，河間數百頃，詭賜額，并得旁近民田，又千餘頃。又乞畝加稅二分。經曰：河間地多沮洳，歲無常收。頃因久旱，卽耕退灘，一遇淫雨，遂成溝壑。苟指目前，輒增畝稅，貽累貧民，轉爲流徙。且王府賜田，畝稅二分，外戚不得獨優。又聞憲宗妃家私田，與民田比，一切還民。壽甯侯家不宜獨異。疏三四上。會雄縣有以退灘地獻爲東宮莊者，上念經言，擲其奏抵罪。十三年致仕。武宗卽位，起南戶部，薨去。正德三年，又起禮部，卒。贈太保。諡文端。經初在清散幾三十年，編摩校閱，有文章名。及授政務，守正應變，制裁不滯。屹然有古大臣風。童軒，字士昂，故鄱陽人。父碧瑄，以精天官學，占籍南京。欽天監軒幼穎敏，讀書過目成誦。以景泰辛未進士，拜南京吏科給事中。軒思舉職，深居簡出，不妄與物接。常上疏言省冗員、公考察、倡武勇、擇師儒、杜倖進、恤京民。又言南京糴貴，民饑，請命官賑之。俾御史體察，多見採納。時詔南京守備採辦翠毛魚魷諸物，以萬計。軒極言止之。英宗復辟，覽軒奏，嘉其敢言，尋上疏言弭盜安民數事，尤切時弊。天順己卯，以嫡母艱歸。服闋，改戶科給事中。癸未，同考禮部會試，得倪岳輩十數人。時稱得士。憲宗踐祚，軒首上疏言帝王之治，當知本末。隆聖德，用賢才，納忠諫，愛小民，謹邊備，本也。而簿書刑名，其末也。願時行儒臣，講求祖宗謨訓，及古帝王修身用人之道，推而行之。則聖德隆，命在廷三品大臣，歲舉堪任方面一人，且嚴連坐之法。進用大臣，亦召三品大臣於便殿，各舉一人，不當者科道糾之。則賢才用，臺諫之言，賞其直，貸其過。則忠諫納，養民之政，在戶部。凡奏報災傷，卽加優邊。則小民安。多方求將，歷試所長。文武有犯，輸粟於邊，則

邊備謹。上優詔褒美。並下諸司舉行之。軒又言漕河爲官舟所阻。請命大臣督其事。仍乞省貢舟而嚴禁之。未幾四川盜作。命軒往撫。軒至。徧歷賊巢。宣布恩威。諭以禍福。賊首王應高等聞軒名。羅拜乞生。悉慰遣之。夏六月。進都給事中。會賊首趙鐸悍不聽撫。旅復叛去。軒偕鎮巡三司分兵勦撫。躬冒矢石。斬獲無算。凱還。蜀人繪班師圖紀焉。明年夏。四川巡撫言賊勢猖獗。委咎於軒。且議出師。軒曰。賊已平。奚用出師。不數日。捷奏果至。猶坐言者謫。浙江壽昌令。成化五年己丑。入覲。上疏自理。廷議以爲寃。於是禮尙書姚夔。薦改軒僉事。督雲南學政。軒精於考校。隨才造就。士風爲變。撫按交章薦召。拜太常寺少卿。以世業天官。掌欽天監事。軒嚴考天文諸生。公僚屬之薦。省麻紙之費。夙弊一清。己亥。夏。進卿。仍掌監事。教諭余正己。奏言麻法之差。上命軒與之考論。不合。軒上言歲差置閏。其來已久。我朝考麻制象。尤爲精密。雖日月薄蝕。不無先後晷刻之殊。分秒多寡之異。則以土有南北高下故耳。正己乃謂天地有自然之冬至。以置朔望置閏。皆非人力可爲。是不知古人以數求天之術。顧以小智亂成式。宜下之吏以正其妄。從之。復正天下陰陽官納粟免考。非制。十九年癸卯春。予告歸。日蕭然一室。非知舊不輕接納。縉紳重之。弘治元年。會欽天官以不職罷。衆復以軒薦。命軒仍掌監事。夏六月。日有食之。軒言日食紀元之初。當盛夏火旺之候。宜修身窮理。進君子。退小人。以謹天戒。尋辭掌天文。舉吳。吳。張紳。高鍾。自代。是冬。進右副都御史。提督松潘軍務。兼巡撫。時蜀歲祲。軒首舉荒政。設粥以待餓殍。給糧以歸流移。平訟以決久禁。先是久旱。軒至。雨亦隨足。乃爲禁令三十餘條。皆安邊保民之政。復以南路鎮番一帶。若蠻夷出沒。歲減軍糧備犒賞。非

計。奏以四川官帑銀布代之。戎卒乃安。軒復以其地險遠。蠻夷雜居。疏言松茂威疊戍邊甚艱。而疊溪一路尤甚。宜調兵設衛。令一都指揮守之。四處要路。各設一倉。以便轉輸。令一布政司官督之。復言沿邊衛所州縣。皆在萬山中。關堡與蠻夷共。有害而無利。宜捐松茂中羊腸一線之路。則關堡倉廩可減。兵無遠戍之勞。民省轉輸之苦。蠻有坐困之機。凡八害三利。畫一以聞。事下所司議行。常創兵器。給諸關堡。爲禦虜具。薦按察使林浚可大任。時論黜之。辛亥。晉南吏部右侍郎。甲寅。夏。進南禮部尚書。累疏乞骸骨。上再四勉留。軒力陳數千言。謂朝廷大政。闕門一議不足決。是非宜如古公卿大夫各得獻議。以俟采擇。未幾以疾卒。贈太子少保。軒身若不勝衣。強學好問。至老不倦。爲文淵博雄麗。詩有唐人體裁。書學遒勁。見者寶藏之。性孝友。事嫡母備極色養。分祿以贍兄嫂。撫親屬皆有恩。平生喜賑人之急。而自奉疏食水飲。泊如也。刑尚書顧璘作鄉正篇。以訓士。云公擇地而蹈。擇言而出。吐辭濡翰。必軌其方。慎哉。願乎。君子以爲知言。所著有清風亭薰枕肱集。海岳涓埃論。蜀藁籌邊錄。夢徵錄。各若干卷。

史官曰。倪岳通達國體。曉暢邊務。指畫時弊。一瀉千言。晁賈之流也。要其大指。如伐病療饑。歸於適用。與表餌請纓者遠矣。周經審諤有執。持正敢言。童軒條奏懸河。能議能任。幸遇明主。得行其志。殆邦之司直乎。

石瑄傳

石瑄。字邦彥。藁城人。少博雅穎悟。通周易。與兄玠齊名。先是皆舉鄉魁。同登成化丁未進士。時稱二鳳云。

瑤選庶吉士除檢討弘治初以纂修憲宗實錄成進修撰侍經筵爲講讀官賜金帶四品服正德改元進侍讀學士掌南院時士風漸漓瑤憤嫉作媒說以諷己已陟國子監祭酒潔己好修士類信嚮會閣瑾用事以勵精爲名常令監生查對軍冊有患病不容給假瑤力寬之又令曬晾黃冊有不至者輒行典簿廳取供令其每夕畫西瑤以祖宗成憲不敢擅改答之明年召爲北監祭酒癸酉晉南吏部右侍郎尋調禮部右侍郎又改左侍郎兼翰林學士十六年辛巳陞禮尙書掌詹事府事嘉靖癸未代王瓊爲吏部尙書每銓輒以職名書片楮爲丸納袖中探而出之囑託不行時柄臣不悅僅兩月解去吏部遂以尙書兼學士仍掌詹事府事甲申夏五月命兼文淵閣大學士入內閣預機務乙酉夏六月加少保兼太子太保進武英殿召平臺煖閣議廟樂再議廟衛又議章聖太后皇后謁世廟儀瑤守己見力爭上謂其非通儒遂忤旨六年二月致仕尋卒加少保諡文隱瑤清修無玷毀譽不撓持論堅確不避夷險稱其爲文初喜法古後頗嗜莊列在南監時取多奇崛文體爲之一變癸未復主會試所作錄文乃更醇雅人固莫能測也兄玠累官戶部尙書

史官曰鄭曉曰瑤秉銓清勁不悅於楊廷和數議大禮乃不肯負廷和自瑤去國而吁咈之風微矣

楊廷和毛澄蔣冕毛紀傳

楊廷和字介夫四川新都人父春進士爲湖廣提學僉事廷和成化十四年戊戌進士改庶吉士授檢討弘治二年歷修撰陞侍讀九年進左春坊左允中十六年陞左春坊大學士兼侍講學士十八年陞少詹

事兼學士。正德元年進詹事。仍兼學士。二年陞南京吏部右侍郎。初武宗御經筵講書故事。講書義畢。必獻規諫語。是日廷和同學士劉忠講罷。上謂閣瑾曰。經筵講書何故增若干支語。瑾奏曰。此二人當打發他南京去。乃陞二人南京侍郎。是時南京無缺。皆添注。五月陞南京戶部尚書。十月改戶部尚書。兼文淵閣大學士。入閣辦事。三年八月加少保。兼太子太保。五年二月改吏部尚書。進武英殿學士。尋加少傅。進謹身殿。七年加少師。進華蓋殿。九年正月奏請視朝。御經筵。及罷邊兵。西僧市肆諸事。上以早朝深居。在朕目處。經筵昔有成規。邊兵何必議罷。市肆常理。西僧舊制。俱不必動。十年二月疏請重視朝。嚴宮禁。三月以憂去。十二年服闋。大學士梁儲請遣行人起廷和復入內閣。而已遜居其下。十二月上巡邊。廷和言北虜不時出沒。正統末年可爲明鑑。不報。十三年六月上復議北征。廷和諫萬乘不宜輕出。上又自稱威武大將軍。令內閣草敕。廷和等又諫。俱不聽。十五年廷和同大學士毛紀上疏。謂大祀之禮。行在正月。社稷之祀。舉在仲春。孝貞皇后大祥在二月二日。禮應即時耐廟。今俱改卜至再。天下朝覲官員。吏部考察上請。未奉定奪。各官離任既久。政務悉廢。殿試進士亦已踰期。自去秋聖駕南行。至今八月有餘。在京在外各衙門題奏。俱未蒙發。伏望亟賜班師還京。舉行前項大禮。并各衙門題奏文書。不報。十六年三月武宗不豫。廷和等密請太后懿旨。誅江彬。籍其家。會世宗將至京。廷和奏由東安門居文華殿。上箋勸擇日登極。上命從行殿受箋。由大明門入。日中登極。初儀制郎中具儀注途啓。上謂長史袁宗皋曰。遺詔以吾嗣皇帝。非爲太子。此所具儀何謂也。命議興獻王主祀稱號。尙書毛澄請之內閣。廷和檢漢定陶王宋濂

王事授之曰是足爲據。異論者謂其爲姦邪當斬。七月進士張璠疏論繼嗣不同。力詆朝議之非。上令送
至內閣。廷和曰秀才焉知國家事體。復持入。頃之召廷和等入。諭曰至親莫如父母。因授以手敕曰卿等
所言俱有理。但朕罔極之恩。無由得報。今尊父爲興獻皇帝。母爲興獻皇后。祖母邵氏爲康壽皇太后。以
伸朕爲子之情。廷和等退而上言。禮謂所後者爲父母。而以其所生者爲伯叔父母。蓋不惟降其服。而又
異其名。臣等不敢阿諛順旨。仍封還手敕。既而御批復加興獻帝后皇字。廷和等復封還御批曰若加皇
字。是忘所後而重本生。任私恩而棄大義。臣等不得辭其責矣。願罷歸。上曰卿等所言皆大義。朕奉昊天
至情。不必拘於史志。可勉錄皇號。廷和等倡九卿翰林科道連章劾張璠等邪說。乞罷斥。不報。嘉靖元年
壬午春以翊戴功。加伯爵。廢一子爲錦衣衛指揮使。辭免。仍加錄廢。二年二月加少師。十二年考滿。奉手
敕。楊廷和輔翊朕躬。勤勞懋著。特加太傅。不拜。三年二月以議大禮忤旨致仕。後削籍爲民。先是劉忠與
廷和偕南。忠曰此行別瑾否。廷和曰事已如此。再趨見人。必謂我輩交瑾矣。忠不往。廷和以錦幣辭。後瑾
乃厚廷和而疏忠。人謂其賣友。隆慶初詔復其官。賜祭葬。諡文忠。子慎。正德辛未廷試第一人。以議禮謫
戍。自有傳在文學。

毛澄字憲清。崑山人。弘治六年進士第一人。方正端毅。有濟務才。初授修撰。預修大明會典。陞右諭德。充
東宮講讀官。又預修通鑑纂要。進右庶子。兼侍讀。賜金緋。武宗卽位。預修孝宗實錄。瑾惡之。矯奪其官。仍
侍讀。尋進侍講學士。正德十二年爲禮部尙書。澄在部持正守典禮。不與諸貴倖通存謝。恭默靖慎。諸貴

倅亦不恨澄。武宗崩，奉昭聖皇太后旨，偕大學士梁儲、駙馬都尉崔元壽、甯侯張鶴齡、章太監、邵皇親、迎世宗於興邸，以功敕廕子一人。世錦衣衛指揮同知，辭充副總裁，修武宗實錄，未幾大禮議起，澄守濮議，請以益王子崇仁王子後獻皇帝，上不從。章聖太后至，請由大明左門入，又不從。會議所生，不得稱父母，卽不得帝后其所生，又不從。上不喜，或又勸其將順者，霍韜再移書，謂今日主濮議非是，澄不從。嘉靖二年三月病，請致仕，加太子太傅，令屬吏護行，至興濟卒，贈少保，諡文簡。澄心術平夷，學識涵正，狀貌抑抑謙恭，正是非義利禍福，確乎不可拔也。

蔣冕，字升之，廣西全州人。十四應鄉薦，又十年而成進士，改翰林院庶吉士，授編修，遷侍讀，改右中允，進左春坊左諭德，兼侍讀，以母憂歸，還爲侍讀學士，進少詹事，仍兼侍讀學士，遷吏部右侍郎，轉左侍郎，爲禮部尙書，改掌詹事府，入東閣理誥敕，進兼文淵閣大學士，加太子太傅，武英殿大學士，滿三載，授光祿大夫，柱國，尋進加少傅，太子太傅，戶部尙書，謹身殿大學士，冕在翰林久，最名有學行，清修自好，而無所見，其入內閣，值上多出巡幸，留連塞外，不肯還京師，冕與楊廷和、梁儲、毛紀疏請，前後以十數，皆不聽。冕乃自爲疏上之，其言尤危切，上不之省，亦弗罪也。既南征，冕與梁儲扈從，以時請迴鑾，上所從倡樂遊讌，雖不能諫止，亦不肯依阿，而是時中官張永、張忠與都督江彬、許泰，挾上寵勢張甚，然不能親疏冕，以是望實頗歸重，而武宗屬疾崩，冕與廷和合謀捕江彬，與商略詔草，有社稷功，世宗自興邸來，論封伯爵，力辭至五，乃改廢錦衣指揮同知，及五品京職，皆世襲，復辭，冕故推重，廷和既相得，懽甚，而冕尤耿介，抗顏

執諍侃侃有大臣體。兵部右侍郎吳廷舉者。其鄉里同年厚友也。有所建白。冕迂之。遽上章謂冕在先朝不能格君心。不稱輔導。冕甚。因盡暴白其所上疏。而謂廷舉爲睚眦。詆訶故舊。斥之。南人兩病其隘。然廷舉更累進秩。冕弗問也。其所持追崇興王禮。既雅與廷和合。而朝議因之。廷和罷。上遣中官織造。尙未具草。冕卒不肯具草。上責之。引咎而已。因移病不出。上優詔強起之。再三乃出。時上欲崇獻王及母妃。得張璉桂萼等疏。益決。雖勉稱本生父母。欲立廟於奉先殿側。禮部議不合。則罷。尙書汪俊以怖冕。既與同官力諍。復獨疏言其不可。因乞休。優詔不允。乃降詔本生皇考曰恭穆獻皇帝。本生母曰章聖皇太后。冕益不自得。復上疏乞不與議立廟。而以骸骨歸。上責之。然猶備大臣禮。略如廷和。錄一子錦衣衛指揮同知。給事御史皆請留冕。不報。冕去。毛紀爲首輔。距其代廷和止兩閱月。歸未幾卒。年七十。贈太保。諡文定。毛紀字維之。掖縣人。少惇敏好學。二十四舉山東鄉試第一。明年成進士。改翰林院庶吉士。授檢討。滿九載。進修撰。充經筵講官。俄侍東宮講讀。修大明會典成。遷侍讀。武宗卽位。進左春坊左諭德。丁父憂歸。服除。閔瑾恨之。奪左諭德。復爲侍讀。孝宗實錄成。進侍講學士。尋爲學士。權戶部右侍郎。遷禮部左侍郎。母憂歸。服除。改吏部左侍郎。進禮部尙書。時遣中官使西域。齎番僧供。紀力爭之。不報。亡何兼翰林院學士。掌詹事府。入東閣理誥敕。賜玉帶蟒衣。尋兼東閣大學士。直文淵閣。預機務。加太子太保。進文淵閣。上以宸濠反。欲親征。紀與楊廷和等泣請留。不得。遂同廷和居守。滿三載。進少保。改戶部。進武英殿階光祿大夫。勳柱國。武宗崩。紀與廷和等合策迎興世子。及捕誅江彬等。世宗卽至。與蔣冕俱同知經筵事。充武宗

實錄總裁論功賜封伯爵力辭。改文武廢襲。復辭以一品六載滿。改吏部尚書。謹身殿大學士。時追崇興獻帝。敕諭甫下。而上復入張璫桂萼等言。驟遷其官。下禮部議。稱孝宗爲皇伯考。獻帝爲皇考。與聖母俱去。本生字。禮廷執奏不聽。令具儀聞。於是詹事府翰林院給事御史部屬百餘人。各上疏爭之。上大怒。逮爲首者下詔獄。紀乃與大學士石瑋復伸其說。報聞。於是紀移疾乞休。優詔留之。當上聖母冊時。大臣多不至者。上益怒。會紀扶病入朝。有旨捕繫言事諸臣。他待罪闕門者尙衆。人情洶洶。紀乃上疏請乞少霽天威。急收人心。上使中官諭數紀朋姦背君。紀乞休益力。上責而許之。其恩禮猶視蔣冕。紀之代蔣冕亦僅三月。廷和子翰林修撰楊慎。以倡僚窳伏闕慟哭。杖之數十。幾死。謫戍雲南之永昌。又三載。璫萼益貴用事。所撰述明倫大典成。下詔罪狀廷和。謂自詭門生。天子定國策。老法當僂市。削職爲民。蔣冕與紀俱冠帶閒住。明年廷和卒。又三年冕卒。紀歸老。無恙。爰恩詔得復官。年八十。命撫按官卽家以幣彩牢醴慰勞。又年卒。贈太保。諡文簡。紀無子。家貧甚。

史官曰。世宗大禮之議。論忠佞。則楊廷和蔣冕毛澄毛紀及伏闕得罪諸臣。皆忠也。張璫桂萼霍縉等之附和佞矣。論則爲人後。爲子之說。與繼統不繼嗣之辨。皆是而皆未是也。孔子曰。必也正名乎。名失則愆。父父子子。君君臣臣。皆名之至大。而不可易者也。考孝宗而不考興獻。非名矣。帝興獻而后興國。可謂名乎。以父子還興獻。必當以君臣還孝宗。乃稱考不已。尊之曰帝。稱帝不已。益之以皇。必欲耦列宗而后已。徇私恩而忘大義。則璫萼等長君逢君之惡。不可蓋也。善乎席書之議曰。舜繼堯統。未聞不以瞽爲父。禹

繼舜未聞不以鯀爲父。然舜禹雖父其父未嘗尊其父爲帝。此萬世大公案也。稱曰皇帝與獻王。則君臣父子之名皆正矣。廷和等不知出此。徒執定陶濮王之議。言不順矣。使小人得乘瑕蹈隙。肆其辨博。以遂其阿私。此皆不學無術之過歟。



著者(清)傅維麟編纂 書碼 626.01
Author Call No. 7567

書名 明書 一百七十一卷：九
Title

登錄號碼 007889
Accession No.

月日	借閱者	月日	借閱者
Date	Borrower's Name	Date	Borrower's Name

國立中央圖書館

書碼 626.01
7567 登錄號碼 007889

國立中央圖書館



0007889



1

音